

國家文物局

清代傳記叢書



明文書局印行

清代傳記叢刊·綜錄類⑦
周 駿 富 輯

國朝耆獻類徵初編

(三)

五卷二二九至
三三七

(清)李桓輯



明文書局印行

國朝書獻類徵初編卷二百二十九目錄

守令十五

王承曾

徐時作

王植

伍澤榮

弟澤梁

陳世俊季弟世隆

貴金馬

孫逢甲
夏志京

陳梯子在瓊
陳長鈞

顧世珍子昌運昌述

邵建徵

鄭鼎勳

楊一正

王時翔

汪灑

睦文煥 蔣鳳色

周中鉉

楊稷

王裕疆

李方膺

左基

王夢弼

吳開

程密

國朝名臣奏議卷之二十一

補錄

王時翔

國朝書獻類徵初編卷二百二十九

通奉大夫前署江西巡撫江西布政使司布政使湘陰李桓輯
守令十五

王承會

古期喪皆得去官持服賈遠以祖父戴封以伯父章義揚仁以兄
謙元以弟陳重以姊輕組綬而重喪服具得以伸其哀明洪武定
承重祖父母丁憂之制 皇朝乾隆詔令遇本生親喪得離任持
其所降服所以教天下以孝曲體人子之哀思俾風俗駸駸復古
民德歸厚也十七年河南武陟令王君官穀以本生父梅川府君
憂去官服喪服稽顙乞予文以表墓予於君爲同年友君以爲人

後不得持三年喪貌黝然哀毀義不可以辭按狀府君諱承會字
嗣徽梅川其號系出太原由茂陵遷醴泉副康熙甲午鄉榜雍正
甲辰舉於鄉丁未以會試明通榜授岐山教諭六年考最中丞碩
公薦升甘肅崇信令乾隆丙寅攝高平甲子爲皋蘭武關參詳官
戊辰以疾致仕今年七月九日終於籍享年六十有七文思夙敏
瞻所著有克己集蠡測集游洪堰小草三龍集芮谷集藏於家其
令崇信也地故瘠民貧且愚男女不知耕織乃規度城北汭河夾
岸可營水田捐工勸墾開引水渠灌稻畦百頃餘歲收豐稔又刻
紡織圖說製百紡車散民間教之婦功民衣食以饒初居民市瓜
蔬率遠走得之涇州平涼吉貝之布值等紈帛不兩年諸物充物

他邑且駢集趁虛雜樹陰濃蔚然映城坳廬舍嚴保甲境內厖不
夜吠禮教聿興絃誦之聲戶接進膠庠士導以修行明經口洮洮
不倦如司教岐山如家居爲文社師如爲邑書院山長時士風大
振崇信歲歉代輸民賦千金眾歡呼且雨泣聽事必據誠感動訟
以平攝高平亦如之中間中丞黃公特列薦牘格不行總制尹公
特器重謂可御史未及薦移節去上官同寮交口稱碩人長德鄰
境涇州靈臺被波潤躋堂頌祝謝政後數年舊民猶自其邑詣門
羅拜對涕洟戀戀若赤子慈母之不忍捨嗚呼此豈可倖而得之
與會祖諱九牧前明進士官曲沃令祖諱蔭啟考諱孫璋諸生妣
張氏官教諭時得地 贈娶汪氏以冑穀前令臨漳得 封如本

階子三長卽冑穀出爲後癸丑進士官縣令次冑構監生早卒次
冑穫監生女一孫一孫女四冑穀所後祖考諱孫璋三娶元配張
氏繼李氏繼劉氏劉太君年十九而寡無可後待十餘年而冑穀
生撫爲嗣孫得 天旌五世祖妣閻太君祖妣張太君並守苦節
得 旌載省邑誌人云王氏三世貞節云曲沃公釋賈大司馬漢
復爲諸生時冤獄官軍圍醴泉公縋城見大帥辨白賈大司
馬亦疏散一城民賴以全闔賊入關不污僞命被榜掠索餉尋知
公清介義釋之其家世濟美有自來矣夫爲善無不報貞節之後
忠孝之門率多光昌府君爲吏開衣食之源大興教化厥功懋焉
冑穀仕遵治譜闢養堂迎事於鄴之治所居喪不以降服減悲哀

於以見府君之光裕時隆事皆足以爲俗之勸也乃表於某原之
阡使觀者興起焉

右墓表桑調元撰

徐時作

建甯筠亭徐君與余爲鄉會同年友已而出莅州縣宦成名立年未及艾遽引告歸歸三十餘年其孫家恆以君書至蘇州謁予索予文介君八十壽予因得讀君所著書並悉君生平行事越一年而君之族人以赴至發之得家恆書具行狀乞銘君之墓予旣重君之爲人又以家恆請弗克辭按狀君諱時作字鄴侯世居邵武建甯縣祖中安父必藻皆 贈奉直大夫祖妣鄒氏妣余氏皆贈宜人君八歲喪父少長能自厲於學家貧從諸戚友借書鈔之一日讀范文正公集慨然慕之曰諒爲丈夫當如是矣雍正四年舉於鄉明年成進士居四年選知直隸成安縣又二年調邢臺四

年調清苑一年餘升開州又二年調滄州以太且人老乞養歸君
爲政灼知人情因其欲惡而除布之謹持大體不撓於私不屈於
勢其所至民咸安之初任成安清河邨舊爲漳水所侵多荒地淨
糧折銀三百餘兩責居人歲償之四十餘年矣君造魚鱗冊履畝
以量釐其隱者而豁其荒者田賦平在邢臺有韓德者以符水治
病有驗居民信之母死葬西山送者眾營官以邪教聚眾白制府
飭太守調兵急捕之太守以告君君曰西山民頗愿決無事請單
騎驗之遂往毀其墓廬以德歸白制府予杖責而已未幾任縣民
亦有以邪教逮者相牽入獄者二百人多自斃太守嘆曰吾今知
民命之縣於令也微徐君西山之民殆矣其調清苑也甫至會大

水放賑常平倉穀半紅腐制府欲令屬吏蠲俸補之君力言不可制府怒厲聲色訶君君不爲動徐起趨出翌日召君入謂日子言良是行別籌之制府者李公衛也已而李公告其屬曰是人乃敢逆我異哉清河道貴倨使氣好譽人君抗言折之亦默然而屈已而李公卒孫文定公代聞君彊直特疏薦焉其在滄州時清戶籍申鄉約旗兵當春乏食以倍息貸民間粟君請於上官發官倉以貸免其息他所至修學宮新諸祠宇愛護諸生始終未嘗笞一人以事至者曲爲導諭而已君旣去官而邢臺民思君尤至建生祠歲時致祭不絕蓋君之施於官者如此君在家以周官六行爲鄉人倡置祭田千畝兄弟三人授田各數百畝宅各一區又爲族

人置公田三百畝已而卽縣中倡建濰川書院立學約資諸生膏火復以赴鄉會試者苦道里費倡興賢會設誠鼓勵風動鄉里數年間積田至三千畝他所捐以濟眾者先後約金數萬計平居節縮衣食倉中積穀率萬石穀貴則平價糶以是建甯貧郭民無凶年憂君之施於家者如此古之嗜退者動曰貴不如賤富不如貧予謂不然富如君斯可以富矣嗇於己而豐於人不距其至而不匱於施古之善取予者蓋如斯矣且以君之善於其官知其取之之有道也知其決不至瘠民以自肥也富與貴又足爲君累乎君所著崇本堂詩文集及諸記錄共數十卷卒年八十有一爲乾隆四十二年某月日將以某年月日葬於縣東北山之阡配余宜人

先君四年卒今合窆焉子八人光英太學生光義縣學生光達光
顯俱早殤光美光義例貢生光善府學生光朔女子四人長殤一
適太學生邱洪紀一適縣學生康誥一未字孫男五人長卽家恆
廩貢生次家泰縣學生次家升家豫其一早殤會孫三人顯璋顯
琮顯璠銘曰

我所思兮灘之陽嗟三十年半行藏北山有宅君所藏銘斯墓兮
永不忘

右墓誌銘彭啟豐撰

公諱時作字鄴侯號筠亭其先系出漢季徐孺子後宋時由撫州
臨川遷居福建甯縣西九十里曰小嶺下後又遷縣郭之北故

世爲建甯人公八歲失怙卽能自勵於學稍長母余太宜人與伯兄時伯內外交督教之學益勤家貧無所得書則從諸戚友借書手自纂錄誦讀之一日讀范文正公文集考論其行事慨然歎曰讀書人宜如是也自是立心制行一以文正爲法雍正丙午舉於鄉明年成進士漳浦蔡文勤公欲保舉任京秩以願歸家更讀書辭焉居四年選知直隸之成安縣又二年調邢臺又四年調清苑任清苑一年餘升開州又二年調滄州在滄州一年以太宜人年高歸養是時公年方四十九公爲政以人心風俗爲本順民之所欲而興革之所至則修學舍葺忠孝節義諸祠以風厲眾庶聽獄訟立時審決庭無留獄暇則與士子講論學業在官十二年未嘗

辱一士卽有敗行者以至誠訓誨之俾自悛改而已故公所至士民咸安之去則謳思而追慕之建祠勒碑以志遺愛不能忘也初任成安前署令蕭夢簡以平糶爲制府所劾坐以侵蝕追贓賠償蕭實貧無所得贓顧已誣服矣縊於獄至是委公覆審公審得其實不得已委曲爲輕其贓而代之賠償更資送其母子還鄉同官悉感歎焉邑清河村爲漳水所侵有棄地浮糧條銀三百餘金舊業戶受賠累者四十餘年公爲清查地畝編造魚鱗清冊按畝徵收舊戶免賠累而徵額亦得不廢在邢臺民有控牧羊戶盜其羊者公憫牧羊戶之貧而老薄責之控者不能平復愬之府已而其人以符水治病母死送葬多人武弁謂是邪教聚眾密報制府調

兵嚴捕之公力爲昭雪民以無事龍泉寺奸僧與其徒爭產銜恨積年募得游方僧二人戕殺之抉其目先是其徒占廣東流民地涉訟公旣審而杖之矣至是得其死狀僧眾又羣訟流民公廉得其實遂捕游方二僧決讞而置奸僧於法其矜察冤獄多如此又嘗力請豁免水衝沙壓地畝銀之累民者凡二百二十餘兩此皆刑臺政績之尤卓卓可紀者其調清苑也屬保定首邑甫至會大水放賑而常平倉粟半朽腐制府欲派屬攤補公力爭以爲不可制府初不然其言卒乃賢之爲別籌焉又以白事忤監司意不少屈是時制府宮保李公衛也已而李公薨合河孫文定公代其任賢公抗直特疏薦升知開州治開州二年除盜安民民以甯謐時

桂林陳相國文恭任天津河道札詢公時政緩急公陳四事曰清保甲禁游惰比經捕嚴防守文恭皆善之滄州當水陸要衝風俗驚悍旗兵與民錯雜處夙號難治公至去刻覈之政清戶籍詢疾苦申鄉約禁健訟民用肅然旗兵當東作之時常乏食倍息稱貸於富戶公請發倉粟按口借給秋收還倉不加息歲以爲常旗人咸德之公是時政聲日起當道亦雅知公公得行其志駸駸可大用矣顧自以居官久心力交瘁須髮皆白且日念太宜人思得侍養於是遂告養而歸云公仁孝性成篤於倫理周於三族於朋友故舊懇懇如也尤軫念寒士常思委曲以周卹之初在官之日已節縮廉俸次第置遠祖祭田數百畝近祖義田千畝而勘室廬以

居伯兄仲兄且置田二百畝資邑人士之赴試者及是歸家又爲
叔兄構居室公兄弟四人公居其季於是三兄皆有室廬以爲居
矣又各爲置田數百畝以資其生尤念幼孤賴伯氏教養誼兼父
師會邑修文廟乃以千數百金奉伯兄俾獨力捐修其後達部議
敘奉 旨欽賜翰林院典簿公兄弟相顧欣然樂之也於是修祖
墓勸祖祠倡首建濰川書院立學約設膏火以贍生徒聘名師以
教邑子弟又倡首舉興賢會爲邑人士鄉會試行李之資以前所
置田二百畝爲之基更以叔伯兄弟子姓之名增捐租田人以十
畝爲率俾凡樂捐者易於爲力焉自城邑鄉落有餘之家公無不
禮先之勤勤懇懇勸其捐輸於中積其贏餘建興賢祠凡捐田入

會者奉一主人祠春秋受享或有孝子孫爲祖父捐田者公尤嘉獎之形諸紀載見於詠歌於是人益樂於捐輸積田至三千餘畝而建甯士之赴鄉會試者行李有資矣公亦自謂歸田來心力瘁於此舉顧其言曰非我之能乃太宜人之教也蓋太宜人本疏財好義自公居官居家凡義事無不諮白而行故雖已老而其爲言猶如此也其捐資於濰川書院及捐膏火費者亦建育才一祠以報之其諸官社民社諸倉無不竭力成之綜公自歸養以至沒身三十餘年日孳孳爲善居家不治生產而衣服飲食儉約過於寒士稍有餘則置田田穀之所入歲豐則儲積諸倉遇饑歲則出而平糶故公家積穀常萬石而建甯附郭之民無憂歲饑也公享

年八十有一生平所著有崇本山堂詩文集閒居偶錄棗堂節錄
嘯月亭筆記不求工於文辭然大抵有所聞見嘉言懿行必紀蓋
樂道人善者也又自著年譜立興賢會義例冊其他鐫刻前賢遺
書及朋友故舊遺集亦凡十餘種垂沒顧子孫不及其私惟命讀
書積德無墜家聲及護惜所刻書籍而已仕驥與公之孫家恆同
受業於梅崖朱先生之門嘗以後輩禮見公而公又命其次孫家
泰來從余游公之卒也家恆旣述其行系諸年譜之後復以狀屬
仕驥仕驥竊謂如公之行 國史循吏卓行當有采焉故不辭其
請撰次其事如右謹狀

右行狀魯仕驥撰

王植

深澤王先生諱植字樓三有思乎長孺之戇而用以自檢故號曰
戇思進士官知縣生平恂恂自持不輕以聲色加人然不肖隨俗
俯仰於流品之不類者往往嚴界閼以待之積學既久游歷半寓
內見聞日廣識力益定仕於粵廉直持平名大著未竟其用退而
著書有四書參註濂關三書正蒙初義皇極經世全書解權衡一
書韻學臆說道學淵源錄讀史綱要其崇德堂彙言學言治均極
見本末心性說曰治法由於心法而事功由於性功自虞書言人
心惟危道心惟微言心之始也仲虺言降衷下民若有恆性言性
之始也至孔孟大暢厥旨遂開道學之宗大學言心不言性非不

言性也明德卽其性中庸言性不言心非不言心也戒懼慎獨卽其心孟子合而言之曰盡心知性曰存心養性知性卽盡心之要道而存心卽養性之實功此鄒魯授受之指歸後先若合符契顧嘗歷考先哲微言竊謂心之與性歧而二之不可混而一之尤所不可左傳劉子曰民受天地之中以生中非卽性之謂乎中庸喜怒哀樂之未發謂之中若爲劉子特下一解然者非中之所謂性者乎然而性有理有氣以理則易言繼善成性中庸言天命之謂性孟子言性善程子一言以明之曰性卽理也是卽所謂受天地之中者是曰義理之性以氣則易言天道之陰陽地道之剛柔而又曰立人之道曰仁與義陰陽氣也剛柔質也人亦有然故張子

曰形而後有氣質之性善反之則天地之性存焉程子曰論性不論氣不備論氣不論性不明蓋所謂性相近所謂動心忍性所謂性也有命焉皆謂氣質之性也若夫易言洗心大學言正心而孟子之言心也曰良心曰本心曰求放心皆不外人心道心之義亦猶性有理氣之分非心與性各爲一物也故張子曰心統性情又曰合虛與氣有性之名合性與知覺有心之名然則心性之相爲體用者歧而二之其可乎顧嘗卽太極陰陽之理論之朱子曰性猶太極心猶陰陽太極卽在陰陽之中非能離陰陽也然太極自是太極陰陽自是陰陽惟性與心亦然性無形而爲理之宗猶所謂無極而太極也其寂然不動感而遂通皆心之爲之性則乘是

以見焉故朱子言太極曰動靜者所乘之機其言心亦曰出入乘氣機蓋離氣不可以見理而不可卽以氣爲理離心不可以見性而不可卽以心爲性又烏得混而一之也哉且孔孟之言心所以無爲心累者蓋心爲人之神明至虛至靈而具眾理非卽心以爲理故誠意之前必有格致之功而養心之道則有操存之力皆所以充虛靈之體以復其天地之性而不流於空寂之學也若卽人心知靈明以爲理而前無格致之功內無操存之力將以意是其所是非其所非烏知不有似是而非似非而是者而毫釐千里去先聖之道遠矣則惟混心性而一之而不知其體用相須顯微一貫之妙嗚呼後儒談心學者所以易入於禪而明心見性之異說

且中於人心害及後世可勿嚴其辨哉其道學淵源錄序曰道學之名古未有也宋始有之而宄臣蠱朝廷遂明以示禁嗣亦知道學非可禁之名也易名以僞學而禁之夫道莫大於孔子而善學無如諸賢道學也而受訾不甚舛乎宋史獨取所訾之名特爲列傳實以當代大儒雖儒林名流不得與其識加人一等矣自是以後又有朱陸異同之說陽儒陰墨幾欲胥天下而入於懸空頓悟之幻境是上之所不禁者又更蝨之以異學一途何啻自爲禁之乎然考之祀典眞儒雖不遇於時往往爲後王所追崇此卽天理之常存而人心所以不死也余嘗考配享從祀所由始蓋諸賢從祀自漢章帝始先儒從祀自唐太宗始而改議進黜者則明太祖

黜揚雄世宗罷荀況十人又改祀鄭眾五人於其鄉而進陸九淵
神宗初又進王守仁陳獻章若吳澄之祀則英宗始之而嘉靖九
年嘗一罷黜者也竊謂道學之統如祖宗於子孫一脈相傳而異
派別宗不能參乎其內朱子所以從祀者謂其接孔孟之真傳也
朱是則陸非矣陸非則吳與王陳將得爲是歟韓愈之從祀也以
其言堯舜以來相傳之緒至於孔孟而荀揚不得雜也學術雜卽
於道無與且以陸吳王陳校論之守仁之精神魄力更勝於三子
然其學術事功多雜於權謀機變之所爲如荀況言性惡卽當黜
守仁乃曰無善無惡性之體此卽性無善無不善之異說也程子
謂揚子原不識性更說甚道守仁得無類是朱子補格致傳最有

功於聖學守仁乃曰知善知惡是良知爲善去惡是格物無論其爲無頭學問且由其說則是格物在致知豈致知在格物之謂乎夫從祀之典爲道學也若但以氣節勳業取之則古今來氣節勳業如守仁者當不乏人欲盡廁於從祀之列可乎竊意鄭眾等改祀其鄉之例正可以處儒林諸子而不必入聖人之庭可也論世者其以爲然否先生官粵時以強項吏稱蓋知其學者少也而先生固非無本矣

右學案唐鑑輯

按王公雍正丁未進士

國朝清風錄卷之二十九

十一

伍澤榮 弟澤采 陳世俊季弟世隆

伍澤榮字惺齋湖南祁陽人父鉅與母雷並以孝稱雍正二年湖南初分闈澤榮遂領鄉薦丁未成進士授寶坻縣知縣勤慎和緩寬惠得民政績載寶坻名宦傳歸里後以詩文自娛弟澤梁字貞齋幼與弟輩均從兄學乾隆丙辰登進士官禮部授淮安府知府署兵備道正己率屬嘗作詩勉僚屬至今吳中猶道之未幾歸田主講兩粵書院季弟澤槩字耐客乾隆戊午舉人任南部縣知縣歷知湖北枝江漢川黃陂雲南文山等縣升開化府同知所至潔己奉公均有政聲同邑陳世俊字惕庵玉立修髯儀觀甚偉孝事後母家人偶拂親意世俊卽跪寢室外達旦俟色懌乃起雍正己

西領鄉薦初借補福建石碼鹽場大使旋知建安政慈心實民不忍欺歸田後主講文昌書院年八十餘卒鄉人援沒祭於社之義肖像紫霞禪院以祀之季弟世隆字眉湖雍正乙卯選拔復登賢書授華容教諭升廣東西甯知縣民懷德畏威咸稱廉吏解組主講文昌書院與伍澤榮分修邑乘年七十餘卒仲弟世賢貢生乾隆丙辰偕弟世隆舉博學鴻詞未遇

右傳李元度撰

黃金馬

孫逢甲
志京

陳悌子
長鈞

在璣

顧世琬子昌運昌述

章

黃金馬字蓮炬湖南武陵人廩生雍正五年以孝友端方徵分發河南署潛縣縣丞於獄中得一冤狀詳活三命擢知上蔡縣先是蔡河壅鄰邑築隄蔡幾爲壑不得耕金馬繪圖請廢之水得宣洩子中孚仕至廣西桂平梧鬱道著有戒溺女文孫逢甲乾隆壬辰進士知鉅梁縣道光壬辰重宴瓊林 賜知州銜同邑陳悌字次方少嗜學與兄愷相師友夜則篝鐙達旦一試冠軍入郡庠以白鶴池賦見賞於郡守王葉滋雍正六年舉賢良方正知羅源縣事皆親覽案無留牘以勞致疾歸子在璣字虞衡與季父孜醇同中乾隆庚午舉人辛未成進士知尉氏縣有被刃者莫知主名於別

國朝通志卷之二十一
三
贖中緝之一訊而服河決楊橋口城不沒僅三版在璣督民捍禦
之得不潰乃購舟拯溺者以便宜發常平粟大吏嘉其能攷醇歷
官長沙教授著有精齋文集顧世琚字採崑雍正壬子舉人知偃
師縣控牒至卽與判決民無冤者緱氏山產煤禁錮久邑人苦之
力請復開民勒石山麓頌之子昌運字奎五由附貢知莘縣逆寇
王倫之變守城七十餘日賊甫平有妄訐逆黨百餘家者大吏將
臨以兵昌運察其誣以全家力保皆得釋擢知膠州昌述字紹五
知四川太平河南泌陽縣有政聲覃志京字咫宸由廩生援例知
齊東縣大清河溢立振之擢知莒州值逆匪王倫徧境志京晝夜
防禦民賴安堵陳長鈞字殿九以廩貢授武岡州訓導援例刺宣

威州有私鑄案株連三十餘人一訊立出之莽匪緬匪軍務大吏
倚辦驛站有勞績以委訊鄰獄被議歸里居時有湖北屯衛軍樊
某控部辰常二衛應補派餉費六千兩長鈞偕邑人陳民困狀守
令白之大府得免派著桂山詩文集三卷

右傳李元度撰

邵建徵

邵建徵字鳳倫江蘇無錫人父璿由拔貢令芮城歷官御史建徵
雍正五年舉材能科授灌縣知縣值金川騷動蜀松潘爲西川門
戶蠻夷環屯鎮標所駐歲需糧餉數萬石灌當孔道收貯轉輸皆
資乎灌地土卑溼糧易蒸變且夷虜雜處兵火盜賊時時竊發建
徵日夜巡查經畫裕如閭閻不擾雍正十年冬事竣論功上官將
保薦卽解組歸

右傳楊熙之撰

鄭鼎勳

嗚呼吏治極敝久矣州縣尤甚焉其居之也若無其官於民或相仇況乎愛焉不欲其去與去而思且有不忘者哉予於今時感夫任吏者不惟其人人亦滋不知其所以爲吏慨然於表鄭君也君四爲縣令果於爲治明幹善斷先後政如一而意主乎爲民絕異近世所稱才能書上考者初仕安仁繼調江華攝新田皆頑險邑而安仁險甚安仁遠在荆衡人尤尙欺悍樂囂訟宰每始至必爭飾詭辭以嘗辦否因從挾持之雖素習於吏或患不勝君方下車安仁人千餘各以狀進立庭下滿君顧主文書吏悉取來每視一牘呼持狀者前曰若情本如是如是乃敢焚我以次無不然持狀

者驚畏發摘多陰散去視未十一而庭畱者不過數人而彭道士者恃弟爲貴官尤奸橫君將嚴按之遠遁乃已自是爲政數年訟日少懦善者得樂無事而澆幻之俗亦漸幾熄安仁大饑富家不有與貧者糴君里籍欲粟者姓名第以金來吾爲汝市而躬往諸富人所曉以理當然與事利害富人並感動立出粟遂無餓死者時江華盜方橫開府知非君莫能止卽使移治焉適巡檢毛德峻來謁君一見知其能召與計事甫三月捕盜二百餘斬其魁君不自爲勞推歸德峻且薦之上官嗚呼仕於今者往往議論短長同列相擠忌或攘他人功顧君獨能若是君於人何如也以喪去楚服除之陝西之渭源渭源盜如江華君設方密獲其首釋不誅責

擒盜自贖盜奪他境而性素直嘗語獨其州守守誣君罪罷令下獄中人知君枉然無有救者君子俊德走京師頌冤始得直未幾疾作遂卒於涇源君孝友讀書給於文辭自少樸儉而尙施於官俸所人多以周所親初爲諸生入太學將由科第仕雍正中有知君而薦之者遂赴官湖南旣連爲令政施於所至而人知德焉其去安仁也老幼號泣以送作爲十三難之歌紀其惠愛刻石邑中後以事至衡衡州人闔城門不能去曰公爲此郡守庶幾活我其自獄而出也涇源百姓望見君於郊亦皆大喜然君之能固不僅止此也予見天下宰牧者置民事不問惟趨走阿媚爲賢往往遷擢去偏冗陋庫或多至大官以君之能於政志於民有可用於時

而位不過縣令且終被誣事固有不得而知者哉君將歿爲詩見志其辭發憤感激子誦之而尤歎息焉君諱鼎勳字某世居山東高密後遷襄平卒時年五十六娶劉氏生三男子乾隆丙寅俊德葬君三河之鄉其墓四尺泉流在側其事不謾書官於石

右墓表胡天游撰

按鄭公漢軍正白旗人
雍正五年任安仁知縣

楊一正

世宗憲皇帝時天下吏治肅然 九重之上視萬里如几席雖所
信任大吏黜陟一微員不當卽別降指揮大吏噤不得逞故一命
以上無不感奮以自效余昔官興化於稷山楊君之被誣及 世
宗之始終保全未嘗不感稷山之遇而歎 天子之聖也君令福
清時吏部侍郎今大學士史公奉 命甄別福建府州縣官君以
價薦制府高文良公入對復奏君政績遂 特升知延平府事旋
調漳州府前守李侵蝕建倉部價恃與藩司潘有聯以破倉齎君
受代君不可揭之撫當是時潘以知府超擢不數月由臬司陟藩
司勢張甚撫軍亦懾之潘於是力右李譖楊於撫與李並劾通省

不平 世宗察其誣有 旨楊一正暫停解任時君已出署月餘
得 旨復入府視事一省稱快而撫藩御之益不解初聞省清查
舊通奏 聞報免查後續完者抵新賦君官福清所解續完銀兩
文漏所抵至是檢舉請改藩司不許沒所解項而以匿報民欠具
劾 世宗從吏議革職仍令給咨引 見革職官引 見亦異數
也尋 命以刑部主事用噫嘻君以邊省微員當撫藩協力構陷
非 聖明睿照於上百無一全理故君每言及之輒泣下君諱一
正字在涇號稷山祖居乾州武功縣之佳氣堡曾祖起鳳祖正芳
縣學生父鑄 贈文林郎君性行誠實由縣學生恩例入貢選正
定知縣以憂去服闋補館陶歲禮君泣請撫軍賑卹且募富戶出

借約官爲責償民賴全活請豁沙壓地賦以紓民力置義冢以收
瘞暴棺露齒禽治積棍有能聲巡撫黃公海公陳公先後薦以知
州銜管蓬萊事雍正六年 世宗以閩省吏治積玩 詔各省督
撫舉其屬之能者發往閩省以振起之東撫塞公以君應 詔君
至閩歷龍巖福清所至稱治既改主事未補復緣事降補光祿寺
良醞署署正以卒年六十有八 敕授文林郎妻羊氏子一延祚
候選州同以某年某月某日葬於某鄉余與君旣同官閩中君爲
署正余爲光祿卿又同官也其孤稽顙乞銘不能辭銘曰
漆水潏潏稷山岫岫秦川之秀澤被七閩七閩有澤 九重是格
履蹟屢興吾守不易壽考令終聿歸幽宮蒼松翠柏永蔭堂封

皇朝詩林卷之三十一

右墓誌銘沈起元撰

王時翔

世宗憲皇帝御字厲精爲治重選守令閒從翰林改授復慮科甲
不足以盡天下才於下第舉子內擇其良且許同列得互保任復
念天下才俊士必有抑伏不得與計偕者乃 詔諸郡守各舉有
猷有爲有守者一人無論出身以名聞於是吾友王小山以諸生
被薦起家而引 見卽授晉江劇縣則又自薦舉來小山一人而
已君諱時翔字皋謨一字抱翼小山其號太倉州鎮洋縣人大父
智爵明相國文肅公輩行也父珩字墅水以仲子時憲貴 贈翰
林院檢討墅水九子君行五君年十三始就傅一歲而通四書易
詩書三經喜吟詩才俊逸傾里中老宿咸謂太白復生尋補太倉

學生員博覽經史著書數萬言再遊京師公卿皆折節願交然竟未得一遇君爲人修潔視流俗若浼家素貧口不及鹽米仁里與王蕙帶恪願玉停陳垆及余四五人族子則秋涯遵辰交最密時爲文譙意致蕭然出塵壻外人競以文學風雅推獨余知君胷中磊磊有經濟略也雍正六年余守興化適奉 詔當薦士遂以君應願玉停在坐余謂曰小山意重詞館外吏非其好雖然以經術潤飾吏治惟此君優耳吾爲 國家擇才不復計小山素志矣玉停亦然之君爲晉江也 上方振飭閩省積玩盡易守令有司急自見務彊幹而諱慈祥晉邑故險健好訟前令以英銳擊斷爲治人入訟庭無不股栗郡守以爲能君至曰此吾赤子也忍以盜賊

視乎我奉 聖訓實心愛民敢忘之一以寬和爲治每聽訟既判
決呼兩造前諭令各釋憾對揖階下歡然出於是訟日簡有負隅
者前令捕之不能得君命一老卒持票往呼立至觀風整俗使實
應劉公按泉委鞠疑獄二十餘輒報可謂人曰晉江長者治事又
何精敏也題其堂勤慎廉平以旌之鹽大使以緝私誣良移君治
君每察其冤立出之制府高公司鹽政心器之在晉不數月民德
之如慈母而郡守弗之能也力掎之調政和民訴府乞留不得爭
負斗米束薪鮭菜之屬置館門外出則牽衣號哭有流交平糶米
六千石新令不受代邑中商漁船戶數百呼其眾曰王公飲晉江
一杯水安所得錢補虧折耶吾屬請分買納原價十日而事畢瀕

行傾邑祖送渡萬安橋三十里不絕政和山僻君擒治劇盜小老
斃之捕訟棍范斌宥其死令感悔縣中益無事日引諸生講學於
署東之玉成堂未幾調甌甯建甯府首邑也君爲政一如晉江初
政和有虎患君馳牒驅之一夕遂絕是歲鄰邑蜚災甌境獨無人
謂史傳所稱王公兼之巡撫泰山趙公與制府高公交薦擢漳州
府同知駐南勝南勝故蠻崗山簪深奧民族居其中一搆釁數千
百人爲黨訟而曲抗不就捕手兵械死鬪吏不敢詰故特議移駐
同知彈壓時有賴唱者糾衆奪犯當捕治君檄示者三遂親入山
漳人素聞君名謂必能活我夾道跪迎賴姓萬丁隨其族長房老
出君爲宣德化陳利害痛切開諭諸賴感服賴唱自縛至遂繫之

出往返六日行萬山中所至觀者如堵無不屏息立既而君察所
犯可原白上官薄其罪尙民從此帖然歲除繫囚數人請暫甯家
君許之至期則皆至撫軍聞之曰此王丞儒術之效也瀨于阮民
葉揚煽亂君意緩之可一紙定或有張之者遂奉嚴檄督兵弁夜
入山捕治事旋平然非君志也乃引疾歸無仕進志乾隆元年
今上旁求廢員復有以君名聞者 特旨召見除蒲州府同知治
永樂或言薦君者爲浙閩制府高文良公也公不言然高公故知
君者未幾奉 特旨晉成都府知府府領州縣十六地邊左官吏
好植黨君凝然獨立以廉率屬持大體審機要上下翕然信之錢
價騰藩司榜示平價市爲之囂君方休沐亟召成都華陽二令曰

爲我謝方伯市當順民情官爲之價錢益閉不出無甯時矣藩司
悟趣撤榜錢價尋平制府欲徙涼州駐防於成都主者議拓成都
滿城當奪民居二千家民恟恟君考故牘示藩司曰成都滿城故
容駐防三千見駐兵一千五百尙虛其半無庸拓也但出駐兵所
侵地足矣藩司乃止拓涼兵亦不果徙漢州甲妻私鄰乙而殺甲
甲弟具控乙不承賂獄中盜引甲爲同盜見殺有司遽成讞然終
不得甲尸君廉得乙有弟實其埋尸乃攝乙弟別訊之果得姦殺
狀獲尸傷皆具乙與妻咸伏其辜新都陳現與從姊夫某習謔一
日某從現父貸斗麥將渡河休於崖現潛往納大石囊中某負囊
以涉囊重踣於水石鎮之不能起現懼匿後縣令究石所自現不

能辨然不得致死故乃坐現與從姊姦現不勝楚誣服君疑之及
庭訊二犯皆唯唯然察其色若冤甚惟懼不敢言者君屏左右好
諭之則張目相視哭失聲始以情告君惻然爲力白之出其死一
郡稱神歲壬戌江南湖廣災撫軍奏請運米四十萬石以濟吳楚
上許之旣而楚省委吏赴川領運江南以米足不委員至撫軍
檄州縣運送時兩省並運內河小舟不給計米集將及封峽而坐
令商賈不通成都城中薪炭俱絕民苦之君謂江運可緩而徒病
蜀甚無謂欲白知非撫軍意然事勢迫不忍默遂具摺極陳其弊
且言不如停止運江獨運楚而聽客商運江良便雖業已奏可事
勢中改 聖明可以實告也撫軍大怒欲劾君君不爲動江運卒

行吏民重困米下峽多覆溺者撫軍紀公至君屢乞休不聽年七十卒於官病臥猶治事無閒卒之日召成華二令入內署訊獄口爲定讞訖遂卒蓋乾隆九年五月十八日午時也噫向使君成進士登詞館以文學顯黻太平出入風議於吾儒經世化民之道何與君雖晚遇未大其用而使世知儒術之措施若是君亦可以無憾矣所著小山詩彙八卷文彙八卷詩餘彙四卷梓行於世君娶戴氏早卒繼娶范氏子一景元亦能詩女一適朱倬孫男澄景元卜於乾隆十九年九月葬君於某鄉先期以願玉停所作行狀稽顙乞銘於余余不能辭銘曰

春華無實儒術輕學不積中顛且傾人知君詩李杜生龔黃吏治

俄垂聲寬和外著內精明執持大體意氣平制科帖括紛尺程匪
聖旁求曷知名勒諸幽宮脉吾銘

右墓誌銘沈起元撰

王時翔字抱翼太倉人所居在南園叢桂中因自號小山年十四
始就塾一歲而通四書及詩書易三經既乃於子史百家二氏之
書無所不讀若夙成者願獨喜吟詩閒倚聲爲新樂府流播人口
四方知名之士履滿戶外尤與同里顧玉停稱莫逆交每會文少
年十餘輩咸集二人者徙倚松石閒劇談今古恆至日下春始涉
筆成二篇既經前輩評閱壓卷率不彼則此一時有瑜亮之目族
子汲園先生於婁東十子中齒最少至是稱老詩伯妙選里中能

詩者為後十子名曰積薪小山年十九與焉唐吏部東江則謂其
標格清妍風神秀逸如東家之子不假粉朱姑射仙人盡除煙火
諱藝家服其論篤小山既以詩名三十卒落落無所遇久之適

世廟求賢有以名上聞者特 召見授晉江令旋改政和甌甯遷
佐漳州移疾歸 今上改元以蒲州同知再起未幾擢成都守為

政以儒術飾吏治廉介愷悌民懷其德年七十求退未允卒於官
嗟夫小山少力學雅欲以文章馳騁當世一時大臣非無知之者
而卒蹉跌以老晚被薦功名可戾契致而僅以郡縣自效弗獲大
伸其志泊夫日薄西山情同倦鳥業遺兒子東歸掃除做廬為息
關娛老計而事與願違終未得向好時柴桑享其一日林泉之樂

則固依然窮措大齋鹽福命也小山爲石幢伯兄上官最稱投契而生平之際遇亦略相等牽連及之人琴之感不禁淚下泫泫矣

右小傳鄭方坤撰

王舉謨名時翔江南鎮洋人明相國文肅公之族孫也爲諸生博學能文章雍正六年州人沈起元官興化府知府奉 詔當薦士以舉謨應引 見授福建晉江知縣時 世宗以閩中吏治積廢遣使按視倉庫盡更諸守令新至者頗尙操切晉江民好訟前官以擊斷爲治而訟益繁舉謨至曰此吾赤子也忍以盜賊視乎縱解苛政坐堂皇响响作家人語曲直旣判呼兩造前令釋忿相對揖罷去由是訟者日衰觀風整俗使劉公按泉州委舉謨鞫疑獄

二十餘事輒報可語人曰晉江長者決獄又何精敏也題勤慎廉平四字以寵之尋爲知府所嫉調政和晉江民爭乞留不得縣有平糶米六千石代者以虧耗不受眾譁曰邪歛此閒一杯水安所得錢補耗米請各出錢買米納價如額十日而事集治政和斃劇盜懲訟盡引諸生講學縣有虎患移牒城隍神驅之尋調甌甯擢漳州府同知駐南勝南勝山箐深奧民族居崗中鬪者輒百千爲黨手兵械抗官吏莫敢詰有賴唱者其黨犯法捕治糾眾奪之與諸賴萬人匿險自固臯謨馳檄示以利害親入山中人聞臯謨至夾道跪賴唱族長率諸賴迎謁臯謨謂曰汝諸賴萬人奈何庇一賴而以死殉之其爲我縛唱以來卽無事矣諸賴皆感動唯而

退唱不得已自縛出遂繫以還治唱舉自是尙民帖然歲除繫囚
數人許暫甯家已而如期悉詣獄瀨子沆民葉揚煽亂舉謨謂緩
之可一紙定矣或張其事聞於大吏遂奉檄入山勦之事平意不
自得乃乞歸乾隆元年以薦起蒲州同知治永樂未幾 特詔遷
成都知府以廉率屬爲政持大體善審機要錢價騰布政使榜平
其直市人皆譁舉謨方請假謂成都華陽二令曰市直當順民情
抑之錢益閉不出奈何二令言於布政使撤其榜錢價尋平總督
欲徙涼州駐防兵於成都議拓滿洲城當奪民居二千家舉謨考
故牘請於布政使曰成都滿洲城故容駐防兵三千見兵一千五
百尙虛其半但出駐兵所侵地足矣毋庸拓也乃止已而涼兵亦

不果徒七年江南湖廣災巡撫奏請運蜀米四十萬石濟之報
可已而湖廣急米委屬吏領運而江南獨無巡撫檄州縣餽運舳
艦蔽江商賈不通成都薪炭俱絕泉謨謂江南運可緩而徒病蜀
甚無謂力言於巡撫請獨運楚而聽商人自運江南則公私兩便
巡撫大怒不聽江運卒行吏民重困在官屢雪疑獄閩府稱神九
年卒於官疾亟召成都華陽二令入內問獄事口爲定讞而瞑年
七十

右述彭紹升撰

汪濬

以父舉子以兄舉弟前已有其事矣而又有以子舉父一事雍正六年 上命內外諸臣各保舉一人衡永郴桂道汪懋保舉其父原任刑部司官汪濬學問優裕政事練達忠愛之性出於至誠奉旨汪濬補授四川敘州府知府 聖朝之立賢無方洵書史所未聞者

右紀聞陳康祺撰

睦文煥 蔣鳳色

睦文煥字樸庵湖南零陵人少孤母蔣氏嬰疾文煥禱於神請減己算益母壽疾旋瘳雍正戊申應孝友端方之舉大挑一等以知縣分發江南補桃源調嘉定時母年八十一兩弟俱亡遂乞歸養其初莅桃源也河水驟漲及城西人民漂溺文煥檄船救之隨請振明年又加振且多設糶廠以便民全活甚眾大學士嵇曾筠築黃河運河隄文煥往來烈日中躬自程督時有言文煥所修不實者曾筠廉其誣欲罪言者文煥曰此我不足見信於人也於彼何尤聞者服其雅量丁巳夏大旱禱雨至鄉亭雨大沛民額其亭曰醉雨亭癸丑夏蝗捕之不息爲文禱神蝗僵死同邑蔣鳳色字梧

岡雍正乙卯舉人任東流知縣先署池州通判後署建德青陽貴池屢平反冤獄嘗云讀書無補於世居官無益於民吾恥之在東流以修庠序端士習爲先務其教民也於每鄉立公所農隙時親訓之約以孝弟力田爲務游閒荒業爲戒民感其意不輕犯法以贍顧同僚受累罷及歸士民餞送者數百人有竹實齋彙行世子大鷗乾隆乙酉拔貢大鳴歲貢

右傳李元度撰

周中鉉

雍正六年秋 詔下尙書太常寵嘉勤官旌死事之吏 特贈故
江南松江府知府周中鉉太僕卿惟古者有功德於民加地進律
有循其職守而恪毋顧計利害毅而能奮錫爵命鷹車章厥非常
典公字子振其先宋知南康軍事道國公敦頤六世祖之德仕明
湖廣通城尹高祖洪謨給事中曾祖懋毅舉孝廉祖琦瑩 贈文
林郎父賓雅恩平縣令公慷慨通豁才名早有聞明習吏條長安
公卿中往往知其名者起家崇明縣丞故事縣大細惟令尉少任
事假權丞中廁惟主唯諾幾如無官公振舉綱理勵爲治蹟文靡
訟令時不能聽爲代決立成崇明故重鎮坐甲千人欲預取軍食

國朝通志卷之二十一
三
於官不獲曹激殺刃縣中官吏咸駭匿公聞曰事若此執卻禍
邪挺身前爲宣布凶順利敗究竟感切聳動眾投械曰諾吾屬駭
嘗未曉幸謹從公言久之華亭尹缺當復除江南開府承 聖祖
仁皇帝制下所部擇賢才吏勝治劇者上公名得 召見賜對稱
旨遂授華亭令至之日迫乎後遷其政簡而不弛刑協而不煩
歸勞於秩以和得民民有自殺其伯指誣甲甲久痠憫無能己白
公考情實置其當法者獄以平縣夙多盜爲民厲則擒誅主魁餘
黜亡屏境壤乂安甲辰秋會大霖雨以風鼓海驟溢巨防盪蹴數
百里魚華亭民簿記不可勝沒敗稻穫邑用匱凋民艱輸秋租乃
約吏無煩追求弔恤死疾具舍宇衣糗存蔽傷又力爲請振由是

多所甦全未幾以歲賦不中常律法當罷邑人日走聚訴大中丞
以聞於朝 今皇帝許復畱公以七品秩位下大夫感 恩厚殊
思益自砥 上亦知公治有方繼被 褒美四年丙午 命自華
亭令守松江松北距海南仰太湖地庫水都吳中苦潦害大損田
率十八九自古明水利者言三江震澤所同入海然東江由東上
貫同里犁湖至於白蠟婁自甘州泉達華澤急水凡二百餘里入
於澱湖皆松江支流太湖匯湖州郡谿天目西北鄙遠受宣州山
谷水廣三萬六千頃後從吳淞經華亭青龍以放乎海松旣久湮
自宋元嘉中已墮壅焚蘆競封益就沃陸民遞侵而畬隄遼隄廢
前時爲治或不省要害規別鑿渠浦使無汎徒費畱少祛誠欲祛

整釋咨俾國勿壑疇穡歲利若網在綱必循其端則宜專治松
於是 天子憫之慨然將求三江故道 命兩貴臣往大濬川兼
修婁水之渠今以稱劉家河者中丞監司相與謀是資彊敏吏要
無出周刺史遂舉昇公公既受令計畫規度以勉厥庸冀績成底
休吳民浚江自王渡至野雞墩六十里又三十里陳家渡地尤近
海而洪騰悍雄唯參笈是阻公以爲非堰殺其怒終不可施既堰
石籠土當之再塌再潰念迨夏役久且妨農田趨召眾力赴躬前
指呼所乘船當險或懼危不測請還公曰其敢避 王事先難退
卒揮之築未合而湍大鬪遽覆舟會暮昏吏士擾亂倉卒不得救
遂卒於江中年四十九事 聞 天子悼公才良篤勤職司就致

隕歿爲之嘉傷既 贈今官復蔭子一人得錄於太學 賜司農
金與葬而 命祭於官備夫哀榮公自起從仕至皆有恩方宰華亭
遭太夫人憂華人告行省願以百姓三日服代公三年喪請毋去
官其私以祠祀宦歌思不忘則攝六合尹家人或道過六逆旅戒
不取值焉以志公惠十一年春公子道澧等旣奠於封淑人師氏
胡氏祔諱先大夫恪循其官以終荷 渥褒其曷可無宣於辭俾
後咸有述乃表吉石以振銘詩

伉伉周葉有翼其桀以紹於澧不疆而剽果毅且安宜民攸宗其
勤孔武坎窞無所孰遏之功 帝曰汝勤願錫乃位胡曠以崇揭
揭旂旒歸焉是保士慨展同不愆銘德利嗣垂式觀望大宮

右墓誌銘方天游撰

雍正六年家文勤相國奉 世宗之命督開吳淞江時松江府周公中欽勤其官而水死 優旨贈太僕寺卿遺民感德私祀之屢著靈爽道光七年巡撫陶文毅公重濬此江以公陰佑奏奉 特旨立廟江干春秋致祭方事之殷也余以公與先相國當日有其事之雅虔禱公祠半年之中聚民夫數萬人於河上風塵不驚疾疫不作工程克期是非神助曷克致此故於竣事後上一聯於神祠曰百四十年舊蹟重開念先人誼切同舟數典敢忘其祖萬一千丈鉅工告厥慶此日江流順軌惟公所存者神以志神貺云

右筆記陳其元撰

楊稷

君諱稷字事可前修撰廷鑑曾孫諭德大鶴孫教諭柎長子性英敏少遭諭德君喪四方弔者輻輳君經紀中禮頗爲戚儻所稱嘗以文受知於殷君元福殷故名翰林慎許可時方出宰武進也雍正己酉以國子監生應順天鄉試會 詔舉賢良方正從父學士椿以君名上引 見發甘肅以知縣試用特給資斧百金蓋異數也時甘肅軍興羽書旁午平涼知府某奉檄解送馬三千匹期當十日限四日至遲且禍不測某大恐不知所爲君笑曰何難哉馬至三千爲數多矣數多則易散難合夜宿曉行遇城市多阻是以遲也若募三千人人馳一騎從閒道行可立至耳不五日果達大

吏知謀出自君凡軍需及他疑讞悉誘問得君言以爲決初署河州調會甯會甯屬鞏昌民俗樸僊之官數月俗乃丕變然地高多旱軍前資輓糧粟大吏令於豐稔處各糴萬斛赴之會甯方亢旱鞏昌知府高某以歲豐報君奮然曰歲稔地瘠賑貸且不暇反誣上以虐民乎值總督查郎阿公按會甯君慷慨陳白公動色檄責高高銜之尋摭他故齟齬君君坦不置意將告歸民號泣請畱大吏廉知之乃寢其事高亦旋自悔焉嘗經涇肅間見瞽者挈少婦行瞽貌猶惡而婦容甚戚君疑而執之一訊具服蓋婦家靖遠從父就食他邑與瞽偕行瞽似盲實見中途殺父古廟中偪婦爲妾耳於是瞽者伏法數郡咸以爲神事在靖遠君聽察得雪例進一

官靖遠知縣方望議竟移其徽護之人以此益重君雍正十年同
甲劉文恪公於義節制陝甘稔君才將薦擢而君旋以勞卒官矣
生平好交游然諾不苟性雖介弗靳施子卒之日笥无長物遺帑
千金民爭代納有想不平者至奔赴几筵以告其感人之深如此
配張氏別有傳子望泰乾隆乙酉科舉人

論曰望摩請友者眾矣五交三數孰居首焉世之從仕羨之不已
則出於懷求之不得遂變爲攘者可勝道哉昔柳子厚願以柳易
播退之亟稱之方君之讓功靖遠也同列咸笑其愚而君志顯益
決其庶幾無媿子厚矣余童時聞君曾祖修撰嘗徂李氏宅發樹
得窖金召而還之鄉里傳爲盛事讓固其世德歟

國朝詩林卷之三十一

右家傳趙懷玉撰

三

王裕疆

世宗憲皇帝御極之七年 詔內外大小臣工各舉所知得人最盛其官於蜀者若而人公治行第一公諱裕疆字晉來號玉亭世居浙江餘姚明新建伯文成公於公爲八世祖文成而下至曾祖諱某皆襲伯爵祖諱貽傑父諱謀庶皆以公官 贈中憲大夫大母吳氏母黃氏皆恭人公少讀書鑑湖之秋水長天間英姿颯爽有智謀旣壯歷游淮右粵東無所遇省父於燕易州知州後官湖南按察使彭公人瑛客之 詔下卽以公應 命奉 旨發四川以知縣試用是時公年三十七簡補梁山縣尋調巴縣以病起復補金堂縣其閒歷權忠萬華陽長壽等州縣遷直隸資州知州調

直隸絳州晉嘉定府知府權上南道官蜀二十餘年莅事明敏發
奸剔伏案無留贖而必以愛民爲先務所至舉舊規之累民者革
之梁山土慮民稀公招徠不倦高下日闢金堂康家渡清水堰等
處猝遇大水漂沒田廬卽據實上報盡力振撫民不知災巴俗因
火奪攘以故愈多火乃盡法懲之仍先事修火政自是火閭作不
致蔓延姦宄永戢商人喜重載舟自重慶下峽不戒於石尤易破
乃與船步約所載毋得過半所全甚眾巴素稱難治而公裕如其
政足利賴於後舉類此其守嘉定也制府方以府屬老洞溝銅礦
日耗不敷鼓鑄爲憂公洞燭積弊而梳摘之梅巧不能施歲獲銅
五倍於昔義眉縣民有請墾薄涼山夷境土者方伯將許之公以

爲此事果行必啟邊釁議遂寢時奉 上諭清理未升科之地以
一年爲限公條列章程期無擾民一時多採用之公善體物情熟
律例讀書問法援筆立就以故疑獄多屬公而公雅多平反不欲
以刻覈爲能鞠涪州邪教事波及者悉縱之犍爲縣令謾勘良民
六人爲盜皆雪其冤有竊役冀獲重賞賄誘愚騃自稱叛逆馬朝
柱火黨且有據證將成獄矣公破其證以得其詐乾隆十三年討
大金川隨營籌畫松茂道某裨將某皆以事將受顯戮皆察其誣
力辨之主將皆從之益公遭逢曠典出身感激淬厲誓盡力酬
聖主所表見卓卓不可勝書性亢直每上官引與論事口講指畫
知無不言宜力爭者則侃侃諍諍不爲唯阿不若無恥自稱能吏

者苟於職困於諛也然而上官亦以此重之策公榜制府之賢者也嘗謂方面中能以實心報國者斷推公第一玉裁之入蜀也距公之死十餘年蜀中士大夫多嘖嘖稱公之賢豈非盛德在人未沫也哉乾隆十七年冬丁父憂去官服闋以母年逾八十不欲遽起旋得痰疾手足不仁丁母憂終喪至二十年十月十一日卒距生於康熙三十二年九月十四日享年七十娶陳氏誥封恭人子六長後楷候選州同次後槐候選直隸州州判次後本太學生次後故次棧格煥膳生次後棟女二長適太學生郎若皋次適候選從九品周汝基孫男九人曾孫五人始公卜居巫山從父志也故公父母合葬巫山城東公以乾隆二十八年八月二十七日

葬巫山城北五里曾家壩繼又稍遷舊穴之西數百步諸子皆占巫山籍公之弟曰裕藩少公三十九年公長之教之先公一年卒病中語諸子曰視叔父所生當如同父至今後槐等與後梓後柏未嘗分財異居蓋公之孝友其天性然而其子亦可謂善繼志也玉裁初識後槐於富順好學之士也因定交焉後官巫山引疾將歸矣後槐以狀再拜請曰先公葬既久敢求銘固辭請愈力乃銘曰

別子爲祖繼別爲宗文成之後別居巴東是宜祖公設施旣崇未竟厥胷挺爲長松矯爲青虹巫溪淙淙樂樹蕪蕪鬱鬱幽宮禔福無窮

同治六年庚子元月三日

右墓誌銘段玉裁撰

三

李方膺

乾隆甲戌秋李君晴江以疾還通州徙月其奴魯元手君書來曰方膺歸里兩日病篤矣今將出身本末及事狀呈子才閣下方膺生而無聞藉子之文光於幽宮可乎九月二日拜白讀未竟魯元遽前跪泣曰此吾主死之前一日命元扶起力疾書也嗚呼晴江授我矣其何敢辭晴江諱方膺字虬仲父玉鉉官福建按察使受知世宗雍正七年入覲上憫其老問有子偕來否對曰第四子方膺同來問何職且勝官否對曰生員也性慤不宜官上笑曰未有學養子而後嫁者卽召見交河東總督田文鏡以知縣用八年知樂安邑大水晴江不上請遽發倉爲粥太守劾報田

公壯而釋之募民築隄障滋水入海又敘東郡川谷疏淪法爲小清河一書載之省志十年調蘭山當是時總督王士俊喜言開墾每一邑中丈量弓尺承符手力之屬麻集晴江不爲動太守馳檄促之晴江遂力陳開墾之弊虛報無糧加派病民不敢肺附粉飾貽地方憂王怒劾以他事獄繫之民譁然曰公爲民故獲罪請環流視獄不得入則擔錢貝雞黍自牆外投入瓦溝爲滿 今天子卽位乾隆元年下 詔罪狀王士俊凡爲開墾罷官者悉 召見詔入城已二鼓守者卽夜出君於獄入都立軍機房丹墀西槐樹下大學士朱軾指示諸王大臣曰此勸停開墾之知縣李蘭山也願見者或擠不前則額手睨曰彼頎而長眼三角芒者是耶少宗

伯趙國麟君父同年進士也直前握其手曰李貢南有子矣悲喜
爲之泣奉 旨發安徽以知縣用晴江乞養母家居四年服闋補
潛山令調合肥被劾去官晴江之言曰兩漢吏治太守成之後世
吏治太守壞之州縣上計兩司廉其成督撫達於 朝足矣安用
損 朝廷二千石米多此一官以碁閒之耶晴江仕三十年率以
不能事太守得罪初劾擅動官穀再劾違例請糴再劾阻撓開墾
終劾以贓皆太守有意督過之故發言偏宕然或擠之而不動或
躡而復起或廢而不振亦其遭逢之有幸有不幸焉而晴江自此
老矣晴江有士氣能吏術岸然露圭角於民生休戚國家利病先
臣遺老之嘉言善政津津言之若根於天性者然性好畫畫松竹

蘭菊咸精其能而尤長於梅作大幅丈許蟠塞天矯於古法未有
識者謂李公爲自家寫生晴江微笑而已權知滁州時入城未見
客問歐公手植梅何在曰在醉翁亭遠往鋪瓊瑜再拜花下罷官
後得噎疾醫者曰此懷奇負氣鬱而不舒之故非藥所能平也竟
以此終年六十葬某銘曰

揚則宜抑不可爲古劍爲碩果甯玉雪而子子母脂韋而瑣瑣其
在君家北海之右崆峒之左乎已而已而知子者我乎

右墓誌銘袁枚撰

左基

莒州公喪既歸之明年將以三月十七日營兆於交河縣窪東村
之新塋遷戈宜人柩祔以葬而二公子鉉錡兩柩從焉公遺命也
公諱基字永圖姓左氏世居河閒後徙滄州公始寄籍爲州人曾
祖諱敬祖順治己丑會試第一人歷官副都御史卒 賜葬祭崇
祀鄉賢祖諱印喆江西崇仁縣知縣父諱方燾山東高苑樂安二
縣知縣以公貴例贈奉直大夫山東莒州知州妣張太宜人配戈
宜人公少從贈公學有根柢年十六補滄州博士弟子員己酉舉
於鄉是年贈公因宗伯蔡梁村先生薦試用山東公隨之任所贈
公宦十年而歸囊無餘資公先志色養贈公忘貲貧及贈公與太

宜人先後逝公營喪葬事畢授徒自給若將終身焉公天懷灑落不以世累牽至其讀書講學務求實用隱以濟人利物爲志乾隆十六年年四十有奇始謁選以知縣試用廣西充 恩科鄉試同考官署天河縣凡九閱月盜賊屏迹癸酉改署馬平法戡提標弁兵閩閩得無擾乙亥題補蒼梧值歲祲全活饑民無算己卯調邊西林首嚴土官後裔憑餘威虐土人者邊俸報滿攝泗城篆凡一年癸未推升山東莒州知州初下車平鹽價次易里老代徵地糧爲滾單法以便民旣而勸修隄防泚水不害開土山陳汪陵陽諸湖溝渠使湖田皆有宣洩其他便宜皆有成效以非其大者不錄蓋在莒三年視粵中建樹尤多遠近異宜繁簡殊術也而公亦瘁

矣公歷官南北所至皆以至誠感物不恃威而民自化任馬平時
路遇爭水鬪者勢洶洶將大公駐車召其首倡反覆開導事得立
解其在莒州有兄弟爭產構訟公既準鞫而故遲其期後以他事
下鄉路經其家乃先使人持諭動以至誠大義皆感泣叩首請無
復訟卒成友愛其感人以誠多類此方公之調西林也地極邊多
瘴疢宜人與公四子先後病卒家人幕客物故者近三十人聞者
皆爲酸鼻公凝然當之公私摒擋纖微無誤又以餘閒蒔花竹吟
詠浩然未嘗作戚戚狀攝篆泗城政舉務閒乃日借賓客益探奇
勝唱酬所得積成卷軸在莒州猶時時回念前遊也以戊子三月
七日病終莒州官署享壽六十有一公偉貌修髯氣象凝重而對

賓客言笑藹然性喜施予善下人居官悃悃自致無世俗揣摩陋習其訓子也以戒奢安命爲主少喜讀道書已而決然舍去肆力正學粹如也自寢疾以至易簀神明湛然無一憤懣語子六長元銓壬申科舉人揀選知縣借補臨榆縣訓導次元鉉廩生次元鈺次善承俱元鉉出孫女四人余識公晚而早與公嗣元銓元鉉善以第三女許字公孫善洵故於公爲諸子行公之葬也長公子先事持狀來乞銘謹按公狀於法應銘銘曰

老於學進不苟勞於官歿不朽準報施宜昌後銘幽之文爲公壽

右墓誌銘李中簡撰

王夢弼

公姓王氏諱夢弼字代言號惕若其先祀人明洪武中遠祖以從
征功授世襲指揮使歷傳至有道爲有力者奮東徙商邱遂家焉
曾祖父承印祖父某妣陳氏其繼黃氏父德宏以郡庠入國學妣
戚氏自公旣貴祖父父並以 覃恩贈文林郎浙江鎮海縣知縣
祖妣妣並 贈孺人公性沈敏讀書能解悟意度深遠無疾言遽
色內行修飭少抱羸疾久不愈然不以廢學自經書性理考及理
學名臣諸書下逮參同陰符之學皆通梗槩心思所到往往造其
深微雍正六年由選貢入成均 御試得高等應舉北闈中己酉
科鄉試副榜引 見發浙省試用渡黃河誓曰驟蒙拔擢當殫心

圖報若受賄賂徇請託有如此河矣旣旋里丁繼母閔孺人憂服
闕赴浙委署金華湖州兩府通判事遂昌富陽孝豐三縣事乾隆
三年題署處州府青田縣事滿考爲眞未幾以治最調補衢州府
江山縣知縣任滿以治最調補甯波府鎮海縣知縣公莅職簡靜
功令所在奉以周旋惟謹遇事有執持機務紛錯神恬氣定從容
擘畫動中窾會其爲政愛民禮士重風教存大體嚴號令慎出納
鋤奸頑撫孤弱如開青田鐵禁令民得陶煽取給設法勸諭江山
紳士畜婢者各以時遣嫁俾無失人理及兩抗守憲窮治麗水僧
崑巖江山大猾陸上章等事有可以宜民厚俗者爲之必盡其力
諸邑口碑具存可考也浙民生事素薄歲饑流殍滿野公先任江

山以旱災報得帑金七千兩以賑其民既鎮海災益劇公力請撫
憲具題且懇借帑金萬六千兩量給富商周迴易米使商人私其
贏而以原項還官得外境米三十餘萬石米價以平比賑恤命
下公悉心經營災民無所遺而奸民不得冒上臺頒其法爲賑式
民賴以全活者無算邑境當海衝所恃惟捍海石塘歲久傾圮風
激潮涌居民惴惴不自保上旣允撫臣議發帑重修公被委綜
役事精思博訪懲前毖後更創新製令鑿枓相銜銅以稠灰千夫
合作所以分畫約束督察激勸之法甚備越四載始訖工塘成堅
厚密緻爲東南巨障公久歷浙中所至以清幹稱而致力於民旣
艱且勤惟賑荒修塘一事績尤著詳具浙人所撰生祠碑記中計

典行制撫兩以卓異薦並蒙部覆引 見未幾又以海疆俸滿例
保題推升雲南姚安府姚州知州尋復於堪任知府案內特疏保
薦公奉檄北上邑人泣送者以萬計到里門親賓咸趣行謂此去
且得優擢公慨然曰宦浙二十年常恐上負 國家下負所學而
競進不已乎遂引疾乞休撫軍爲具題得 旨以新任職銜致仕
公治家寬而不弛骨肉燕聚油油如也與人接深自斂抑有負者
以情恕之未嘗校里居五年日手周易性理程朱全書及陶靖節
詩恬吟朗誦綽有餘味時錄其語以資觀覽疾亟猶惓惓以延平
先生行狀開示諸子嗚呼其所會心者深矣公生於康熙年月日
卒於乾隆年月日享年六十有八配謝氏處士銓之女勤儉宜家

約己裕人事兩繼姑並得其歡心長公一歲先十七年卒葬於郭
邨南祖塋之祔穴副室宋氏子男五女二孫男十人女八人明年
三月日其孤某奉公柩啟謝氏之墓合葬焉禮也銘曰
不撓其甯不墮其庸不湛其盈以恢厥聲可謂勿誼所學而無忝
於循吏之風矣揚之水白石皜皜闕此幽宮萬古是保

右墓誌銘郭善鄰撰

吳開

公諱開字來儒先世自唐左臺御史少微始家休甯十一傳而徙歙又十四傳而徙歙之嚴鎮曾祖銑鄉飲正賓祖瀚候選州同知父正道郡學生公雍正己酉選拔貢生令山西陽高改臨晉當攝大同府通判兼攝萬泉榮河猗氏虞鄉永濟等縣公爲政廉善而才所至案無壅牘獄無淹囚烝烝以治官十六年卒困於百里之任以死至今士大夫爲公惜之公之治訟也凡民所獻狀手自判示不假實僚宜訊鞠者不二三日卽集其人鞠之往往片言輪服久之訟日罕其徵糧也令民自函其財投之府庫數淨者以榜徧告歸之其人初民爲吏誑有棄田宅鬻子女以償者至是相顧歎

訝遂輸將如恐不逮尤加意振人才型風俗士蒙其訓民革其偷者甚眾蓋公爲政之大指如此公之在臨晉也一日升堂聽政父老千百爲羣老杖幼攜徑躋堂上公大驚父老曰無異也吾儕小人久饜公澤而獻額於公也公三辭父老卒張懸羅拜而去其辭曰萬民食德云乾隆丙寅閏三月十七日公卒於臨晉年五十有四及柩還白衣冠送之郊外者數千人哭聲百餘里不絕嗚呼斯亦足以知公之政矣公生平未嘗納賂於民然亦無以餽獻上官有所執必力爭上官滋不悅嘗念宗祠隘陋重建寢堂俾得合族以祀其爲費微而所有已告竭公旣亡其子孫常至日不再食嗚呼公雖賢而抑沒於上官然上官亦嘗數數嘉其績矣乃卒滯公

下僚至不克庠廡其後昆而沒吾聞螢隨時而出蟲應節而鳴無
非教也君子苟心契夫屈伸存亡之理遇雖窮而怨尤可不作矣
所著有讀黃合志一編行世餘集藏於家配鮑孺人繼配許孺人
子一人棧乾隆丙子舉人陝西高陵縣知縣孫六人壬寅四月葬
公暨兩孺人於田西山之陽從弟之子定敬爲銘曰
山莽莽其相接兮草離離以白也閔志士才人於終古兮善莫之
發也漑大釜以烹小鮮兮君子以爲澤猶及物也抗鸞音以長嘯
於太虛兮幸吾節之未失也

右墓誌銘吳定撰

程密

程君諱密字用詳晚號退於其先爲歛之岑山渡人族叔錫琮故用六安州籍成進士君少從叔游因試爲州學生雍正己酉以選拔生當貢入國子監朝考高等得旨分發山東以知縣試用當是時世廟方重吏治凡選拔試爲縣而才不數年輒致顯仕人人爭羨以爲美塗君之在山東也初署鉅野歷城兩縣丞再署東昌府經歷值歲荒上官檄君往辦振貸君所至周察戶口必得實凡飢者稱其仁辛亥試限滿當奏授淄川矣已而聞母曹疾君召家人刺刺語頗得其母思子狀仰天喟曰母戀子而子戀官邪密乎爾非人子也明日泣請於上官願移疾去視母時巡撫都御史

爲成都岳濟承宣布政使爲漢軍孫國璽提刑按察使爲江都唐
綏祖並器君相顧笑曰迂哉書生豈有奉 上旨以知縣試三年
將卽眞矣而忽以疾去者哉君益泣請至於再三請上官皆不許
君則具牘署其上曰程密自考爲知縣力不及當改教諭去上官
益大詫已而察其誠也聽之去君卽去抵家母願而喜卽日病若
失君亦喜願母曰兒自今不復以官去母左右矣遂自號退於也
越二年癸丑母竟卒嗟乎人或父母篤老年八九十子在官不克
就子亦戀官不克去至於父母喪復不卽奔若淹滯以待父母之
恨至者今則有之豈今之人子者日益薄耶而君何以如是君居
母喪毀甚閱再暮而禫家人未嘗遷其笑六安人僉曰孝子君有

庶母生妹嫁吳而寡君迎歸而終身養之卒詔厥子嫁其二女甥
人僉曰君友有里之惡少倉卒曷君稱人中君輒避去惡少隨而
曷之君無所動於詞色里人僉以是服君之度君除母服竟不出
徜徉於八公九公諸山水間嘗三遊古南嶽一以雨登聞爲詩詩
清絕未嘗畱草後以乾隆壬申十月十日卒君生於康熙丁丑六
月二十日年五十有六君二子命長者秉鈞爲兄後次子秉銓十
三歲而孤旣長爲諸生余在江南時試有聞後來京師手寫君詩
之僅存者爲一卷而乞余書其行作書事

右書事朱筠撰

國朝耆獻類徵初編卷二百二十九補錄

守令十五

王時翔

先生姓王氏名時翔字抱翼號小山江南鎮洋人父墅水公高蹈海濱有潛德先生幼歲廢學年十四始就外傅一歲通易書詩三經爲制舉業及成童背人作詩古文樂府藏弄甚固同里徐龍驤族子策方爲高才生見而異之授以去流聲籍籍戶外屢滿而與同學友顧陳埈爲性命交嘗約入山講經世務兩家嚴命不許乃止游吳門受經於易亭楊公歸益自奮宗老蘆中公比其詩高啟選刻邦彥十人之作爲積薪集先生年十九與焉隨以第一補博

王弟子婦家吳郡之赤松山往依之擯絕人事學期有用嘗著三
史摭言數萬言上下千載論治亂興亡之故見者服其英辨又嘗
纂錄諸經義疏擷其精要靡閒寒暑無何省試屢躋北游成均徐
大司成目爲國士呂少司農讀其詩曰所謂御二龍於長塗也海
丙名輩多傾心交之試京兆薦而弗售賃柴車出都門意不自聊
連就閩豫學幕非所好也雍正癸卯甲辰再試京兆同考皆拔薦
而卒被落通江李侍講鍾峩薦修 三朝國史不就慨然南返扁
戶絕交惟與海甯釋至公爲方外友後以授徒往來吳郡北平黃
少宰崑圃寓居寒山之左先生攜二三弟子相與吟唱於江楓漁
火之間意甚樂之會詔求方聞之士興安刺史沈公起元薦先生

被徵入都授晉江令晉爲閩劇邑多訟與盜先生惟以誠感就質者必得其欲兩造俱歡或負嶠抗匿他人列卒收之不得先生命一介往呼立至數月改政和邑小民貧僻居山峽閒先生嘗微行詢民疾苦纖悉畢至力爲釐剔由是野無一盜獄無一囚乃葺署東偏之玉成堂日引諸生講課其中嘗得句云公餘開講席高館對秋山一時稱其雅量未幾遷甌甯地廣於晉事繁於政先生辨色而興夜分而寢日求所以牧民除鄉徵積弊人甚德之語見鄉徵記鄰縣有蜚甌獨無先是在政和西里患虎遣獵逐之一夕入古田山中二邑誦之比於虎渡河蝗不入境撫軍趙公國麟面引東漢循吏傳以稱遂遷漳州司馬先生莅三邑晉與政皆未及期

月甌獨二載初去晉士民挽之不得詣縣請見牽衣哭日負束薪
斗米鮭菜之屬叩頭置門外拭淚去趾相錯也就道傾城出祖至
洛陽橋三十里不絕多泣下士大夫歌詠其事或繪洛陽泣別圖
爲故實去政惜其去者如晉政故名宦推高公于公高有祠于有
碑乃爲先生設位高祠復立碑與于竝峙及去甌甌人奉以尸祝
爭建去思碑地遠弗獲與者攜石工增名碑陰之隙至無可增則
旁皇歎息去先生亦重念甌人徧召諸父老設酒果於庭與之坐
言家常事諸父老泣先生亦泣比行懸綵焚香餞於路者三十餘
所觀者填溢獲輿不得前晚乃解散司馬治南勝爲蠻峒適巨匪
葉揚結黨瀨子坑暴鄉里先生督兵役乘夜入山捕之遂平以積

瘁移疾歸乾隆元年大臣薦 召見補蒲州同知時布政使某由
大中丞降授恣睢暴戾性復忌刻屬官畏之如虎晉撫亦降心從
之獨與先生善人問其故先生曰程子云今之監司多不與州縣
一體監司專欲伺察州縣專欲掩蔽不若推誠心與之共治又云
令與簿不和只是爭私意令是一邑之長若能以事父兄之道事
之過則歸己善則惟恐不歸於令積此誠意豈有不動得人吾之
獲上以此而已三年遷成都守成都全蜀總會專事酬酢而司馬
某工諛樹黨互相軼結招搖納賕復與守幕朋比合己者助之否
則排之或陷以事全省爲動近邑尤受毒先生獨中立幕欲借事
作奸輒抑之司馬某深飲恨而官方自是一振乾隆六年議徙涼

州滿兵駐成都初兵燹後土曠人少成都食物視他省爲賤秦楚
閩粵之民多往歸之月增數萬人因之諸物騰踊昂於他省增兵
則民愈困且欲壞民屋築城以居人情大恐勢不可解先生立白
布政使閻公并草狀陳制府事卒寢漢州某氏有外遇懼夫知密
謀殺之埋其屍其弟聞之未悉控三載無驗先生一鞠而服得其
屍磔於市人驚其神先生與人接藹若春風遇事精明必不可惑
多此類也少好學初欲以文墨馳騁當世爲吏非所好然猶欲立
功會 國家承平憲章完具無以自見故常鬱鬱年七十卒於官
性狷介非義不染去漳州時行李蕭然漳民念之餽贖者蒲伏羅
於門先生憫其意但取米一掬松薪二尺而已平生多著述意小

不愜輒燒之有小山文集十卷小山初彙三卷續彙五卷後彙二卷小山詩餘六卷溫陵小錄一卷啟事偶存一卷藏於家子景元太學生亦嫻風雅種鶯粟詩有曰歸意已如秋月滿癡心猶種隔年花識者稱之

九畹子曰先生自爲家傳有云嘗慕著作承明之廬當時大臣非無知之者竟蹉跎以老命矣夫晚雖被薦奮志功名而僅以郡縣自效缺然無以酬其志世有抱負非常得無望先生而慨歎不置哉

右傳劉紹攷撰

--	--	--	--	--	--	--	--	--	--	--

國朝書獻類徵初編卷二百三十目錄

守令十六

勞孝與

夏詔新

施念曾

丁元正

邱天民

易宗瀛

任應烈

商盤

何夢瑤

孫濂

秦仁 顧滂

胡彥昇

甄汝翼

魯淑

馮大山

陳儻儀

戚弢言

常琬

唐效堯 鍾先麟

魏鎰

俞存仁

王瑋 陳文言

熊學熊 馬玉簡

余光熙

張興宗

補錄

守令十六目錄

皇朝通志卷之三十一

丁元正

杜思賢

國朝書獻類徵初編卷二百三十

通奉大夫前署江西巡撫江西布政使司布政使湘陰李桓輯

守令十六

勞孝與

勞孝與字元齋南海人少好游渡瓊海登羅浮絕頂浮江觀衡嶽著作甚富補諸生受知學使惠士奇與順德羅天尺蘇珥陳世和陳海六南海何夢瑤吳世忠番禺吳秋齊名號惠門八君子雍正七年選貢於朝次年修一統志分纂粵乘發凡起例多出其手編修魯曾煜爲總纂官甚重之乾隆元年舉博學鴻詞科試罷出爲貴州錦屏知縣時苗亂甫戡定屯田議起上官委之措置遂入

苗山由二嶺至山婆踰圭翁斗巴達琴台竭瘁心力七月將去山
民蟻行盤路而下曰公衣食我忍未及覩我飽煖而去也皆泣下
移知清鎮龍泉清溪畢節皆有廉平之譽卒於鎮遠有春秋詩話
讀杜識餘及阮齋文鈔四卷阮齋詩鈔四卷子潼乾隆三十年舉
人有孝經考異選注救荒備覽荷經堂詩文集武進劉星煒大興
翁方綱餘姚盧文弨皆稱之

右文獻徵存錄錢林撰

夏詔新

夏詔新字紫泥號樂村姚州人雍正己酉選拔歷官四川瀘州直隸州性孝友在蜀幾三十年所至以廉能著致仕歸財產與兄弟共之優游林下十餘年其倡修覺宮捐貲獨多躬親庀材程工復遭子至大理購運點蒼石爲廟中壯觀瞻祭器香鐙一時畢備捐置鄉會兩試卷金田嗣紳士議買裁缺府署改建書院金無所出公獨力任之且以家藏十三經廿一史呈送書院收貯嘉惠後學三姚無賢愚貴賤莫不佩其德行云

右滇繫師範撰

施念曾

夔齋以拔萃入成均奉大對 世宗憲皇帝命往廣東揚歷知緊
縣以課最得 召見 今上知其有母移之浙江再試二大縣前
後其十五年始由德清遷河南之禹州尙未赴爲前縣尉所誣解
官聽勘夔齋平生自好驟遭毒噬不勝其憤大吏頗知之深加慰
藉欲亟白其獄而夔齋已病不可爲遂卒於杭之寓寮君子哀之
夔齋爲愚山先生之曾孫學有宗傳不媿其家兒粵中巨豪憑其
城社大吏莫能誰何君杖而錮之浙東奸民煽動大吏欲勦之君
以靜填之而自息其才諳有過人者其令新會嘗葺白沙先生祠
又嘗遇莊定山後人於逆旅而周之姚江爲黃忠端公贖祭田皆

非今世俗吏所有也愚山先生詩集舊爲張尙書伯行曹通政寅所開雕而未及其文藥齋始盡板行之又爲之年譜乞子爲文以糾志狀之譌而補其脫先是中明先生羅文恭高弟也藥齋不遠千里以學錄寄予表章孔亟愚山先生與蔡士美葺宣城前輩詩爲宛雅藥齋續之予謂當稱宛陵羣雅不當稱宛雅藥齋曰何謂也予曰恐無以別於南陽之宛與宛邱也藥齋曰子乃吾先子之功臣其虛衷如此所至聚書雖在官衙不廢稽古嘗繙閱至夜分風吹其鐙熱及長髯左頰亦燔次日子適過其署相視而笑夫以常理論之以藥齋之勤慎和平愛民下士善氣所萃不應以凶終而竟橫罹憂患年甫踰四十二死無子其開雕年譜之成病已劇

讀子序僅一過竟未及覆視也身後大吏窮竟其事皆無有其尉
反坐以去然而歸裝蕭然斤賣及書卷平時賓客交游無至者惟
吾友杭堇浦一人不替歲寒之誼抵家太宜人亦遂以哭子死人
倫之慘備矣明年其兄來乞予銘嗚呼蘄齋蓋嘗請予表其贈公
隨村先生之墓言之頻年而怪其行略之不至也叩之則曰子淡
泊衡門而吾以先墓之文爲屬可無以將意乎然釜魚塵甑尙有
待也言猶在耳而蘄齋之墓已隆然矣蘄齋姓施氏諱念曾字得
仍甯國宣城縣人世系見愚山先生年譜生於康熙某年某月某
日卒於乾隆某年某月某日享年四十有二雍正己酉選貢生以
詞科薦皆於予爲同譜娶梅氏從子某其後也葬於某鄉之某原

其銘曰

國狗之瘦於今已雪其如近者不可復活敬亭之山以埋君骨

右墓誌銘全祖望撰

丁元正

丁元正字少微湖南清泉人雍正己酉拔貢以知縣用歷任江蘇如皋等縣如皋沙田多爭訟元正躬履丈量設魚鱗細冊猾吏有改竄悉置之法辦宿遷等邑災振及上海塘工咸稱善所至喜表彰名迹如皋許忠愍陳忠肅祠崑山歸太僕墓樊公祠吳江三忠三賢諸祠及楊主事廷樞殉節處皆捐俸建修年七十卒子姓乾隆壬午舉鄉試第一著楚辭輯注二十卷

右傳李元度撰

邱天民

故滕縣令邱君天民字次衡襄陽宜城人高祖瑜字鞞懷明乙丑進士崇禎十七年二月以禮部侍郎入閣三月京城陷死之而公之封公明忠夫人龔氏媳廖氏女二次子之陶在家先後死闖賊之難蓋癸未甲申間湖南北稱一門忠節者推宜城邱氏曾祖之敦選拔貢生祖峒父健中皆縣學生健中五子君次居長少能文補縣學生雍正八年以選拔入貢故事貢入太學次補教職是時世宗不次求才特詔天下貢士廷試後引見拔其尤以知縣用蓋異數也君得與選奉命發往山東試用初攝霑化坐事被劾後河東制府王公薦復起攝鄒平數月旋調陽信君爲政精明

強力案無畱牘吏不敢欺在任五年士行興民氣蘇時有老瓜賊出沒山東河南直隸閒爲行旅患積十餘年日滋蔓老瓜賊者專伺孤客一賊昵客同止宿誑客早行餘賊爲坎道旁俟客至蜂出縊客破其腹裸而埋諸坎攜賊以逸慘毒甚於他盜而地無尸迹死者家不得死所無可控賊不巢聚捕治不卽得乾隆五年巡撫朱公奉 上諭嚴緝擇幹吏八人責之君與焉半載後君訪得賊首楊姓誘之至其人魁岸駢脅年五十餘能數人敵庭詰之無懼色君念事無左證不可以刑好言詰之潛令人取其家所藏贓物示之色微沮卒不吐復飲之酒至五斗賊大呼曰今日願就死耳具吐平日殺人狀及年月日殺者姓名瘞屍所同黨某某漏盡四

鼓盡得實翌日飛檄分捕同黨盡獲三省謀殺五十餘獄皆具得所埋尸二十六撫軍具以報咸置之法自此瓜賊滅迹君之功最先是沂水有曹黑三人等謀死馮石二人一事獄久定君鞠瓜賊時賊具言殺沂水二人狀悉乃知殺人者非黑而黑已斬二人在獄眾護前令不欲平反君曰黑死誤耳一誤可再誤耶力白於院讞定乃出二人於獄前令及主是獄者皆獲罪於是民胥頌君神明而忌者遂眾旋以卓薦調滕縣失知府意被揭去官後巡撫方公阿公稔其誣請開復者再格於部巡撫準公至闕故牘知山東盜風賴君得衰息兩奏力薦得旨令送部引見而君至京未及見上竟以疾卒矣年五十子一廷錫女子二余客濟南君弟天

運以文來謁且跪請曰亡兄勤於其職以命之屯屢起屢仆卒齋志客死今生將扶柩歸葬幸先生賜之一言則亡兄死且不朽余閱其所爲慎刑錄齊魯謳吟二冊復詢之故濟南守劉君及久宦山左者徵其言信乃爲之銘曰

明德之後必有達人宜城邱相正氣一門胡厥後嗣湮鬱不振裔
我際會釋褐製錦雅琴愔愔龍泉刻刻萑苻朝靖萬戶夜枕去不
以罪豈媿家聲補贖動天遽促其齡洋洋東海流此令名孤櫬南
歸甘棠在魯遙望羊碑父老淚雨我志斯銘慰君幽戶

右墓誌銘沈起元撰

易宗瀛

易宗瀛字島民湖南湘鄉人幼工詩文年十二受知學政姚頤雍正己酉以優行貢成均大司成薦入慎郡王藩邸甚見禮遇乾隆丙辰舉博學鴻詞科尋選曹娥場鹽大使調東江場卒於官性孝友母病齧指瀝血爲文額以身代遂愈與兄弟白首無尤著有翠濤書屋集二卷昨非集二卷子祖杖字嘯溪由監生直修書館工詩文兼精書畫流傳 禁中 高宗御製有題易祖杖墨竹詩乾隆戊辰獻畫冊 賜方物更 命爲雨中山翠圖一時榮之祖杖由議敘官青浦縣主簿遷柳州府經歷署岑溪縣事著有淑南賦詩兩稟嘯溪詩稟

右傳李元度撰

任應烈

君姓任氏諱應烈字武承一字處泉家世山陰自王父大廣爲杭
贅婿遂籍錢唐考諱相潛德不耀生三子君其次也以後其伯兄
君生而穎異爲文奧衍深曲善體物情旣冠試於有司冠其儕偶
學使錄入郡庠旋食其米廩歲己酉舉於鄉明年成進士改庶常
散館授編修充一統志纂修官書成晉一級兩掌院以人才薦出
守河南之懷慶君精於心計民畏而吏不敢欺尤以振興人文爲
己任於懷仁書院中拔其尤者數人親經指授莫不得氣以去風
氣日上懷屬七邑幅員不廣而文章爲豫省之冠孟縣爲韓昌黎
故里其子孫向無博士君勸議上大吏請於 朝得蒙 俞允昌

黎之後有五經博士實自君發之歲己未以本生父憂歸里服闋
補南陽守南陽地廣民悍號稱難治未入境聞鄧州唐縣民偶乘
糧貴糾匪搶奪卽於途次遣經歷密授方略禽其渠魁餘釋不問
一郡帖然北來巨盜李會來宛句黨劫奪頻聞甚至有闔室被殲
者懸重賞購之立置於法南陽之盜自此頓息上官廉其賢能委
以全省捕務雖隔屬聽其節制前此未有也宛偶被水災單騎省
視廬舍有衝汨者槩予修葺秋禾可補種者槩給種粒向例賑務
必先請而後行君念宛距省六百餘里往返稽時則倒懸者無救
先發而後聞災黎得霑實惠大吏不以爲專也豫藩趙城密奏請
於河南南陽懷慶等郡開礦 敕下該撫查議中丞轉檄各屬皆

礙藩伯面持論唯阿君獨斷斷直抒所見略云煤炭爲日用所必需而計利究不甚大趨之者諒不甚眾又腳價卽關成本採取入山必不甚深稽查嚴密自無聚眾藏奸之患若銀鉛等礦其爲物也本不脛而走其聚人也自不疾而速禁之且不能止況招之使來乎況豫省沃野千里非若滇粵等省山多地少本業不足謀生者可比卽如南陽一郡見在務農之家大率人耕百畝此卽盡驅斯民而農之尙覺地廣人稀田功鹵莽更分之使爲礦徒趨利逐末其爲本業之拋荒必多矣前明萬厯中河南巡按姚思仁條奏開採之弊有八見今形勢不必盡如所云而農桑失業一條其流弊古今則一也條議內開滇省邊地可開何以腹地轉多顧慮不

思邊地僻處一隅遠方人諒難涉險而至若腹內卽屬四通八達之衝其聚眾也較易而河南居天下之中又偏近畿輔似更不宜輕爲嘗試且銀鉛有無衰旺都不可知貪不可知之利役本業之民而或至釀成意外之勢此固事之不得不爲總總過慮者也中丞卽據此議覆奏事得寢計典膺卓異之薦奉 旨回任候升例晉按察使副使旋奉本生母諱居廬買宅山陰道上宋陸務觀快閣遺跡在焉構傑閣三楹以復舊觀課耕教子便有終焉之志越中後進皆從受業合鄉先生之仕而已者倣香山洛社故事爲娛老之會飲酒賦詩歌詠太平聞者豔之同年孫宮允頤齋掌教戲山移家至越旋捐館舍遺孤才十一齡耳君首勸買田之議與娛

老會諸公先後飲助延師課讀歲議給脩月議給米遺孤未冠卽
列膠庠忘其羈旅之苦也君精神矍鑠每來湖上健於登陟近得
痰飲之證兩月中處分未了之事手書寄余願以一言傳其身後
飾巾待期神明湛定竟以九月十六日不起時乾隆太歲在戊子
也生於康熙癸酉九月二十二日壽七十有六例授中憲大夫配
杜氏例贈恭人先卒子男子五長伊太學生先卒次仁太學生皆
恭人出適室以胡生傑會稽諸生次倅次備子女子三乾隆戊午
科舉人孫泐紹興府廩生聞人莢太學生汪墀其婿也孫七法祖
衍祖震祖纘祖詠祖秉祖慰祖壽藏_{在會稽之儲墅}君所自卜也
臘月六日庚申諸孤將穿杜恭人墓合葬復理遺命前來乞銘銘

曰

君之生也與吾爲文章道義之友及其沒也鄭重而申久要之言
平生風義宜哭寢門病跼躄而鑑井幸吾舌之尙存件繫君之行
事巫咸許我誅盪叫九閻木葉下兮空山昏吹簫鳴咽開幽窀灼
楚焯兮筮襲及胖體合兮安且敦完吾責於後死俟士友之討論

右墓誌銘杭世駿撰

商盤

商盤曾稽人雍正八年進士初以知縣用 特旨改翰林院庶吉士習國書十一年散館授編修尋以養親乞外補授同知終雲南元江府知府盤自幼工詩初效樊南既而出入元白蘇陸聞樂府歌行尤瑰麗縱恣跌宕自喜少讀書於土城山之質園因名其集盤才情富贍篇什尤多刪汰之餘尙三千首爲集三十二卷

右 國史館本傳

會稽商君寶意以詩鳴海內者垂四十年乾隆二十九年冬君服闋朝京師 上特擢爲雲南府知府於是輦下知名之士喜君之見用而惜其有萬里之行相與招邀置酒賦詩以贈之明年調元

江又明年四月二十七日以疾卒於官三十三年余從軍過昆明則子某將以喪歸葬於會稽而請余爲幽竈之文悲夫按狀君名盤寶意其字明文毅公輅九世孫曾祖某祖某父某皆 贈中憲大夫妣皆 贈恭人君自幼聰穎五歲能辨四聲七歲塾師舉烏獸草木之名悉能成對十七歲補博士弟子雍正八年年三十成進士改庶吉士授編修乾隆三年翰林輪班引 見君乞外授江蘇鎮江府同知五年調安徽太平府同知十二年丁憂釋服授湖北施南府同知十九年擢廣西慶遠府知府二十一年調鎮安二十七年遭繼母喪去位再起卒於雲南距生於康熙五十年某月某日年五十有六配某氏子二某某君英雋曷儻以詩自豪美鬚

髯工談笑所至必傾其名士彈絲撮竹妙得神解解官居秦淮水
榭眷一姝麗姝臨去出白玉墜爲贈君把翫不忍釋手江甯令袁
君校過之投諸河君以防止水使人涸而出焉雖蹈惑溺不顧也
王西曹又曾寓金陵嘗乘秋月夜送客權舟汎秦淮聞水榭中簫
聲叩之一人于思攜鐙出見乃君也握手大笑重置酒達旦而別
世爲邀笛圖以寫之君負才瑰麗詩歌上做四傑下做元白炳若
列繡淒若繁絃揆以古人繩尺不爽絜黍故所著質園詩集尤爲
海內所稱嗚呼以君之才之詩既不獲雍容侍從以盡奏其長而
僻居蠻徼又不獲施諸政事浮湛中外姑自比於温岐杜牧豈果
性情之所寄抑或意有不自得而遂託於是耶然海內知名之士

言詩者必歸君言風流儒雅者必以君爲首則君可無憾於九原矣乃作銘曰

其宦也蠻陲其瘞也鑑湖之麋織雲錦兮成文詞一官偃蹇兮奚其悲

右墓誌銘王昶撰

公諱盤字蒼羽號寶意姓商氏其先汴人也世居嵯縣之繼錦鄉四山公始遷郡城代多聞人前明太僕明洲公少廷尉燕陽公皆登進士遂爲邑著姓再傳等軒公位冢宰爲公五世祖曾祖濟川公郡庠生祖頤山公康熙丙子舉人官嘉興教諭考今素公壬午舉人歷任達州泰安州同俱以公貴 馳贈如其官康熙辛巳十

月二十又四日公生於八士橋尙書舊第五齡就傅讀書於土城山之質園越七載乃出應試年十九補庠生與同學結西園吟社著小山叢桂集而髫齡所作新蟬詩紅葉白燕等賦已爲時豔稱雍正元年設特科公年纔二十有三山左何公世瑗視浙學拔公貢成均明年入京師周公學健任公蘭枝咸目爲國士凡名卿大夫文字之飲得公擊盤刻燭始相引重公灑墨淋漓每成四韻輒傾倒前賢而才子之名赫然布滿都下己酉舉京兆明年登第廷對列二甲以知縣用次日 特旨改庶常習國書散館授編修今上元年公三十五歲疊充八旗館國史館纂修官進經史講義數上封事戊午獻臨雍頌耕藉詩皆爲 上嘉納尋以祿養陳

情乞外任得廣西新甯州牧 上以其親老特改授鎮江郡丞詞
臣受 恩逾格前所未有也既而權海州牧及南昌令南康守調
太平郡丞甲子以督造戰艦居吳門二載丁外憂去服闋補施南
郡丞攝守篆壬申分校文武鄉試旋督糧艘北征甲戌擢梧州太
守公年五十有四矣既入粵而知梧州者已易官乃權鬱林牧及
太平守尋補慶遠府歷四年遷守鎮安又三年持繼母服去甲申
年六十四再補雲南守丙戌移守元江明年 王師進勦緬甸公
跋涉戎行夙夜靡逸感觸瘴癘受病日深六月渡清河水露雨如
注公露處馬家檳榔園一晝夜病大作歷旬日猶力疾理事晦日
渴甚嗽瓜一環痰壅而卒蓋以死勤事者也公游心典籍樹骨風

騷馳騁百家弋獵四庫著質園詩幾及萬篇宦跡所歷方幅殆徧
凡冠裳禮讓戎馬戰爭之區風月鶯花般樂嬉遊之地以及蠻鄉
瘴海鬼國神泉奇詭荒怪之境莫不遐矚曠覽傾液漱潤一發於
詩蓋取卷軸精華璀璨洋溢於呼吸吐納中遂併古人諸長使靈
源匯心錦機納手故能清新無窮垂老不竭爲一代有數作者至
在事有方人思其政從容馴致不尙刻深是以士女昌逸閭井謳
謠公以此得與庶僚寘從迴翔文酒於江山清宴之間以視束隘
迫蹙於簿書筐篋中者翛然自遠公好賢愛士天性眞摯見人擅
才藻若已有之壇坫風流俊彥景附而舞衫歌扇乞公醉墨霑漑
者輒滿其志嗚呼豪矣公詩初倣樊南旣而出入杜韓元白蘇陸

間樂府歌行尤瓌麗縱恣跌宕自喜交友徧海內最善者嚴遂成
袁枚王又曾萬光泰程晉芳戚友吳煥文其子璜幼富文詞特爲
舅氏矜寵晚年採 國朝郡邑人詩數千首編排品隲題曰越風
然而無出公右者

論曰昔人謂位有窮通不可滅者文章其著焉經禮樂而緯國家
通古今而述美惡非斯莫可誠性情風標神明律呂也商公仕宦
三十年身佩十三印列戟專城不廢觴詠有承平士大夫之風迨
老入師中盡瘁而死文人所遇克有終矣到溉曰有大才而無貴
仕於公則何憾焉

右傳蔣士銓撰

何夢瑤

何夢瑤字報之號西池廣東南海人雍正八年進士官奉天遼陽州夢瑤出宰廣西治獄明慎宿弊革除有神君之稱富於著述旁通百家而尤以詩名有芻芳園詩鈔文鈔莊子攷皇極經世易知錄賡和錄醫礪紺山醫案算法迪三角輯要移橙餘話宰岑溪時大吏將以鴻博薦辭不赴

右廣東通志張維屏錄

孫濂 秦仁 顧滂

孫濂字山傳江蘇無錫人雍正八年進士授靖安知縣當官獨立不阿江右州縣有漕者四十八南昌水次倉七十二有監司與旗丁比倡議當徙倉瑞洪可省兌費瑞洪瀕湖無障障歲虞漂泛且爲劫盜招濂起爭之謂倉萬不可徙又或議剗水腳費旣轉請且檄行濂列陳不可於大府凡數千言大要謂鑿給募運病在官官不能應勢且奪船勒夫病究在民語甚激烈於是二議皆得寢甫四載卒於官監司以下遠近吏民赴弔者填街巷皆泣下同邑秦仁字體國由副榜貢生舉茂異科初令滇之蒙自治漢獮有法會普思不靖仁嚴設戒備邑境帖然其後移東阿擢守福甯皆有殊

政仁少孤奉母至孝事兄秉豐尤篤倫誼顧澆字克家以諸生薦授福山知縣調單縣單民輕生小忿輒以死相傾陷利株染澆遇事立斷一無波逮奸民失所圖俗遂革遷知濱州請豁謙地通糧迂制府意會又有墾荒令濱獨無所報趣之澆曰甯去官無病此土遂假他事落職歸澆工文書法尤渾勁

右傳秦瀛撰

胡彥昇

德清胡先生諱彥昇字竹軒進士官知縣著樂律表徵八卷凡度律二卷審音二卷製調二卷考器二卷一一辨證多糾正古人之謬如謂十二律相生不計餘數五音相生不計變音又謂錢樂之三百律杜佑之十二變律蔡西山之六變律則又皆襲京房之謬說而失之者也古人之十二律旋宮最爲簡便卽如琴之七絃每絃必有三準其音皆與全絃散音合簫笛六孔並出音孔爲七而四字高吹卽五合字高吹卽六此其聲之高下清濁自然相應豈假於變律耶至於變宮變徵二音本皆在五音之外故以變目之今因仲呂以下之十律而皆如地形訓之說目以變宮變商恐黃

鐘變律縱與變律有分亦必不能獨成一聲先生是論可謂精且
審矣又謂荀勗十三笛是古人遺法今但作黃鐘大呂二笛而十
二畢具其法黃鐘笛用黃林太南姑應蕤七律大呂笛用大夷夾
無仲黃林七律作大呂笛之法但以黃鐘笛相較其黃林二律之
孔無所那移餘四孔及出音孔皆下黃鐘笛半孔共七調除黃林
二調相同外其大夾仲夷無五調合黃鐘笛之七調爲十二律調
較古人之云六十調及八十四調者亦爲簡易可從

右學案唐鑑輯

按胡公雍正庚戌進士

甄汝翼

鶴溪甄公以乾隆八年五月廿三日卒於里第其孤子鏞予同年友也授狀於予告卜宅兆有日矣爲志其墓而銘之先生諱汝翼號鶴溪世居平定自明迄今代有聞人祖大治以子貴贈徵仕郎翰林院庶吉士考昭康熙庚午冠省試丁丑進士以庶吉士出爲玉山令先生其冢嗣也生而端肅孝友天至玉山公歿於官署先生年未弱冠從數千里外徒跣扶櫬北歸哀毀骨立道路感愴庚子登賢書雍正庚戌雋禮闈對策賜進士出身未與館職或以爲惜先生曰讀書將以致用劉東山何人哉癸丑知甯夏中衛中衛枕賀蘭面大河左控靈武右接莊浪稱邊陲劇邑值軍興旁

午日不暇給先生與民休息親履鄉亭咨疾苦每幃帷所駐父老相望於道邑故多豪民武弁盤踞鄉曲屯官鹽權私稅爲商民患先生廉得其狀申明約束罔有得逞者蠹胥猾吏時時發其奸利事草薶髮櫛不遺餘力案牘皆躬自檢校或道中投牒駐馬立判之訟以大省先生諸所擘畫皆爲民計久遠所筦倉五徵糧七萬有奇芻蕘二十萬民不勝催呼擾先生因便制宜苛累遂絕時州縣爭言水利中上官邑有境土曰鳴沙洲故唐時鳴沙縣地也勢高印不可田先生以羚羊美利二渠皆乘勢利導此實勞費無益力持不可忤上官意引疾歸邑人相率泣送有臥道不去者先生居官不爲矯激谿刻之行惟務以德化人然雖溫然長者遇不可

嶄嶄不移嘗語人曰使吾希鞬鞫臆伺上官之色而進之則有所不能故其立身不可撓屈在中衛時興起文學士多嚮風王子歲分校鄉闈所得皆知名士歸田後足不詣公府日與弟子杜門著書以自樂獎拔後進如恐不及稱鄉祭酒幼好爲詩著近體若干卷歷宦後徧探諸名勝詩日以進人謂得江山之助云銘曰
峩峩甄君淳德載凝含章蘊粹抱璞懷冰一麾出宰清公著稱栖心古烈百廢聿興撫民若孩姦宄克勝邢之張耕懷之譚澄有巍高邱颯發神騰孔安孔固以福雲祚

右墓誌銘夏之替撰

魯淑

故黃巖知縣耘莊府君以乾隆三年二月卒於官歸櫬之十六年配楊孺人卒諸孤始克奉其柩與孺人合葬於里中之荷坪又十有六年孤仕驥謂其嘗所從遊之族弟仕驥曰先考妣之葬卜家以時月不利弗納銘今將賴銘於子子吾所與也於吾父母事悉子又習爲銘章弗可以辭仕驥再拜受命謹按府君諱淑字靜陶耘莊其號爲康熙乙酉舉人封文林郎黃巖縣知縣懋田公諱亭之冢子大父諱瑗康熙乙丑進士由翰林歷任通政司右通政府君之生通政宦方顯而府君生十年失恃自幼已習知艱苦能力於學雖貴介子蕭然若寒素以是得父母心雍正元年以諸生

拔入太學己酉中江西鄉試第五名明年成進士發浙江試用初
任泰順積能調黃巖縣黃巖故劇邑財賦甲浙東八郡東南瀕海
總兵鎮之軍民襍處淫縱姦宄不法之徒亦時出入其間府君至
調和文武爲政以飭風紀厲廉隅爲先邑有項貞婦徐氏貧無以
活府君刮俸資之歲時存問其他問民疾病興革惟所欲斷決訟
獄如神明任三年民畏其威士安其教某年歲大祲請賑於藩不
許且檄飭府君卒直請制府得許而後已邑有八閭宋朱文公所
建歲久沿廢府君訪其故蹟復之邑民更號爲魯公閭嘗丈田均
賦雖劇寒甚暑必親蒞吏不敢欺爭端以息以積勞得疾民間之
走相禱也卒之日巷哭城內外皆縞素有善繪者各以意圖其像

或以規諸孤有像額者眉者兩額者未幾更醮金爲祠肖像其中
四時祭祀至於今不絕孺人同邑國子監典簿楊君大誥女才而
知禮教事舅姑如府君之事父母和諧叔妹娣姒數十人人無閒
言初府君之官懋田公以少子眾不欲以家累累府君不就養孺
人亦不往及府君卒孺人痛不得一訣哭泣無時日常腫終身衣
飾墨素足不踰闕雖爲子取婦未嘗就饗懋田公後府君十年卒
於是孺人益鬱鬱顧諸孤常流涕不數年而遂卒府君卒時方三
十八孺人得年五十有四子三人冢子卽仕驥乾隆丙戌進士次
仕驍次仕駮冢孫志旦諸孫某某府君少年有文名鄉會墨義
出土墓效之在浙凡兩充同考官所得皆知名士銘曰

士惟賢能亢宗本既大支宜隆吁佛鬱兮我公胡不有於其躬將
爲善者食報久而益豐耶其必之於冥冥之中我鏗此辭藏於幽
宮後千萬世視此以無窮兮噫

右墓誌銘魯仕驥撰

馮大山

君諱大山字維嶽五峰其號姓馮氏海甯人也六世祖九泉由赭山徙邑東園花里考諱世瑜世業儒君自幼資稟穎異狀魁奇卓犖有成人之度年十五經史百家言罔不畢究二十四補學官弟子旋餽於庠學使馬公豫講學須宮君條荅經義多發前人所未發公心異之相與辨難至日昃始罷旣而延之使署引爲忘年交君性素方正自講經譚藝外未嘗干以私公益加敬禮舉雍正己酉鄉試庚戌成進士發江南頭等試用赴江蘇未月奉委清查各屬積欠及賑高郵饑並以幹濟稱會當迴避兩江總督尹公繼善知君才請改上江宣城令適境大旱潔齋致禱竟致甘霖歲有

秋政尚廉明惠威兼施胥吏不能因緣爲奸無何以越獄呈誤落職時因公出例子限一年有大吏歛望於君不待期登之白簡君了無愠色曰自我得之我失之又奚慊焉遂畱宣協緝雖去官視赤子病瘵疾苦惻然若切於己上官遇有疑難亦往往就訪君傾意竭誠苟可爲斯民興利除害者無所辭避宣舊有典賣軍田民戶於常賦外畝輸幫貼贍運三分雍正七年奉文飭禁衛田私典者咸令贖還時本府以民業軍田爲日既久且多家墓室廬不無紛擾議於幫贍外再加津貼三分允行立碑迨十一年邑監生吳某以不願津貼爲辭糾眾鼓譟毀其碑一邑騷然市門晝閉上官聞變將窮治之又恐激成大獄舉張皇莫知所措江藩李公素知

君密札致詢君爲宛曲調劑罪止其首脅從者槩予未減事平全活不下數千人畱宣三歲以暇日教授生徒士遊其門者甚眾若梅理梅立本駱大俊楊廷棟梅子援皆連掇科第一時人文稱極盛云去宣日老稚攜壺漿攀轅泣送馬首幾爲不前乾隆己未復任歛之婺源縣未幾以勞卒於官其治婺壹如在宣時邑故瘠土境有五嶺質成者踰越嶮阻動需時日兩造具備復多守候之苦君下車昕夕視事斷決如流滯臚一空大障山有虎屢傷人列任不能捕君親率從騎往遇虎令直前搏之瑟縮若服罪狀竟禽以歸自是四境無虎患道路頌神君焉聽獄一以理斷屏絕私謁汪氏爲邑豪族有朱生貧士也聘於時汪慕女色強委禽焉母利其

財兩袒之朱訟於官前令皆庇汪連年不決君閱卷卽日追問汪族有爲君房考者乘閒爲之緩頰且陷以利君正色曰某承命守茲土惟知奉法盡公上不負吾君卽所以報吾師也他非敢聞命卒判於朱歲舉童子試拔董生文炎爲案首未及院試而卒次名張圖南請改冊爲案首君愀然謂董半生力學未博一衿今骨肉未寒遽削其名吾弗忍也謝卻之院試圖南竟不錄然感君居心之厚益奮志勵學甲子領鄉薦歷宰桐廬秀水二邑擢杭州西海防同知猶時遣人存問君家不絕其至誠感人類如此卒之日室無長物篋無整衣士民哀思祀之名宦祠君性純孝奉母馬孺人竭盡色養在官日雖公事鞅掌不少違晨昏之節所至振興文教

到葵卽修紫陽夫子祠邑儒江慎修永續學通經著禮書綱目八十五卷流傳未廣君手爲譌序並繕錄一部進上而別鈔其副藏於家蓋其吏治原本經術故多卓然可觀非僅以刀筆從事爲能者也

論曰爲身舞勺之哉側聞長老言言鄉先輩以循卓著必舉君爲稱首頃與君孫念祖交迺益悉君之生平念祖手行狀句爲之傳竊惟馮氏在漢世門才爲最盛若左將軍奉世以治春秋起家其子吁王立俱通經爲良吏所謂大馮君小馮君者當時播諸謳頌君可云克紹家風矣君手歷仕日淺不獲盡其所施爲之掞擊若圖南問一言之善至於終身不忘並可著爲世勸云

國朝通志卷之二十一

右傳吳崇拱

三

陳備儀

凡官州縣者無論遷調及被議去其吏民題去思於碑或雜進衣履挂銅木斗於其聽事先帝深知其弊嚴禁絕之而其人之真以顯何也彼遷與調者其勢固在也卽被議以去雖失勢而其好名之心與力圖未可測也惟至於身死而人思之不置甚乃其歷任所治之人皆思之不置則其爲循吏始信吾家知縣備儀字夏紱由雍正八年庚戌進士作宰垂二十年南北各三調任最後知黟縣事頗不習水土故不迎親官署而畱妻子在籍侍養子膺笏等歲一至省父或閒歲相代乾隆十有七年以勞勩卒官得年五十有四卒之後四日黟父老數千人走數百里以崇祀名宦額

請於其郡太守以故君之賢聲至死而益彰君之初任於北也雍正癸丑知安肅縣事乾隆戊午補懷柔中間以母憂去前後在任纔三年然其去懷柔調密雲懷人巷哭而密人相慶於道蓋二邑犬牙相錯彼有所聞見以信之其素故也所任密雲五年以他故去職乙丑起知江南鳳陽縣未浹歲調懷甯越五年調黔縣其在懷甯之歷歲與在北之密同而所得於民者尤深黔之父老既得請於太守將上之大吏而奏之 天子同時懷甯之人不期而會顯於府者亦以千數蓋有似以得祀君爲榮且樂者吁觀民情之善此則君之魂魄毋亦思樂其鄉而安於血食時其晴雨以福其老幼如古所傳述否耶理或然也按狀君諱儻儀字夏紱父□□

先生 敕封文林郎如君官母荆 贈孺人子膺笏絳縣訓導次
膺紳膺錫係三人君之卒封君在堂痛之甚明年六月遣其長孫
來京師款子門長跽而請曰不孝將於某月日藏先魄於某山之
原乞先生念同牒之誼志之曠石敬將王父意陳不腆願毋辭予
歸其幣而諾焉且爲之銘銘曰

維畿紫邑實繁旗柱 國初畫界令毋侵疆旗不諳農取租出佃
或退居民售受兩願久之在旗則指厥初而民黠者影射爲欺訴
牒如蝟步尺告瘁譁動 九閭勘煩朝貴惟君之賢兩造稱便民
無壅情公可化頑皖江之俗免身殺女君爲活之動以苦語亦有
愿氓埋骨振窮君重勸之暨碣紀功自其筮仕三十加四由北而

南六更厥治四鄰苦蝗弗犯循良禱雨輒應人比法王匪徒佛之
又呼爲師口講指畫日月爲期何期日月遽爾奄忽燕山風號吳
江雨泣緬君之靈比戶薦馨神嗜飲食其樂如生

右墓誌銘陳兆崙撰

咸弢言

君姓戚氏諱弢言字魏亭一號研齋父以 賜研畀之卽自號也
先世浙江東其遷德清自諱鄉者始七傳至君父諱麟祥歷官翰
林院侍講學士五子君其次也生而嗜書襤褸笑見書輒止及
就外塾不煩講釋曉徹大義翰林胡彥穎吳家騏皆其師學士所
交如徐用錫陳鵬年輩多碩德鴻才君幼侍得聞言論博覽載籍
康熙己亥補縣學生庚子舉於鄉主試四川李紱浙之名榜也是
歲學士以事謫戍甯古塢君乃隨侍戍所聞之甯古塢去鸚哥關
一千八百里其地有一土阜初名之特後轉爲臺再轉爲塢固無
臺無塢也掘地得正隆錢或謂卽金之天會府寒暑不時與內地

異君既扶持久學士遣之會試雍正庚戌與仲兄振鷺同登進士是科一甲皆浙人周霽沈昌宇梁詩正也而君以奉 旨派福建學習其時有進士學習知縣例遂知連江縣事連江叢山環海故多虎亦多盜君嚴法捕之盡於是勸農桑興教化編保甲務相感以誠相說以信賦惟正供訟無畱牘又設普濟堂育嬰堂義冢濬城河凡以贍民之生而恤民之死也乾隆丁巳山水發大風雨縣治且溢八月拔蛟颶不止南門水高丈餘君肅衣冠拜禱風止水勢定於是上請捐銀穀振貸並請捐田賦其水所衝陷者得永蠲除明年又饑募巨室捐米平糶四旬餘民以活嗚呼斯亦足以徵其治行哉縣有東湖隋開皇閒義士林堯捐田瀦水所成隄之以

溉田四萬餘頃千餘年矣侵占淤塞土墜崩豁洎水災後內隄蕩
然外隄復決開二十餘丈君亟上請乃加石築土修二百四十餘
丈廣四丈隄成上植桃李雜樹下種苜蓿立祠以祀林壘民歌誦
之又修學宮設義學修縣志之修於元而久不修者連江之人方
樂君之靡事不舉而相與爲連江幸也 皇上初元 恩旨赦還
麟祥君益感奮日發言其何以一心報國乎將迎養罄橐遺弟朝
桂歸畢請昏嫁事於是築室三間聚書其中以迎養其父連江人
曰吾侯孝子也庚申冬學士病劇不起君居喪幾毀蓋自庚子以
還奔馳鬱轉積患驅逆至是扶喪歸營葬未成而疾大作以沒四
十有四歲連江人聞之相與率私錢祠其侯於東湖之上嗚呼君

之一生可不謂難乎其於道也蓋庶幾哉今歲辛卯其家乞按其子更生所具行述作傳以俟族譜之收采

右家傳錢載撰

戚孝子名茂言字魏亭德清人父麟祥康熙己丑進士官侍講學士以納故禮部尚書蔡升元妾被劾學士故隸尚書門下部議援卑幼擅娶尊長妾爲側室例發遣甯古塔時孝子已登賢書隨父往茹氈萬苦畢嘗孝子朝夕左右無倦容渠帥成敬禮之歷五年雍正庚戌會試孝子欲勿往學士強之行道出賀蘭山下驢逸去被盡失孝子徒步走會日暮迷失路途有老人持鐙火導之追及曉老人倏忽不見孝子嘗言宵行時北風捲沙林木怒號

狐嗥虎嘯之聲不絕於耳自分幾無生理也及至京師襪穿履脫
兩足僵裂沃以溫湯半日始醒赴禮部投名去試期僅二日主者
憐之得入闈竟以是科成進士分發福建學習三年令連江有聲
乾隆初 詔刑部行文赦諸罪人戍邊者學士格於吏議不果赦
孝子聞之頓足泣欲去官或告之曰不念得少俸以爲菽水計乎
且機會尙可俟也孝子不得已視事如初未幾制府郝公玉麟入
覲孝子往送伏地不起叩首乞代陳郝公難之孝子膝行前持郝
公裾號泣言曰噫言所以緩須與死覩顏而食祿茲土者冀得一
當明公意雪父冤耳今明公置勿理復何望哉引所佩刀欲自裁
郝公愕眙亟止之孝子旋取所上書出袖中皆刺指血爲之郝公

素愛孝子能吏事及是惻然動容許諾比入告 天子憫之特旨
放學士還學士以迎養至連江部民擔酒爲賀孝子與之飲盡歡
而罷益勤厥職以博學士歡明年學士病卒孝子輿榱歸哀毀骨
立未終喪而卒時乾隆七年九月二十二日也年四十有四無子
以兄子更生爲後方孝子觀政福建時予與之共邸舍者二年親
見孝子悴容寡笑食止粗糲卻梁肉弗御予怪之曰塞外高堂求
此不得也言之於悒夜臥草席擁布被往往聞搥牀飲恨聲蓋雖
寢未嘗寐也嗚呼可悲也已孝子治連江築隄修誌多人所不能
爲者今不著

右書事章有大撰

常琬 唐效堯 鍾先夢

常琬字英懷湖南長沙人雍正庚戌進士知洧川縣捐俸建洧陽書院置膏火地四十餘頃縣賀子坡小河與尉氏鄆陵中牟扶溝界連遇淫雨衝決惟尉氏民利在深浚琬力爭於上官得勿浚四縣民德之再勸金山民刁悍多私梟窮民死不旬日匪徒羣劫其婦去名曰拆婚偏令改嫁琬痛懲之俗頓變前後在官二十年屢平反冤獄罹大辟者祇一人分校河南江南鄉試所得多知名士著有金山縣志樓山文集一卷詩集一卷與琬同登進士有唐效堯字衡尊辰谿人父歲貢靈皋年六十始生效堯幼穎悟七歲能詩既登第以卽用知縣分發陝西時方修省志大吏以效堯博通

工文屬爲編纂補白河知縣克己便民一切求索累民者皆禁革
之十二年告歸縣人板號載道年七十卒著于隅集三卷又雍正
庚戌舉人鍾先麟字振公溲浦人授長葛知縣廉明有治狀父喪
歸服闋會 高宗南巡識其賢 召赴行在奏對稱 旨發往廣
東知臨高縣其治一如長葛分校己卯鄉試得人最盛

右傳李元度撰

魏鎰

魏鎰字金生號海若先世自山西洪洞遷於鄭明通政司右通政諱尙賢壬午殉難祀鄉賢者鎰高祖也尙賢生希微希微生繩祖繩祖生世盛世盛生宣化宣化生鎰鎰之生其外王父夢偉人因以孫女許之鎰十一歲卽能文年十四知表揚六世祖之忠節出其遺文鄉之宿望多器重之鎰由州學生入國子監以史館議敘授貴州威甯府通判改大定尋擢知黃平州事會雍正八年烏蒙之亂苗賊旣陷烏蒙而黃平之台拱苗亦相繼叛鎰於任官之始瘁力於山川險阻之中出則資糧梁齋馱馬入則安輯流亡蘇其困軍務以時濟而居民無剝膚之災當賊燄方熾之時長官坐困

而鎰獨用其土官何模策檄模引苗民於冷西間道乘其不備而攻之以 聖主之威靈小蠢不旋踵撲躪而當事者以師出無主不敘模與鎰之功則鎰之居成功而不言較之其敬事守官尤下述也鎰入 見時苗民復動署事羅某與何模死焉及鎰至黃平賊稍稍引去上官以是仗之而軍需所至亟爭其病民者不應上官亦或聽讒焉然鎰居官介然無事可中司寇張公照視軍黔中制府以事齟齬劾其糜費帑金被逮授鎰指鎰曰凡所報銷皆司寇未至時費也竟以實報遂陳疾乞休不得所請上官易去乃得請鎰官黔時有同官某與撫軍善將爲先之弗荅歸里後貴州藩司陳某過鄭州見州守曰魏君居官有法可往詢也守曰魏君家

居余不得一見可咨以吏事耶鎰世系年譜其門生王楚士述之
其墓表翰林院侍讀楊公述曾述之不備載撮其要云

贊曰余讀鎰年譜載其家居早起洒埽一室几席供用必潔曰吾
以養心也心靜則事至而不淆其遇繁劇具有條理固宜至息民
之困黔之人至今思之不忘蓋當其知表揚先祖之日志足見矣

右傳陳浩撰

俞存仁 王瑋 熊學熊 余光熙 陳文言 馬玉簡

俞存仁大興人雍正中知寶慶府布衾敝服無殊寒素十二年城步徭句誘綏甯徭據險作亂存仁督兵勦捕深入窮搜積勞致疾卒貧無以殮士民傷之雍正時湖湘守令著聲績者又有李珣濟源舉人知辰州府會貴州九股苗叛沅境戒嚴巡撫鍾保雅知珣幹吏檄署辰沅道事駐沅州珣勒兵堵禦卒無警時黔民避難挈家奔沅者數萬人珣議發廩以振守者有難色乃黜眾議開倉碾米令知州朱琰度廣場爲草舍數百椽居之按口給米全活甚眾王瑋太平人任乾州廳同知置學田設義塾教苗民子弟人漸知禮義乾隆四年葦衝排楚諸苗出劫瑋會營將擊破之苗復聚

眾阻河劫糧官兵進討羣衝苗抗命而他苗陰欲抄出官兵後來
攻道經砦陽璋已先練鄉勇守其地諭以利害懼而退羣衝苗遂
爲官兵所破自是不敢復橫璋益以恩威濟之邊境大治乾隆十
年擢知寶慶府加意學校卒於官郡人祀之遺愛祠熊學熊南昌
舉人知湘陰縣經水災穀貴甚上官平其值而益昂學熊乃出
示益增其值遠商聞之踵至不十數日價賤於前嘗閱前牘有寡
婦僅一子被誣論死欲生之幕客持不可學熊慨然曰甯失吾官
豈可以免絕人嗣已而上官以案久定詎以利害學熊力爭之卒
得殺人者而寡婦之子以生調知長沙縣時巡撫方執奸民興大
獄繫無辜者數十人學熊訊而釋之巡撫歎以爲賢余光照大治

人知武岡州先是知府某將於州增設稅關州人籲免不得光熙
固爭於大府得寢其事光熙亦坐是免官去之日民皆泣送陳文
言奉天舉人知攸縣譚將軍祠號靈異民男婦燒香雜沓文
毀祠火其像調知綏甯時議修河西橋以水深沙厚力無所施文
言親禱河干越三日水涸橋成人以爲正直所感旋擢知靖州馬
玉簡長樂舉人知安鄉縣縣頻大水民居陵阜官吏以桴爲家匪
徒架十百小舟刈高田禾稻乘閒掠商民貨物玉簡率兵役擒捕
皆逃竄山谷難民得無患時人食草木玉簡詳請發振撫字甚力
卒於官士民哭之哀

右傳李元度撰

按俞公雍正八年官寶慶知府○又按篇中李公珣官終山東按察使列是編疆臣

匡身... 卷之三

十八
茲
不書附

三

張興宗

君諱興宗字冑堂先世出自宋景炎太傅越公世傑之後越公自臨安抗議背城一戰不得以所部東渡駐慶元定海之巾子山爲觀察計元使降將卞彪說之越公執而磔之山下會陳丞相等起奉端宗越公遂航海赴之輾轉閩粵竟殉崖門而慶元遺民爲公立祠巾子山上公長子出百死亡命以慶元遺民多念公者遂來隱居鄞之張華山聚族四百年潛德不曜自君之大父以才諧邀遊湖海國初勦鎮大臣多延之幕府蓋嘗僑居山東暨松江者久之而歸甯至孟縣君始通籍以循吏稱君爲孟縣長子以高才列國冑當是時張氏家門正盛甲第田園殷然而孟縣醇以篤行

貴不驕富不侈力敦孝友勤施族黨遠追古人義田之風設爲家塾以課族中子弟諸一切事宜皆以君督之君能仰體厥考心以先諸弟滌除世俗膏粱裘馬之習吾鄉士論翕然以爲漢萬石君不言而躬行則孟縣似之而克肖其家風則君殆郎中令之流也君旣身綜家政無豪髮私於己諸弟亦化其誠推黎讓棗雍雍怡怡顧君坦懷待人不逆不億遂以是爲人所負來連往蹇驟耗失至三千金而門戶益大洊遭死喪支吾益困以是家漸落計君資格亦應蚤得官而中遭沈滯又罹太君之變至雍正己酉始得入都就選人籍則君已蕭然成窶人矣次年天子召見殿中以爲能遂發東省試用今都御史唐君峩村時方任東臬一見識之命

以查賑而同賑諸君大率欲節省賑穀者多體恤饑民者少東臬
親出驗視又爲求賑饑民所聒擾頗激怒君宛轉調停覈其果有
浮冒者汰之餘皆疏通其戶口而增給之東臬大喜以爲能善會
其意且補其過也役竟言之署撫王劉二侍郎試知堂邑君之莅
事也首入獄見其中別有屋數間詢曰是何人所居吏曰前令沈
君去官監追虧累所建也君瞿然曰戒之哉乃君之作令則實有
過人者其初受任也見所徵錢糧皆憑戶房吏所造赤歷流水簿
而幕友不過覈其大槩苟求無錯而已未嘗一一查對也凡一切
摘拏大戶旬消流水皆出吏手因得以舞弊絲毫稍增而爲釐釐
稍增而爲分漸積而多吏因得將已戶漏輸或私收大戶所納肥

己而以民間之羨抵之若大有餘則不肖之官不肖之幕友分陷之是固天下之通弊也君別令幕友之精於會計者將赤歷逐戶查對覈實句消摘拏皆自內出而所司之吏不得與吏稍稍怏然歲終猶餘二百七十餘金吏亦故欲以試君也君念所餘無從給還仍將所拘之逃戶與有糧無地之賠戶得其最甚者免徵二百七十餘金貧民受恩不知所自而所司之吏亦內媿不敢有怨次年乃令赤歷以毫爲止差案無得增一毫者然歲終猶餘百五十餘金吏以舊年之均抵及貧民也故令其所親或延挨不完以圖被澤君必欲絕之乃於次年赤歷以忽爲止吏稍稍窮歲終不過十餘金君令存之庫以備公用而嗣後浮徵漸絕君因歎司牧徵

輸之難不肖者與吏共爲奸不習爲吏者聽其出納使大吏於每
州縣提取赤歷稽之人人皆可誅也君因念此查賑之役皆由保
甲之法未善若保甲果精豈有貪狡混列老弱漏遺之患乃實心
行之周詳審悉別見君所著清釐堂邑戶口記其法最備可舉而
行之天下而其後疊有水旱被賑惟堂邑最易理盜賊亦爲衰止
則明效之著者也境內自正供外尙有餘稅其上之布政者十三
而司牧多自潤焉君隨繳之罔贖遺者初君里居嘗歎近來
司牧聽訟之失不論大小事宜動經數月甚至沈閣數年不結鈔
詞有費出票有費拘犯有費挂牌聽質有費聽質上堂又有費蓋
自六房兩班差役以暨行杖之徒無不有費而尤可訝者有所謂

賞紙之例一票出則差役爭營求得之夫以賞差爲名是導之需索也尙有人心者乎所以一訟結能蕩中人之產及君之任其無理呈詞定在三日內出票而鈔詞出票拘犯之費免簽牌時量其路之遠近親筆限某日帶訊違者責而挂牌之費免屆期不論早晚卽爲訊問銷案或有須覆訊者多卽在次日或甚冗則面諭以日期而遣之而遷延守候偵探指撞之費免差役畏君之嚴營求屏絕需索亦衰止然君則曰此輩如鬼如蜮謂竟能使之一切風清吾未敢信其然也盡吾之心行吾之法庶幾不至決波倒瀾乎聞者以爲至言堂邑人命之獄頗多君於相驗尤謹所全活申雪甚多事繁不能悉記乾隆二年東省復歉於收大府援以工代賑

之例題開武城臨清夏津一帶運河君方署臨清牧所轄役夫二千三百餘人共計估土方三萬三千七百有奇日則步行河干刻無停晷夜則握算計工乃所發帑銀在君境內勵得二千七百兩不足以給民之食而督促甚急君大憂之歎曰以工代賑周官之美政也而行之今日大有累民之處無由上達大工既興人眾米價益昂老幼之不能赴工者先受其累將謂壯者之赴工可以養及其家乎則工值幾何且如築城築隄可但以土方計工今開河必兼水工如此次河身需開二丈四尺初開在平地一人一日可得土一方受值裕如及至七尺有餘高下懸絕二人竟日僅得土一方則所受之值不敷至一丈五尺以上三人竟日僅得土一方

而水已橫溢四出又別需人運水其運須樁須壩須水車然後得
運土而運土者往返八十餘步人益勞既深二丈則三人竟日尙
不得土一方而所受之值不增何以救飢遂日夕逃亡勢莫能禁
大吏始事所計但及土方之工既束於成數欲稍爲變通則土未
及半幣銀已竭必至誤工司牧者之資力又甚無幾卽捐以急公
終不足雖以身殉之亦又何益不得已自身先捐資以及富民之
稍有餘粟者苦口曲意令之助工給食勵而克集向使初估之時
豫分計水工土工人工則官民不累而工易成而又需別謀所以
賑其老幼之法則事無阻然大吏必不肯委曲及此以滋重費故
爲民者往往反以累民此惟君身歷而知之而予備詳之而不厭

者以爲足令天下後世之臨事者鑒於此而動其心也然是役竟而君遂以是積勞成疾右足爲汗溲所傷屈申不得自如初君之試事期年而眞授既考以最制府平越王侍郎將薦之會去任不果北平黃藩司又欲薦之不果乃歷攝臨清高唐館陶皆有聲其在館陶東臬白映棠方以武酷臨下有屬吏曲意承之卒遭謾罵勒令去官者三日以事屬君於曲直大鑿柄君獨抗之怒甚然卒以君理直不能有加富人以八百金爲莫夜壽拒之未嘗以告人也而富人以語其所親於是始盛傳之其餘善政之及民者不能條舉而件繫然觀於其大者亦可以見君十有三年居官之略矣君旣以足疾欲乞休而同城寮屬有惡其持正者請託多所不遂

乃構之大吏遂以去官堂邑之民譁然攀轅塞路不可遏抑 天子亦念君勞再 召見謂尙可用將令之直隸而君奏對畢疾動蒲伏不能起乃 賜歸其命也夫然君自少年承先人之餘履豐席厚中年喪其資斧殆盡老得一官堅持古人之節釜魚甌塵解組南下家無長物僵臥一室有爲寒素之士所不堪者雖枯菴之遇亦關於命而君之不媿於古者在是矣君生平無事不歸於忠厚前堂邑令朱君卒於官所欠官帑二千金君爲委曲設法抵之虧及千金太守以屬君然更無可謀乃以其養廉償之又以二百金贖其眷屬而歸里中管生子然一身爲之納筭今遂有後生平所遇非意之事橫逆旁午每委曲謝之尤惓惓欲廓大先人之義

田而不克晚年困甚然猶時時不能忘情其操履醇篤從無大過
閒有一二薄物細故自以爲未當者垂老猶向子弟言以爲悔欲
使子弟戒之蓋亦近於慈湖內訟之學者與君生於康熙己未三
月二日卒於乾隆庚午正月五日身後幾無以爲殮娶胡氏杭州
府臨安縣訓導德裕女再娶陳氏大理寺少卿紫芝女三娶項氏
戊子舉人埒女四娶邱氏諸生正恂女男子四長嗣鏡國子生先
卒次嗣鐸國子生次嗣錫嗣銓女子四孫男三孫女四諸子將以
卒哭後合葬君於先孺人之兆而乞子爲之狀子自庚戌與君邂逅
近京邸其後音問雖不甚接而從東方士大夫聞君政聲甚善嘗
致書欲捐君清俸以修太傅越公巾子山之祠君復書甚喜願乞

稍待其力而竟弗能副也及其歸君已足疾杜門予亦終歲奔走
不得時見然能知君居家居官之心迹足以有所暴白於世而惜
其命之困卒無有能援而振之者以至於阨窮齋志而歿而猶欲
以文字之力稍爲君申沈屈於身後者莫予若也是爲狀

右行狀全祖望撰

國朝耆獻類徵初編卷二百三十補錄

守令十六

丁元正

丁公元正字少微號湘亭湖南衡州人我吳賢令尹也自雍正庚戌來尹於吳治繁劇邑凡六乾隆癸亥宰吳江三年例議改調己巳春東軒相國奏江南治行以公名上旋丁太夫人憂遂絕意仕進去官日囊無餘資著書以老自號一峯又號拘迂道者初公之起家縣令也非公志也公年二十而贈公歿事母洪孺人至孝幼弟五人皆自督課至成立三登賢書一入詞苑迺公十舉制科不第康熙庚子已定元四日詭失去時授徒關中張撫軍所從耘梁

王先生游深惜之刻其文傳世雍正己酉公年四十六中拔萃科
世宗憲皇帝特恩分發江南公於是以儒飾吏而以循良著歷任
如皋新陽靖江丹徒蕭縣吳江縣事所至治獄多平反性愷悌愛
民下士邑中人有慈母神君之號尤加意名教皋邑許忠愍陳忠
肅諸公祠新邑震川墓樊公祠江邑愛遺亭鳴鶴塔三忠三賢等
祠黎川盛川學舍及維斗楊先生殉節處皆捐俸建修楊先生孫
太史繩武每爲余道其事甚悉又江震自分邑以來志乘闕然公
倡修總裁垂爲信史手定楚詞輯注集諸家之成上自屈宋下迄
有明倣騷體者咸備焉著退思錄二十卷友人李客山與余姪冠
雲校刊行世卒年七十子坊姓請傳於余嗟乎公居家勗諸季以

成歷官去後令人思退老林下著作等身如公者不愧儒吏哉自
余爲諸生時得交於公後與公弟爲同年友余師蘭陵趙公又與
公最相善且鄰治也頗能知公行事因書其略以俟史官

右傳略沈德潛撰

按本卷前刻李元度丁公傳與江恂撰傳略同惟江稱前令葉某徐某卒於任

先後數十年棺未厝丁公捐貲禮葬之所至作育人材出其門者多知名士李傳所無附錄於此

三十三

國朝耆獻類徵初編卷二百三十補錄

守令十六

杜思賢

詩云天生烝民有物有則民之秉彝好是懿德天之生民固不以
中外異民之秉彝亦不以華戎別以今而見古由往而知來千世
之前萬世之後無以異也吾於烏蒙見五年三變而慨然矣烏蒙
於漢屬牂牁郡自元後始置土府隸四川知是府者爲祿氏世守
歷明至 本朝皆相承弗替吳逆叛獨能不受僞命抱印堅拒者
九年吳逆亦無如之何既蕩平朝議嘉其節令世守如故初祿萬
鍾之父鼎乾死其弟鼎坤欲蠱其嫂而奪之襲嫂不從諸夷亦不

義其所爲坤乃給川帥劄授安撫司據有魯甸掠鄰境無虛日祿
三官之惡聲無不懾之者川帥以祿萬鍾方守郡而使屬目狘猖
至此因參革其官然萬鍾猶孩提耳諸夷不平欲攻坤坤乃率其
黨數百人而逃時東川府方歸轄雲南文武會勘疆界對江卽烏
蒙境坤遙呼東川汎兵曰我將往梁山若雲南容我我以魯甸贖
曲鎮劉帥遂遣官納之旣而征烏蒙並及鎮雄此二土司者俱削
秩遷豫章地悉歸雲南當是時夷民之死者不啻數千而坤又將
夙昔所懾之人盡疏於主讞者靡得脫其族子祿永孝與焉坐以
兄亡收嫂棄市乃其妻祿氏在米貼未獲副將郭正域率兵百人
往捕勿戒盡殲焉乃發大兵勦之鶴鎮張帥憤甚立沈命法無少

長皆死匿而獲者斲手足剗腹竿屍其不敢出而自死巖菁閒者又不可勝數通計死者不下三四萬人於是以米貼爲永善縣調廣通令宰之卽杜使君也使君本仁守信體寬務斷招徠撫綏不遺餘力導其蒙遏其淫不示之以聰明而民不迷不拘之以禁錮而民不困永善之遺民俱知有賢父母矣祿鼎地畱雲南意常怏怏及奉 內召不知所爲其黨欲劫之不果然禍芽已萌會劉鎮移節於烏羊粟不貲民甚苦之坤黨因而生變殺鎮帥並諸官吏而漢民之罹於禍者甚多一時東川等處相繼起而永善獨不從亂是時也杜使君因公來會城以太夫人病請假奉湯藥聞變作卽謁臺使告行臺使以事方急恐其不能無虞使君曰職不去

民心不甯乃疾馳而去過烏蒙諸帥亦難之使君慷慨攬轡而前
漸及永境老幼來迎者皆望而哭曰來何暮也使君抵治所各撫
存之如初仍上書臺使明永民之不反乞命師弗加而臺使亦信
使君有素止諸帥勿侵永夫永民非向稱暴悍不法自遠於恩化
之民哉今如此其守死而不與於亂者是非秉彝好德而能然乎
詩曰永言配命自求多福又一年使君秩滿遷知霑益州去之日
永民泣血相送者十餘日不絕詩曰豈弟君子民之父母初大理
府陸公世宣守烏蒙仁惠人也與使君實同心至陸公去而民始
叛是可以察其情知其故矣杜使君近作撫夷圖若曰均是夷也
撫之則我民虐之則我寇爲人上者奈何不敬嗚呼觀此圖者可

以悲其志矣使君名思賢遵義府人

右撫夷圖記倪蛻撰

皇朝通志卷之三十三

三

國朝耆獻類徵初編卷二百三十一目錄

守令十七

黃興仁

馬榮祖

徐良

石鵬翥

陳起鵬
左定波

趙盛治

康曾詔
陳肅

董淑昌

牛運震

邱仰文

項樟

邵大業

徐觀蓀

李大本

徐世佐

黃玉汝

李宗
劉欣拔

姜順蛟

張邦柱

子煇

饒夢燕

守令十七目錄

國朝耆獻類徵初編卷二百三十一

通奉大夫前署江西巡撫江西布政使司布政使湘陰李桓輯
守令十七

黃興仁

君諱興仁字元長號藹堂安徽休甯人初黃氏自晉新安太守卒
葬黃墩世家焉祖鍾父治安君年十九以商籍補錢塘學生北游
太學援例起家刑部江南司員外耶時雍正九年也已而京察一
等擢福建司郎中十三年黔苗不靖張尙書照出爲經略奏以君
從改江西司在軍營屢以功得敘今上卽位以黔省用兵曠廢
農事詔借給牛具籽種君奉檄行黃平及施秉餘慶諸州縣莅

視給散不假吏胥手乾隆元年九月還京授湖南衡州府知府故
有九釐餉 國初洪經略用兵時權設額也後遂沿爲例君上牘
請免之議格不行權衡永郴桂道聖吏議落職君曰吾得歸與諸
兄弟奉老親足矣遂老於家嘗寓杭而遷蘇卜宅師子林元高士
倪雲林所手造也 聖駕南巡五幸其處蘇人榮之君教子嚴長
子騰達辛巳進士掌京畿道監察御史次軒辛卯狀元上書房行
走日講起居注官文淵閣校理司經局洗馬季騰驥貢生君年五
十有五乾隆二十一年卒妻汪氏程氏側室李氏汪氏孫七葬於
柏山之原著有南征集南歸集松園編師林紀勝諸書藏於家
贊曰君負幹才不竟其施而歸老於林園之樂人或惜之然以其

穀貽子孫聯翩取甲第卓犖競爽則君之隱德可知矣子與仲君
同直書房知其大略爲著於篇

右家傳朱珪撰

馬榮祖

君名榮祖字力本號石蓮江都人姓馬氏系出宋丞相廷鸞十三世子堅佐明太祖戡定禍亂賜第揚州遂爲遷揚之始祖一經相禮不徒他業福建閩縣令啟象君曾祖也祖賓父鳳藻皆有聲於庠序君少負異才左國班馬之書若宿讀弱冠名雋一貴所爲制舉之文雄邁駿厲能參太史之潔兩江南北之名能時文者拱手推挹桐城方望溪金壇王耘渠尤所愜心而俗目往往見嘖以是屢戰於有司而藝屢絀雍正壬子始得一當而年幾艾矣 世宗憲皇帝欲復唐宋詞科之制 詔天下慎舉方聞之士江南大吏以君名廁薦剡中君讀書好古宜必有合也淹於時命復報罷君

叩囊底之智復理故業屢不得志乃循例謁選人初仕闈鄉闈鄉
處豫之西鄙與潼關纔隔一門限扼秦蜀之咽喉爲中原之門戶
城廢不修井煙木刊歷三百餘年莫有起而任其責者大府臆君
言發帑更新畚鍤板枅之事繫君是賴閱十月而巖城屹然君自
爲文記之所謂收峭函於掌上聯潼華爲聲援鎖鑰彈丸而豫西
之門戶已壯者此也邑僻處山陬士子無從問業君相地於署東
庀才鳩工勅設荆山書院不一年而講堂橫舍以及庖廡之屬莫
不畢具政暇親至爲諸生講授至移日晷不忍去又念邑爲荆山
發脈迎荆山之生氣建魁星樓其上所以期望士子者至遠且大
嗣後人文蔚起連掇取科名以去皆君教也義門里白晝殺人於

道而莫知主名君意兒不在遠亟至屍所詰問數語悉遣去獨執
尙戊兒以歸研訊一日夜遂得情實遠近駭服黠胥豪役斂手不
敢上下四境大治繼遷鹿邑治如在闈鄉時而教士彌篤捐俸建
講舍二十一楹榜曰鳴鹿從邑得名所始也老聃生其地而顏其
堂曰崇禮蓋深維吾夫子問禮之意也未幾引年歸祖墓在闕口
門外豪民占其地君致其理於有司遂復故址周以垣牆冰霜寒
沍匠人瑟縮如凍蠅君以垂白之年披荆棘冒風雨晨夕督率不
少懈而馬氏數世之先靈以妥嗚呼君可謂克家之肖子矣君素
康彊善飯言論終日不倦末疾忽嬰方起溲而蹶不復起時乾隆
辛巳十一月乙未也春秋七十有六娶於李同縣南豐令斌女先

卒有子瑄不永年孤孫曰春聲

論曰江淮之間多治詩而君獨治古文嘗爲文頌九十二章以自道其利鈍得失之故海內之健於斯事者山陰胡徵君穉威丹徒張觀察圖東仁和沈廉使菽林錢唐桑水部發甫皆申至契江左之以輕豔相扇者則猶冰炭之相置矣君與余有十年之長推獎之勤氣誼之厚不在三數君子後余以狂言被放君爲序送余行能委曲道余之心事蓋忠孝之隱鬱於中故言之親切而能達如此也君今死矣孤孫擗踊號泣欲託余以傳君於不朽嗚呼君以儒術飾吏治其見諸施行者連鑠如此獨奈何以區區之文字爲君重輕哉

右傳杭世駿撰

力本爲文清邁深亮見賞於博陵尹運使會一嘗擬劉彥和爲文
頌百首又爲演連珠箴百首宜興儲六雅謂爲窮探窵窻瀘州先
遷甫以爲奧衍橫鶩

右詞科掌錄杭世駿撰

馬力本大令爲閩鄉令愛一碑摹刻立公案側後令惡而碎之馬
言於大中丞某公札致後令需捐此碑百本令無所措急求舊時
捐本復鉤勒立之

右廣陵詩事阮元撰

Table with 10 columns and 1 row. The table is mostly empty, with some faint vertical lines and a small mark in the second column from the left.

--	--	--	--	--	--	--	--	--	--

Vertical text on the right side of the table, likely a page or section number.

徐良

徐君守夔州一年而病假歸里己丑三月赴補京師復病僦居法源寺者三年壬辰五月引見蒙恩如例補原缺需次矣復病作甲午三月告部假輦歸四月三日去其家十數里歿於舟君諱良鄰哉字又次號其先吳縣人曾祖雲劬遷婁縣祖考完一考迪生皆贈文林郎內閣撰文中書舍人晉贈奉政大夫廣西太平府同知祖妣張氏顧氏妣朱氏皆贈孺人晉贈宜人考以布衣篤行重於鄉二子安國太學生君婁縣儒學生雍正壬子中式江南四十三名舉人榜名觀光後改也乾隆辛酉以考取補內閣中書壬戌充玉牒館膳錄官乙丑玉牒成議敘加一級拜

文綺白金之 賜戊辰以大學士保舉監督通州裕豐倉辛未

恩詔加一級推升廣西慶遠府同知丙子閏九月莅任己卯調太

平府同知庚辰三月實授癸未籤升四川夔州府知府甲申五月

引 見越日詣 圓明園請 訓蒙 上垂問 溫諭有加九月

莅任其在廣西丁丑攝河池州連月理舊牘二百餘秉燭吏倦數

易必得其情州俗嫁女不及時而宰耕牛知州日面誨以化之暑

月行金城江羣虎踞山岡肩輿至而虎去州士盧思捷謁曰公之

民始悍繼帖今戚矣以公之將去此也其去河池老幼扶攜酒漿

二百四十里接於德勝戊寅攝天河縣旱爲文禱城隍神雨如注

四境有秋壬午攝甯明州甲乙訟田數歲未決甲以賄求日得之

矣明日與乙翁然而土官德他事將以金謝者不敢見邊俸之滿
三年癸未巡撫禮爲秀峯書院院長君熟復宋儒之書時文法先
輩聲在釐下至是而粵士樂之其在夔州兼榷關稅清釐一切夔
無書院至則勅建之營占地牧馬訟數歲不直爭於制府以還民
出開縣民之舊誣其弑母擬實極刑者勞逾一年而病不可以彊
矣君十五歲而喪母泊乎計偕甫入京而布衣終於家布衣之教
其子也曰爲國家有用之人君體清性慈直而廉謙而厚內外二
十年餘而其所就止此嗚呼君嘗語余學術之達於功名固其命
也然而不得謂非有用者矣君生康熙四十三年十月二十六日
享年七十有一娶同里吳氏處士崕女兩遇 覃恩請貤贈而未

受封子二鳳鳴太學生先卒鳳翔太學生四庫全書騰錄女二長
適同里鴻臚寺序班袁璿子太學生四庫全書騰錄秉直次適蘇
州元江直隸州知州宋惠綏子太學生思德孫子四屏翰耆霖孫
女四君之名觀光官內閣實工於書及養痾僧寮也應人之求得
金以給余壬子副浙江榜屬同年己卯典廣西鄉試君監試內簾
甲申賦詩送之夔州己丑來京老而益相得也暇輒過之愛其日
書不輟小楷鍾王行楷董文敏是月春寒忽投筆空中幾絕遂不
復書行之前日謂曰三年法源未嘗一言失也嗚呼自舉之南不
能過法源矣嘗謂曰我死子必葬我今鳳翔卜以乙未二月十六
日葬君青浦三十八保五區二十七岡山字圩祖兆之次嗚呼徐

之世蓋不得詳以是誌君宦績歲月不略俟其後之起而大之者
銘曰

君南孫侍子畱我邸訃至而奔諾銘以涕先塋昭位匪我葬君樹
之松櫃納則吾文嗚呼大夫其介守節是曰平生庶乎豪傑嗚呼
大夫城南之寮風晨月夕色泯聲銷嗚呼大夫宰木蕭蕭

右墓誌銘錢載撰

國朝書目類考卷之三十一

--	--	--	--	--	--	--	--	--	--

石鵬翥 陳起鵬 左定波

石鵬翥字北起湖南湘潭人雍正壬子舉人授武陵教諭監生某
豪奪諸生田鵬翥白於郡守某懼夜進千金鵬舉怒擲之斷田還
原主武陵隄工久弗竣巡撫屬鵬翥督修不踰年蒞事擢知甘肅
華亭縣縣俗貧輒鬻婦鵬翥斷還故夫代償其值後有棄婦者責
族長資給之俗漸改乾隆壬子重宴鹿鳴卒年八十九弟鴻翥乾
隆壬午舉人由內閣中書歷刑部郎中廊舉乾隆辛丑進士工部
屯田主事同邑陳起鵬字南池鵬翥同科舉人知廣東西甯縣廉
得土豪悍役及舞文吏數輩寘之法士民稱快縣居萬山中毗連
廣西徭獍雜處上官檄開錫礦起鵬以招集流亡易聚難散力陳

不便事遂寢去之日縣人建生祠祀之又同郡同舉左定波號晏亭湘陰人乙卯聘充貴州鄉試同考官選授山西和順知縣折獄明決謝絕苞苴乾隆丙子分校山西鄉試尋舉卓異定波謂盛名難副引疾歸宦囊蕭然布衣疏食足不履城市者二十餘年子逢霖永順府教授

右傳李元度撰

趙盛治 康曾詔 陳薦

趙盛治字象虞湖南衡山人母夢鍾馗降而生雍正壬子舉人官無極知縣罷落地私稅不受餽遺貧民冬給糧死給棺修濟陽書院兼設義學勸民勤耕織遇兵差不派累里閭捐常平倉穀以防饑時北直蝗惟無極不入境有殺人而逸其犯者詣驗時忽聞空中雞聲意有所觸後竟獲犯時稱包公再世同邑康曾詔字克庵癸丑進士知山西靜樂縣聽斷平允吏胥無擾調江蘇昭文歲歉捐資施粥有疑案前任擬置重典爲請覆驗獲宥民立祠以祀署常州海防同知及宜興金匱溧陽均有善政宰靖江代償民欠倉穀捐修正誼書院邑人勒石以紀自靖江解組歸葺祖祠修譜牒

詣江西原籍省祖墓清釐祭田又與盛治同舉有桃源陳禧字蔚
文由明通進士任邵陽教諭重修濂溪書院捐學租資膏火擢知
天台縣多惠政士民爲建生祠

右傳李元度撰

董淑昌

乾隆七年十月吾友董君卒於錦屏官署明年四月其子楷舟柩歸里爲書與狀請於秦安而予爲之誌與銘曰嗚呼吾友生寒素峭拔自勵讀書肆力文字崛起成進士投宦蠻徼局趣一令懷長畫不竟施設卒以勞鬱死職下清介著節槩旣歿而所爲詩古文皆卓然足以傳於世君諱淑昌字景伯號蓮齋爲運縣人生五歲而孤母郭孺人奉節鞠養之稍長從其外王父受章句卽自知嚮學思解穎雋才氣踔發外王父異之家故貧衣食常不給君旣成人則儆身爲塾兒師得館錢自資非其身力不以食也遇儉歲輒乏絕妻子饑色然行歌坐誦縱筆爲文字愈疾力不輟君年二十

七始應童子試入學年二十九舉鄉科年三十八登雍正癸丑榜
進士年四十一以守部進士發貴州試爲令歷署桐梓龍里二縣
終黎平府錦屏縣知縣兼攝永從縣知縣君爲人性傲岸不能隨
人俯仰然特倜儻有大志遇古今節義之行及名臣直言敢諫者
未嘗不慷慨歎歎爲人道之也若己身爲之見事開明果決論公
私事當否及歷代成敗興壞之紀未嘗不激昂上下反覆剖判之
也若欲以一身任之見人有不可於行輒形於色不能毛髮容然
持身侃侃剛直無他腸與之久居者畏而不忍怨之運與鄉人及
京師同年友論推廉設有氣槩者必曰董君董君云君論德行氣
節功業常崇右兩漢唐宋以來嗒然少所可者尤不喜宋儒惟文

亦然好讀漢詔令及李斯晁錯司馬遷劉向李固之文沈浸吐屬
忽若有得其適拔紆折欽嶮歷落之神時時於論序書記之間頓
挫發露蓋駸駸乎具體而微矣好爲詩尤長於五言古清夷閒雋
寄託高遠雖少不工於練調諧聲而孤意刻苦力歸涵蓄澹然超
絕於字句筆墨之外至其所爲古樸柔厚風骨驚而益上則又往
往軼入於晉魏蓋君初學詩以鍾譚詩歸爲宗而最愛岑參儲光
羲王昌齡常建諸家之作旣而源本漢魏馳騁六朝故其峻詣孤
邁非人所及嗚呼董君之深於詩也君之往貴州也時古州峒蠻
新平制府張公駐軍凱陽以鎮撫之君至則委輓運勘查數大事
應時而辦悉無貽誤試署桐梓龍里二縣事以斷決民以懷畏其

令錦屏也錦故山谷小邑人戶凋敝俗獷悍難治君抵任卽教民墾田畝種樹木竹箐荆榛之區悉闢以治得實熟地五六百頃溝塍閒繚以桑柳茶桐諸樹三年後悉成行列可觀暇則率諸生之秀者課之德行文藝錦人樂有矜式焉乾隆六年黎平守以公赴省君以屬縣管府事四月中廣西峒苗石金元煽亂於府屬之洪州司有眾數千人攻陷永從旋蜂薄黎平郡城維時城中將弁亦以事空汛他去守兵虜斃百人而郡城雉堞崩陲殆不足以扞馬足君聞寇來則伐樹爲城率丁壯登城拒守而飛檄隸府土司兵三千人薄暮集城下明日賊至縱鑼攻掠外郭城中人瓦皆震君陰誡土兵爲伏於南山之坳而開門出官軍嘗敵賊見官軍少爭

先趣戰官軍卻致賊入伏所礮發伏四起官軍士兵前後夾擊之
苗蠻大潰於是君立城上招慰外郭及永從兵燹人戶而出倉實
以糜餓者一郡生靈獲安堵當是時君勇氣激發捷出謀奇凡七
晝夜不假寐事平兼攝永從又以計懾綏雲峒富祿黔粵兩界之
苗構釁結忿蠢蠢欲動者畝牛釋戈安帖如犬馬然皆君之力也
嗚呼君今其死矣君之亡勵勵年四十八耳向使天假君年裁得
中壽必不斲以一令終必將爲中外興利宣福如古名臣循吏之
爲卽君磊然以詩古文自命苟有以篤其志而遠其學抑將升堂
視奧而增進其所不逮其所以前不愧古人而後足以昭示千秋
萬歲者必不止於是嗚呼惜哉然具足不朽矣君所著古近體詩

一卷古今文彙二卷評注孟子七篇評注離騷二卷具載其家君
入學之前三年母郭孺人先以殉節不良歿君既通仕籍常痛母
氏矢節鞠子哀而不克享對人言常涕泣卒因有司具母貞孝狀
請於朝得旌褒成其志君娶夫人鄭氏子一人卽楷也君以
乾隆九年十月二十四日葬於滋陽城南大榆村之原子與君有
生死交最知君宜爲銘銘曰
孰才不羈而躬其律胡施不昌而壽其畢詩卷千秋聲志孔溢已
而已而茲惟吾鄉大榆村之原君其入室

右墓誌銘牛運震撰

牛運震

往予得牛君金石圖思其人頃官監司鎮兗州君之家在馬子鈞以諸生禮來謁識其家風醇謹時嘉慶元年 詔舉孝廉方正縣令校官薦舉鈞以應鈞辭以母親不就徵明年春鈞請權布政使荆觀察道乾乞予文表先人墓觀察故牛君設教河東時所識士也予時亦攝按察使在歷下知觀察之爲人益以思君之爲人不取以不文辭按狀君名運震字階平號空山兗州府滋陽人高祖歲貢生天鑄曾祖起宗祖歲貢生洪範父選拔貢生日照縣教諭夢瑞世敦儒素君生十歲能屬文博覽書傳不喜爲舉子業雍正初年十六補縣學生有文名己酉歲選拔貢生壬子科舉順天試

癸丑科成進士 世宗十三年詔舉博學鴻詞山東巡撫岳濟舉君以應先策試以山東分星地勢海防河渠之學君對以魏陳卓星度爲西法入中國所改不合於古及禹貢職方之所以異議以山東形勢要害在青州穆陵青石二關海防巡外洋不如守內洋河防宜籌沁黃交關及決漕通淮之害皆稽合圖志通曉時務東方碩學無出其右至都以文逾格報罷乾隆三年授甘肅秦安縣知縣當是時空山君才名籍甚都下賢公卿惜其補外君欣然之官秦安治環山西有隴水君開九渠溉田萬畝縣北玉鐘峽崩塞河水溢壞民居君募丁壯率胥役家屬數百人荷畚鍤督濬四日夜而水通流民皆安堵縣聚西固去治二百餘里邨民輸糧苦轉

運費積年逋課胥役迫之則持杖抗拒君單騎往諭問所苦民請以銀代糧便君權許之西固無梗化者先是巡檢某誣馬得才兄弟五人爲盜前令勿能察得才自刎死其兄馬都上控令又誘斃之勒其弟馬雲者三人具獄上府將就道君鞠得其情卒白之請於上不罪前令又雪清水縣武生杜其陶冤前令當其陶父子以謀殺人首從罪上官檄君覆治驗死者得自刎狀以移屍罪其陶卽釋其子他所平反率類是君官秦安八載惠農通商以經術飾吏治暇則行視郊野或鑄農具教民耕耨或稱貸賑揭戶不求其息民樂其政所至爭饋餉設隴川書院於署東偏通其門與諸生講習縣人由是向學得高第嘗雩雨九龍山立應又牒城隍神爲

民勘崇病者卽愈人以爲勤政之感兼攝徽縣治如在泰安時建
杜工部祠於溧亭川又建吳玠廟於仙人關皆置祀田又攝兩當
縣隴西古蠻夷縣道僻遠相去或三四百里君虔舍於三縣之中
路曰大門鎮以聽斷徽多虎患君官三載募壯士捕殺二十六虎
道始通及自徽邑歸秦安遇白額虎當道人馬股栗君叱之虎度
岸去或爲馴虎圖傳其事以能遷平番縣縣當衝要屯兵三千餘
君輯和番夏鎮撫兵民甚著威惠縣之五道峴告饑捐粟二百石
賑之民感其事人輸一錢製衣銘德君受衣返幣固原兵變攻提
督戟門掠居民商賈督撫咸至平涼飛檄召君問方略君謂二公
當鎮靜不可盛兵往遙屯城外爲援令城內將出亂者從之遊擊

任某方攝提督執三百餘人出城內惴懼君請釋無辜者入城慰諭反側始定君治三百人者獄越十五日而具斬三人監候四人餘予徒杖有差上官才之或反以此忌君乃撫前受萬民衣事劾罷職平番民涕泣攀轅欲訴留君君固止之既而寤不能歸上官聘君主講皋蘭書院教學得士心及君歸有千里走走至灞橋始返者君在里中閉門治經日與鄉先生講論文義授考金石嘗出主講晉陽河東兩書院晉豫當道推重君稱爲空山先生君在河東時與同歲生胡天游論古最相得所識士亦一時名儁君教以殖學立行不徒以科第自見如荆觀察其一也君事親孝待宗族盡友悌受業師貧死爲營喪葬事與人交貌落落內情至亦不爲

崖異不喜雕飾性開明有斷事雖鉤棘莫不辦治兩爲令不假手
幕下好遊覽登華山泰岱窮極幽險善弈能鼓琴著有經義史論
存於家君以乾隆二十三年正月二十二日奄捐館舍春秋五十
有三其年十月二十三日葬於縣南馬青村之原秦晉門下士聞
君喪皆致誄秦安平番士民設位哭踊不期而會者千人君德化
所致也君配范孺人與君齊年比德入門勤操作姑患心疾侍奉
盡孝姑疾良已君在官不問生產罷官無愠色及卒後兩親相繼
逝營喪葬教子孫一切皆范孺人力孺人卒以嘉慶元年六月二
十六日春秋九十有一其年十一月三日合葬於君墓子二人衡
鈞孫七人廉夫潛夫敏夫敦夫穎夫蘊夫莊夫君才學冠世不能

排金門上玉堂撰著成一代典章乃以吏才自見猶卓卓如是子
既表君之墓感世之讀書出牧民者不知天人經世之學輒干祿
思得官既得矣則問所治之肥瘠以爲身家計及到官則又覲他
邑以爲勝此邑秋毫終無益於民若爰書箕斂皆探上官意更舊
章禮經稱貴臣鄭康成以爲邑宰孔子言南面臨民不謂莅官亦
卽宰也縣宰所治億萬人縣皆治則天下治柰何輕用而褻視之
若牛君者可爲盡職聞君之風者可以媿矣乃爲銘曰

隴西水千尺清其政舉宰有聲魯邦石一片峙讀父書宰有子鳴
呼徵君古賢宰我無媿辭銘於此

右墓表孫星衍撰

滋陽牛先生諱運震字階平號真谷進士官知縣其學博涉羣書
亦精研經義著空山易解四卷務在通漢晉唐宋爲一其大旨主
理不主數於卦氣值日及虞翻半象兩象等說排抑而掃除之是
亦足以成一家之學矣又著空山堂春秋傳二十卷

右學案唐鑑輯

邱仰文

滋陽邱君襄周罷官著書不入城市一日謁余於運河道署日文
老矣身後之名將以屬公余笑而不應又二年君卒其孤愛堂不
遠數百里來述父命謂公雖不應知固已心許之死則必求公誌
我墓余不能辭按狀君先世浙東人後家於竟以事誤編衛籍子
孫因隸任城衛祖時開考隨皆滋陽學生 贈文林郎君諱仰文
襄周其字又自號省齋雍正壬子舉於鄉癸丑成進士知四川定
遠縣昭雪羅九飛冤獄稱神明又條上治咽嚙法通行於貴州湖
廣其詞載在文鈔可久行無弊調知南充縣丁父艱服闋補知陝
西保安縣巡撫桂林陳文恭以言學投契深加敬禮未幾移疾去

著頤松堂讀易記其學專以伊川爲師謂程傳不明不知卦爻爲
何物邵子止繪其所自得非易本有此圖與三原劉繼貢紹攷郵
書數千里往復論辨余每從中兩解之因復輯易舉義別記四卷
大指右程而左邵爲言易者所不可不知別有楚辭韻解省齋古
文自存草皆行世其卒之年以著春秋集義成命史鈔錄日夜警
校不少休一日晨興理丹槩方進甌茗整衣而逝乾隆四十二年
五月二日也年八十有二配張孺人先卒子念祖亦高才早世次
卽愛堂又次冒堂殤皆側室何出孫玉麟愛堂出出後念祖先是
形家言去君舍三十里濟甯城北有吉地君曰我先世墳隴皆不
越十里外我死必近祖墓而葬愛堂因是節靡費謹求柏槩以某

年月日葬於某原如治命嗚呼君於是爲有子矣銘曰
家臨泗水學則伊川唯伊與泗同一源松楸相望先壟親君安斯
室利後人

右墓誌銘陸燿撰

The image shows a large rectangular frame with a thick black border. Inside the frame, there are several vertical lines that appear to be part of a table or a scanning artifact. The lines are spaced evenly and run from the top to the bottom of the frame. The background within the frame is white, and the lines are black. There is some faint, illegible text or markings along the right edge of the frame, possibly from a document or a page number.

161-244

項樟

乾隆二十有七年壬午二月十八日中憲大夫江南鳳陽府知府
阜甯項君以疾卒於官卒之日鳳人如失怙恃持楮錢而哭於廕
者無虛日其子兆龍等匍匐扶其柩歸葬於祖氏之原謀伐石表
諸墓而乞文於余余與公同年友且俱官於皖其治鳳實親見之
乃爲之表表曰

公諱樟字景貽號芝庭先世徽之歛人自美章公始遷居淮之廟
灣實公之祖考有隱德載邑志以公貴 贈奉直大夫祖妣戴氏
贈宜人考爲鳴虞公孝友聞於鄉 贈中憲大夫妣周氏 贈恭
人公爲鳴虞公三索子生而穎異甫四齡美章公口授五七言詩

輒成誦及就傳詩文斐然二十四補博士弟子員越五年王子登
賢書明年癸丑成進士謁選得四川大竹令以治行優異調萬縣
萬當水陸衝向設老役幫役老役永不替幫役則歲一更民不勝
累公至悉革之尋膺卓薦入都而鳴虞公逝世服闋補黃岡令未
逾年擢山西蒲州府同知皆有聲又一年擢鳳陽府知府鳳故水
鄉莅之日值上游河決所屬大澆而宿靈虹爲尤甚明年再被水
又明年復水公單車四出稽戶口招流亡振饑贏早作夜思寢食
俱廢又建言請帑數萬金預購米穀貯諸倉以濟輓運之不及成
活無算民慶更生公喟然曰是煦煦之仁也拔本塞源之謂何乃
徧走所屬審高下原隰循流溯源躬數千里而自宿州濉溪口下

至靈璧新王城積潦汪瀚道阻不通公艤扁舟行洪濤中周巡諮
度往復測探於是乃知上游之計在毛城鋪下游之計在濰河而
洪沱荀岳及南北二故道皆洩水要津今壞不治亟宜塞毛城開
濰河分疏洪沱荀岳及南北各故道而多爲溝洫以入於支達於
幹而歸於洪湖於是繪形勢陳利害條列數千言馳白大府再三
請大府據以 聞得報 可丁丑秋九月用公議舉工迄戊寅三
月工竣是役也在鳳境者爲幹河幾爲支河幾爲溝洫若干爲開
幾爲隄若干丈役民夫萬計費帑金幾十萬有奇 特遣重臣同
大府董其事分任監司牧令丞倅簿尉等官數十人而始事以蘇
其事者實唯公之力由是水患頓除歲獲有秋風用不困嗚呼漢

時重良二千石而稱賢守者必曰召父曰杜母非徒喚咻之謂謂必爲之計長久而使之安全也顧當其始事功效未覩或狃於時勢或怯於勞怨甚或持安靜無爲之說以懾其果敢之氣未有不退縮沮喪者自非明足以審幾斷足以持久慷直足以動其上下而又本以勤勤懇懇吉凶同患之思鮮見其有立也今公之治鳳不畏難不苟安不旁貸孜孜汲汲毅然斷然卒使汗萊化爲桑田沛澤變爲平陸驅鼃鼃而雞犬之其所以計久長使安全者在數十百世非徒振貸濟一時之厄是真父母之心召杜之事也使充其術而大用之其功德當不獨在鳳而竟以鳳老嗚呼是可悲矣公生於康熙辛巳十月二十日年六十有二配嵇氏 封恭人子

四長兆龍丁卯科舉人雲南保山縣知縣次成龍 恩貢生次騰
龍附貢生四八龍邑庠生出繼公兄養來公先卒女二人孫男八
人孫女三人

右墓表邵大業撰

邵大業

君名大業字在中號厚庵別號思餘姓邵氏宋康節先生後也康節孫徽猷閣待制溥祕書省校書郎博從高宗南渡家於越之會稽十世而都巡公忠遷餘姚自都巡以下又二十三世至君祖諱秉徵禮部會同館大使因父汝楫官天津遊擊遂居京師著籍爲大興人君考諱琮康熙丙子科舉人四川大竹縣知縣兩世均贈中憲大夫河南開封府知府妣胡氏 贈恭人君爲大竹公仲子生有異稟目能於十步外辨粟米大字書再覽卽不忘爲文操紙筆立就雍正乙巳年十四補學官弟子旋餼於廩壬子領京兆榜明年以春秋魁其房君故文譽藹鬱至是益謀諸公卿爭禮致

君君無所吝張文和公座主也君亦未嘗有私於公公心重之再舉再不用卒歸部爲選人君爲人強正有節槩寬中和物守義達志樂清勃自刻削不習媚以有立於世卒亦坐是謫塞外 今上初元龍集丙辰初出爲黃陂令下車投訟謀者數百人君不移晷決遣立盡吏民一見問姓名後無不識者人比之張睢陽眾莫敢弄以事聽訟務以誠格不事刑威鈎致有爭產者兄弟皆頌白貌絕相類令以鏡鏡面問曰類乎曰類則進與語絕痛君亦不覺自淚下且曰吾新喪弟獨不得如爾二人白首相保也嗚咽至不能語各相視涕泣罷去縣有溪環城蛟雨溪漲崩隄齧城城壞勢且潰君卽壞處泣拜誓以殉水爲驟止拯溺粥餓完毀岸築民隄民

得無以水死旱禱不應則爲文焚告城隍神雨立沛民得無以旱
饑死禁民捨身於木蘭山之捨身巖民得無以愚死凡五年制府
宗室德公賢之以其名上 聞會丁父憂去其服除而吏河南也
權開封府同知收土惡號木耳大王者杖殺之授禹州移睢州均
治如黃陂睢頻澇君破匿報習請糶借請賑皆得之他郡亦得請
如睢州民以不飢挑惠濟河以俸更直民悅立石紀之凡四年無
遠近皆名君曰邵父當是時江南蘇州旱米價昂民告於守守告
大吏不省民譁於市於是法譁者而奪守官民困甚乃陟君守蘇
州至則盡得囿積罔利持價使不得平者名召集與爲家人語皆
心動曰惟命則出酒食彩帛勞遣之價頓減民怙怙無危心君爲

治篤誠信敦寬大絕餽遺簡酬接嚴職司清獄本終身守是道不變至是益振刷劬躬燻物莫不俟應松江舊獲二十餘盜鞫鞫互引獄無主名多瘕斃者則以屬之君立取羣盜至則皆斷脛折踝腥穢螫鼻君蹙然呼之曰爾輩亦人子也迫於飢寒偶一試而習爲之遂至是猶茹刑詭辭顛倒首從誣殺非罪人且誣殺人何益於爾語未竟有魁然者仰首曰公猶以人類待我耶公廉正不忍欺公公速命吏具紙筆卽起跪呼其黨曰吾等今日結案也一日而獄具由是獄無不待治於君者時兼權蘇松兵備道俄而攝治藩司事制府黃公撫軍雅公交倚重君首薦部議格不行辛未今皇上初幸江南成憲鮮據屬君條具列上頒行之 御舟左右

分兩岸執行名蝦鬚緯君語嚮道大臣曰除道增緯則必毀廬舍
平田墜伐桑柘梁支河塞汊港若此非所以宣上德意也遂改
單緯黃公欲移君守江甯雅公不許黃疑君爲雅私人忌者乘之
會積雨治吳江帳殿基未就黃慮不及事且得罪豫以觀望劾
君至則供備咸具上悅黃亦悔然卒以是左官去於是君再至
河南撫軍則鄂忠烈公也先以光州待君俄而特授開封開封
民習知君而鄂公又深相愛重君謂可盡出所有以自效未幾而
鄂去豫豫瀕河多灘地有陽武祥符民合控封邱史固村民侵占
者及清丈侵占妄而畝數則浮於額撫軍欲照欺隱加賦君持不
可願無解於數之浮考志乘及諸舊牘始知豫省原分上中下三

則自萬厯閒改併中地十畝有奇完上地糧七畝下地十畝有奇
完上地糧三畝畝數浮而糧不減曰得之矣陳之撫軍撫軍曰昔
爲下則今則膏腴如之何不加君曰公以此爲膏腴乎是河衝淤
積百姓以墳墓田廬父母妻子所易之微利柰何以爲膏腴而爭
之且今可爲退灘淤地異日即可爲沙壓水衝冬春播種夏秋之
收穫未可知況此村向稱瘠苦鶉衣鳩面十室九空加以上年河
決正當十三堡口門之衝屋宇未盡葺流亡未盡復議賑議借苟
得延命舊賦已艱復增歲額其何以堪撫軍作色曰是國計所在
誰敢撓之君曰公爲國計某爲民生民生卽國計也撫軍怒甚君
起趨出撫軍屬藩司富語曰吾將劾之問能當得否君曰以撫軍

劾一守何云可當况某蒙 皇上棄瑕錄用若復被劾更不可當
特不知所劾何事耳曰卽封邱事君曰如此則某當得矣富愕然
君曰某被罪不過一人之身家流離失所彼桑戶樞樞蓬頭歷齒
者獨非身家乎以某一人殉千萬人何不可當之有且強行之恐
興大獄富竦然問故君曰加課封邱封邱人無如何也必歸怨控
者毆擊以洩忿控者必多其衛以相鬪鬪則官必禁歷禁歷不止
必逮究從此抗官聚眾之事起矣且汲汲欲以此爲功部議亦未
必卽行也不聽卒以加賦請部議試種三年乃加額次年盡沒入
水乃寢未幾以陽武工漫溢復左官於是君復至江南知六安州
歲餘民戶書官清民安四字於門丁丑 駕南幸治江甯 行宮

明年穎亳水利興一以委君自經始訖終事民忘其勞尋以緝盜
例議降去六安初六安有祠祀明六安牧越湖公者君族之先世
也君爲葺祠置祀田君去民謳思之卽祀君爲生祠引 見再選
江南權知江甯府壬午 駕南幸徐州爲入境首程守數更替事
多廢闕乃以君攝郡 駕至卽眞授初 上發帑治徐水利爲久
計民免墊溺君謂疏溝濬渠工不閒歲必躬必勤毋飾毋怠庶可
保前勞弭後患勛已率下用是爲先務其宣洩規畫所在多有今
民所號邵公河者此其一也黃河自豫直下至韓家山折而東薄
城西勢如建瓴由是而北而東環城三面水漲濤起吹地欲裂城
中人仰視帆檣如在屋上驚走駭亂戶不帖席顧東北循軌直下

西北則斜當其衝雖有重隄獨恃韓家山埽工爲固失固則破竹之勢成矣君按視得蘇公舊隄於城西起雲龍山迄城北月隄修約三里湮爲民居君曰此隄似無用然大隄猝潰循此南下城得免衝保障之道實在於此力請於大吏卒復其舊隄建蘇公祠置祠田夾植桃柳自爲文記之越歲韓家山工幾潰已而西門大隄又幾潰民皆恃此以無恐越二歲甲申 上命開荆山橋河大吏以君習於事令專之河成今相國高公爲河帥設譙落之親酌酒以贊於君治徐七年雖閒有水患而民不災無蝗害至今誦之戊子春君循例引 見還道聞譚言妖匪割辦事至卽坐是落職謫戍軍臺遂不復用卒時辛卯四月九日也年六十有二 上四幸

江南君皆躬遇凡 賜朝珠者一 貂幣者二 又 賜武金牌者一
則以旌靈巖山救火功也 召對者三文集中有恭紀 天語一
則記 上初幸顧問語也君所至以勸學爲務因黃陂二程子祠
榜義學葺睢州洛學書院集生徒月課之率親爲之師得其指畫
者輒獲售戊午君分校楚關黃陂售者七人君得士五其一人卽
邑人自後科第不絕咸歸德於君云君事親孝爲諸生以文學爲
養旣任以清慎勤三字爲養大竹公亦忻然忘其貧也親歿卜兆
形家言不利於仲伯欲改卜君曰利伯猶利仲也何害遂葬伯季
並先歿愛其子逾己子嘗自笑曰此亦第五倫之用心耶在官廉
俸外不名一錢削衣貶食型家訓後斬斬不少假而族黨交戚之

食而歸君者如其家食常二千指其諸積死藏幽出危繇絕力靡
不爲之盡君謫各散法多失所者君解音善弈能琴書而尤獨嗜
書公暇未嘗去手晚治古文有唐法詩俊爽皆有集在塞外著讀
易偶存八卷批春秋未竟而卒皆未刻其刻者制義恆爲眞吾二
集也君配胡氏早卒繼以其娣亦前卒均 贈中憲大夫河南河
北兵備道候選州同知世安女側室施氏陸氏顧氏子男十存者
九人自昌乾隆庚辰舉人內閣中書今戊戌進士翰林院庶吉士
自華己卯舉人任邱縣訓導嗣季父某後自榮候選州同知自悅
壬午舉人昌同榜進士禮部額外主事自中自和自本自彭自巽
皆能業其家女六人皆適士人

舊史氏曰宗室德公嘗撫其座謂君曰君學問治行皆第一當以此屬君然吾所期於君者非僅在是嗚呼此可以知君矣德公天下學者所稱德夫子者是也後嗣封爲簡親王

右家傳鄭虎文撰

徐觀孫

君諱觀孫字用賓號雪巖徐姓初自越北遷京師爲宛平人家於天津考諱某候選州同 贈朝議大夫君其長子也年十四妣王恭人卒十八入府學二十七舉雍正乙卯科鄉試乾隆八年以知縣揀發廣東借補電茂場鹽課大使充癸酉科鄉試同考官任滿舉最丁父及繼妣胡恭人憂服除二十五年補廣西恭城縣知縣兼平樂府同知暨平樂縣事望吏議引 見仍以知縣用揀發福建署永福惠安二縣及汀州府同知事補連城調漳浦三十三年三月縣民盧茂謀作亂君先期探知賊要害督兵役往規之賊旅拒用槍踏賊三十三人擒其魁鞫餘黨爬梳滌穢刷剔全活

者無算民有畏辜絕姻者廉其情卽與牌合是役也既能鋤惡於
芽而無滋蔓 天子聽之有 旨送部引見擢同知未浹日授廣
東惠州府知府異數也後任山東武定府四十九年年七十有七
致仕明年與千叟宴拜 賜如例五十三年六月二十七日壽終
於家年八十娶陸恭人繼娶趙恭人子三如源河南開封府同知
如灝以州同借補揚州府經歷汝瀾乾隆庚子科進士孫八彙吉
東理集岡柴符柴轉枋詔榮範楓蔚女二女孫四君之爲令於閩
也子爲閩臬知君能其官及君平漳浦之亂適子司臬湖北治荆
門州孫大有獄與閩同日子有姑之子許廷基在君幕中爲子道
其事頗詳以是知君賢君之子如灝使來告哀且請爲銘不獲辭

某年月葬君於某銘曰

難葬不與尹之能老手治郡去有聞大年陪敦蕃子孫

右墓誌銘朱珪撰

李大本

李大本山東安邱人雍正十三年舉鄉試乾隆九年簡選得湖北
東陽縣以試取奏摺改湖南益陽居官自奉極約勤於吏事識大
體所規爲多遠略益人不知蠶大本教之樹桑後賴其利號李公
桑縣多山有里豪謀開礦以利啗大本大本叱去之因爲上官陳
開礦之害請立碑申禁從之明年調長沙考績爲湖南最十六年
遷寶慶理徭同知其所隸之通水峒有苗僧行賈臨桂知縣田志
隆見之意其爲賊黨吳方曙方曙者從馬朝柱謀反時方繪圖懸
購者也僧畏刑誣服又訊朝柱所在妄言在峒中志隆以告巡撫
立上奏帥兵出命大本從行大本曰僧言真僞不可知大兵卒至

苗必駭且生變請潛訪之果在以兵禽之未晚也旣而白僧言實
妄巡撫疑未釋復欲率兵往大本力諫乃已後 廷訊苗僧果誣
如大本言橫嶺峒苗乏食額官求粟大本多方賑之復請於上官
曰橫嶺峒自迎渠授首安插餘苗因惡其人故薄其產每口授田
起三十積至四十積每積上田穫米六升中田五升下田四升以
中田率四十積者穫米二石三十積者穫米才一石五斗耳峒田
稍腴者又盡與堡卒極惡者方畀苗民歲入不足男則斫柴易米
女則刷蕨爲粉給口食年來生齒日繁材木竭米價益昂飢餓愁
歎深可憐憫恐不可坐視而不爲之所也見有入官苗田一千三
百四十八畝舊募漢民佃種出租供饗好良不一屢經淘汰請視

苗民家貧丁眾者稽實書簿有漢佃應除者卽以書簿之丁次第受種出租如故則苗民得食而饑亦無虧此補救之一端也議上上官不許後巡撫陳文恭公見之曰此識時務之言也後因北覲陳其事會遷兩廣總督遂寢二十一年大本遷知長沙府以病足告歸卒於家

右述彭紹升撰

徐世佐

石亭徐公先君同榜友也葬十二年矣嘉慶戊辰肇奎以教職佐嶽麓監院晤其孫治璋治寶於齋舍狀公遺事乞銘焉奎雖生晚猶得憶前人齒牙論及諸君子所傳誦者爲公質而銘之公諱世佐字輔卿號石亭晚號遁翁幼穎悟讀書目數行下長博通經史年十九補弟子員雍正乙卯舉於鄉公英年早達詩古文已名謔當時一時鉅公如相國梁公詩正陳公大受尙書彭公維新羅公源漢無不導揚延譽推公爲南楚詞壇巨觀嘗居會垣羅公慎齋精理學王公霽川擅時藝然聽公議論皆心折於公楊太史瑄出七排一章試之他人方寓目未半公默出一字不差客高平和周

公宣猷所作風船餘韻一夕成七律三十首公屢薦春闈不售旋
鄉講學密巖山廬更主湖北黃岡書院講席教澤涵濡列宮牘者
如霑化雨焉公不苟合於世而待人必以誠與先君交最密先君
宰鎮安譌聞公已下世作詩哭之一日西赴長安值公自南迂道
來訪遇於色河鋪相對愕然執手欷歔抵署盤桓月餘賦七古一
篇畱別先君爲作流寓傳並錄其詩梓環溪集中今讀其詩良朋
厚誼寓儒者曠懷則兩人者眞神明交也乾隆辛未公由銓選分
發直隸任天津縣事借補嚴鎮場大使尋署鹽運分司運判公自
丙辰丁父艱癸酉又以母憂去服闋之官頗多卓績以強項稱公
餘不忘吟詠當事有走驛券索詩彙者尋里吏議戍玉門關外大

將軍阿公知公宿儒題請掌教桐華書院時邊疆初拓賴公訓迪
蒸蒸有土風先是公詠懷云皇天有意開西極故遣文星特地來
斯豈其識語耶抑實錄也紀曉嵐先生時爲侍講以謫繼至唱和
甚歡在事三年 天子嘉勞 賜環是歲辛卯恭逢 皇太后八
旬大慶獻頌 慈安 詔復原職里居後日以詩文自娛者又二
十年乾隆乙卯重宴鹿鳴精神矍鑠大主考章公守勳贈詩扇朱
公澍贈扁聯有繡谷祇應花自染鏡潭長與月相磨之句撫軍而
下改容禮接稱 熙朝盛事焉公兀岸壁立不侈泰不干謁里黨
久奉爲楷模其他行世有遁齋文集二十卷拾遺詩草首山居集
次客遊集次海上集次出塞集凡四十卷皆窮年撰著力追漢唐

作手嗚乎若公者誠足信今而傳後矣公世爲蘇吳西洞庭山人十七世祖諱繼英客遊湘陰遂家焉高祖諱養琦邑廩生曾祖諱捷可歲貢生揀選訓導祖諱開基邑庠生父諱百師乾隆辛巳

覃恩敕贈如公官母氏蕭 覃恩敕贈孺人公生於康熙甲午十月初十日卒於嘉慶丙辰四月十一日享年八十有三歲丙辰九月曆於本邑車公衝子五鳳靈太學生藻歲貢生試用訓導猷附庠生耀國學生翥先公卒孫十四人多列庠序銘曰

衡山聳翠湘水澄清兀岸浩灝公其挺生服古入官煮海和羹作爲文章歌頌 昇平重遊廣寒月宮之舊前度人來今已皓首荷盛朝之寵榮用垂令名於不朽

右墓碑聶肇奎撰

國朝書林續編後切編卷三百二十一 寺命十七

七

黃玉汝 李宗 劉啟拔

黃玉汝字麗山湖南善化人雍正乙卯舉人知泗水縣值縣蝗躬督役掩捕盡殄之歲獲有秋尋以疾改澧州安福教諭時金川用師澧當孔道玉汝以州學佐治軍儲餽餉不誤上官奇其才玉汝同舉李宗字錦章桂陽人除澧州學正澧故乏科第宗下車修黌宮勤訓課文風丕振自是獲雋者眾擢大荔縣值歲饑大吏發帑金五萬期以次年正月振宗見民困甚請先期一月振全活萬計民立祠祀之是科副貢劉啟拔字超才醴陵人未生而孤母賀氏苦節撫育長而嗜學有聲庠序選授新甯教諭擢陽朔縣知縣丁母艱服闋揀發四川署峨嵋縣事檄辦金川軍需無誤改陝西

署紫陽旋署略陽略陽地介秦蜀萬山重複爲奸人出沒所啟拔
嚴行保甲四境帖然補延長政簡刑寬民情胥洽己亥冬卒同寅
某輓之有范丹釜底無餘物海瑞靈前僅冷霜之句咸以爲得其
實云子繼顯乾隆辛卯舉人官宜章教諭

右傳李元度撰

姜順蛟

丙戌冬余以病乞假歸過君淮安官舍執手道故愴然爲留三日見君昧爽視事率漏下數十刻始卽安退謂女夫貽績曰而翁年逾六旬神明不少衰然政務填委勞不自惜爾輩晨夕其善體事之歸里後旋聞被議鐫秩越歲丁亥夏遂得凶耗悲夫其孤貽經等走使奉書來乞狀余故稔知君又重之婚媼其美敢辭時病瞽新愈乃忍淚敘其行略而爲之狀曰君姓姜氏名順蛟字兩飛號禹門世爲天水望族始祖漢平襄侯維越二十八世至紹夫宋南渡時贅上虞姚氏遂家於餘姚咸池之南又越五世至好勇始徙居山陰代有聞人君大父存仁考候選州司馬天濬以君兄順龍

貴均 贈奉直大夫戶部廣西司員外郎祖妣李氏妣陳氏均
贈宜人天濬少工舉子業不遇棄去負經世大略王公大人爭相
延致用是數出遊康熙四十九年遊直隸之大名畱數歲愛其風
土濬樸挈眷屬家焉生丈夫子二長順龍君其次也君與兄先後
以元城籍應童子試補博士弟子員遂爲元城人君性孝友事父
母能以色養居喪毀瘠過期有餘哀事兄和而敬肅如嚴父讀書
專以經術爲本不務俗學嘗讀昌黎原道廬陵本論輒慨然有三
代之志由是文章孝友爲世所推重雍正乙卯試拔貢學使者錢
公卽今秀水宮傅香樹先生也按部聞君名詢之元城令王公師
具狀以聞錢公進君於庭曰子大器也勉之遂貢入太學乾隆元

年丙辰試禮部錄十五人君與焉引 見發江南試爲令明年丁
巳攝贛榆旋移昭文有竊盜某數爲害於里中里中人苦之會某
盜孀婦財里中人欲殺某屬孀婦并誣以姦君廉其誣活之戊午
移攝山陽時未分阜甯縣繁劇甲江南而漕河二院駐其地又往
往以趨走廢事故吏之敏幹者莅此輒以闕冗去君言其狀於二
院二院寬假之五閱月清塵案三百餘件釋繫囚六百餘人上官
異其才遂真知宜興縣宜民素健訟君治數月獄訟衰息 國制
分天下府州縣爲繁中簡三等督撫量其屬之才以稱授之宜訟
繁故以授君今宜之得列爲簡者自君治宜始也已未移無錫至
則斷遣訟師王某徒土豪許某由是豪惡斂手民以大和城中河

道廢不治行舟膠疏之民稱便在治四年上官益心重君以他邑
事屬君平反鉤稽者無虛日矣癸亥移吳縣吳劇邑公私事零雜
繁猥苦無聽訟暇訟故積積故亂不可理君治之如山陽無錫時
鉅細事無懸案一月不結者又縣志漫漶譌舛久且失考公餘輟
寢食之暇與海昌施君蘭垞刪訂增輯手勒成書君之處劇任其
整暇類如此越三年丙寅擢知太倉州事是年秋八月州治水民
饑君勸報賑恤凡所部雖極窮僻地靡不躬履已而民病疫復和
丹藥施濟民忘其災冬十月攝蘇州府事以米價翔貴詳請截漕
米平糶漕米須碾食而市民家鮮碾具請令長洲元和吳三縣春
糶江以北流民來就食者眾請設廠粥以食餓者春融請給口糧

俾復其土咸如所請行民賴以全活者甚眾丁卯四月以亂民顧
堯年率眾乞平米價事坐落職奉 旨發往軍臺效力旋復蒙
恩釋免君聞 命感激涕落如雨深自咎才力短淺上負 國恩
雖已退就散輩而報稱之心彌篤矣初順龍以康熙己酉科舉人
起家由戶部員外郎守福建之福州擢延建邵道尋晉四川按察
司使至是左官湖北武漢黃德道君與兄不相見者垂十年矣乃
之署歡聚如兒時君自蘇郡罷官後卽率眷屬歸大名之舊居而
身往來於燕楚間者凡四載至壬申春謁兩江制府今相國尹公
於江甯相國素器君宜及時爲 朝廷用欲畱之江南明年相國
移鎮秦中而順龍適被議奪職發往軍臺君疾赴楚迎嫂姪喬居

浙之杭州君家故貧雖宦遊不名一錢重以軍臺事戌亥兩載益竭蹶奔走無休時丙子尹公還鎮語君曰吾之念念於汝者無他意惜汝才耳丁丑冬尹公借江蘇撫軍今相國陳公奏留君於江南得旨允行戊寅隨尹公巡視邳睢桃源安東河工指畫井井尹公曰汝非河官何精當乃爾遂奏督六塘河隄工又督開淮徐海三郡溝洫陳四事於撫軍陳公報可三郡水患息旋命鉤考阜甯柴蕩海灘田土坍塌之實籍其數上之己卯春攝淮安府篆未幾卸事在任時會有安東生員蔣遵叩閭事上命少司農裘公御史海公來治其獄知君賢屬爲奏章君手具稟上之靡不當意遂心折焉是年秋攝治海州有蝗災捕蝗不力例奪官莅任十五

日罷庚辰築揚州女仙廟河隄時揚州水卽命勘賑辛巳命理淮揚徐海減免錢糧事是年八月特授海州知州州地窪下濱海水會趨而不得其道以達自乾隆八年以來歲被水民多流亡田荒不耕君曰導水此救民首務也乃歷四境勘其狀條列事宜繪圖上之大吏大吏按視如所請於是開丁家口河口四十里響水口河十二里濬鹽河以導其流築五圖河口孫家灣三奴口諸壩遏其旁漫排之以入於海自是民始得耕矣明年秋遷淮安府知府君謂治淮宜先治水道乃帥屬於農隙時行境內相視通塞塞卽治之歲以爲常用是守淮四載比有年民氣和樂山陽縣有蠹役趙吉者勢傾一邑武生曾謹主育嬰堂事卽盜堂中財與子監生

朝英相濟爲惡橫於鄉君下車悉置之法三十年乙酉翠華南
幸帥屬敬謹治辦御舟渡黃河是日風日晴霽聖心嘉悅詢
知君名召對於平和橋行幄中上諭渡黃事宜皆汝所辦甚
妥協回鑿時仍須汝辦奏對良久天顏溫霽旣退賜貂皮三
荷包四大緞三蓋異數也丙戌開城南涇河河爲商舟達阜甯鹽
城之道通塞聽民自爲之淤久不能運舟貨滯百物騰貴至是請
於大吏借帑開濬飭山陽鹽城阜甯三縣官任其事河成而二邑
之物價平矣是年冬十二月以率轉山陽命案例鐫一級遂謝事
僦居淮之北門河下宦橐蕭然食指繁夥人咸爲君慮君處之意
泊如也旣閒退乃進子若姪而誦之曰吾曩者以國事不及課汝

等學業他日又終當振奮末路稍展割裂之用以自贖恐遂不暇
爲此今差閒將徐考若所爲業因各以詩文進隨進隨甲乙之口
講指畫終日無倦色自臘迄春日不輟講二月初旬後飲食漸減
惟日進飯一甌然無他病狀入三月右手及兩足輒作酸楚行必
扶掖四月奉廉使檄赴省力疾就道貽經侍行抵吳門旬日病增
劇百藥罔效急旋淮於二十七日酉刻抵寓館貽經等環侍榻前
至夜過半君張目謂曰吾負 國恩汝等儻有遭際毋忘而父齋
志以歿之痛少頃又曰財身外物也毋吝財而薄於宗族戚友言
已遂卒君器宇宏遠端重有度事上恭謹而能守禮未嘗以他途
進遇所當爲輒爲之未嘗揣摩卒亦無所忤於上遇人初不爲翕

禽之熱久之人意自愜性輕財有請輒應人知其然咸接踵至坐是亦往往而困然卒不悔且終身不復道其事故雖家人不能盡知也君與兄最友愛當其謫戍軍臺也君斥公產以輸其費後卒戍所數千里外復拮据奉其喪以歸葬於北泊守淮痛兄之不及見遂迎養邱嫂而延師以課諸姪事嫂如母撫姪如子猶恐不得其當也他若同祖兄弟兄弟之子或自來或挈眷來官舍至不能容其不能來者資其費歲必徧此皆數年閒近事也初雍正十二年有同祖姪威遠者居大名幼聘山陰陳端士女年三十貧不能娶請助於君君無以應時嚴冬質衣裘爲之完娶未幾威遠歿遺腹一子君出爲令攜其母子至粵撫之成人其他類此者甚多嗚

呼觀其彌留之際猶諄諄以不吝爲後人勛則其厚德之在人豈能枚舉耶君生於康熙癸未十一月二十八日寅時卒於乾隆丁亥四月二十八日丑時春秋六十有五 誥授奉直大夫江南直隸海州知州例封朝議大夫江南淮安府知府加二級配王氏 誥封宜人例封恭人淮安府清河縣河務縣丞守序女子男子三長貽經乾隆癸酉拔貢生乙酉科舉人娶朱氏翰林院庶吉士改授兵部職方司主事履端女繼娶程氏太學生太陞女次貽綸乾隆癸酉科舉人歷任直隸趙州隆平縣教諭四川龍安府石泉縣知縣先卒娶陳氏翰林院編修世侃女繼娶鄒氏內閣學士兼禮部侍郎一桂孫孝廉志伊女貽績太學生娶鄭氏余長女也女子

長適貢生周學濂次適太學生范世彬孫男女各一俱幼

右行狀鄭虎文撰

張邦柱 子燾

張邦柱字蔚齋湖南醴陵人父一瀛貢生值興舉社倉首輸穀數百石歲饑復捐米振粥病子藥殍子棺人稱長者邦柱十歲入庠學使有神童之目雍正乙卯選貢授永明教諭時永明有諸生得罪要宦被誣不得直邦柱廉其實力白上官獄乃解永明人尸祝之擢信豐縣知縣課農桑興學校平獄訟緩催科績最內遷戶部主事歷員外郎轉刑部郎中遇秋審不縱不苛務期平允京察授思州府知府假歸卒於里著有天籟山房集嘯松樓詩集子燾由增貢除貴陽府經歷調凱里縣丞歷署七縣以才幹明練擢畢節縣知縣護理府事潔己愛民獄訟無滯士庶爲立生祠屢辦軍需

調度悉協薦授平越直隸州知州署大定府事丁內艱服闋起補
廣東崖州瘴海三年撫循有法調連州以知府用尋引疾未行卒
檉歸州民沿途哭奠

右傳李元度撰

饒夢燕

饒夢燕字放殷號翼堂湖南城步人雍正十三年拔貢官山東金鄉魚臺知縣

湖南通志夢燕選貢時值苗徭不靖當事延之協議設法捕治以次奏功尋由教習歷任山東知縣所至有廉惠聲

右湖南文徵羅汝懷錄

國朝書獻類徵初編卷二百三十二目錄

守令十八

黃宜載

黃建中

汪上堉

沈鳳

陳鼎

盧豪然

龔鏡

許國幹

屈成霖

黃永年

沈宗湘

周應宿

原承猷

蘇王遇

范宗佺

袁淑先
范宗裕

何洛書

楊潮觀

趙宗堡

錢之青

彭時捷

楊河
鄧長信

孫續子瑛
鄒鑑

周恭先
楊瓊

鄒杰
曾承謙

守令十八目錄

劉逢
鄒應昇

鄭大綸

汪瑚

陳銘

補錄

錢之青

國朝耆獻類徵初編卷二百三十一

通奉大夫前署江西巡撫江西布政使司布政使湘陰李桓輯

守令十八

黃宜載

先生黃姓諱宜載字靜涵號安齋湖南湘鄉人祖棣開有盛德以布衣祀鄉賢父輝廩貢生先生性沈毅有至性篤於孝友幼承家訓年未冠卽有文名入縣學旋食餼雍正乙卯考充拔貢予家遠隔重湖未得會晤及應 廷試同萃京華往來過從遂成莫逆旋卽先後出都倏忽十有餘年比余擢守湖州而先生以平陽博案被議矣先生以直隸州州判簡發浙江海塘試用借補歸安縣丞

升歸安知縣調補平陽分校乾隆甲子浙闈歷署仁和主簿孝豐
金華海鹽縣丞海甯州判江山甯海知縣皆浙疆也故浙人歌詠
政績予得備聞之最著者江山李某遭仇斃命誣以盜前官徇自
首免抵先生至爲昭雪之所知平陽濱海其外洋屬水師巡緝有
商被劫營弁慮緝限將踰令營卒賄瑞安鹽梟蔡某自首曾與閩
晉江漁舟十餘人在洋行劫爰緝獲漁舟以舟存樓薦爲所劫物
通報矣會先生引見回任卽關提詳訊漁人極口稱冤令與蔡
梟質證而蔡梟竟無一能指識者因思劫物他無搜獲樓薦乃海
舟常有並無號記可辨彼旣先首夥劫今又不能指識其爲賄屬
無疑爰嚴訊蔡梟果得營卒賄賂之狀乃執營卒訊之一鞠而服

遂釋閩漁而上官同僚皆以是獲咎先生亦以是被中傷矣夫書
生幸登仕版庶藉以安上治民不負所學耳豈有明知其冤顧有
所忌而俾其含屈不伸也先生所至勸學重農興利舉廢如修復
西湖書院青銅石橋諸跡爲最著其棠蔭尤切歸安云又嘗奉檄
辦賑諸暨民霑實惠有去思曾與同官劉某購鉛漢口值劉病劇
兼辦所購鉛斤及歿躬爲斂殮並郵致廣東歸其喪所歷各任於
前官有虧短者罔不竭力籌墊俾免羈累追身註吏議乃無一援
手者知者慨之家計頗踰中人以守先訓爲清白吏竟破其家所
奉覈減海塘工程帑金甚巨未嘗以產絕邀免猶謀諸昆季勉力
完繳其樸忠類如此乾隆十有六年恭值 南巡大差例應供備

皆預出廉俸措辦無絲毫派擾商民荷蒙 聖恩賞加一級並有
內緞紫貂之 賜越六年再值 南巡先生已落職例得迎 鑾
奉 恩旨開復原官先生聞 命九叩涕零感踰格外蓋異數也
先生自罷官後寄寓湖城予得與詩文往還從未一干外事湖人
咸稱曰古君子今歲壬午予以親老乞歸知先生賠款已繳擬並
權還楚而先生一病不起傷哉浙之士民聞訃者遠近莫不奔哭
殆仁廉積感也諸令嗣因子雅知先生屬一言記梗槩故不辭而
爲之傳所著有安齋集四卷藏於家家子崇規縣學生次崇觀次
崇寬皆能文通世務庶不墜家聲云

右家傳李堂撰

黃建中

君諱建中字懋德姓黃氏陝西咸甯人由諸生充雍正乙卯選拔
貢入成均 今上御極之元年 廷試引 見 命往江蘇以知
縣用歷震澤嘉定無錫吳元和長洲陽湖凡七邑所至有惠政在
民迫擢州牧未之任而卒其卒也以賑災理繁盡瘁職守馴至廩
療竟不起殆幾於古者以死勤事之義以故遠近咸哀思不置方
其在嘉定也懲豪強以戢良善儲倉粟以備凶荒濬城內清鏡塘
野奴涇呂墅溝諸水以濟行旅資蓄洩人咸稱其治可繼當湖陸
清獻公既調任民扶老攜幼遮道攀轅皆飲泣失聲長洲吳元和
皆首郡治所繁劇甲於通省君赴事勤敏民間利弊殫心籌畫城

內三橫四直河歲久淤積君設法開浚太湖濱有灘漲田田去糧
存久爲民累君覈實陳請蠲免上官難之君爭之甚力卒得請又
以社倉爲積貯要務推誠勸輸積至萬餘石民享其利吳之光福
鎮鳳鳴岡有古寺曰福慶旁有陸墳陸姓欲攘其地數十年結訟
不休君親往勘斷歸寺塵案頓結江陰惡少某誣常熟民陳姓以
姦事獄已成大吏檄君再鞫君廉得實遂釋之其聽斷明決多類
此已而以公事望吏議士民保胥不獲旋得 旨入覲仍以知縣
用時海州水災被檄往賑見民采食稻實榆皮諸物取以告監司
復蒙加賑一月賑務竣補陽湖令相繼丁父母憂扶櫬歸囊橐蕭
然道中恆步行至百餘里喪葬畢因公事至江蘇適淮安被水大

中丞陳文肅公奏留君賑清河桃源安東三縣嚴冬風雪賑所在
黃河岸側僅設一席篷君黎明輒先步至以待饑民無濫無遺全
活甚眾丁卯秋崇明海溢浮屍徧野漂沒田廬無算君復往賑方
病星夜馳抵劉河口風浪洶涌土人勸勿冒險君曰數十萬生靈
待命方殷違惜此身哉毅然航海至崇力疾視事晝夜不遑寢食
者幾卅歲崇民戴其德爭刊石頌之而君疾漸至沈痼者實基於
此再補陽湖令知邑向有役田起明萬厯閒巡撫胡公因民運爲
累每圖置田若干收其租爲運費名曰役租後糧入官運役田變
爲民田租額仍在乃均攤入民田君亟請於上官後奉 恩旨蠲
免於時君在江蘇先後十四年矣督撫交薦升知海州事而君舊

疾增劇遂卒於陽湖君雖不讀書天性愿慤宅心和厚行修於家庭品重於鄉黨本是以出治溫然愛人急民事如身謀所施不究食其德者亦已博矣其善政不可枚數而焦思勞苦沒身而不悔則尤在賑災身後家無儋石儲重以覈減公用遭累數千金弟文中號呼求助蘇常二郡民踴躍代輸惟恐後洵乎公道在人廉吏不可爲而卒可爲也君生於康熙四十一年六月一日卒於乾隆十四年四月三日年四十八曾祖甲選祖用臣父峯皆潛德弗耀娶張氏處士學禮女有賢行公沒後力持門戶艱苦備嘗凡八年而卒年五十五子一階樹太學生娶張氏庚戌進士河南祥符縣知縣淑載女孫男一繩祖聘王氏諸生時泰女孫女一階樹以丁

丑冬十一月奉公與張宜人柩合葬於長安縣彼坡砦之原以狀來請銘憶君令嘉定子方垂髫應童子試君大加愛賞後遊吳門客君署二載遇子良厚銘非子孰宜然文章者天下之公也虛詞緣飾欺天誣人何足傳信 本朝百餘年來循良吏不多有以子所見聞君實足當之此江蘇數十州縣士民之公言非一人所得而私也謹據實撰次無一字溢美後有覽者知子言之可徵銘曰孔稱善人不必踐迹德基有恆質近聖域孟稱樂正善信之聞惟其好善治魯無難嗟世既降俗尙佞邪所謂善人公其是與起高才生試手爲吏外寬內明忠信慈惠霸守潁川高蓋見旌公堪繼之胡不永齡雖不永齡所去民思琢詞貞珉用眎來茲

皇朝通志卷之三十三

右墓誌銘王鳴盛撰

三

汪上堦

乾隆丙寅八月雲南大理府知府汪君以疾卒官其孤孟錮自京師萬里奔赴次年七月奉喪過皖來告哀繼因吾友上海喬君廷選具狀請銘以余夔藩於浙而君元貫徽適在部內習其家世行業甚詳爲之請者又喬君也誼不可以辭按狀汪氏系出唐越公華其遠祖遷婺源者曰道安再遷休甯者曰接自接以下五世曰漢者支分爲七其長文彬卽大理所宗也數傳至可鎮是爲君高祖始遷嘉興之桐鄉縣可鎮生淇是爲君曾祖皆再 贈至中憲大夫仲子文桂中書舍人君祖也叔子森戶部郎中與同里朱檢討錫鬯周布衣篋選刻詞綜藏書甲於浙西自號碧巢者也中書

子亦四其次繼煥歷官給事巡臺瀾有聲爲後於碧巢君考也子
六君行三弱冠補學官弟子給事旣歿始奉母張太宜人定居郡
城連應鄉舉不得薦慨然有功名之心雍正乙卯以軍興入粟佐
邊起家爲郎初授盛京刑部員外內轉戶部擢刑部郎中乙丑出
守大理府逾年遂卒曾一遇 覃恩封奉直大夫君在陪京所聽
獄皆禁軍大校牒訴繁積手批口斷事無停壅 今上御極初將
拜三陵載 命親王大臣臨視將作選難其人而君獨以敏幹兩
與大工迄成第勞居首山東司主天下鹽兼漢引曹務最劇吏叢
穴爲奸君芟薙肅然湖北巡撫崔公與淮南鮭使爭鹽直會議朝
堂君前陳利害甚切疏入竟從君議其在刑部河南司讞獄稍矜

卽反覆廷辨令甲司官能駁正成案者案定議敘君爲郎五年先
後獎異獨多君所守郡漢葉榆姑繪地在滇西南控制夷獠提督
重兵駐焉號雄望難治君外異而內剛遇事能斷至未數月僚吏
信睦庶政修飭境內大和君旣自曹郎出諳故事明法律它郡有
疑獄諸使並以付之嘗奉檄赴臺慮囚而所部雲龍州徼外夷早
可與片馬仇殺君偵知其情遣官屬馳往撫慰開以誠信俱帖然
聽命君諱上靖字綺巖生康熙壬午九月十九日卒乾隆丙寅八
月十九日年四十有五其疾也以勞役傷暘誤餌蘆桂遂篤配祝
氏 封宜人有婦道前卒子孟銷仲鈔季鏗其適所生則彝銘也
俱國子生孫二人如藻如洋卜於戊辰十一月二十七日葬君海

鹽縣山茶花漾之原啟祝宜人窆而殫焉君生平篤孝友慎交與
周貸濟人不少倦而奉身廉儉砥厲清節有人所難能喬君每爲
余言君之居鄉當官事子姓尙多不及知者狀僅得什一二耳然
卽其著於篇者準諸前軌蓋無媿篤實君子矣乃年未五十奄然
窮荒萬里之外先親而殞可悲也夫銘曰

越國之祐燕及後昆自歛僑禾圭組紛綸維碧巢君有道而文嶽
嶽給事於臺於垣大理紹之萬里溟雲克宣其勞亦清厥芬刻銘
幽堂曰斯良吏之墳其永以存

右墓誌銘沈大成代某撰

沈鳳

本朝王吏部虛舟以書法冠海內從遊者爲補蘿沈先生余見先生時年六十餘博脣廣頰隆然高白髭貫兩頤長尺許雜爲毫毛沿頸而下覆其身幾滿其先江陰人先生生十六年家燬於火蕩無一椽十九歲受知虛舟當是時虛舟館於淮安程氏程故豪士饒於財力能致天下之桓碑彝器及晉唐真蹟先生天性好之縱觀臨摹虛舟又爲授八法之源流以故業精而學博以其餘技刻劃金石古麗精峭如斯冰復生嘗一過京師再遊酒泉所至公卿閒爭袖玉石求握刀惴惴慮不可卒得而先生一與周旋無德色慳狀以故名益高貧益甚雍正十三年以國學生效力南河乾

隆二年署江甯南捕通判再署徽州同知凡六攝縣篆宣城靈璧
舒城建德盱眙涇縣皆所歷也於吏事非所喜每治行服飾蕭然
載冊籍圖卷鑪研等物重疊後車外阜唱衙畢諸吏抱案侍階下
先生猶伸紙潑墨含毫逸然在宣城訊竊雞者畫雞賊面以恥之
雞之神色有畏竊欲飛之狀合邑傳觀笑以爲神性廉靜謹厚斤
斤形於體貌郵罰麗事雖小有過差而吏民諒之無怨嗟者大府
皆器重之常異目以視黃文襄公督江南嚴官三品以下膝行無
敢闌語先生入褒衣博袂強曳一足跪訥訥然唾與言俱黃爲霽
威談笑賜坐賜食人皆驚且羨轉相告語而先生亦不自知其所
以然乞病金陵金陵之人咸從從捧手與余及李晴江交尤密朝

夕過從聽談 三朝典故及前輩流風如上陽宮人說開元遺事
鐙地酒闌諧謔雜作誦俳優小說數千言聽者傾靡欲絕而先生
語益緩色益莊若不解笑者自言生平篆刻第一畫次之字又次
之晚年不肖刻石作畫而寫書余以其閒得請山中題額尹文端
公過隨園笑曰何滿山皆沈鳳書耶亡何先生歿海內之求其書
者若金膏水碧之珍然後歎余見之先焉余好古器苦無所解每
鑒別奉先生爲師未十年而先生有所疑必質余以定真贗余雖
私喜自負而心憂先生之衰年七十一卒卒前數月貧不能具膳
而歷任之數減幾至竟先牒產絕而後報人亡嗚呼其可哀也已
先生名鳳字凡民一字補蘿葬金陵南門外湯家窪二子恆慄俱

早卒孫夢蘭隨寡母僑寓廬州余權春秋祭埽事俟夢蘭長大將
勒石而告之處銘曰

其生也賢故人貌而天其所好也古故於今少伍嗜此非馬說之
封乃商彝夏鼎之宮

右墓誌銘袁枚撰

陳鼎

麻城涂如松娶楊氏不相中歸輒不返如松嘆之而未發也亡何
涂母病楊又歸如松復毆之楊亡不知所往兩家訟於官楊弟五
榮疑如松殺之訪於九口塘有趙當兒者素狡獪謾曰固聞之蓋
戲五榮也五榮駭卽拉當兒赴縣爲證而訴如松與所狎陳文等
共殺妻知縣湯應求訊無據獄不能具當兒父首其兒故無賴妄
言請無隨坐湯訪唆五榮者生員楊同範虎而冠也乃請褫同範
緝楊氏先是楊氏爲王祖兒養媳祖兒死與其姪馮大姦避如松
毆匿大家月餘大母慮禍欲告官大懼告五榮五榮告同範同範
利其色曰我生員也藏之誰敢篡取者遂藏楊氏複壁中而訟如

松如故踰年鄉民黃某墜其僮河灘淺爲犬爬噉地保請應求往
驗會兩雷電以風中途還同範聞之大喜循其衣衿笑曰此物可
保與五榮謀僞認楊氏胸件作李榮使報女屍李不可越二日湯
往屍朽不可辨殮而置楊孺同範五榮率其黨數十人關於場事
聞總督邁柱委廣濟令高仁傑重檢高試用令也覲覲湯缺所用
件作辭某又受同範金竟報女屍肋有重傷五榮等遂誣如松殺
妻應求受賄刑書李獻宗舞文件作李榮妄報總督信之劾應求
專委高翰高掠如松等兩踝骨見猶無辭乃烙鐵索使踣肉煙起
焦灼有聲雖應求不免皆不勝其毒皆誣服李榮死杖下然屍故
男也無髮無腳指骨無血裙袴偪如松取呈如松瞽亂妄指認抵

掘初掘一冢得朽木數十片再掘並木無有或長髯巨靴不知是何男子最後得屍足已鞋官吏大喜再視髑髏上鬚髮白髮又驚棄之麻城無主之墓發露者以百數每不得又炙如松如松母許氏哀其子之求死不得也乃剪己髮摘去星星者爲一束李獻宗妻刑臂血染一袴一裙斧其亡兒棺取腳指骨湊聚諸色目瘞河灘而引役往掘果得獄具署黃州府蔣嘉年廉其詐不肖轉召他縣仵作再驗皆曰男也高仁傑大懼詭詳屍骨被換求再訊俄而山水暴發並屍衝沒不復檢總督邁柱竟以如松殺妻官吏受賊擬斬絞奏麻城民咸知其冤道路洶然卒不得楊氏事無由明居亡何同範鄰姬早起見李榮血模糊奔同範家方驚疑同範婢

突至曰娘子未至期遽產非媼莫助舉兒者媼奮臂往兒頸拗胞
不得下須多人拍腰乃下妻窘呼三姑救我楊氏闖然從壁間出
見媼大悔欲避而面已露乃跪媼前戒勿洩同範自外入手十金
納媼袖手搖不止媼出語其子曰天乎猶有鬼神吾不可以不雪
此冤矣卽屬其子持金訴縣縣令陳鼎海甯孝廉也久知此獄冤
苦不得閒聞卽白巡撫吳應棻吳命白總督總督故邁柱聞之以
爲大愚色忿然無所發怒姑令拘楊氏陳陰念拘楊氏稍緩或漏
洩必匿他處且殺之滅口獄仍不具也乃僞訪同範家畜娼而身
率快手直入毀其壁果得楊氏麻城人數萬歡呼隨之至公堂召
如松認妻妻不意其夫狀焦爛至此直前抱如松頸大慟曰吾累

汝吾累汝堂下民皆雨泣五榮同範等叩頭乞命無一言時雍正十三年七月二十四日也吳應棻以狀奏越十日而原奏句決之旨下邁柱不得已奏案有他故請緩決楊同範揣知總督意護前乃誘楊氏具狀稱身本娼非如松妻且自伏窩娼罪邁復據情奏 天子召吳邁兩人俱內用特簡戶部尙書史貽直督湖廣委兩省官會訊一切皆如陳鼎議乃復應求官誅同範五榮等

袁子曰折獄之難也三代而下民之誦觚甚矣居官者又氣矜之隆刑何由平彼枉濫者何辜焉麻城一事與元人宋誠夫所書工獄相同雖事久卒白而鞫轉變幻危乎艱哉慮天下之類是而竟無平反者正多也然知其難而慎焉其於折獄也庶矣此吾所以

書麻城獄之本意也夫

書麻城獄之本意也夫

右書事袁枚撰

三

盧豪然

士有志特意奮行不顧而甚勇者爲義興盧杰夫盧氏大司馬象昇與弟晉觀明之亡也並以節顯至杰夫四世矣少貧躬耕山中顧自負忠臣後思挺出時俗好名喜事議論感發頗沾沾然以舉人教官學士滿三歲例授縣令杰夫不欲遽仕乃假去往來河南淮北閒學騎射墮馬臂幾折宿遷主人館之一日杰夫忽念時方修明史恐以嫌致略大司馬等行事狀卽辭往京師主人憂其臂創也勸少畱不可值大暑雨蓑笠自禦徒步行至則果然杰夫徧訴諸公不避厭怒久之始得未幾選知威縣縣素頑杰夫思變其俗以爲民之敝由士不知學爲市書築宮羣教之眾始謂苦我如

縛初就塾甚憎其先生久漸馴聽他政當舉者刑賞當必者惡人
媮風禁者鋤者除賦稅無名者從事甚決餘四年治頗振然太守
及傍縣令咸嫉所爲爭言杰夫駭謗聞幕府中杰夫亦辛苦甚喟
然志難卒行自稱有疾去杰夫剛爽疾惡主信義利害無所動自
居家至仕時數遭人笑辱愈自岸然聞士少異者必求與交于初
識之由萬編修久之復相見於燕見不過三四獨喜其爲人旣歸
半歲有自義興來者問杰夫何如則云已死杰夫存時嘗以書一
篇示予予讀而悲之其意固欲入深山拾松椽狂歌長吟終其身
嗚呼其憤悶抑鬱不平乎世者又安能久自處耶杰夫名豪然死
時年六十一行事多可書予傷杰夫而欲使有稱於後乃爲表貽

其子使刻於隧門

右墓表方天游撰

卷之三十三

一

龔鏡

姚思廉作梁書撰止足傳爲前史所未有益以周易進退存亡之
正能其德者之難也故天監至泰清四十餘年而傳中所載祇顧
憲之等三人而已吾於今得一人焉曰潁江先生先生宰霍邱年
未七十遽投劾歸畫戶限居堂無履聲者十有五年乃卒嘻古之
人有臥車上三十六年不履地者有坐木榻五十餘年所當膝處
俱穿者其定力足矜矣然彼皆艱貞蒙難忍而制焉非得已也若
夫優游昇平投簪邱園而亦復刻勵如是則固其性之所甘而非
詭眾博名孔子曰仁者靜庶幾近之似又加止足者一等矣然先
生法施於民有可紀者先生以雍正舉人爲金山場大使海濱漲

沙居民與竈戶利之牽持洵洵先生至曰塘內民也塘外竈也沙在塘外民何爭訟者噤口去霍邱俗悍家畜兵刃先生示禁投繳者如雲性篤風義館戶部郎洪文瀾家洪以事頌繫先生經紀其家愈謹洪事雪後泣拜再謝先生歸後常自言有五樂而人亦言先生有三事五樂者弄孫栽花靜攝與故人話舊自問無愧怍三事者看書飲酒小眠夫人王氏與先生同志雅踞相對如嚴賓然長先生一歲以戊子九月七日開九秩觴明年己丑正月十三日卒先生以己丑九月一日開九秩觴今年庚寅正月十三日卒壽算死期陰相符合亦異數也以某月日合葬於石潭之原先生姓龔諱鏡字穎江江甯人子元超次元芳俱以文世其家銘曰

貌瞿瞿古其眉鬢以嬉於庭衢君子人歎而今亡矣吁

右墓誌銘袁枚撰

西河警犬頭收刀

日本書紀

卷之三

三

許國幹

君諱國幹字靖爾姓許氏歛縣人也祖夢周父延纘 贈奉直大夫母汪氏 封太宜人君幼警悟絕人刻苦攻文辭年十八遭奉直之喪家貲散落遂棄制舉業遊京師以任俠有聲燕趙閒筮仕得貴州清平令以廉辨升知雲南鄧川州以內艱服闋 召見奏對稱 旨 特命知陝西蘭州以不阿附上官坐事免制府華公奏白之且請畱陝補用竟格於部議君卜築繁昌江山絕景觴詠清娛二十餘年雍正某年某月日卒年七十有五配江宜人先君卒年六十有四子五人啟盛歷官陝西河州知州啟璜以從征朝漢積官勳爲遊擊啟祚光祿寺典簿啟蕃啟廸俱太學生啟廸次

室余氏出也孫九人鏗銓鉞堉鑑銘釗鈞錚鏗今爲長沙府通判
銓善化縣丞鑑今爲廣東鹽大使曾孫十人君之令清平也視府
篆者再攝州縣篆者八在黔九年黔當吳逆叛亂剝膚椎髓之餘
公私赤立君所至爲民設方計資牛種墾藝用古教化爲治速
亡復業流庸自占者接跡馬化龍者楚之邊鄙人以拳勇出入蠻
峒中爲黔民家贅壻嗜酒縱博婦家患之會婦翁爲人所殺媪遂
教女誣壻殺之前守令驗治旣具獄君廉得其冤狀覆訊數四最
後婦所抱兒跳躍向化龍婦懽悽色變君退獨召問化龍何以自
誣服化龍瞪目仰視曰螻蟻豈不貪生今承則死於法卽一死耳
不承則脛骨斷爛之餘實不勝楚毒因泣下君惻然迺令攝婦入

獄而夜遣黠吏匿旁屋爲鬼詔嘯連三夜婦不知所爲徐曰無預
吾事迺母教我也旦日一訊而服化龍得釋犛獠結仇鬪殺列柵
樹幟聲勢洶洶同列爭請用兵君曰種夷自相仇非叛也單騎往
解之兩姓相與結盟而罷任鄧川也蒙右侵漁小弱胥吏通行爲
囊橐州人號五虎七彪君一切收按致法盜魁李二鬻者郡守欲
斃之獄君請貰其罪令督緝羣盜自是境無盜跡其治蘭州值連
歲大祲又省會倚郭徭役供辦無虛日上官方務刻急集事欲君
希風順指君曰吾子孫欲求衣食也素工書大字尤蒼勁因自書
偶句揭之堂上曰作片時官盡片時職死生不顧食一方祿愛一
方民進退由之州人至今傳之凡君治行之大者如此小者可略

也辭宣有言吏道能與不能自有資材何可學也言爲吏之難也
兩漢書所列循吏大抵興民之利移易風俗其稱冤嫌久訟能曲
盡情詐壓塞羣疑者獨東漢王渙一人蓋不以聽斷爲能彊力精
敏爲效然宣帝嘗曰庶民所以得安其田里而無歎惜愁恨之心
者政平訟理也訟不理政無由得平他如雋不疑之平反活人于
定國之治讞決疑人自以不冤又曷可少哉至於窮治賊盜姦黠
具得其根抵窟穴所在及其所過抵悉捕誅之如趙廣漢尹翁歸
之屬皆有治名然龔遂以持鉤鉏者爲良民吏無得問張敞越法
縱舍當時枹鼓不驚天子褒美之吏道不可一律而論此其所以
爲難也嗟乎君以一人兼能之其爲尤難者歟啟盛初令溫江一

如君清平之政溫江至今爲華縣鏜兄弟皆有吏才視其家有縣令譜者追過之固不盡如薛宣所云者抑君求人之生宜有後者也是又可以爲爲吏者勸矣啟盛旣痛其先人之喪過時之久而不葬又懼無以掩諸幽也將以乾隆某年某月日合窆於繁昌某里而命鏜來請銘銘曰

君不竟其施旣明且惠慈吏道之師民之所戴子孫之貽有戒其後人甯坐殘賊以免者眎此銘詞

右墓誌銘汪應銓撰

日本書紀卷之三十一

一

屈成霖

府君姓屈氏諱成霖字起商常熟人其先自明初以來皆名在庠序以文學師授里中十餘世相承不衰成化時乙酉科舉人輜仕至瑞州府推官祖欽縣學生父永清廩貢生府君年二十四補縣諸生雍正四年年四十四中順天舉人乾隆元年成進士故事進士爲縣令者吏部以次銓授是歲 上始親簡數人以知縣卽用而府君爲之首初任盧龍縣總督李敏達公見其書生敕知府教以吏事及莅政剖決皆適事理知府鶯服五年以總督孫文定公河道總督劉文恪公交薦遷景州知州濬惠民渠築運河月隄決堙增庫民無水患募卒夜偵津路盜賊迸逸商旅獲甯有大姓宗

族好相訐告府君廉知構訟主名出教誠勵訟以衰損八年天津
河閒早饑有 詔發賑異時一戶率賑二口府君計口施賑無漏
澤者民先流亡聞賑還者續上其籍並蒙廩給又於南門北門設
棲流所以業四方流移鄰邑聞者恨不爲府君民是時府君才望
浸顯大吏方議薦拔而府君深懼盈滿因求解職十一年遂謝病
歸初府君少有羸疾數咯血且咽且讀書因習導養術竟獲其效
比老用其術益精遂更强健家居二十年屏他書不觀惟以老莊
二書自隨嘗與客談老義歎曰內丹祕蘊盡於此矣注家莫喻微
旨空復紛紜得不使柱下長蹇類乎性善治生能節嗇致饒益中
年產益殖府君曰財不可積也凡遺子孫度令衣食不缺足矣餘

宜以漸散之顧不當妄用耳乃置義田贍宗親歲製絮袍給道路
寒者具席帳巾襪等以施固園年饑則貴糶而賤出之前後凡六
千餘斛橋道毀斷多所修建息曾發造安濟堂收養男女貧癯無
依者歲可百人府君割千畝充其費縣東北瀕海二十年官築海
城捍潮延袤百二十里多值古墟廢坐府君募僧俗各十人日擔
積收遺骸凡五百七十四積悉埋丁家港義冢其隨事施惠多此
類亦由精力強敏綜貫纖密故任得其人蠹弊屏絕又能練悉時
務通知物情邑有大疑多見諮訪府君陳說利病犁然曉析公私
皆信聽焉廣仁局歲施棺藥有公錢取息既而用度日詘眾議非
府君莫能主持府君以家錢盡償其本屬息曾發經理歲月滋息

七年之中倍其舊貲二十八年鄉人合貲繕修學舍鉅細之務推府君父子規度料量程制周肅工勸士悅又虞山致道館乾元宮維摩寺皆荒頽府君發願修復布金捨田幾以萬計凡所營造靡不完固府君春秋既高悉以家政委息曾發曉發雜事不復關意優游晏安奉養怡適然有節制不事奢縱嘗言人當歡娛時不可無戒慎恐懼之意一不慎則喪其身而害於事矣欲復樂得乎與人交際貴簡易質直悉除去時俗文飾著習是編二卷明居家莅官之法末年又集古今善惡報應爲一書號經史參同三十一年八月二十九日卒年八十四先娶宜人曾氏康熙某年月日卒後娶宜人席氏乾隆某年月日卒子四人曾發乾隆戊午舉人曉發

太學生煥發府諸生長發女四人孫八人孫女七曾孫三府君前
以乾隆二十二年十二月初九日曾發等奉府君葬墓之中穴銘曰
次及卒之明年二月初九日曾發等奉府君葬墓之中穴銘曰
屈之受姓維楚之裔胥宅虞山於宋之季有明迄茲青衿十世詩
書縣縣氣澤淹漬至於府君遂以昌大甲科發迹銀黃作吏寬樂
令終八十有四始病羸瘠而獲久視仕宦寢通而果於退豐財厚
生而散厥利娛樂無妨而克戒畏身從化遷而有子繼福祥溱溱
亦孔之備大河之塋松檜手藝丁亥春仲良辰協筮藏魄吉兆昌
厥來嗣

右墓誌銘邵齊燾撰

按屈公所著習是編分居家居官二
大綱爲上下卷居家之目自孝順至

國朝三才名錄卷之三十三

喪祭凡十有四居官之目
自忠愛至恬退凡十有二

三

黃永年

常州知府黃君既歿二十三年其子光理光琮始克葬君於其鄉小港之原又逾年以書告於紹升屬爲文以表於其墓紹升年二十餘初自奮於學誦黃君之言因以識黃君之志黃君之言曰善人君子不可絕於世如嘉種焉生人之命所恃以立也嗚呼豈不然哉黃君不幸早卽世而其時所謂善人君子者迄於今亦零落殆盡矣可悲也夫黃君諱永年字靜山自號崧甫世爲江西廣昌人雍正六年舉孝廉方正不就乾隆元年成進士授刑部主事累遷至郎中君故好學以文章自名平居未嘗廢書及官刑曹則矻矻治案牘於諸疑獄多所平反一日有廣東客謁私第聞者以名

聞弗識也及見遽伏地叩頭謝仰而言曰某頃以某事陷冤獄非公則久入鬼錄矣徐出一盒珠獻之曰謝公大德君變色曰嘻我爲刑官據法出無罪職爾何比於汝而乃汙我爲客大慚內珠袖中逡巡去旣公卿交章以御史薦時宣城知縣段雲翮以迂謹失上官意會有築城之役委它官代治之雲翮故勤民民愛戴之民間譌傳雲翮被劾且受代相率罷市鬪於府堂巡撫以變聞坐雲翮指使罪上以御史言命君往鞠之但請以雲翮改教官諸囚並減死十年拜平涼知府以親老辭改知鎮江歲餘又改常州君爲政寬重有體尤盡心溝渠之利在常州濬德勝澡港漑田二十餘萬畝行部所至必咨訪高才尊禮有德事上官未嘗屈節總

督黃文襄初至江南知府以下迎者俱道旁跪君獨長揖而已後黃以閱兵至常州供具頗約省黃弗善也尋以它事奏罷君待讞於蘇州日閉門課文史焚香默坐泊如也十六年夏六月遇疾卒年五十有三巡撫雅公知其貧欲令屬官各致贖或以告光理光理曰此豈先人志耶辭之喪之歸也費皆出門人陳道云初君在京師與同朝賢士大夫砥厲志節一日大學士鄂文端與甯化雷貫一燕語論當世人才貫一因道君之爲人文端以是知君君爲曹官得稍行其志者文端力也文端薨君竟以黜死而諸公亦相繼謝世晚進之士其風氣稍殊矣予不獲生君之時與諸公一發其中之所藏也予能無感乎君舉鄉試出大人之門平生書疏往

還頗密商推問學氣誼深至紹升嘗竊聞之又嘗與光琮相處久
得備聞君遺事因揭其大者著於篇使後之論世者徵焉

右墓表彭紹升撰

沈宗湘

文林郎知新淦縣事沈公之歿也距今十有三年矣將葬孤子梓
踵子門言曰惟子與梓交久既聞先子之出處本末惟是麗牲之
石將以種諸幽窳敢請銘子謝弗獲辭按狀公諱宗湘字六如號
尊村先世爲浙江桐鄉人明季遷吳江縣之小豐村曾祖某祖某
皆潛德弗耀考某國學生考授州同知以行誼聞於閭黨公稟庭
訓克自振厲補諸生後聲譽漸起始遷居邑城南城中多前明搢
紳舊族以門閥自矜詡咸懷妒嫉而公所遷新宅卽售諸某宦裔
亡賴子從而媒孽焉遂控之官撤其門廬以是擲揄之未逾年爲
雍正乙卯公登鄉薦明年乾隆丙辰聯捷成進士向之擲揄者咸

內愧不自安然公不與校也既 廷試列二甲銓注山東禹城縣
遭母喪未及之任服闋簡發江右授新淦縣以議刑名事忤上官
意謝病歸淦人德之攀轅泣下謂令長雖瘠吾民肥矣莅淦廩三
載善政不勝書而其大者則在收漕一事漕之在淦者每歲額輸
四萬餘石漕船皆泊會城由縣倉運至省倉以達於漕幕友家人
駱駝分布加以運船之盜竊旗丁之需索所用不貲非浮收餘米
不足賅習行之數十年納戶相安不以爲怪公力持不可大書揭
示倉場嚴禁胥吏謂稍有染指卽若輩從而效尤民之被累有不
勝言者甯爲吾一身累耳三年中所虧數千金稱貸不給至闔家
產以償無怨嗚呼瀕江州郡皆財賦疆筮仕者率以漕多之區爲

善地以事上官則秩遷以贍身家則橐富然其勢必倒持太阿授
權胥吏由是土豪市僧因緣爲奸晉如鼯鼠惴惴焉慮有他變甚
或褫冠服觸刑辟向所培克俄焉冰消吾見亦多矣以視脫屣五
斗俯仰自如遺後人以安者其得失可道里計耶公內行醇篤飲
人以和自少以能詩名在新淦愛其山水之勝當春秋佳日聽漱
玉坐雲濤吟嘯其閒喜形篇翰觀者不知爲簿書長吏也丁卯分
校鄉闈得人稱盛歸里後應聘主笠澤書院山長講學論文娓娓
不倦暇與邑中諸耆舊結歲寒詩會幕之者指爲香山洛社中人
平生著述甚夥皆手定存橐臨終舉以付梓梓泣而志之藏於家
公生於康熙二十七年九月二十七日歿於乾隆三十六年九月

初六日得年八十有二配顧孺人先公三年歿子二長楓國學生
早卒次卽梓邑庠生女三一適國學生朱遠聞一適 馳封奉政
大夫刑部陝西司郎中李光運一適庠生周瑑孫男四兆熊昌燕
保魯雲羹孫女三曾孫男一履莖銘曰

古稱廉吏而不可爲而可爲兮載鶴歸來西江之水清且漪兮有
子象賢詩書之澤久而垂兮我銘吉壤質實不文無諛詞兮

右墓誌銘金學詩撰

周應賓

漢法文學試射策其高等補刺史二千石往往多賢良吏後世異
古士雖飾文辭取科第至任之官一縣一邑多漫失理嗚呼蓋其
術既分巧便苟利益忠信純款之風熄矣君爲句容令獨能出其
悃以接其民民亦信其治乾隆戊午邑大旱農廢乎田粟罄乎市
餓徧乎里焦嗷沸皇不可以日君勞露吁禱悉出俸錢又門勸富
家意切切有所感動因得其合金致粟活縣人命君世儒者未嘗
知簿計習名法據案視牒訶詰榜敲尤性所厭苦宜不能乎治惟
忠信自然出於其身懇懇持之用已有餘嗚呼假爲吏者而皆若
君何患勿得焉君動止言笑一任其致篤於文章常覃思竭深窮

守令十八

臣

求其變刊剔濯鉛言成一家約中道理雖頗致疑怪然識者皆其
傳之年五十七始中禮部第名最高益爲人所望選庶吉士自翰
林出爲令方欲大爲治以文學振教其士使各知所立遭外盜入
縣去官方邑災時君已力謀救尙不足益借官粟濟焉及罷將責
償於君貧無以抵句容人眾號城中明府仁愛有活我恩爭以情
來代者未兩月而償畢也君周氏世居山陰初名鑣後更應宿特
以其文四方士無識不識相與論議率皆字謂君其旣去句容而
歸已七十九喜說諸經於易頗有述旣卒句容人聞之相與望弔
以哀其歿嗚呼予益歎忠信果足以誠物而士出今世若君者特
少也君將爲令或爭笑其迂指爲不省世事曰是徒能名文章安

任吏然君往而自見特如此惜所效試止於句容不然豈僅若是
哉僅若是故既葬三年君子建中來試京兆問表墓道者文字猶
未具悲君不可使返而復與處也曰是實余職有以昭發其光嘉
庶幾於君無所病負夫往者九江祝生之徒陳仁義距功利誠趣
背當世然其書具存想見其爲人君生平志行一自道於文而獨
守之欲知君者求於是亦可以識其所懷凡君家世卒葬月日不
復具使建中磨石陰刻而敘之

右墓表方天游撰

按周公乾隆
丙辰進士

原承猷

故臨漳令進士原君慕齋葬有日矣其猶子培初持狀祈銘君之成進士也余方以拔貢客京師魁卷出人爭傳誦名籍籍出同輩上然竟坐是不得與館選而授臨漳令甫數月又以不合上官意旨卒移疾去去而仍以教授生徒終然君固已得民心民至醵金舁板輿旗幟導引送之家垂涕泣再拜去嗟乎是可銘也已古之稱循吏者必曰以經術飾吏治初非割而二之也後之學者往往不識經世爲何事甚或專務揣摩襲取以爲能幸而獲售所選爲清華者猶夫人也卽縮銀黃爲親民吏反與民淡漠不相關率操切從以迎合文其奸及一旦有事罷則謂民實無良者聞原君之

風其可以少自反矣君諱承猷字允升別字慕齋先世爲洪洞人元末有官千戶於蒲城者遂家焉明正統間有以施粟表義民者因稱爲官門原氏嗣是宗支繁衍登仕籍擅文辭者指不勝屈矣君之高祖諱鍾漢天啟辛酉舉人爲偃師令曾祖諱熊祖諱於辰父諱懌皆縣學知名士母曹孺人誕君及弟承獻而卒君夙負異稟年十三已能背誦五經左氏傳由是博通羣籍而尤邃於制舉之文登康熙庚子賢書嘗就館宜君營甘旨以供祖若父旣而祖若父相次棄養君喪葬盡禮每慟幾絕蓋傷祿養之不逮也服闋赴部仍設帳郟下及門多獲雋河南解元彭應麟者卽君臨漳所賞拔受業者也以故君罷官後臨漳人尙議畱君爲子弟師而君

竟歸矣方君之初莅臨漳也適運直賑米數千石至秋而領司銀買穀還倉君難之諸父老躋堂請曰我君無介懷也我君初至嚴苞苴除供應勤撫字慎刑法俗賴以醇民何幸得此也今買補公事耳我君無介懷也卒持司所發銀去不日而倉儲告足矣太守某者以君收穀之易而嫌其不潔也親詣倉詰之君計司所發銀未敷市直且有分耗而民急公如此懼累民因以二穀足一米對遂拂太守意民益以此得君後培初以事至鄴臨漳民驚相告語且謂君復仕矣急相率入鄴詢知非是則相與環跪問君起居嗟乎此豈易得於民哉君歸里後遠近問業者日至乃應聘爲橫渠堯山兩書院山長多所成就所得脩脯卽以周戚舊之困乏嘗迎

養異房孀嫂終其身以節著君沒後而余適主堯山講席故知君
尤詳云君元配劉孺人先卒妾張氏生一女亦卒繼配李孺人生
三子臨泰恆泰師泰時年六十餘矣君素友愛弟承獻一子名景
泰卽培初常任家事治命以師泰爲弟子又命諸子須成立乃葬
是以緩君生於康熙某年某月某日卒於乾隆某年某月某日享
壽六十有九葬於某山之原夫以君之才固宜早登上第以文章
華國乃鄉舉後遲至十餘年始捷南宮以君之爲政而得民心也
雖古之良吏如何易于元結之輩殆無以過所謂得結輩數人散
布天下宜少安者而卒止於是是殆有不可知者與抑莊子稱薪
盡火傳者宜若可信與系之銘曰

學優則仕仕優則學利濟爲心德修罔覺雖未獲竟其所施而見
於世者已果而確世固有聞君之風而慕之亦當有聞君之風而
作山川絲邈以利其嗣人於萬斯年勒茲封石

右墓誌銘楊鶴撰

按原公乾隆
丙辰進士

蘇王遇

後漢書循吏傳序曰勤約之風行於上下蓋勤則天下之事無不理何論一邑約則所操者要而推之於用可以廣暨於無窮故射義曰卿大夫以循理爲節太史公謂奉職循理亦可以爲治蓋運乎一心以平其政則澤流當世名著來茲此作史者惓惓於循吏其人而樂爲天下後世告也予無以周知天下之循吏而於吾友雪渠蘇君泗水之政得其大略焉君諱王遇字掄青號雪渠世長洲人代有隱德考諱琬歲貢生雪渠世父某早沒配某氏守貞雪渠嗣世父後遷吳江貫吳江籍中乾隆丙辰科二甲進士越五年謁選得山東之泗水縣泗水地小而瘠陋然爲至聖過化之地尼

山禱雨處子在川上亭皆在其境君下車慨然曰子束髮讀書佩
聖人之訓今所宰邑近聖人之居其可不以所讀之書敷而爲政
乎乃下令教民力樹藝夫無不耕婦無不蠶農桑盛而國賦辦民
鮮追呼之擾邑中每歲僉夫疏泉濬河君請疏泉則責之泉長濬
河則捐養廉雇鄰境河夫之諳練者不役平民以無事豪強兼
并田則混淆履畝丈勘清土豪吳衍愷漏籍田千畝正其罪官其
田以代繇役之費奸猾屏跡社學久廢捐修造士邑百年來無登
賢書者君識拔相景雲於眾人中至是得魁一經至於片言決獄
審察幾微聶永福自殺其妻誣杜姓者獄幾成矣君驗永福頸傷
爪痕卒服其罪而脫枉者於獄泉林寺僧通純之見殺也驗之無

跡君夜禱於神且日徧閱眾人見有色變者忽指沙興曰殺人者汝也果得血衣及行兇之杖爰書以定一時有神君之稱綜君生平爲政大要本乎教養而佐以明決宋趙方有言催科不擾是催科中撫字刑罰無差是刑罰中教化其於循吏也亦庶幾與乾隆某年月日卒年幾十幾歲配某孺人子某某孫某某子與君生同里久爲文字交歲庚申予授經同川袁氏又數相晨夕知其文章學有經術後措之於政其卓有規畫民受其福又如此嗚呼仕學兼優體用咸備準之漢京循吏可無愧矣因舉其政治之大者表之於阡

右墓表沈德潛撰

國朝詩林卷之三十一

三十一

范宗佺 袁淑先 何洛書 范宗裕

范宗佺字坦夫湖南桂陽人乾隆丙辰進士知獲嘉縣值歲歉米貴例無冬月平糶者宗佺詳請破格行之全省援其請俱賴不飢同邑袁淑先字來範乾隆癸酉舉人任黔陽教諭課士甚勤學侶雲集古龍標山坊其手蹟也知象山縣值臺匪不靖派米二千石濟軍海運多阻淑先設強弩勁卒於舟巖爲備豫米得盡達及渠魁就禽餘黨尙肆掠淑先購邏者獲林佑等十八人磔之尋以疾卒於官何洛書字聖則乾隆壬午舉人知大甯縣首革浮派時教匪蜂起洛書率練卒搆其巢生禽百餘人賊爲奪氣大府動容嘉獎之范宗裕字曉堂乾隆辛卯進士知東鄉縣下車革陋規懲蠹

隸豪猾斂跡爲政一本仁恕民咸化之尤崇學校視事八年邑大
治又捕獲閩省竊餉盜卓薦入都以目疾致仕比歸行李蕭然

右傳李元度撰

楊潮觀

雍正閒西林鄂文端公作蘇州布政使設春風亭招致四方賢俊如沈歸愚華希閔皆以耆舊見重而以十四齡童子與會者惟楊君一人君名潮觀字宏度號笠湖常州無錫人生而沈默寡言秩秩見於面目以乾隆元年舉人歷宰晉豫滇南三省遷知四川簡邛二州再調瀘州年八十終君在官凡三十餘年正署一十六任獲勉額額一以視躬澤物爲務在文水值五年編審之期歷年徭役不均君親加區別除鰥寡孤獨者千餘人嘗過杞縣有尪羸男婦百餘焚香跪道旁鄉保指曰此公所活氓也君愕然鄉保曰公不記某年聞賑歸來一案乎大府不許報銷此輩皆公捐俸所活

岷也亡何長子掄舉進士而公奉調瀘州年逾七十初志不欲往旋聞瀘大饑道殣相望慨然曰見義不爲無勇也卽到官碾穀檢校一切在官閒款分設三粥廠令男婦各隨地坐給籌以起之換粟以出之在瀘不滿百日凡活五十九萬七千人笑曰吾事畢矣卽以老乞歸其孳孳爲善皆此類也然君亦非偏於寬慈者固懸獄訟債興君預示審期立限拘集赴訊者晨到午回民間號楊半升言案結無需再食也瀘州散賑有咽匪率百餘人夜破廠門攫食君追擒之斬爲首者一人眾遂帖然河南布政使蘇崇阿查賑問有濫否曰有有遺否曰有蘇怒厲聲曰又遺又濫何以爲賑君曰口稱無遺濫而心不自信故不敢欺公蘇曰然則汝有可信者

乎曰有官無侵吏無蝕是可信也蘇嘉君言之誠慰勞而去君以古賢自期與今之從政者格格不入河南災奉檄辦河料二百萬君頻蹙曰野無青草何能辦料卽牒民疾苦求免俄而有省會來者曰君癡矣此是上游知君杞縣有累故特多其數爲君生財計君不解乃固辭耶君笑曰吾誠不解亦卒不問其作何解也君嘗自言居官信心而行投艱不辭理繁不亂然往往有未慊者在杞縣回署求賑者麻集有一人裸而攀車隸人逐去次日早出已死深雪中瀘州營兵借穀所送冊漏造防汛者姓名續請而君病竟忘補給以此二事時時抱憾嗚呼今士大夫乘堅策肥知有己而已視民若秦越人之不相關君能仁其民而過後猶欲然若不足

此其行事居心豈凡所及耶性無嗜好惟耽音律愛花竹在邛州得卓文君妝樓舊址構吟風閣數椽吏民上壽者令各種花木一株取古今可觀感事製樂府數十劇付梨園歌舞以落其成七十七生辰與夫人重行合盃之儀兒孫捧觴上壽撒帳坐牀號白頭花燭借老新聞古無有也所著□□若干種□□若干卷夫人孔氏子掄官太平縣令次子摺歲貢生

贊曰君與余爲總角交性情絕不相似余狂君狷余疏俊君篤誠余厭聞二氏之說而君酷嗜禪學晚年戒律益嚴故議論每多牴牾君居家聞余至必喜在邛州特寄金三百屬置宅金陵將傍余以終老歿後其子掄以狀乞傳莊子曰仁義之人貴際際者大

德不踰之謂也古之人游夏交相譏管晏乃合傳雖異猶同其卽
君與余之謂耶

右傳袁枚撰

趙宗堡

乾隆庚子十月八日前廬江令鉞守趙先生卒於里第余既聞而
走哭其家且歎邑中之不復有斯人末學小生失所依仰有不止
爲先生悲者明年其高弟子錢君大培自山左郵書述其家將屬
銘於余余固謝弗能文乃先生之兄元禮先生復率其羣從踵門
固請於義不可終辭按狀趙氏遠有代緒宋漢藩元佐十六世始
來吳江五世而石如公某成進士累代以孝友世其家逮先生尤
篤於至性居考妣之喪皆盡禮盡哀與兄元禮先生淬磨行誼友
愛至老葬其世父母及從伯父母遇嫻儻之貧乏常推誠賙贍之
輯族譜建宗祠拮据經營積數十年而皆成厥志其在廬江廉勤

自矢抑豪監捕飛蝗謹天災培土類尤惡風水惑人民有爭地停喪者爲峻法以驅之無力者給費於官設叢冢於閒隙使以時斂埋焉在官才餘二年而代者至先生拂袖飄然無幾微介意也生平質直好義嫉惡甚嚴人與遊處皆望而生畏及接其言論和平樂易止覺可親錢君來書稱其廬江作宰布素依然惻惻無華慈良爲政甯不善事上官從未違離書卷此皆不同流俗無愧古人者嗚呼觀其從遊所稱道可以知其爲人矣先生爲文幼承鄉先達緒論中年詣益精進最爲涇縣族人諱青藜者所推服其友教四方必先以名節相砥礪而後及於文藝余始弱冠侍先大夫於京師已薰炙先生之風範四十年來往還不絕去年夏訪余於樵

李新居猶授余啟秀堂近刻曾無幾時而遽銘先生之墓其可悲也夫先生諱宗堡字拙存晚年又號餅守乾隆元年丙辰科舉人三十五年庚寅選授安徽廬州府廬江縣知縣三十七年壬辰去職又八年而告卒距生康熙丁亥十月八日享年七十有四以明年辛丑九月二十五日耐葬於堯峯山父墓之左祖中楷考文炯皆 贈文林郎如先生官祖妣吳氏妣吳氏沈氏皆 贈孺人兄宗壇卽元禮先生弟廷珪皆以學行爲諸生祭酒配全孺人先卒子二孝錫山錫皆國子監生女一適國子監生陶錦孫四泰初泰開泰階泰交孫女四皆在室銘曰

文吾不知所云行吾不知所循肅肅秋風之羽融融冬律之暎外

剛內慈略見敷施徵信門牆其無愧辭疇則嗣音堯峯永宅述美
蕚幽後死之責

右墓誌銘陸燿撰

錢之青

錢於江浙閒遠有代緒在震澤者尤以孝謹績學著其施於官亦切要公勤與巧吏所爲者異余交大培及見其先人數峯先生之政事故辭而表之先生諱之青字恭李數峯其號也宋開國公愷裔孫四世祖穎遴曾祖夢卜祖霑皆載邑孝行文苑志中考楷早卒先生爲遺腹子生而孤露卒能自立乾隆丙辰舉於鄉充咸安宮教習期滿得山西甯武縣甯武界雁門大同之閒明末遇闖賊李自成之亂總兵周遇吉闔門殉難史言城破巷戰以死先生徧訪故老乃言危迫縋城語賊獨殺遇吉以全百姓賊脅降不從磔死百餘年來未入祀典屢言之上官請於朝竟得如例輿情大

國朝詩林卷之三十一
卷之三十一
四

悅調榆次修復水利增築清晏豐樂諸隄保障田廬有疑獄不決
夜宿關聖廟虔禱縛囚於前夜半囚自叱何不實說遂吐實人以
爲神升朔州州自併衛於州人皆土著而額賦相懸猶仍其故方
籲請立法均平會遷保德未就貽詩後任引爲缺憾保德城臨大
河怪石夾岸地有天橋尤嶮絕木商浮筏至此觸石漂解無賴乘
機剽掠往往爲患又外接蒙古人馬經行山巔雨久路絕則舍陸
從舟覆溺相隨先生禽治草竊開鑿峻坂行旅賴以安全方金川
用師時或議勸民輸饟先生持不可曰無事食 君之祿有事卽
派民間耶歲餘川酋款服軍需悉發帑金人盡感服自榆次後三
遇軍興資糧駝馬無闕於供百姓高枕安臥不知大軍之過境其

政事卓卓皆此類學以主敬爲本涵養純粹發爲吟詠皆根至理
非強爲韻語以隨時者余嘗序先生之集而其出處本末未之暇
論乾隆五十年乙巳大培將爲學博過余長沙官署去先生之葬
二十餘年矣念此後無復有及見先生之人能道先生之事者爲
之文使歸而鐫諸墓道之左且爲銘曰

闔然君子道日章施於有政治效昌表闔徵獻忠實彰擿伏平險
人悅康所至與民作籓牆過師席上塵不揚拂衣辭祿歸故鄉徇
祥草澤歌虞唐良治爲裘世不忘明珠出海胎前光范隅馬鬣松
柏蒼礎石刻銘聲炳琅猗嗟先生此其藏

右墓表陸燿撰

彭時捷

楊河 孫積子 周恭先 鄒杰 鄧長信 鄒錫 楊瓊 曾承謙 劉逢 鄒應昇

彭時捷字及三湖南新化人乾隆丙辰舉人官四川永川縣知縣時捷性樸訥而聽斷明允每鞠獄如家人父子相對不施鞭箠而人自帖服莫之敢欺永南有寺僧徒多為民害會有告其橫暴者往察盡得其侵占奸利諸狀乃禽其為首者寘諸法餘悉勒令為民籍其產以十之一量遠近資遣之使各謀生業而寺改為書院題曰錦雲延進士王家駒主講文風丕變因請廣永川學額為上學永人建生祠焉同邑楊河字伏圖乾隆戊午舉人壬戌明通進士選茶陵州學正時其父可震適為州訓導因改調綏甯父子同官佳話也外艱服闋授宜章教諭遷武昌知縣抵任八日即禽治

劇盜吳大在任革陋規除耗羨禁浮收江漢閒呼爲楊青天母憂服除補山東范縣時大駕南巡河躬治輦道事集而民不擾在范久治最如武昌而勞更甚引疾歸五年卒孫續字雪堂乾隆丁卯以五經中本省鄉試官長沙教諭俸滿遷臨清知縣時山東有王倫之變臨清壽張皆被蹂躪王師進勦軍書旁午續治繁有法事訖民不知兵地恆苦蝗講求搜撲之法竭誠禱於蜡神民報有羣鴉集其處食蝻殆盡治臨四年不以眷口自隨以母年老乞歸遂不復出子璜乾隆庚寅舉人官貴州龍泉及山西洪洞知縣以事謫戍軍臺撰易經簡括錄三卷卽居塞下時所編其自序云行篋無所考訂祇成易經簡括裝錄成帙至字畫敲斜墨跡濃淡

椽寢息蒙古包內如甕底坐視甕口漏光一綫錄成此本我後人當惻然念所由來歟周恭先字素芳七歲能文應童子試父榮幹爲負之入場督學桐城葉酉面試之詫爲神童取入縣學時方九歲也踰二年癸酉應鄉試已擬中矣以三場病未與見遺又十年中乾隆庚辰舉人丙戌成進士授建水知縣治獄尤明慎建水地故產金官斯土者類多緣爲利藪會所治獄有宜問抵者令已定案將出之矣恭先閱讞牘曰是不宜出吏挾前官畫橐力爭恭先持之急而其家果懷金求緩恭先曰是迫我也緩之何以自明乃盡駁前讞按律問擬大府以故入罪恭先謫戍烏魯木齊十年釋歸恭先喜吟詠與同縣吳樞交最篤及遭貶斥久處塞外而出語

和平無激烈之音歸後布衣躬耕足跡不履城市士子有從游者亦不拒也鄒杰字萬夫弱冠舉乾隆戊子鄉試初官桂陽教諭截取得夥縣知縣調繁昌再調宿松均以循吏著先是安徽教匪案蔓延最廣匪目劉之協起自太和故搜捕尤亟一日奉總督檄村民被逮者七八十人杰知其枉乃率七八十人者訴於行轅總督意解俱得釋民爲建生祠杰所至崇學校革陋規擊豪強撫孤弱雪冤獄皆有名迹卒官後虧項累累籍沒時家僅敗屋兩楹薄田數畝而已鄧長信字璧園十三歲隸縣學籍中乾隆辛卯舉人挑發山東補鉅野知縣鉅野多盜而健訟長信至鋤奸擊暴懲猾決滯獄縣大治性剛介不喜迎合大府雖善其所爲而銜之者眾會

江南句容劫庫案詞連鉅野民姚大姚大者曾以事繫縣獄爲長
信所責釋者也遂以縱盜論革職已復坐用官錢五十緡濬河漏
報遣戍伊犁居八年歸歸後益貧授徒以自給生平博聞強記居
官精敏明幹與周恭先同歲生皆以幼慧早注學籍其遣戍出關
卽恭先入關之年論者謂兩人均以耿介獲重譴不竟其用爲可
惜云鄒錙字華袞乾隆丁酉舉人歷官肥鄉柏鄉武邑知縣在武
邑最久嘉慶辛酉大水錙日懷餽飫數枚覓得民間一楸柳盤代
舫乘以行躬親勘視設法振救滑澆泥水中所至荒村聚落男婦
雜處叢柳間面無人色見官至則泣錙亦泣或終日不得食取民
閒惡草具充飢而月始徧水退武邑民少飢餓死者居十年卒楊

瓊字叔玉幼慧與其兄玠同有聲瓊年十四爲督學盧文弢所賞
識旋餼於學充丁酉拔貢生官龍陽教諭六十年辰州苗變檄調
軍前以功遷納谿縣知縣調繁西充升簡州知州調署涪州擢直
隸酉陽州未赴以疾歸瓊有治才練習吏事所至擊豪強決疑獄
鹽梟匪聞風皆遠遁無敢宿其境其在涪各路私販壘集持械
拒捕瓊佯弗聞而陰籍白役得壯夫五十人朝夕訓練爲一隊至
是出不意掩捕數十人眾聞奔集聽事洶洶將爲亂瓊坐堂皇出
其首訊之有白衣而草帽者疊三草爲臺登其上手葵扇指揮瓊
叱一役越而顛之立斃杖下是日凡杖斃三人餘黨收繫無一脫
者未幾以病歸曾承謙字利川乾隆己亥舉鄉試第一挑發直隸

歷任定興甯津高邑知縣慈惠廉潔不名一錢所至民常愛戴定
興地當衝要又川楚陝豫同時用兵所調索倫勁旅及帶兵大臣
皆取道縣境承謙竭蹶供億事辦而民忘其勞最後在高邑以事
去官歸後鬻所居宅償夙負別做一荒圃構茅屋數椽居之灌園
授徒以爲食甚自得也劉逢字原旃乾隆庚子舉人挑發陝西知
縣初至值川楚用兵大吏檄赴軍營多所毗贊旋署膚施縣膚施
地苦寒逢因俗爲治勸墾荒種菽薯代粟未幾以憂去送者多泣
下服闋補白水白水地在南山之麓漢唐以來未經開闢所謂老
林也川楚餘匪竄匿其中數出爲民患官兵搜捕皆爲所敗逢至
團練丁壯數計禽其酋斬之餘黨竄散民賴以安性清介在任十

餘年囊無長物然脫略尙氣不悅於上官爲所中旣罷職白水人
釀錢爲買南山荒地三十里居之逢乃召其族人移居墾岱耕種
今遂爲白水人鄒應昇字照輝乾隆己酉舉人挑發甘肅歷任西
河通渭知縣所至與民休息在通渭見民間棺柩多寄寺廟乃出
示偏諭有主者擇地安厝毋惑風水無主者設法掩瘞毋使暴露
文悽切動人見者爲之墮淚已復出己財買地數十畝爲義冢不
三月而舊俗丕變應昇官甘肅最久兩以憂歸士民謳思弗置

右傳李元度撰

鄭大綸

君諱大綸字掌之又字補之其先世居於歙明永樂間始遷如皋之白蒲鎮祖諱琪 贈朝議大夫戶部福建司郎中父諱勳 贈奉政大夫濟南府同知有孝行仁於鄉里君少負奇稟讀書數行俱下自經史及天文地志醫筮諸書靡不殫究稍長卽以利濟民物爲志乾隆元年援新例出知陝西隴州隴地故瘠薄又頻苦旱君至訪瓠口六輔故跡濬渠泉募南方水工教以戽水之法於是歲率倍收又廣布區田蠶政之書使百姓專力耕桑又爲隴人修書院置學田而士興於學汧水爲東西要衝故橫木爲渡春夏水暴漲木輒漂去君設渡舟四行旅便焉隴與甘肅接壤甘肅歲荒

饑民數千就食於隴君曰若待報而後發倉民其殍矣卽按口給糧安其居時其醫藥而棺其斃者至春麥熟資流人還之鄉人得無害州民有物怪屢焚其廬君爲禱城隍之神怪卽止歲旱禱縣之龍潭輒雨時桂林陳文恭公方爲巡撫君以僚屬謁見與語興除事條析利害如指掌事有不便或排羣議必得當乃已陳公以是知君將薦之 朝會君以葬親乞歸旣歸乃不復出子嘗讀陳公奏議見其撫陝時爲民經畫者至周允以農桑二大政爲先務稽古雍州田賦甲中土幽風所稱其民莫不敦本業習勤苦漢唐之世再建國都其俗亦稍靡矣自宋暨明屢經戰爭漸卽凋敝今國家太平百餘年噢咻拊循德澤洋溢而關中富庶之效殊異

於東南者豈地利之或適邪抑人事之未至邪誠得如陳公者久於其任又得如君者落落數輩以佐之陝人其有賴矣惜乎君既去而陳公又已移節於他邦也君仕隴十年家居又二十年初奉政君好施勸育嬰堂君益善其事活嬰兒無算蒲鎮有南北石橋二南橋久圯首捐金爲眾倡橋成民甚德之其他親戚之貧乏者婚喪葬埋之不贖者無弗周也乾隆三十一年卒於家卒之日弔者咸哭失聲妻石恭人事翁孝翁得小疾輒晝夜侍寢門外不去及翁病篤每中夜焚香籲天翁卒痛不欲生水漿不入口者數日及三年喪終以疾毀卒年三十有三太史傅玉露著孝行傳以表之繼室鄒恭人年十九歸君撫石恭人二子如腹出君治隴日每

以家財佐公用恭人時脫簪珥助之卒年五十六子四人長景莊
浙江嘉松鹽運判次景誠工部虞衡清吏司郎中次景綱 贈儒
林郎布政司經歷次景收女七人俱歸名族君卒後九年諸孤將
葬君及兩恭人於白蒲鎮洗馬池之新阡景誠過江謁子請誌其
墓銘曰

唯仁於物必有濟卑之肉食爲身計卓哉鄭君古良吏求牧求芻
起凋敝振窳卹匱心調劑爰有孟光德相儷洗馬池邊幽宅閉永
勒仁風昌爾裔

右墓誌銘彭啟豐撰

公名大綸字言絲又字補之 贈奉政大夫贊庵公諱勳之季子

贊庵公有刲股廬墓之孝有育嬰濟眾之仁公字補之非敢效仲
山甫也繼志述事欲以竟贊庵公未竟之緒也幼有至性母冒宜
人見背時方五歲哀毀如成人贊庵公遵疾衣不解帶與德配石
孺人中庭露禱祈以身代既棄養毀不欲生石孺人亦水漿不入
口者數日且曉公曰吾婦人也從翁地下不爲輕重君志在顯揚
滅性違禮宜節悲哀勉終大事公感其言稍進食飲三年喪終石
孺人竟以哀感成疾旋至不起公承先人苞蔭凡贊庵公所有志
未逮者悉力行之如皋向無書院公合同志擗立學舍禮聘名碩
士風興起所居白蒲鎮有南北二橋南橋歲久就圯捐金倡建墓
義者景從雙虹並峙民不病涉利賴至今贊庵公建育嬰之堂全

活嬰兒無算至今公未嘗中輟其他寒衣飢食歲有常經不以有
無爲解則好施其天性也讀書斷爲有用尤留心經世之務筮仕
陝西隴州牧隴地高而土瘠民田每苦風旱當事議多鑿井事
迂遠而卒不可行公倣瓠口六輔之遺制濬舊渠以疏泉脈而泄
地氣又令人之南方募水工教民以溉播之法嗣後畝入一鍾公
益廣布區田蠶政之書使百姓專力耕桑雖有凶荒而隴民無菜
色隴士向不知學科第鮮少公爲修書院置學田築文筆峯建魁
星閣所以興起之途無所不備由是文風漸盛列賢書而歌鹿鳴
者不乏矣隴俗勁悍不循禮法觸利網而胥足入絆者毛舉不可
爬疏公至去泰去甚布寬大之政兼并之豪胥篋之盜椎埋之奸

悉予自新民感泣不敢爲非風俗爲之一變汧河爲東西要道僅
有二木橋春夏雨多山水驟發橋盡衝壞行旅望洋而歎公設四
舟以爲義渡晨夕往來遂成坦路州與甘肅接壤乾隆六年甘肅
荒歉饑民數千來隴就食公不待報可開倉日給口糧時其醫藥
而樽其膏骼至春麥熟資遣還籍而流人忘其飢治隴十年擿伏
發奸案無畱牘吏胥不敢因緣爲奸而民不擾畏之如神君愛戴
若慈父母兼攝汧陽事前令虧帑至二千金力不能償公哀其廉
悉肩任無難色邑令得以脫然歸故土以治隴者治汧恩威深入
民隱去後邑中士庶立碑以志甘棠芟憩之思時桂林陳相國方
撫全陝公以僚屬謁見與語興除事宜指陳明畫洞悉本原或獨

排羣議斟酌時勢令人各如其意所欲出雖稍憊勿恤也相國深相器重擬列薦劾公以營葬贊庵公故乞假歸里陳情迫切至於涕零相國感其孝思不得已始從其請歸田後葬贊庵公於白蒲鎮龜筮協吉永無後艱而公亦不復有出山之志矣恆以節儉守禮教子長子景莊官兩浙鹽運分司錢唐湖山之勝甲天下迎公就養極人世清暇之福好樂無荒良士瞿瞿數年仍歸故園次子景誠工部虞衡司郎中手書古名臣事迹示之尤以勤慎奉公爲助乾隆某年月日考終里第享年六十五歲初娶於石會稽傅太史玉露爲之傳繼以鄒三子景綢其出也公歿而柴毀特甚未終七而天四子景旼筮室某出公賦性鯁直是非不少假借以急告

傾筐倒庋而應之不少吝也錢唐梁文莊公謂其在家庭則爲令子在州里則爲仁人在朝廷則爲良吏型家而家齊臨民而民化時人以爲寶錄

論曰守令之進退皆待命於封疆之重臣重臣不敢徇私然亦不能無好惡以循良之績入告者盡心民事者半逢迎奔走諂事上官者亦半吾交於今相國桂林公卽其儒術之淳深信其能知人能薦士其所保任而無疑者必其能盡心於民事者也吾交於隴州鄭公卽其在家爲肖子信其當官爲良有司治隴十年前後上官未聞有薦拔之者必其不肖逢迎奔走出於諂事者也兩賢相遇桂林公知隴州最深能遂其恬退之高而不能挽其純孝之志

隴州見知於桂林公不梯榮取寵以干進轉陳情涕泣而求退論者兩高之余獨竊有規者桂林公經綸雷雨佐 聖天子成時雍之治誠得如隴州者數十人分治州郡以養以教察閭閻之疾苦則 九重之宵旰可寬亦人臣以人事君之義也隴州未五十而懸車甘心泉石有長才而不得大展其用桂林公欲援手拔之百僚之底而不得則近於愆此亦朋友責善之道也嗚呼隴州死矣隴汧治譜猶班班在人耳目有志乎史事者所宜大書特書不一書而已也余無眊筆之職又無秉筆之權因賢子景莊之請粗述梗槩徵信於克知灼見之桂林公揚芳樹軌吾文庶其無愧色乎

右家傳杭世駿撰

汪瑚

何子曰我 國家承平二百年草澤閒奇才異能之士湮滅殆盡
卽有何所用哉庚寅閏夏月夜與彝陵何子瀛論古來奇士因言
乾隆閒汪瑚事甚悉爲記之汪瑚宜都人兒時賣菜爲業晨興荷
擔寄蕭寺輒疾走還家而後鬻菜於市寺僧詰之爲買餅餌啖其
母也僧曰孝哉孺子可教於是教以技擊丁甲壬遁諸祕術人無
知者嘗乘舟渡河笠爲風落水汪蹈水面取笠人始異之有舅氏
官歸富甲鄉里汪往省見急裝客徘徊門外汪告舅曰此非孔道
客殆爲舅來耶舅恐問策汪難之舅曰甥能識客必能禦客毋辭
汪不得已應之曰此特偵者耳後當大至可備白金千盛筵二至

時烹茗待之後三夕閉從者於室鼻從隙闚汪時夜將半汪獨在
中庭忽一人自天而下汪呼茗茗自牖出已而鼻鼻者十餘人相
繼下汪連呼茗舉筵向牖茗置於筵累十餘椀不墜因徧餉客汪
曰公等來僕已喻指顧主人非他僕舅也僕非他某師弟子也雖
然主人已治具餉客且奉千金爲壽眾唯唯飲饌取金去蓋素饗
服某寺僧而隱隱知有汪者也由是舅大寵異之爲納粟作令數
歲解組歸遂閉門謝客乾隆初汪年踰六十川督某眷屬道出宜
都被盜喪重貲污其婦女督聞之大怒檄縣令刻期捕盜否則罪
令令懼計無所出或謂汪可辦盜乃急踵門求汪汪始託辭他出
旣而察令廉吏卒許之語令曰此去入蜀境巫山中羣盜在焉請

具大船在彼俟我汪乃乘小舟晝夜達則巍峯峻嶺中羣盜結砦自衛汪上及半坂遇邏者大呼曰速告爾酋汪瑚來也盜魁聞跪迓砦曰請曰茲事重大願明府終貸此三十餘人汪曰攫不義金本無足問淫惡者不可宥也羣盜意汪隻身來可攢斃之方動念手足已如繫乃皆大驚異失色魁曰止汪徐徐出袖中綆悉縮而去還至水次汪先登小舟繫三十餘人於舟尾曳之從水中行過大舶始加桎梏遂按治如律自是汪愈引匿然迄今問宜都故老無不知有汪瑚也

右記事黃培芳撰

陳鏞

曾叔祖會理州知州摩村公諱鏞弱冠卽擅文名乾隆丙辰楊大
司馬薦舉博學鴻詞著作等身晚年與金宗伯柱錢方伯嶼沙汪
徵君槐塘姚比部羽峯做洛社之會龐眉鳩杖花晨月夕載酒湖
山畱題殆徧觀者目爲神仙中人

右筆記陳其元撰

國朝耆獻類徵初編卷二百三十二補錄

守令十八

錢之青

榆次縣當太原四達之衝其東南萬山叢矗土瘠田少加歲數饑雖有常平義倉粟然在城內山路險遠難致民無所取食死亡交道縣故多雜徭無遠近皆徵無少貸東南之民病焉莅斯土者踵相接未有憐而設法以甦之也乾隆十三年錢侯來爲令甫下車考圖書問民疾苦惻然念東南之民同處榆次供 朝廷賦役獨不得濡倉儲一粟 天子命官以牧民爲事豈忍苦樂不均若是捐俸數百金相東南高燥地錯置倉若干楹移城內倉粟分儲其

中以待歲饑而正賦以外諸雜徭一切罷去不使累東南之民又
三年錢侯親至其地召其父老而告之曰吾儲粟於是以待汝饑
有事又不汝勞也豈貧困猶如故乎抑不也民皆感泣謝曰我民
今幸家有餘粟人有餘力實爲賢侯之賜侯又言曰吾欲從東南
亂山中伐木通道以便汝行可乎民皆喜曰諾於是踴躍趨事鑿
石夷土未閱月而山路平東南之民爲之歌曰昔也巖嶮今也康
莊徼侯之力孰示我周行我勞我恤我饑我哺侯之愛我踰我父
母乾隆十七年榆次之民劉某等述侯之所以惠東南之民與民
之所以頌侯者走京師來求予言爲記自先王之道不明士大夫
不知官民一體之誼以催科爲政以鞭扑爲能以奉行文書免上

官譏訶爲謹誰能於簿書之餘出力以甦民困如一身血氣之必
均而泯其疾痛如錢侯者豈易得哉爲之記所以告後之令楡次
與天下之爲令者皆當如是也侯名之青江南震澤人爲令廉敏
此其一端云

右記林明倫撰

國朝耆獻類徵初編卷二百三十三目錄

守令十九

陳士璠

楊度汪侯鈞
朱雲駿

陳樹華

莊經畬

鄭變

王光燮

潘汝龍

周昌德

許恆

錢元功

馮協一

吳璪

晉受一

宋賓鴻

守令十九目錄

--	--	--	--	--	--	--	--	--	--

161-408

國朝耆獻類徵初編卷二百三十三

通奉大夫前署江西巡撫江西布政使司布政使湘陰李桓輯

守令十九

陳士璠

大科之開也際不世之遇待非常之人將以代 王言備 顧問
從容殿陛洊歷坊局以儲異日槐鼎之用此 聖主寤寐旁求之
至意也吾同年一十五人錢塘陳君泉亭與無錫楊君勛齋皆以
諸生超授庶常吉士踰年散館改官楊君知江西德興縣事蹉跎
以死泉亭浮湛郎署又十餘年一麾出守守官以死死之日官無
餘財繼配趙某伶俜孤苦挈二孤扶櫬歸里終喪而不克葬非

慢也力不逮也埋幽之石龕而有待踰時閱歲孤子京始來告將以某年月日葬君於西谿某原余乃按其狀而表之曰君諱士璠字魯齋泉亨其號也陳氏系出潁川至宋南渡派分江西以信國文正公康伯爲弋陽之始祖繼遷餘姚之馬渚有湘露公者贅於錢塘始遷會城之後市街太平里六世祖學易萬厯癸未進士南京兵部車駕司員外郎從祀鄉賢建祠於里自五世祖以至君考皆爲郡邑博士弟子祖考諱遇 贈翰林院庶吉士考諱孚衷以君貴累 贈如其官三娶皆 贈恭人而君則吳恭人所出也君屢試高等爲邑增廣生十試不售雍正十二年制府上蔡程公以博學鴻詞薦乾隆元年十月試於 保和殿拔十五人而君名在

二等第七授翰林院庶吉士散館改授戶部河南司額外主事河南
南省有鹽礮飛沙河灘歷窆等地畝千餘頃無業賠糧民人籲部
請求豁免遞解回籍者數矣君與同僚武定李君斟酌定彙力請
竟從其議有佟姓家主告發廣東駐防係其戶下冊檔研審有據
同事受賄爲之出脫君以名分所係決然剖斷旋被告發西臺嚴
訊得實以營私治罪而農部一官無恙實藉君持正之力有旗人
仇家誣以先人係某姓戶下遂致子孫不得仕宦君委曲詳勘立
破其誣首人允服兩事相反而不膠於一轍虛公處事君無成心
也已而實授主事充戊午科順天鄉試同考官辛酉副中允朱賈
裘典四川鄉試明年晉江南司員外越四年晉福建司郎中君前

任員外時江南司有雍正十二年溧水等州縣被災其勘不成災區畝饑民例不加賑當事以社穀及官紳捐米煮賑屢爲推駁且欲報參賑米四千餘石著落原辦官追償接任者又以社穀原屬地方公輸儲備歉歲此固向有 諭旨仰體 皇仁非動支正項可比況業已賑去官吏易何處責其償還一二苛細者謂旣屬公捐卽爲公項堅執已見牢不可破君力主銷案十四年塵案一巨掃除州縣得以免累君遇事不辭難壹以清案牘豁拖累息事甯人不與同官立異亦不曲徇上官爲郎十一年出知江西瑞州府事以豈弟之心化刁頑之俗修學宮葺橋梁復譙樓平米價次第舉行暇卽與諸生講論文藝士風興起中丞胡公寶琮雅相契

重歎爲品高學邃積勞店作移疾俟代而已不可爲矣時乾隆丙子閏九月六日也享年六十有七文武僚屬以迄商賈士民遠近奔赴行哭失聲遺愛可徵口碑如一君初娶於張生二女一適同邑張慶增一適長洲王邦譽繼以趙生四子京國學生寅邑諸生三四皆殤銘曰

噫乎瑞州陳使君生有惠政州民云六尺豐碑高於墳下馬讀碑以我文

右墓表杭世駿撰

楊度汪 侯鈞 朱雲駿

楊度汪字若干江蘇無錫人拔貢生篤志問學工學窠書膺薦入京師客舉主尙書任蘭枝邸舍得交山陰胡天遊天台齊召南學益進既中博學鴻詞科官庶常尋改德興令告歸同時侯鈞字□□乾隆十年進士歷任陝西知縣屏供億杜苞其嘗修三賢祠三賢者燕伋郭欽段秀實也其在武功會有念佛聚眾之獄上官將治以邪教鈞廉得其實曰此愚民求福耳省釋其眾朱雲駿字逸湄乾隆二十一年舉人官隆昌知縣少學詩於劉瞻榕入蜀後篇什尤富古文學曾輩在隆昌時方有金川軍事饋饌供億不以擾民竟以勞瘁卒官

右傳秦瀛撰

陳樹華

乾隆辛丑余自巫山引疾歸南陔多暇補理舊業得盧召弓金輔之劉端臨諸君爲友盧金二君爲余言蘇州陳君芳林以所著春秋內外傳攷正五十一卷相示余讀之駭然以驚曰詳矣精矣內外傳乃有善本矣遂書其副藏於家用以訂阮梁伯十三經校勘記顧余不識陳君壬子冬移居姑蘇嘉慶辛酉君乃自晉歸容貌頽然嚴毅厚重相見恨晚並得其國語補音訂誤及詩集觀之詩集采於青浦王氏湖海詩傳矣其全集三千七百首生平舉動一可稽如白樂天之長慶也余與君居相近然不能數見遠於九月哭君溘逝余歸自蜀今三十年舊友如盧金輩鮮有存者吳門

王禮堂江良庭錢曉徵汪明之皆樂數晨夕亦相繼凋喪若君則相識才數月而旋失之可不哀哉辛未君子承宗等將葬請余志墓余不敢辭按狀君諱樹華字芳林號治泉 誥封奉政大夫先世由崑山遷長洲曾祖學洙仕知縣祖璋康熙甲戌進士歷官侍讀學士順天學政父鴻熙歷官兩廣都轉鹽運使君以乾隆元年恩廕貢生補授湖南武岡州州同公事註誤回籍家居十載閉戶著書內外傳攷正蓋成於此時也已而得江西靖安縣縣丞嗣升湖口縣知縣大吏保薦 特授山西澤州府同知旋以到任遲延降補甯鄉縣知縣乾隆六十年也君莅官能聽斷長官前侃侃辨論無阿諛姚巡撫蔡王藩司昶善觀察泰皆服其才其於民事

雖無某事某事可指殆古所謂日計不足月計有餘者與讀君遺
命一篇有云早知窮達有命恨不十年讀書吾所著惟內外傳攷
正宋氏補音訂誤可壽蓋君以勤學自任如此君生雍正庚戌享
年七十有二妻吳氏 誥封宜人克謹婦道卒嘉慶辛未年八十
有四子三承宗安徽試用主簿次翊宗啟宗君長子也後君之伯
父拱乾爲孫女三適吳鉸孔廣彬吳雲錦嘉慶十六年月日葬君
於某縣某鄉某原吳宜人合窆焉銘曰
或謂之循吏或謂之儒林古宇古言精熟有過於劉歆千秋而後
過其墓者知君於左氏之學綦深

右墓誌銘段玉裁撰

莊經畬

太守莊君從北門還宣州未半月訃至士大夫知與不知俱爲流涕聞其渡新河遇風舟幾覆食飲滯留服大黃臥便利不止果藥誤耶抑驚顛離胸以隕其生耶嗚呼求其故而不得者命也夫昔余知江甯今劉映榆學士介君於余長不踰中人而秀眉方頤言論風發從此交甚懽二十年來余雖居林下而君之黜陟升降以及其尊主隆民之治功有其子孫所不能知而余獨知之者然則君後人之來乞傳於余也固君志也君始知建德再知盱眙甯國泗州而終於宣州太守乾隆十年貴池民熊永安與金海鬪金傷重熊慮訟不勝會族弟長德病死乃斧屍誣金縣令謝錫伯廉

其奸遂並誣謝落職而抵金罪民洶洶不平撫軍檄君與無爲牧
玉名標勘詰君檢腦骨陷於顛非生前傷鉤鉅旁證得喉訟人某
而長德妻亦傷其夫屍之無故熏灼也跪謝告實熊乃伏法事雪
皖江數萬人譟於時稱兩君子云盱眙大水湖岸崩庭飲者相掬
君兩立油衣而騎指揮水退民以爲神在泗州請免二十五年漕
耗大府聞諸朝天子許之到宣州三月積案五百無畱獄者
乾隆十六年至三十年天子四巡江南前總督黃文襄公今相
國尹公俱以絕世才總領百務而非君在側如失左右手一切山
川舟車供張儲侍君能先機置想後事補缺絲毫不註於過差余
嘗見其扈蹕時踞坐帳中皮硯膝上十指雨下旁立文武內監

數十人噂暗相環或催徧火急而君墨無停書筆無誤字面無異色朝奏入夕報 可其敏健如此樂道人之善遇孤寒一才一伎必薦寵遇建德舊令於途貧爲還帑而甯其歸性狷狹乘氣辨口小忤意輒以精神凌偪人雖貴游長官不少含忍以致先爲泗州陳刺史排笮再爲安撫衛公劾奏至落職簿錄而卒之事皆無驗天子閱其勞每南巡必加擢遷自縣令而州牧而太守雖忤者聞之皆懃服曰莊君以才力取非福命也然屢躓屢起危而後光家以是貧而精亦消亡矣卒年五十五君諱經畚字井五一字念農乾隆二年進士

贊曰儒者多迂緩養名爲文俗吏所訾謗得莊君而人不敢輕科

目才之不可以已也如是夫然君色焦然蹇蹇無已卒皆料量苛
細馳逐雜務與書之云循吏者異也過此以往執掌將畢而宣州
民安風涵君必能修先王之政與民相和親而已亦將流覽其山
川詠歌賦詩以永嘉譽於來茲乃竟齋志以沒若蒼蒼者故限之
而欲其止於是也福之方始壽之已終悲夫

右傳袁枚撰

鄭變

鄭變字克柔號板橋興化人乾隆丙辰舉於鄉連登進士第授范縣知縣改調濰縣以疾乞歸板橋少穎悟讀書饒別解綽有文名家固貧落拓不羈壯歲客燕市喜與禪宗尊宿及期門羽林諸子弟遊日放言高談臧否人物無所忌諱坐是得狂名既得官慈惠簡易與民休息人亦習而安之而欬欬歷落於州縣一席實不相宜世方以武健嚴酷爲能而板橋以一書生欲清淨無爲坐臻上理聞者實應且憎不則怒罵譴訶及矣雅善書法眞行俱帶篆籀意如雪柏風松挺然而秀出於風塵之表所畫蘭草竹石亦峭蒨別致詩內所云時時作畫亂石秋苔時時作字古與媚偕者是已

詩取道性情務如其意之所欲出其自序有云余詩格卑下七律尤多放翁習氣屢爲知己詬病好事者又促余付梓自度後來亦未必能進姑從諛而背直慚愧汗下云云其言可謂不自滿矣然其詩流露靈府蕩滌埃壘視世閒無結轡不可解之事卽無梗咽不可道之詞空山雨雪高人獨立秋林煙散石骨自青差足肖之非彼藉口白戰以自詡爲美無故實者也板橋徒以狂故不理於口然其爲人內行醇謹胸中具有涇渭所刻寄弟書數紙皆老成忠厚之言大有光祿庭詰顏氏家訓遺意異乎放蕩以爲高者信賢者之不可測也昔晉文王稱阮嗣宗爲至慎吾於板橋亦云

右小傳鄭方坤撰

濰縣知縣鄭板橋變揚州人乾隆丙辰進士與吾膠南阜老人高鳳翰善余曾於南阜處見鄭往來筆札心慕其人辛未五月下第歸過濰招飲友人家濰俗重賈二三賈客與語焉語次及板橋余亟問曰何如羣賈答曰鄭令文采風流施於有政有所不足余曰豈以詩酒廢事乎曰喜事丙寅丁卯閒歲連歉人相食斗粟值錢千百令大興工役修城鑿池招徠遠近饑民就食赴工籍邑中大戶開廠煮粥輪飼之盡封積粟之家責其平糶訟事則右窶子而左富商監生以事上謁輒庭見據案大罵馱錢驢有何陳乞此豈不足君所乎命阜卒脫其帽足躡之或掉頭黥面驅之出余曰令素憐才愛士此何道曰惟不與有錢人面作計余笑而言曰賢令

國朝通志卷之三十三
此過乃不惡羣賈相視愕起坐去語曰商賈之言醫匠之心錄其事以俟採風者

右書事法坤宏撰

鄭板橋愛徐青藤畫嘗刻一印云徐青藤門下走狗鄭燮童二樹亦重青藤題青藤小像云抵死目中無七子豈知身後得中郎又曰尙有一燈傳鄭燮甘心走狗列門牆

右隨園詩話袁枚撰

板橋以歲饑爲民請賑忤大吏罷歸其詩云長官好善民已愁況以不善司民牧真至言也工畫蘭竹書法以隸楷行三體相參古秀獨絕淮縣人感其政法至今寶其書畫多有效其體者性疏宕

嘗置一囊銀錢果食之類皆貯於內遇故人子或鄉鄰之貧窮者隨所取而贈之作詩不拘體格興至則成頗近香山放翁

右淮海英靈集阮元撰

板橋幼失恃賴乳母費教養得成進士初歲饑費負大令入市以一錢易一餅置其手始治他事數年費益不支其夫謀去費不敢言常帶泣容汲水盈甕置薪數日而去大令入室見竈猶有飯一盞菜一盂未幾復來其子俊已得提塘官屢迎養不去大令詩云平生所負恩不獨一乳母又云食祿千萬鍾不如餅在手讀之令人流涕

右珠湖草堂筆記張維屏錄

板橋詩云四十科名五十旃旌妻孥綺穀童僕鼎羹何功何德以
安以榮其家書又云凡人於文章學問輒自謂己長科名唾手而
得不知俱是僥倖設我至今不第又何處叫屈來余謂世人藉幾
篇時文弋取科第一日身爲民上安富尊榮時誦板橋此言庶幾
不忘本來面目稍免罪戾

右聽松廬詩話張維屏撰

板橋大令有三絕曰畫曰詩曰書三絕之中有三真曰真氣曰真
意曰真趣

右松軒隨筆張維屏撰

先生少孤負讀書成甲科授邑宰見身說法民皆安堵息訟嘗於

公庭步月作詩寫畫六房如水吏去無人真循吏中之僅見也晚年置田百畝歸老躬耕時往來郡城與友人聯詩酒之歡所作詩詞文章手書付刊先生不以詩鳴然述事言情無不惻惻動人誦先生詩者可以知其志矣與袁簡齋太史未識面聞有人傳太史卒者先生頓足痛哭不能自已今之奇人也其贈太史詩有君有奇才我不貧之句

右奇心齋詩話符保森撰

按鄭公前據小傳乾隆丙辰舉於鄉聯登進士第編列乾隆二

年嗣見板橋集印章康熙秀才雍正舉人乾隆進士考題名碑公成進士實在乾隆元年正談於此

四庫全書
卷之三十三

三

王光燮

乾隆五十五年夏兵部主事王育琮請假歸里踵門而告曰先君沒五年矣情事未申幸得一第豈敢更緩而卜又不吉將權厝於某鄉之原以俟大葬敢以墳記爲請按狀君諱光燮字麗三世爲武進人考家梓清德未耀君九歲能屬文年十四補邑生員乾隆元年以五經中順天鄉試舉人明年成進士初選廣東博羅知縣調定安坐博羅遞書遲免復出令直隸之雞澤權廣平移邯鄲復以會讞事免家居六年起署江西之安遠改廣豐補宜黃母老乞歸養既免喪簡發福建累攝莆田將樂事補連江不就移疾歸治博羅甫視事投牒者數百人無鉅細卽予飭斷兩月後積案一清

治定安民有犯淫擬辟繫獄者年甚幼君慮囚察其枉貰之治雜
澤鑿邢家隄建青龍關通城濠水利濬溝七道建七利閘得灌田
三百餘頃沙河爲害縱橫二十餘里夏水漲舟行過邨落聞秋涸
始種麥君舍河畔召約民濬二旬而工竣沙患以甯建書院招秀
民肄業其中公餘輒過之經指授多掇科第去值歲旱甚衣冠禱
赤日中首觸城東龍王廟石碑血殷漬天遂大雨血痕積久不滅
京軍過臨沼關雞澤當出車五十輛故事先期遣吏選民馬吏緣
爲奸或詐增車值君按鄉亭定出車數書其值令民自擇馬至期
乃會治邯鄲時廐騎詣邊驛假民馬役使民自具芻牧徵馬殆徧
君爲區處貸富人馬十而假一官爲畜之繇滿還其主僕者予直

夜隸更繇宿南關市逆旅數十家苦供億君捐廉俸別置舍官給
資物市民賴焉河東鹽池壞西商借長蘆引由漳滏兩河運所過
郡縣爲扶持各有餽謝君峻卻之左右或以爲言不可後事覺受
者皆望議治安遠女子謝英珠父沒虐於後母將嫁何氏擊行娶
者逐之歲除英珠泣祭父前母怒更擊英珠盡奪遺屬書契傅其
罪白縣君詰得狀召何趣成禮庭中俾御其妻歸治廣豐雪徐氏
兄弟之爲仇抵者爲復諸生服治宜黃禁私鑄革溺女俗置育嬰
舍舍之臨川饑民突入官舍奉檄會勘臨川令欲窮治之久未決
令勅偶起君略問卽論笞杖有差令還讞橐已具令不能奪免者
數十人縣民牛兒少嘗盜竊人物後贅婦家婦勸習恆業已十餘

年牛舅犯賊往探之連坐擬配君按無贓據遂釋牛曰吾不忍令賢女子失所也縣故山疆民爭山多械鬪吏不敢誰何君言於大吏官山無糧民各趨利便豪有勢者卽益兼并願一切令民認墾升科以息爭訟大吏善之令通行部中斷獄大減初至閩海盜劫商舟以行又掠得販者驅販者登商舟盡躍登販舟去商報縣行捕識販者舟執而榜之強誣服君鞠商與販時日互異召販所嘗宿者寃始白攝莆田二十餘日釋前無罪繫者三十餘人其直人輕枉罪多類此君前後爲令最久未嘗一遷秩然所至多惠政去之日民必詣大府請留不得則涕泣送去後益見思在將樂數病不視事素善子平術曰吾行年六十九恐不利可長違首邱之義

乎及補連江竟不就以乾隆四十五年二月卒年果六十有九配
白氏候選州同知樟女端栢範撫庶子女咸有恩後君五年卒今
耐厝於君禮也子六人育琮己酉進士兵部武選司額外主事寶
雲育璣俱國子監生育琪早殤育瑞育瑄孫五人成錦成鑰成鈺
成鑑成鈞女五人舉人蒔純裕知縣許承志縣丞吳兆晉主事孫
星衍生員劉植之其壻也君性坦易不飾邊幅被服常垢敝遇達
官貴人脫帽跣足如平人交貧士一藝之長必爲延譽既居鄉於
諸鄉先生中科最深又負人倫鑒後進請業無虛日懷玉與君諸
子子壻輩交甚辱知厚君亦以所爲文相訂質有所獻替未嘗不
欽然受烏序可謂忘分樂善者矣銘曰

君之仁浹於民君之虔格於神宜子孫繁且賢殯廣遠待表阡

右墓誌銘趙懷玉撰

先生姓王氏諱光燮號蓺山曾祖之仕高才不偶工畫山水及蟹
與暉壽平齊名祖 贈文林郎諱滋生父 贈文林郎晉奉政大
夫國子監生家梓母唐太孺人先生生數歲父贈公教之嚴讀書
樓中扃門自小竇通飲食積寒暑不少暇九歲能文章十一歲應
童子試縣令奇先生文拔前列十二歲應學政試日不移晷走筆
成七藝補學生員乾隆元年以五經舉順天鄉試明年丁巳科成
進士十年授廣東博羅縣知縣始視事縣中投牒者四百餘人先
生坐庭中細事卽決遣當召捕案驗者屬吏子期斷不理者飭罷

自己至申手批數百紙皆盡縣中悅服兩月後按治舊牘一清久之調定安縣博羅耆民數十百人詣省言民等束髮至今七十餘年未見有視民事若己事如王公者願假一日畱因日向臺使轅門叩頭請至流涕大府先不許重違民請予畱半載乃去之官定安縣民有犯淫擬辟繫獄者先生錄囚至其人實十餘齡耳曰孩也安有此事貰之縣境際海甫登舟遇颶風大霧有物觸舟破海水沸舟中人皆泣先生神氣如平常俄得一舟先生呼餘人畢登乃自登舟從霧中抵岸巨濤拍石上前舟盡裂在定安二年道府重先生治行他邑疑事輒委讞決咸當其理欲白臺省右遷會坐博羅郵遞稽遲免官十五年起復爲雞澤令明年上幸江南交

河知縣尹侃有政聲偕先生辦差交州交人德之爲之語曰尹也
幹王也善先生治雞澤好爲民興水利通溝澮每舟出或經行隄
上徘徊視水道曲折良久乃去邑東引滏灌城濠名文明河明末
湮廢乾隆九年 詔修饑輔水利前令自邢隄開渠通文明故河
入濠道曲水不能達先生鑿隄偏引水直西入東關建青龍閘時
啟閉濬溝南北七道建七利閘溉田三百餘頃築護城隄種柳干
株濠中植夫渠十餘里花時邑人游泳爲樂沙河爲雞澤害圮鄭
歷南縱橫二十餘里每夏水田盡沒舟行過村落聞東柳柏枝諸
墅歷歷見水中秋乃涸種麥號一水一麥鄉先生舍河畔召約民
浚畝出夫里均直二旬而工竣水患遂息縣故有義學三舍先生

至建書院廨東鳳起山下每閒便服過諸生行學舍觀其書籍及
所爲文爲之疏解疑難行數年高者擢甲科次或補明經食餼士
風大振畿南蝗起先生赴魏縣出賞格令民捕蝗滿格者予錢如
數蝗盡滅歲當旱先生且夜禱盛衣冠坐赤日中汗涔涔下左右
爭扶持去不得趣白太宜人出阻乃起走謁東門龍王廟叩頭籲
禱輒大雨一縣皆喜方禱時首觸坐石碑上血流漬碑積久不滅
邑人異之旋攝廣平縣數月還時擬擢大興縣有阻者乃止調邯
鄲令縣中聞先生遷旦明先生出閣門民老小遮道泣畱掖持輿
幾敗先生遣吏諭散因其叩頭進卮酒輒少飲慰士民意日中乃
得出城就道後雜譯人列上先生於名宦云先生居官久大指與

民興利除害力之所能至務推行之以此得吏民心先是都兵嘗出臨洺關雞澤僦送車五十輛故事先期吏選民馬牧城中吏緣爲奸或詐增車直先生乃按鄉亭定出車數書其直令民自擇馬至期乃會吏毫釐無敢侵犯邯鄲廐騎詣邊假縣中馬郵亭役使民自具芻牧五日代徵馬徧邯鄲中先生具爲區處取貸富人馬至十假一畜官舍園中繇滿還其主僕者輒予直又夜隸從數馬更繇宿南關市逆旅數十家更次供億隸或羣飲叫號卽有不遂輒怒罵毀器物先生以私秩置民舍數閒官給用度什物隸出不敢舍市中自此安焉河東鹽池壞西商梁借鹽引長蘆由漳運十二萬溢河運八萬過郡縣爲扶持謝各數十百金先生卻之左右

或以爲言先生曰人各有分卽非分得子孫弗能享久且爲禍吾輩人前談言若可斬金鐵見利則柔其節如唾涕豈可復面目對天下耶遂不受後事覺河北諸郡受者皆被議制府按商簿無先生名以此歎服後以會讞事牽連免官家居久之復起署江西安遠縣改署廣豐初安遠孤女謝英珠許嫁何氏後母求賞不遂擊逐行娶者會歲除祭英珠拜父前號泣母怒率其子擊辱英珠發篋中盡奪衣服遺屬書契英珠走匿族家母白縣傅英珠罪先生會族家皆言狀因召何至趣成昏禮庭中何卽日御其妻歸縣中男婦縱觀皆歎息廣豐徐氏兄弟爲仇抵先生雪其罪爲復諸生服旋授宜黃縣先生治以惻悻爲行不忍任刑法收賦租民有負

者輒假其期會上課時或不足計簿至典裘服適其數以緩民追捕聞民俗多溺女出教嚴諭廣育嬰舍收卹之禁民私鑄捕首惡按其不法餘皆憎服歲饑舉平糶法市賈不得騰涌臨川饑民突入官舍中先生奉檄至郡按其事與臨川令共論囚庭中某令欲窮竟其罪株連多先生唯唯不更一言自日中會論夜中未決令勸起去先生令民更前略問狀卽論杖笞有差立具讞臺俄頃令還復詢先生曰休矣論且定吾今報府因示之狀令愕然起卽夜報府免數十人邑民牛兒少時盜人物後爲贅壻婦勸夫耕田學鑿法十餘年牛舅犯賊掠死南豐獄往候執牛連坐擬配送宜黃先生歷竟所考無贓處自言久爲婦諫止先生曰牛前犯贓不足

惜豈可令賢女子失所隨配軍耶令更捕賊果廉得乃釋牛縣故
山疆民爭山及墳壟或趣守山上下礮石投人吏不敢收捕匯集
益多會大府行部先生言官山無糧民各趨利便無券約豪有勢
者卽益兼并願一切令民認墾升科以息爭訟大府善之令下通
行部中斷獄大減江右至今稱便奉檄守鄱陽三月還以母年至
高乞養歸四十年免喪起官簡往閩省海洋羣輩爲盜劫商舟乘
以行劫又掠販者五人販者盡納贖免死賊驅五人過前商舟登
販舟去商報縣五人適歸行捕識舟執販榜擊無完者強服先生
鞠商及販者時日不符販言某某日至某所販宿某某家因召販
主及所當宿者證之冤竟白閩每讞盜賊數百多所平反閩中稱

平行署莆田事二十餘日嘗釋官舍前無罪繫者三十餘人先生
前後所輒直人輕枉罪皆此類也四十二年署將樂旋授連江聞
前令虧帑因移病不任事曰吾代人受過爲上官挾制何能復自
爲政耶先生素善子平術常言吾行年六十九恐不利每歎曰仲
弟知止辭公縣車吾雖百不及二子又可默默長違首邱之義遂
辭疾循粵東歸先生恬於勢利不肯爲容悅邀當世名每計典多
有稱薦輒罷同列及故屬吏或治下生多有至大官者而先生前
後爲令三十餘年終不得徙官凡任粵閩各三直隸再歷江西者
四三與同考所至縣去官後久之猶見思生平爲人樸介而眞衣
服不少飾行道中輒爲鄉里所指笑與人交忘形骸不立崖岸每

譙集時脫帽露頂雖當道顯者未嘗少拘禮然恭讓下士每貧士
敝服造謁迎致密坐語移日左右侍者皆疲急人難出肝膽周旋
曲周幕某病辭去依先生於雞澤屬死事尋卒先生爲大小斂以
禮使護其喪歸其緩急可恃類此以四十四年二月二日卒於家
寢春秋六十有九娶白氏宜人側室黃張陳氏子育琮己酉進士
兵部武選司額外主事次寶雲次育璣俱國子監生次育珙早卒
次育瑞次育瑄女五人長適甲午舉人蔣純裕次適乙酉舉人廣
東番禺知縣許成志次適分發廣東候補縣丞吳兆晉次卽適星
行次適府庠生劉植之孫男成錦成鎬成鉞成鈞成鏞孫女二人
星行辱在甥館故得書聞見之實以請於當代立言之君子採擇

焉謹狀

右行狀孫星衍撰

潘汝龍

公諱汝龍字健君湖州歸安人以乾隆丁巳進士令松溪聰明肅
仁接民於理令七年松溪大化其冬丁母夫人憂去官民跼百里
會哭匱下惟公孝思例不可畱相與立祠水南亭左並碑公績祠
堂惟公始至設旣縣門受民書以知好惡審其無私罷行之如奉
上命始教俗葬禁停柩修學宮改浚泮池如法易道路復廢井墮
建橋於津新賢祠以示教嘗決疑獄道有棄屍究之立得殺者他
所責罰民皆自罪改悔感泣至爲位以祝松有濫徵請蠲於上不
得則出己產代償松民歌之以訖於去令松七年家鬻田廬幾盡
嗚呼可謂賢矣始公以名進士兄弟有聲京師說者謂且官禁近

經術輔佐 天子閉不得通隘其大澤之於一邑隄防濬蓄故其
入民也深公雖以憂去賢聲徹四方他日去柄大政於 朝勳勞
天下究其治迹發聞之處自松溪始

右去思碑朱仕琇撰

周昌德

周昌德字紫谿湖南零陵人雍正己酉舉人乾隆丁巳明通進士任益陽安福教諭選浙江武義知縣兄弟八人昌德晚出生時母以家貧難養育溺之嫂匿而撫之生前夕有綵輿紅蓋之兆故嫂護之力幼穎悟過人後以五經舉於鄉知武義時旱且荒邑城久圯昌德爲請於上城之以工代賑更糶倉廩以濟民多全活告歸事嫂如母廉奉所入率均之兄弟年八十五卒

右傳李元度撰

許恆

今天子紀號之元載起潛震蟄收擢才雋與之更始前涿州守江甯許君家居者蓋六年矣踊躍 聖化走京師投狀請自效執法司憲之重臣察其辭直俾得 覲見 天子有日無何許君適以疾告越明年竟卒邸舍其孤天成將以喪歸匍匐余庭口述先人遺事請爲行狀狀曰君諱恆字思貞號北山系出唐忠臣遠後世居徽州歙縣之許村自君封公宗玉公始遷江甯遂爲江甯人宗玉公娶奈太君生丈夫子二人繼室程太君又舉子二君其第三子也幼而岐嶷端厚不佻及長性識練達措意經世之務入太學循例謁選人授江西建昌府通判甫莅任值南安府砂夫梗化兇

鋒方熾往收捕者輒爲所挫撫軍廉君才俾率兵士進勦君以計
攜其黨乘其怠擊之旬日而平未幾府治城鄉同日蛟發水涌十
數丈遭漂溺者呼號徹聽君亟命人吏恣與之金不問安人翁亦
徹環瑣以助招徠舟人得船大小九十餘艘救回漂流者四百二
十餘人生全者三千餘口渡送天一山蓋茅安處炊糜給廩民得
恃以全活水退更爲修葺廬舍復獲安堵康熙五十七年調判湖
南永州檄赴長沙執季執季者當時所定之名於府佐中擇一二
賢員以當司臬譬指之使者也君天性豈弟能盡心於庶獄七府
二州填牢戶籍以開釋者不可僕數而匿名爭水兩重獄尤倚君
以全妖僧有爲悖逆帖子者揭於通衢索其人不獲撫軍怒甚飭

長沙善化二令必訪致之城僧千眾皆坐幽繫敲引無虛日君謁
軍門請以身肩其獄日就僧鑿辨辭色卽於眾中得造謀者千僧
一時盡脫桎梏泣爲許使君立主尸祝諸寺至今不衰五十九年
攝善化縣事歸塘李陳兩姓以爭水利致殺人禁囹圄者六十餘
人案懸七年不結痠死者七人矣文書盈尺君用情閱實寢不齎
席者兩晝夜庭引諸囚謂之曰獄有首有從律有矜有疑若以關
闔細故株連蔓衍至數年不解父母妻子皆日引領生還但得一
人首服其事卽冰釋矧就坐尙有矜全之路耶忝爲民上誠不忍
效前事者濫刑懾汝伏盍自陳乎爲之獻欬掩泣淚汎瀾几案聞
眾囚感動慷慨引伏盡得其狀收其兇首餘並請於軍門開囹圄

而縱之兩村父老焚香踵門祝使君長壽者走數十里不絕雍正
三年兼攝府事本屬江華永明道等州縣地界苗疆跳刀走戟間
有竊發君草上移鎮駐兵彈壓巡防之議不果行後卒有荆之寶
之變始移兵駐守如所議六年銅斤解京例得引 見 憲皇帝
諭旨褒嘉晉任順天府涿州知州十二月十九日朝於 乾清宮
跪請 聖訓溫綸勸勵至數千言有香貂珍藥乳茶克食之 賜
恩遇稠疊君益感勉奮發治涿未月循聲四播俄以前在湖南
時屬員有諱盜者牽連及君 上置不問以北南大道夏秋積水
爲行旅者所畏發帑修墊在君境內者部定修寬二丈君更增廣
五尺皆解私囊爲之益藉此以仰答 知遇而督臣不察猥以違

制累民絀君吏議而君遂自此解組歸矣君服官三十年勤勞在職殫厥心膂凡四督漕運一護京餉一解銅斤一送軍糈抵紫荊關在建昌攝縣事者三曰宜黃曰新建曰新城攝府事者一曰吉安在永州攝縣事者二曰善化曰零陵兼攝府事及郴州皆以興學校課農桑鋤奸振滯宣導 聖化爲要務修建橋梁民不病涉今宜黃之通濟石橋及永州西門之浮橋皆君所勸也君至性友悌初服官先人田宅卽推與弱弟歸田後空囊不名一錢假屋而居日事影質口不言析產事晚歲築室鳳皇臺左授書諸孫與人樂易無疾言遽色束帶終日家人儼若嚴賓爲鄉里所取則君生於康熙八年某月日卒於乾隆二年某月日春秋六十有八娶於

國朝志卷之三十三
翁同縣明經象賢公女 覃恩封安人先君十年卒子男二天成
天一天成娶於如皋高氏天一娶於上元譚氏天一先君早卒女
子子一嫁海甯陳克敏孫男一愨余之託襟契於君也從君族弟
焄余重君老成貞純敦樸之氣襲余懷而不能釋且以天成之爲
能嗣君並欲傳君是不可以辭也謹狀

右行狀杭世駿撰

錢元功

泉州屬邑多際海海道與粵東相出入寇有自粵來者率藉之萃淵藪惠安其一也而陳發利等爲之魁初粵之海盜蔡三十二張甚粵制府遣標官張爵臣撫之而爵臣倚巨商楊懋仁願陰與盜通懋仁者孝廉某父也故往來販海中蔡三十二生得之遂以爲謀主號曰太公縱使餌內地人因誘得某弁之弟某弁親信之與陳發利等各有名籍稱將軍而某弁所轄者卽惠安邊海境也發利有與主旁緣漁劫無誰何及晉陵錢君元功長斯邑以耳目發得之旣考實遂駢斬發利等二十人於福州惠安之海境清惠故淵劫邑君爲政多所縱舍裁闊狹以貸民而獨嚴盜賊嘗杖斃積

賊王四曾添等數人又善察人眉睫之間以得盜有訴盜牛者盜爭之君縱其牛牛徑奔主家盜以伏罪及是禽海盜欲遠徇薙其根株因具讞本末以上而故事捕洋盜滿品者賜一級大吏願難之謂時方太平安得以此驚上嚮也削其贖不以聞而君之功遂格不敘山賊陳五顯嘯亂安溪永春間惠與永春壤地接而駐防兵先是他遣畱者如晨星君言於上官不備不虞不可以師秦兵搏力法可做也取丁結隊而以邑軍官陳某紀綱之春秋都肄拍試應格屹然如岳家軍事平乃罷說者謂是軍可無罷諸官兵可漸減也而其後蔡三十二者益張 天子至命大臣親入海就撫粵中吏往往以罪去而張翁臣楊懋仁獨他徙免君頓足曰使我

初獻得上者爵臣等可出不意就縛何至網漏吞舟願滋蔓若此
方大嵐山事發也惠安人有連浙中移名氏捕之年齒月日頗具
而無狀貌及里居同名氏者數輩莫適承君取道院禮神簿覈得
一人械以送而釋其餘所縱舍多此類也庚寅歲大饑 上命截
浙漕以賑君欲民速得之計米抵泉州必由惠安達也亟請於總
運者提軍藍公便道畱邑所需米而運之鄉委其辦於鄉之廉幹
士吏不得一舉手帀月事竣民獲甦董賑事者先願未至也太守
劉公伉數以鐫切君君抵日追亡者趨拯溺者濡民不食月餘矣
更遼緩之則且鬱爲枯腊復焉用賑爲守怒其慙也許之撫軍謂
疑有奸私撫軍黃公秉忠曰吏思利民忠也是可與權變矣何罪

無幾何黃公去晉江賑事開而君亦隨以罷官歲之饑也晉江號者滿街名口視惠安蓋倍以上守飭減之再三而賑米屯縣倉又不時發民贅聚枵然無所得食怒洶洶如水火會給米券司獄鄧君至傳太守語云云未脫口眾卽袖瓦石擲之令徐君源至卽又擲令市一闕而集者萬人遂攻郡署是日也守匿提軍署以免城門盡閉郡官吏無敢馳道中而君適以他事至聞變唁守於提軍所護之歸郡署郡民緣道額叩君此眞民父母矣惠安何幸乃獨有二天而斥守名奴之惡言詈詞滿若堵耳當是時守杜門辭舌欲自殺私疑君爲煽變謀有以中君念君素廉難污以奸利事又一切治辦不可以輒弱不勝任坐之獨食庫缺者未奉撥抵罪

之差有詞連揭請制軍劾罷之得旨勒追而君故錙銖無負也其明年撫軍覺羅滿公道惠惠人遮馬首累牘列君冤大略謂平糶價已解司獨批未下耳月日可覆也詔蠲地丁而祭祀香燭以及廩膳俸工窮民之常餼諸所當給者例取畱椿錢應之以是爲虧帑卽入閩官署空矣穀之缺者緣歲旱屯米不時輸故碾以給軍亦已具案報郡今願以累令小人無狀願數日還官逋慈父母不可失也其言絕痛撫軍卻不省而久之事卒得白君竟洒然以歸嗟乎儒生俗吏不識時務幸有識時務者於此網絡施設推拍宛轉便於公而宜於民上之人不一引手以勸能者而輟幾沮成赫然蔽之甚且因以爲罪古今來如君者多矣此可爲太息也

初君榜惠安治堂有曰作一日吾盡一日之心寬一分民受一分之賜卒能行其言又嘗著論以謂居官者強迫而取甚於盜委曲而取甚於賊事上官以固其位而取人財甚於倡與優故其歸也不能名一錢君諱元功號碩齋年三十三補諸生又十年而充內廷教習又六年得官官十一年而罷既罷復畱闈者三年迨歸則六十矣又二十五年乃考終乾隆二年九月二十七日也享年八十有五系出吳越武肅王當明神宗朝侍御史啟新公與高願號東林黨魁而其子大司徒梅谷公復振之世美不隕鏗耀史書是爲君高曾祖大司徒生孝廉巖石公君祖也孝廉生 贈翰林院侍講學聖公君考也凡再娶遇 覃恩贈封皆孺人前孺人周氏

君父執友名臣公女攻苦食淡勤靡餘勞哭先姑之喪過時而哀
遂得疾以康熙甲子二月二十八日卒遺孤子女繼室吳孺人鞠
之過於所生方君游京師貧甚一臥室也柩左右夾之吳孺人扶
羸振壞大抵從十指出而沛然若力有餘從宦惠安助廉成德內
外斬斬康熙己丑四月八日禮佛而逝其曾王父文端公宗達官
大學士祖職思父守茲皆有列於 朝詳具君自爲狀中男子子
五日兆升國學生候選州同知先卒曰人麟雍正癸卯舉人歷知
淳安黃巖縣又知桐廬方爲之曰兆豫康熙庚子副榜監督通州
倉曰兆豐曰兆賁女子子三張煒賀大復周文彬其壻也孫男子
六曰廷直郡諸生曰迪德曰建基曰延賞曰維城乾隆戊午鄉魁

曰維屏孫女子五曰莊容纓曰楊和光曰劉豐曰蔣馥其孫壻也
其一未字會孫男子一曰澤承始余成進士與君從弟太史君天
槎號同年生頗知君願獨謂其有諸儒質行通經術下筆敏若注
射所撰著皆可傳不知其精於吏職若此及君就養來滄安官舍
余爲文以壽甫得其崖略道之今葬有日矣諸孤件次事狀速余
銘余讀之而悲古謂作吏如鐵船渡海君不幾是邪然君之子尹
桐廬方以公才吏用爲世所急異時侍御司徒公功名或於是乎
在君其可無恨銘曰

切人不媚和臣不忠員枘方鑿馬牛其風嗟乎君才如深衣可武
可文而左右具宜亂者宜斬水鱗山莽飢者宜餽枯魚涸鮒獸窮

則搏兮震於其鄰胡移甲而怒乙乃歸休乎君母以公歸淚如傾
海劇駢岐旁罔曰郎罷官本臭腐花飄溷牆委蛻天地君子陽陽
鳴鶴兮堂開臥龍兮山峙魂魄毅兮臨之雖萬古兮猶視一畝之
宮此焉寄

右墓誌銘方棨如撰

馮協一

益都故臺灣太守退庵馮君葬於縣城南雲門山西同郡趙執信爲之誌曰君諱協一字躬暨退庵其晚所自號太子太傅文華殿大學士兼刑部尙書馮文毅公之第三子也其先世以文獻爲北海推重具在明史及青州府志妣曰一品夫人房太君慈母穆恭人以君得 贈君幼育京邸聰敏著聞長工文筆應順天試一不售語人曰丈夫貴自表見胡爭此區區者爲因隨例謁選人初授浙江紹興府同知賊巢也其役卒率與賊通君按其罪盡逐之更募健者充替而重爲賞罰格不旬月威令大行摘發如神有數人夜聚孤村塗面將出健卒掩至禽之論如法盜駭散境內無警攝

山陰令漕糧歲逋日積邑大姓陰主之有兪某者隸撫臺仗下久
共爲奸利君方據案責問催徵吏某闖入爲吏解抗聲引撫臺以
自雄君曰隸何敢然趣執之左右莫前君怒自起捽之階下予大
杖數十卽日渡江訴撫臺則摘隸畀君君枷著街中令曰糧完免
死逋者懼相牽率兩月畢輸兩臺才之舉卓異擢江西廣信知府
治上饒縣兵燹之餘版籍亡缺田賦淆亂占田多者漏其賦賦半
屬無田者積負十萬有奇逃亡相繼無所責償君欲用清丈法與
夏始而期未屆堅請於上官許焉君命先疏見田其無賦之田聽
自首首後起科不咎旣往更隱漏者眞重律頃之田盡出徧歷田
所量之使與賦協定爲新籍悉刊去有賦無田者姓名會 恩赦

下逋賦盡獨公私大快頌歸於君遷將及矣而文毅公薨於里第
君聞訃亟發其民閉城門遮留之良久乃行傾城出送涕泣奔走
者累日既抵家長兄病篤君獨任大事繁細始終一不他諉禮成
物備聞於海岱閒服闋補廣東廣州知府粵之首郡經逆亂盤踞
人懷疑貳君智馭而德綏之驟得民和屬縣相沿歲派數千金納
之令爲雇役直不問其出入號曰均平非功令也君嚴禁絕之巡
撫蕭公永藻素清峻於屬吏中獨器重君每有委任一守藩司兩
攝轉運咸著聲績連州生獠作亂至煩 禁旅君獻四策於制府
用之俄而大定兩臺稔其幹略合疏請用爲雷瓊道部格不行後
以小誤鑄級去官士論惜焉家居篤於內行敦倫睦族戚黨歸心

尋入都復所鐫級再補福建汀州知府汀士不知學君勅書院資
生徒講誦其中親課其文藝由是始有科第甯化縣武生曹祖乾
者聚族一村性並獷悍祖乾與其四子尤兇狡倚眾橫行陰蓄異
志其人四出誘結奸民乘歲旱遂大肆劫掠張旗幟焚村落勢洶
洶鄰邑無賴遽起應之甯化戒嚴君聞之詣鎮將謀發兵出不意
易撲滅也將猶豫君以危語挾之乃夜出三百人君人犒一金令
疾馳猝至祖乾惶急奔逃並其子及兇渠數輩匿深山中其黨散
處者數百人皆銷聲滅影無敢枝梧遂不戰而平更懸重賞募生
致祖乾等有樵人自言知其匿處鎮卒易服爲村氓狀隨入掩之
盡禽以出會訊具伏君則遣吏往亂許宣言曰爾曹無恐罪已定

矣數人而已聞者潛自安既而按誅祖乾父子及同匿者餘一無
所問上官推君首功欲上聞時方清晏諱言兵革亂既消弭不
復敢張皇其事君患重聽又妨奏對僅載其勳勞於海隅黎庶之
口已矣君引疾請謝事兩臺不許反調之知臺灣府君航海遇風
危而獲濟於是自號退庵云因俗濟和化行徼外前守矧例民成
丁以上者每名歲入銀於府爲船政需君曰是又均平也亟除之
恆巡行屬邑宣布朝廷威德使民諳法令習禮讓華風郁然居
二載重聽愈甚聽斷多誤況未有子退志遂決申前請至於數四
經歲不移乃得歸抵吳畱止子愿生焉然歲必一還青州理家政
內行敦睦有加於昔族雖疏屬必時其吉凶緩急量爲拯濟不待

求請弟姪中落者屢周之無倦色揚州守肅先公之家孫浪跡江淮以沒其故同僚挾詐欲傾其貲不得則訟之撫臺望君爲區畫因並誣君達於制府紛糅不已君從容置辨事狀分明不可奪而肅長子又異及君季弟容孚先後被誣陷益祁令訊治頗急南北構難君悉力撐拄奔命往復數年始獲甯息人咸謂微君則文毅公之緒墜矣年七十盡室北返城東三里先公所授莊是宋王沂公別墅君於其中作池亭恣閒適樂而忘老於其外自營生壙成繼室吳恭人適卒則引前卒元配徐恭人之柩同窆而水見願愿曰後當改卜未幾君無疾下世愿得今兆以禮安君遷祔二母遵治命也君生於順治辛丑八月十日卒於乾隆丁巳十月二日得

年七十有七又明年己未十月三十日而葬兩蒸人家世才德並
子女婚嫁具愿所述中茲略焉余與君少通世講終締婚姻媼衰
愈親情踰同氣君遺詩余敘之墓門之文其何忍以不爲况愿勤
請爰系之以銘銘曰

世韋平學埒龔黃績惠洽威行嶺延海溢才踰於位德稱其年剛
柔交克邦家無怨和鳴應卜光耀孫子保於雲門以昌厥嗣

右墓誌銘趙執信撰

國朝文獻通考卷之三十三

三

吳璪

國朝循吏豐潤令全椒吳公乾隆二年冬卒於官越二十有五年
公長子鉞以知州銜攝無錫縣事遇 覃恩晉贈公奉直夫夫元
配俞繼配胡俱宜人鉞重刻官階樹綽楔於墓前神道眾歎曰仁
人昌厥後其信矣夫公諱璪字藻文號澹庵先世徽州休甯人曾
祖世耀遷全椒是爲全椒吳氏祖文德太學生積勤而豐父應正
太學生博瞻愿直公其四子也公九齡生母金太君病且篤手浣
中幫取廁脬所遺嘗之叩天而泣尋太君卒日夕倚棺慟吳氏族
人曰吾家王祥也幼嗜讀究古人典故端委洞知成敗旣壯豁達
通方名振一時當是時 世廟廣求豪俊命大臣各舉所知以備

任使當事奇公才薦公引見便殿顧問時務奏對明暢喜溢

天顏問公曰汝曾參幕事乎公稽首謝曰臣兄璠牧道州招臣
助理臣實自幕中來授公直隸密雲令公至密雲和易詳擊鞠獄
集兩造呢呢款語汝所以是非者何其負者愧服自謂宜受笞也
民某聘某女女父俄以其貧而悔之公解俸錢成其婚民某死妻
且寡或欲奪其志又解俸錢資其節又申牒上官請釋前令尹囚
繫羅致千餘人謂愚民香火供佛冀生淨土非如律文所稱聚眾
不軌狀罪其魁足矣他株連者可宥也密雲人皆誦公一舉全活
千餘人真仁人哉會河水擊密雲城請分河身以殺水勢上官如
公議監修者與公齟齬劾公誤工公備糗糧自效三年制府李公

衛廉公勞績曰是卓卓者其焉可誣奏補豐潤令豐潤西接京師東通遼海陵寢祭祀道路必經民旗錯互營田屯糧蟻集絲芴公愁而斷外衛內撫於民不徇於旗不激癸丑秋暴雨猝涌橋梁飄蕩公遽泛木罌視災中渡罌覆有善泗者負公出公乃得活維時萬眾目駭遠邇傳歎僉謂吳侯爲我等生命而幾喪其軀近今所希覩也公敝衣糲食察民疾苦危者安之死者生之所敷政澤若獎良懲頑興學恤孤諸事露濡日煦悉周浹如治密雲時乾隆元年世廟梓宮奉安山陵制府委公稽察重人明年又委公稽察他縣賑務是冬十一月二十二日病卒距公生康熙甲子年五月十七日積年五十有四公子鉞等扶公柩歸里與元配俞宜人合

葬滁州花山之原公幼孤事嫡母方太夫人先意承旨備得歡心
太夫人有子三人以次膳養太夫人恆樂依公所公祖父暨父既
以兄璠貴並封贈承德郎祖母暨嫡母方太夫人並安人而生
母金太君未蒙國恩嘗撫膺長歎謂身爲人子而不能顯揚其
親誰之咎也祿仕後今上御極始敕贈太君孺人手錄玉
音敬設几筵且告且泣追憶音容描摹形似增繪象服烜輝於遺
照出告入面如聞其聲複製翟茀簪珮盛以石函命僕馳瘞太君
墓前自出郊外歛獻跪送雖身後之榮無補生前萬一然事母未
竟之願於茲稍慰云公友愛兄弟長兄璠任道州獲譴卽鬻己析
產以紓兄難兄得改官刑部諸兄相繼逝哭之目瘡語之涕溢攜

其同母弟球俱之官所授以家政暇則怡怡談笑連牀相對有美伯淮之風元配俞宜人江浦辛酉科舉人闈先次女少公一歲莊肅淑慎於雍正乙巳年三月十八日先公卒胡宜人江甯處士佩森次女少公十六歲隨公官署茹蔬衣布勵儉襄廉聞公同僚有虧官帑者或貧無歸者必贊公厚助之訓課諸子必嚴必飭當公合葬時胡宜人尙存故未耐子四長鉞知州銜管無錫縣事調吳縣知縣擢邳州知州又擢奉天府治中次鐸邑諸生出承兄刑部雲南司主事璠後次整玉田縣丞歷署博野香河知縣次銓邑諸生俱胡宜人出女二俱元配俞宜人出一適汪朝縉一適朱漢章俱邑諸生孫男二人中治中范初公在豐潤也民欲繪公像立公

長生祠公止之曰令甲所禁也後數年有少年赴京兆試驅車過
豐潤之鄉鄉父老環視指語若人眉宇粲粲何大似吳侯子鉞也
遮道問訊持酒漿相慰勞至於泣下膏澤及人久而弗替雖古書
傳所稱仁人甯有加歟錫胙承公長子鉞結兒女之姻鉞屬錫胙
銘銘曰

孰與民親惟令熟也孰抒民困亦惟令篤也 皇朝課吏諄諄勸
督也郟城有黃靈壽陸也豐潤之吳踐芳躅也慈母以字明師以
淑也沒則哀之莫我鞠也歷久弗忘願尸而祝也返而藏焉故山
之麓也松柏丸丸拱墓木也象賢振振庸車服也推本所生自
天寵渥也孰昌厥家煒以煜也惟仁斯昌絳世福也崇岡峩峩一

恩屢沐也銘以俟之不一而足也

右神道碑銘韓錫胙撰

唐書卷一百九十三 守令十九

長

國朝詩林卷之三十三

三

曾受一

公諱受一字正萬號靜庵東安人雍正乙卯拔貢乾隆戊午鄉試以第二人冠一經庚辰揀發四川初署琪縣至卽荆南廣書院增設膏火作勸學詩百韻諸生斷斷向學每歲農時巡行郭外作勸農憫農歌令兒童歌之凡實興鄉飲讀法諸令典他邑令所視爲具文者公必敬謹行之旋調江津江津號難治又值歲荒公聯邑人作救命會以有餘貸不足明年秋熟捐穀千石勸民立義倉作訓俗瑣言以教愚民於署前立旌善坊大書邑忠孝節烈諸士女名氏民俗不變人稱曾夫子而不名乙丑以署合州事降秩囊篋蕭然江津人醵金資之癸巳開復補長壽其治視江津甲午乙未

兼攝巴縣時金川軍興駱驛公不累民不誤公供帳悉辦戊戌解
 組歸珙人預奉主人名宦祠巴人作有四亭以比鄭子產而江津
 人則建坊於城南官道建祠於通泰門內曰曾夫子祠公所嘗莅
 事如涪開綦江閬中廣安諸邑民過祠者咸瞻拜伏謁每歲八月
 廿七日為公誕辰紳士耆老咸率其子若孫具衣冠陳酒脯鞠脮
 頌祝門外設俳優陳百戲為樂三日乃罷公少時讀朱子四書有
 所得輒劄記其旁及上方殆徧嘗曰集註主釋經貴嚴約而不得
 盡其詞故作或問以暢達其意並著前人立說之是非蓋註舉其
 端問竟其委註釋其要問備其義註採程門諸家之精粹而問辨
 程門諸家之得失故讀集註者必讀或問然後詳悉無遺纖微必

析又考洙泗以來淵源授受下迨宋元明諸儒之俎豆學宮與未經從祀而獲聞斯道之傳者皆博採史傳釐其序次曰尊聞錄漳浦蔡文棊公謂其定見知聞知之統屏俗學雜學之陋嚴陽儒陰釋近理亂真之防非一人之書而天下萬世之書也又舉歷代禮樂刑政治亂得失之大推本經義旁及諸史著學古錄六卷朱文正公謂其所志者正所學者邃讀之見未知本想見古聖人禮樂刑政之迹之心是爲有本之學有用之文致仕家居講學授徒復著易說四卷春秋解義四卷四書解義若干卷卒年七十七

右傳吳應遠撰

受一雍正乙卯拔貢乾隆戊午登賢書總督清江楊公以理學相

期許有四書解義朱子或問語類文集義纂及尊聞錄學古錄等
書刊行初署琪縣歷署江津開縣綦江閬中廣安等州縣補長壽
調署涪州所到民愛所去民思在琪縣則附祀名宦江津民建四
知亭巴縣民建德政坊歸田九載著春秋解義易說兩書壽七十
七歲道光二年纂入廣東通志儒林傳長子思謙附貢生

右東安縣志張維屏錄

宋賓鴻

宋賓鴻子原一湖南甯鄉人乾隆戊午副榜入太學補武英殿校錄爲總裁某所器授永豐州判除苗民差役嚴禁火葬跳月諸惡俗修復義學延師訓課苗俗一變調遵義通判地與四川合江接壤仁懷廳等處咽喉匪出沒賓鴻禽治之咽喉以息擢知德慶州致仕賓鴻歷官二十餘年躬課農桑平情折獄公餘手不釋卷歸後以俸餘置祭田修先隴築族乘建橋梁隨力所逮不與家謀年八十無疾而卒著式好堂四六冬餘詞

右傳李元度撰

國朝耆獻類徵初編卷二百三十四目錄

守令二十

朱坤

陳益

鄒雲城

子儀 倪鼎銓

健 馮培

王儀曾

胡澤洪

黃道恩 劉序拔

張思炯 思旬

陳九霄

楊丕樹

任國瓏

瑛寶

莊鈞

陳率祖

單煥

袁枚

楊愚

楊鸞

陸廣霖

孫良貴

黃澍綸

唐煥 汪啟緒

聶燕

彭坊 周世玉

王世瑞 溫清子 家桂

文光朝

郭承齊

李德亨 黃昭蘇

守令二十目錄

段汝霖

謝仲坑

葉鵬雲

師問忠

王孝治

章國茂
謝振宇

張眉大
李罕

龍慶

劉德傑

郭士領

史進爵

補錄

徐碩士

國朝耆獻類徵初編卷二百三十四

通奉大夫前署江西巡撫江西布政使司布政使湘陰李桓輯
守令二十

朱坤

乾隆辛卯冬十二月三日秀水朱正甫先生卒於家越明年二月
筠在太平試院聞其凶問哭諸寢門之外喟然曰先生古之學者
而當世之循吏也今亡矣歲在戊午先生年二十六舉於鄉壬申
年四十試禮部報罷揀得蕭山縣教諭秩滿薦爲知縣己卯年四
十七引見詔可需次吏部明年庚辰知山東博平縣三年引病
歸又九年辛卯年五十九卒先生之爲教諭也自陳知府以爲經

義治事當兼講戊寅六月兩縣大水書曰芻蕘之見不敢不告
一西江塘當改築石塘也塘在縣西南起臨浦傅家山極乎四都
褚家墳橫五十里江自富陽合徽廣信金華衢嚴處溫七府之水
南來衝之霽雨溽霖上游陡漲而錢塘之潮朝夕兩上相持不退
激而怒鬪於時土塘庫薄者當之先決決則蕭山先壑奔騰東下
山陰會稽所在昏墊是懼此時雖蠲三邑財貨以爲金塘無及矣
然而蚩蚩者痛定輒忘商人轉徙不利則剗削之農利灌輸則穿
穴之蟻穴之潰勢成滔天是非易土塘爲石不可然或以繁費苟
安歲於本邑得利田徵錢四百六十貫備修築不足更假借司庫
別項錢益之費埒蝥蝥石風雨浹旬下民惴惴立椿取土遲則淪沒

今縱未能一切改建亦宜審擇要害而先施之段落丈尺分年告
功豫假數歲歲修爲一年之用若必不可宜倣宋北海萬柳塘遺
法沿隄樹柳不數年根結隄堅可斷民間剗削穿穴諸弊保護土
塘良便一龕山長山龍口諸閘宜修復也蕭山四面故設圍塘以
攔外江之水而內湖積霏無所歸宿地勢西南高而東北下故於
東北方建三閘以洩水運渠之水出龍閘口由化由夏二鄉之水
出長山閘鳳儀鄉里仁鄉水出龕山閘前人所以不敢專恃三江
閘者以三江閘在百里外又爲山陰會稽諸水畢匯之區其去水
也較遲不若於縣境立閘呼隄巖壑之水赴海多門卽江塘溢入
分下如沃焦釜矣比歲潦患少啟閉久廢卒逢暴漲淤塞罔措及

其安也又復忘危於是動輒成災卽如山陰所在之山西關昔蕭山大水時嘗試開較其功利殆不下三江關及今年往相視外壑異昔是雖沙水有變亦無人爲之探畫時時刷濬所致也請檄下有司修復啟閉濬刷如法夫蕭山爲山陰會稽上游上游治則下流安實三縣生靈無疆之慶也知府得書下縣勘先生復書請存長山舊關以固內而別建一關於關外老壑塘靈洞之間通流接脈遇澇開放可以佐三江關之不及又請開龍口關外支港或徑填築閘以內水門用遏圍內諸水滾滾逆入又請溝通龕山關以外雁山籠山中閒四五里勿令水溢倒灌使水由兩山至雷山入海且曰有塘以遏水有湖以潴水有閘以洩水三者備而蕭山治

又致書知縣力言之知縣如其言事以爲必不可行至八月大雨
沒禾知府始急從先生開長山閘洩水之請轉送上官行之而縣
僅以安後十三年庚寅七月二十三日浙江大風潮怒擊蕭山塘
壞死者二萬餘人縣人洶號狂走歎息先生之言不用也其在博
平歲辛巳 上南巡先生當治道獨騎一馬從役四五人沿馳道
所在循行博平人爭荷畚鍤灑埽之具先生所行處無有不治
先生騎往來與父老勞苦而罷及 乘輿過博平所治無失狀他
縣治道者聞之相語以爲奇陽湖龔友年二十有異才先生在筠
坐中見之與爲忘年交友閒自家過博平謁先生先生飯之訖辭
去乘以驢召僕手牽之而先生躬自扶客以乘曰坤不敢以肩輿

頃吾民送客也友至京師爲筠言相與歎息已而友死先生聞知亦歎息初先生需次獲選當行筠作序送之且請曰先生其何以治博平先生應曰坤不敏然竊願學陸先生隴其之治嘉定也筠曰果然筠當望泰山之東載拜載拜已而果然嗟乎若先生者殆行之而有其言者邪抑能言之蕭山而能行之博平者邪先生天性友悌少從伯兄秬堂先生學服習有宋諸儒之言而私淑於其鄉先生桐鄉張先生履祥在蕭山嘗校刻楊園遺書是時甯化雷公鉉以副都御史提學浙江先生及門稱弟子及雷公請終養歸先生與講論往復於浙山閩水之間斷斷儒者之風也所著餘暨叢書二卷靈泉筆記一卷刻行初治易後考證五代史論著雜文

並藏於家筠始及先生之兄秬堂先生門乙丑筠年十六先生以
應禮部試來京師獲見焉旣以應試來必見需次一年餘時時見
及先生歸後不見者十年庚寅冬筠使閩還舟出嘉興訪先生於
家先生爲筠設酒食坐秬堂先生於上語日連夜絮絮道曩者權
甚漏下四五十刻呼郎君出錦衾臥客於書堂之東偏明日同游
滄湖登煙雨樓又送筠於舟再飯而別筠方謂先生年未老遂其
初服他日有役於浙數見先生不難而不知其不可得而見也先
生諱坤字中黃又字正甫乾隆戊午科舉人 敕授文林郎山東
東昌府博平縣知縣生於康熙癸巳某月某日卒於乾隆辛卯十
二月三日曾祖某祖某父某妻某氏再娶金氏 敕封孺人子三

人筠聞其卒而為之銘書以寄先生之子俾更句書丹刻於墓道之石銘曰

石有玉曷其琢樾有本曷其斲斲以瞳乎未之盡以終也而吾心之降也

右墓碣銘朱筠撰

陳益

乾隆戊午秋闈吳中舉於鄉者十有三人今幾三十年晨星零落而陳畱宰陳君荔汀以疾告歸里蕭然如諸生時時過余草堂商推詩文相約爲耦耕之侶情相浹也乃不及三年遽成古人士林傷之葬有日孤子位中以狀請誌銘按君生平家居盡子弟職爲廣文盡教育職爲縣令治績卓卓可傳余烏容辭君諱益字麗亭荔汀其號先世自虞山遷長洲高祖文字曾祖應聯祖時憲 敕封儒林郎鄉飲賓考又羣州同知以君職 敕贈文林郎妣楊太安人繼妣顧太安人兄弟六人君生晚五兄皆析產惟君奉侍左右贈公以辦銅累產盡廢顧太安人對君泣曰爾舍讀書無他計

國朝名臣列傳卷之二十一 朱子 三十一
矣君用是勵志於學母沒哀毀幾滅性事贈公視聽在形聲先視
田所入墜魴捕鯉以供膳餐兄弟無爾我彼盈此絀未嘗動心暨
諸兄久宦減產竭力周卹待姪如子撫孤姪女如己女家庭中融
融如藹藹如也其內行如此從來士林中人多長於讀書短於出
治以故秉軸者每重刀筆筐篋之徒君獨不然登賢書後以明通
榜選英山教諭英山在萬山中學宮頽廢士人荒落君先講立品
次講經術取先正文之有法者苦心開牖嗣是金君序珽旋掇高
科鄭君一坊選拔居首此百餘年來所絕無僅有者也大吏交薦
其能銓授河南陳畱知縣君之出政也甫莅任卽親訪民間疾苦
知歲辨河工稽料吏緣爲奸君榜示通衢盡革其弊維時西陲川

兵師旅往來芟芻車輻輳則羈留急則騷擾君調劑適宜官民並
免於累水災散賑挾冊親往村落按戶給發委署懷甯卒遇河決
星夜捍築殺其急流疏其漲塞水勢既平相其低窪處決之淺者
堰之深者陂之皆成腴壤至於聽訟心和氣平刑不輕予獄有疑
案秉燭閉閣反覆思維甚至終夜不寢務得其實故十餘年來初
無冤民其署禹州通許鄢陵密縣諸篆一如治陳畱懷甯時噫嘻
吾見夫今之稱能吏者矣大都以深刻爲能以擊斷爲才以趨承
大吏爲盡職而視小民同草土然此如受人之牛羊而不與芻牧
轉加鞭撻恐牛羊俱受其病也君不爲能吏爲廉吏不第爲廉吏
爲循吏可云善牧牛羊者已時俸滿考績例得遷擢格於部議不

行君乃以有疾告歸歸而以孝友爲政於家以仁讓爲教於里方幸鄉黨有所矜式何天斂之速耶宜有心者之慨焉興歎也配徐孺人淑慎端莊事舅盡誠事夫盡敬在官署中以廉裕佐教子親以經書授之教女以班氏女誠爲訓先君十年歿年四十四君生於康熙五十二年二月十八日歿於乾隆三十一年七月初九日年五十有四子一人位中元和縣學生有文名女三人長字顧鼎裕孫一人元輔孫女一人某年月日與徐孺人合葬於某原銘曰苦書生惇孝弟出而有爲循良吏何必虎渡河何必鳳凰鳴但期人民和樂田疇耕長官雖沒神如生旣安旣固永歸佳城

右墓誌銘沈德潛撰

鄒雲城

子儀

健

王鎮曾

倪鼎銓

馮培

鄒雲城字擁書江蘇無錫人乾隆三年舉人任元城知縣元城濱河地勢窪下雲城豫治隄堰及秋水大至元城獨完擢知深州首革陋規民大服時鄰縣災富商囤積居奇民憤將成大獄雲城奉檄往勘事得平擢知河間府子儀字補山乾隆二十五年舉人任江西雩都知縣邑所屬禾豐三堡沙磧地皆科糧民不能堪儀覆丈得實詳請豁免捐貲益雲陽書院膏火士民德之供順天府治中健湖南清泉知縣皆著惠政又有王鎮曾字玉裁乾隆九年舉人知鳳山縣時生番出掠單騎入其境諭止之嘗於臺灣民家得偽印例遷秩而臺灣令應降調瞿然曰人黜我陟胡可居也旋擢

黃平知州以勞卒官祀鳳山名宦祠倪鼎銓字晉階乾隆三十年
舉人授渠縣知縣適教匪滋事堵禦有方並擒賊首超遷知府時
賊四竄焚掠陳堅壁清野之策民賴以安補雅州知府卒馮培字
體中乾隆三十六年 恩科進士由工部員外郎出爲山東青州
知府益都報災單騎往勘設法撫恤吏不敢欺調廣東雷州知府
漁戶多奸民常勾引海盜弁兵往捕輒縱盜首而略瀕海貧民誣
爲盜以邀功培悉心研訊莫敢誣陷居官廉慎年逾六十引疾歸
弟培乾隆戊辰進士歷官至給事中著有鶴半巢詩藁

右傳楊熙之撰

胡澤洪 黃道恩 張思炯 思甸 劉序拔

胡澤洪字葛山湖南甯鄉人乾隆戊午舉人知嵐縣愛民息訟再補定嵐定界萬山中有三溪口開河可達粵境縣人圖之而粵人不顧利害互相持久之上官欲從縣人議澤洪按視具公牘力爭不便議遂寢同邑黃道恩字臧皋乾隆丁丑進士歷任江南知縣所至有慈惠聲最後補虹縣縣瘠貧尤勤撫字因公罷職歸築尺五山莊銳意著作有祠禮臆說西銘註發蒙錄唐詩說法約三卷古文分體彙編八卷兄道懋道懋同舉甲子鄉試道懋官州同嗜學工詩道恩子甲隆候選訓導孫湘甯知長垣縣張思炯字恆鑑乾隆乙酉舉人初署岳陽縣大修廢墜興文教理滯獄縣以大治

補長子縣治如岳陽數月民多豎青天碑紀德政以母艱歸服闋赴晉道經長子民相率迎數十里再補甯武甯武俗親死不能葬輒棄其尸兒女殤必委溝壑謂能轉劫思炯誠懲之爲置地掩暴骨並瘞殤者俗丕變奸民王黑子誣平民謀不軌上官議發兵圍捕思炯力止之單騎往廉得讐誣狀冤遂白縣故無科第思炯爲擇師召諸生讀每月親課之邑人黨軼羣遂登賢書居數年告歸主玉潭書院卒年八十一弟思甸字惺園乾隆庚辰舉人知武清密雲二縣母憂服闋權松江同知補金山縣廉能勤慎政務寬大所至民皆親之甲寅分校鄉試時病疴入闈力疾校閱事竣遂不起所薦拔五人皆知名士沒後糧儲道某親見思甸章服而出眾

傳其爲神劉序拔字茹連苦志績學篤孝友乾隆庚寅舉人授鄆縣教諭課士先行誼次詩文倡修學宮皆踴躍捐助諸生以財物爲六十壽拒不納乃各書其生年月日於家祝之後知藤縣甫莅任卽平反庸某廿年前冤獄復訊結百餘案其文致者申釋之全活二十餘人遇骨肉爭訟勸導至泣下兩造皆泣書役亦爲隕涕邑故多盜設法戢弭終任無鉅案藤自國朝以來無以節旌者某氏苦節序拔爲申報其子執贄謁謝卻之曰吾以明教也奚費爲以母老乞歸縣民以巾織德政歌頌之

右傳李元度撰

國朝月表卷之三十一

十一

陳九霄 楊丕樹

陳九霄字紫峰湖南武陵人乾隆戊午舉人知武康邑有荒坪數十里多逋賦白大吏請減額稅調餘姚時左道律嚴有武弁陰使人於施氏神主旁注奉左道字欲置之死九霄廉知之徧白大府會鞠之事得白同邑楊丕樹字松陽祖健石門教諭崇正學丕樹乾隆乙卯領解額官和平知縣日坐堂皇投訟牒者數百不移晷悉決遣之調翁源捕盜八十餘人置諸法獄有重囚逸和平民詰得諸境喜曰吾儕有以報前令君矣縛而歸之獄初一猾與富民某訟不勝自往沈於沼富民坐瘕死丕樹爲申雪之澳門夷船不靖總督委權同知至則折其酋使奉約束惟謹丕樹旋請於疆吏

曰彼介鱗也日出其所有以與我市久將逞其所欲爲及此時亟
請於朝而絕之患猶可弭也疆吏頗偉其言而憚於發後補四
會縣未久卒於官

右傳李元度撰

佟國瓏

公諱國瓏字信侯遼東人以祖從 龍入關再傳至公公性孝友
有幹略髫齡卽能任家督親旣沒與兄相敬愛同爨二十年族黨
稱之平生好施與重氣節遇事無難易艱險慨然以身任年三十
有五以繙譯考授兵部督捕筆帖式有能名越五年擢山東文登
縣令文俗故愚悍或勸公以嚴峻公曰爲政在誠心愛民興利除
害化導之而已嚴峻非邑之福也副將某暱一妓日遣營卒爲役
又剋蝕軍餉合營衷甲大譟夜半斬關出屯東郭公聞變披衣出
家人止公不聽吏役股慄莫敢從公乃單騎陟山巔厲聲曰吾與
軍民同疾苦有冤訴我何妄動至此眾猶洶洶公當礮立曰吾不

忍見爾曹族誅請先試若礮眾色動曰公廉明軍何敢犯然事已
若此奈何公力任保全再三覈其故得實狀疾遣吏縛妓至撻於
旗鼓之間眾泣拜而散副將尋被劾去輿情快之癸未大饑奸民
所在騷動將不測公率數十人徧詣村墟捕斃凶渠旋散賑曉諭
民賴以安事竣公名得首列薦剡云宋某兄弟三人爲邑豪鄰婦
貸其錢不能償息豪殺之公廉得其事而吏役得豪金皆巧爲掩
覆公方疑慮閒宋某倩人持千金賂公公怒笞其人立覆驗得重
傷然無確證忽門中有小婢公令牽出鞫之得實狀遂坐三人於
法而嫁婢民家一邑肅然邑故濱海閩商泊舟島嶼閒副將林某
縛其數十人指爲寇公訊之皆釋乃更捕真賊四十餘人殺之海

疆甯謐而商舶繼至者皆拜公德丁亥 聖祖南巡公以二次扈
從蒙 溫旨顧問至是復被 御書諸賜物同列榮之辛卯擢山
西澤州牧時甚荒歉公至大發常平倉穀借民秋成剋期輸還無
有後者又爲滅火耗革漏規省徭役平物價民情欣悅時太原守
挾威勢能傾軋人公獨與之抗太守乃陰囑太行驛丞誣揭公公
遂解任州民譁然集鳴鐘罷市欲詣 闕畱時康熙五十二年六
月也旣而得 旨畱原任州民歡迎公者塞道路其爲澤人愛戴
如此是年冬平陽民變略如公宰文登時撫軍檄公往撫許以兵
從公曰兵行是速亂也請單騎往旣至民皆喜曰佟公至吾屬毋
慮矣乃入城諭撫安堵如故州北門敵樓傾圮城垣殘缺公捐俸

千金爲倡集僚屬紳士共議修築凡兩年大工告竣民感公捍禦之功乃共爲公立祠署側公禁之不得迄今五十年春秋伏臘俎豆弗衰庚子公年六十數請致仕始得去去之日州人攀號震郊野公歸卜居天津泊雍正二年以舊屬高平令虧空乃逮公分賠萬餘金公故介然自守家無儲積先是公在州辦軍需數載獨自賠累未嘗尺寸擾民民尤蒙福澤至是憤泣爲公捐五千金投州庫公復竭蹶鬻舊產越五年始得完項歸籍自是偕家人雖布衣蔬食恬如無嗟貧色乾隆三年正月公聞兄喪奔入京悲慟幾絕六月遂沒友愛至性垂暮不衰如此公子四人繁官浙江秀水主簿滿保永定河北岸同知士苞乾隆癸酉舉人次僧保

右傳略蔣士銓撰

守命二十

三

瑛寶

夢禪名瑛寶滿洲人大學士永文勤公長子其先以開國功世其官歷登顯秩簪裾赫奕至文勤公以吏部尙書拜文華殿大學士子三人夢禪居長翩翩佳公子也夢禪少讀書博涉典籍屢試不售以筆帖式外用知縣莅任後頗著循聲上游器重欲上考夢禪喟然曰功名吾家固有五斗米不足爲也遂解組歸年才三十時文勤公正秉政同懷弟伊靜亭江阿亦由樞祕授山東巡撫烜赫一時而夢禪獨以韋布自安老屋數間冬一裘夏一葛不喜肥甘疏食飲水性喜畫尤善運指興酣時解衣磅礴潑墨如雲每作奇想不落古人窠臼近時高且圓傳凱亭外無與比者然性孤介不

多與人畫以故得者甚罕素與劉文清公壻爲文字交劉書夢畫
每每合作得者以爲至寶雖連城不易也與余論交時年已五十
餘白髮飄騷老而益壯面如渥丹紅白可愛蓋其得於天者厚游
情物外不以榮落貧富動其心不以功名奔走勞其形俯仰之間
自得天趣故不必乞靈於金石託命於丹鉛泊然自保其天年也
年七十餘以布衣終

右傳鐵保撰

莊鈞

莊君鈞字振和自號曰敦坡先世自鎮江之金壇徙武進明宏治中有禪者中進士官山東參政其後子孫多顯武進之言世族者推莊氏以至君十世矣君少育於外王父劉文恪公於義乾隆初劉公奉節巡修畿輔河道君年十九隨幕府數爲劉公言水利事劉公甚奇之當是時直隸總督高公某方舉能任河工者曰孰有才如莊某而不早試之吏者乎卽上其名補霸州州判卓異升東安縣知縣磁州知州以與按察使有親例改河南禹州升直隸汝州尋升陝西漢中府知府畱河南改南陽仍調直隸大名府丁父艱服除授山東濟南府護理濟東道按察使印卒於官君旣以高

公舉任河工而以後督方公觀成卓異薦其畱河南也以巡撫阿
思哈公奏而直隸總督周公元理請之故又調直隸君旣明習水
利事又長於治民所在大府爭欲任君以事其歷州郡皆有殊績
而君性謙謹未嘗自言及君之歿而其子幼無以知君之詳獨得
其卓卓稱頌於人人者四事其一事曰磁州二漳水合於其西夏
秋之間水潦至決溢四漫或數百里無陸墟瀕河之吏歲賦帑築
隄而捍之潰又增焉以爲常君至州議曰水方悍而撓之以隄是
搏之也請穿河引之勢必殺總督方公然之疏於 朝報可如君
所欲穿者漳患大息其二事曰漳之瀕有棄地數千頃故民田也
爲水敗獨其賦存吏以敲扑責之君請總督以 聞盡蠲之民祠

君於漳水上其三事曰汝州舊有衛衛有四屯衛之罷也併於州而諸屯距州二三百里遠徭役以爲病君爲州皆貰免屯之民立石誦焉其四事曰君始爲大名府歲大旱君謁守道請發粟賑道曰太守擅之乎咎誰執君曰府去省千里文移往返必旬月饑民巨暮且死何咎之云乎知府請任立檄大名元城出穀四萬石與民旣總督周公奏之有 旨復與賑穀四萬石民無餓者是秋歲

大稔

張惠言曰君之子軫與予交軫言君在東安時河水暴至君乘小舟渡及中流舟覆僕役皆溺有躍而呼者曰此吾賢父母也遽入水負之出及其去大名民號哭而走送者百里不絕余以爲世多

言今之民情不如古觀於君豈其然哉惜乎君之未得盡其所設
施而其事又不得而盡傳之也余嘗游大名大名之人至今能道
君之賑民粟也

右傳張惠言撰

陳率祖

陳率祖字怡庭湖南祁陽人文肅公大受姪工山水花卉奇情勃發機趣橫生知嘉定縣歸隱戴公山

右傳李元度撰

按陳公鑒於從兄輝祖之難解官歸隱植品甚高畫以人重鄉人至今稱道弗衰

三十三

--	--	--	--	--	--	--	--	--	--

單烜

君諱烜字曜靈一字青孩姓單氏先世鳳陽人自明洪武中遷高
密爲邑盛族曾祖諱父牧大興縣知縣祖諱廣康熙甲子順天舉
人雩都縣知縣累 贈朝議大夫父諱鳳文湖南布政司庫大使
累 封朝議大夫母任氏累 贈恭人君以雍正十年舉於順天
乾隆元年會試中式而奔母喪於大使君雲南磨者并署至沅州
灘石碎舟墜水得板以活踰二年始以喪歸乾隆四年 賜同進
士出身歷龍門撫甯知縣以薦擢宛平縣知縣西路同知 特授
廣平府知府復補銅仁府知府護理貴州糧驛道君所至皆愛於
其民其在宛平也剔冗應劇案無滯牘五城訟者多赴縣求理縣

民某以姦殺誣服論死繫獄七年矣君至始爲辨釋布政使議稅
西山煤君力噤之議遂寢踰年 上以京師煤價昂 諭工部步
軍統領順天府會議招商於西山舊礦開溝泄水而貸幣銀三萬
三千以君董其役至今稱便二十五年近畿水君與大興縣知縣
某議請賑不合獨謁總督方恪敏公九請至欲投劾去方公歎息
因委勘大興災所並賑之君在宛平七年上下交許方公以磁州
薦不果遷復以京縣處分多遷升格於例吏無以勸奏依五城兵
馬司例乃擢君西路同知京縣改例遷升自君始其在廣平六年
率下清整申前任龍門保甲法於屬邑步軍統領嘗有以名搆者
按冊卽獲會雲南師與量均境內車馬以次更用民無蠶累而以

父喪去職其守銅仁勘決土田積訟貶苗悅服及護糧驛道踰年
松桃紅苗白王保與其黨搶劫拒捕殺兵役署守報至議者謂且
煽眾苗也護巡撫韋公謙恆以詢君君曰白王保黨徒七人耳素
爲苗害眾苗必不從爲亂煩請自往令苗人捕之韋公卽授君令
箭並馳諭貴東道佛德偕往苗人素德君政聞君往懽迓滿途君
諭以爲苗除害之意且給以糗糧眾苗爭先往捕捕急白王保乃
縊其黨六人悉縛致伏法苗以無事韋公方敘君績而以事去君
亦稱病歸君自任宛平政聲上聞上每語及京縣輒稱君君
去廣平後以例降一級會吏部以因公降革員名列上上記君
名命引見以原官補用比君自貴州歸時上東巡詢及欲復

用未幾竟以病卒實乾隆四十一年八月一日年六十有九君配
傅氏以乾隆七年卒繼配黃氏與君合德恭遇乾隆十六年 覃
恩俱 敕封孺人例封恭人君卒後黃恭人督教子孫力學服官歷
十有五年以乾隆五十五年九月一日卒於子可堪洛陽縣署年
七十有三子五人可地附貢生 貽封文林郎商邱縣知縣傅恭
人出先卒可堪辛丑進士河南洛陽縣知縣可垚河南睢州知州
可垂改名汝瑛己酉拔貢可里改名可璿附貢生候選鹽課大使
女二人皆黃恭人出孫十人爲銜邑增生爲鈐改名相南河試用
府經歷爲鑿附貢生候選縣丞爲錡附貢生爲鋌爲鑿監生爲鑿
監生爲鈞爲餘爲鐔孫女十人曾孫七人祜瀉祜漳祜澗祜榮祜

川祐溥祐洵曾孫女五人君以乾隆四十四年春二月二十二日
合葬先塋傅恭人墓黃恭人以乾隆五十七年四月二十二日合
葬君墓君之卒也予嘗爲銘而未定諸其藏比黃恭人合葬予可
堪復來請銘而刊石墓次銘曰

人有韞患無所施有施矣患上不知君之有施於所治而天子
才其所爲然止於斯我以銘之

右墓誌銘竇光胤撰

袁枚

君錢塘袁氏諱枚字子才其仕在官有名績矣解官後作園江甯
西城居之曰隨園世稱隨園先生乃尤著云祖諱綺考諱濱叔父
鴻皆以貧游幕四方君之少也爲學自成年二十一自錢塘至廣
西省叔父於巡撫幕中巡撫金公鉷一見異之試以銅鼓賦立就
甚瑰麗會開博學鴻詞科卽舉君時舉二百餘人惟君最少及試
報罷中乾隆戊午科順天鄉試次年成進士改庶吉士散館又改
發江南爲知縣最後調江甯知縣江甯故巨邑難治時尹文端公
爲總督最知君才君亦遇事盡其能無所迴避事無不舉矣旣而
去職家居再起發陝西甫及陝遭父喪歸終居江甯君本以文章

入翰林有聲而忽擯外及爲知縣著才矣而仕卒不進自陝歸年甫四十遂絕意仕宦盡其才以爲文辭歌詩足迹造東南山水佳處皆徧其瑰奇幽邃一發於文章以自喜其意四方士至江南必造隨園投詩文幾無虛日君園館花竹水石幽深靜麗至櫺檻器具皆精好所以待賓客者甚盛與人畱連不倦見人善稱之不容口後進少年詩文一言之美君必能舉其詞爲人誦焉君古文四六體皆能自發其思通乎古法於爲詩尤縱才力所至世人心所欲出不能達者悉爲達之士多效其體故隨園詩文集上至朝廷公卿下至市井負販皆知貴重之海外琉球有來求其書者君仕雖不顯而世謂百餘年來極山林之樂獲文章之名蓋未有及君

也君始出試爲溧水令其考自遠來縣治疑子年少無吏能自匿
名訪諸野皆曰吾邑有少年袁知縣乃大好官也考乃喜入官舍
在江甯嘗朝治事夜召士飲酒賦詩而尤多名蹟江甯市中以所
判事作歌曲刻行四方君以爲不足道後絕不欲人述其吏治云
君卒於嘉慶二年十一月十七日年八十二夫人王氏無子撫從
父弟樹子通爲子旣而側室鍾氏又生子遲孫二曰初曰禧始君
葬父母於所居小倉山北遺命以己祔嘉慶三年十二月乙卯祔
葬小倉山墓左桐城姚廌以君與先世有交而廌居江甯從君遊
最久君沒遂爲之銘曰

粵有耆龐才博以豐出不可窮匪雕而工文士是宗名越海邦藹

如其沖其產越中載官倚江以老以終兩世阡同銘是幽宮

右墓誌銘姚鼐撰

袁子才以散館出爲縣令初在江甯總督尹文端公愛其才旣丁憂再起至陝西與總督黃文襄臭味差池上書萬餘言不省遂乞病歸

右湖海詩傳王昶撰

仁和袁枚子才廩生奉天金公有國士之目力薦於朝在諸徵士中最爲年少兼有美才一時名滿日下

右詞科掌錄杭世駿撰

余於乾隆癸丑冬至金陵先生卽折柬見招爲余題拜梅圖推以

異才有門下士諷余執弟子禮者口占示意云修竹生來掃俗氛
錦綉纔脫便捎雲讓他桃李公門外玉立亭亭只此君蓋恥與噲
等伍非不肖師先生也身後攻之者太甚大半卽其門生故舊訃
至揚州余與山尊獨爲位哭之先生嘗以其詩見質余謂一代之
家而非正宗欲摘其精華釐爲四卷刊以行世庶令後賢無可指
摘亦藉報知己於九原也

右石溪舫詩話吳崇梁撰

散館以未嫻清字改知縣分發江南初試溧水調江浦沈陽再調
江甯枚常言爲守令者當嚴東家奴吏役使官民無壅隔則百弊
自除其爲政終日坐堂皇任吏民白事有小訟獄立判遣無稽留

者多役耳目方略集鄉保詢盜賊及諸惡少姓名出所簿記相質證使不能隱則榜其姓名許三年無犯湔雪之奸民皆斂迹方山谿洞外兩氓爭地無契券訟久莫能斷枚視案山積笑曰此左氏所云晉鄭之閒有隙地玉暢頓邱是也訟久則破家吾當爲汝了之乃盡去舊案別給符驗使各開墾升科聞者皆歎賞有賈人販布江行舟觸戰船溺死一兵眾兵縛控舟子兼及客枚心知過失殺無罪而累客必傾貲乃令乘風張帆作觸舟狀縱之去以埋葬錢發兵完案侍郎尹會一督學試江甯有兩騎衝其前麾且媢罵稱親王家奴他縣尹不敢問枚立擒治則爲大將軍投書制府者也搜其篋得關節書十餘封悉焚之重撻遣去十三年江南災銅

并民運米至吳門言率眾劫之者枚以荒政當弛刑召其魁詢之乃土人遏糶非劫也諭以情法追米還之其敏而能斷類此

枚長身鶴立聲若洪鐘生平事母孝友於姊弟母年九十四終迎養寡姊年至九十妻亦白髮齊眉一家怡怡如也篤於故舊嘗爲亡友沈凡民司祭埽三十年如一日程編修晉芳死負五千金往弔焚其券且撫立其孤尤喜汲引後進嘗自稱吾之官不擇日葬親徙宅不用形家言而未嘗遇患不學仙佞佛而年登大耋枚旣山居年又最高歷四朝乃取康熙至乾隆間所識名臣事狀諮諏其子孫僚友各編次爲碑傳傳聞或有譌舛然其逸事足以裨益正史其所爲詩文天才橫逸不可方物尤長駢體抑揚跌宕得

六朝體格撰小倉山房文集七十卷詩話尺牘說部之屬若干卷

右澄清堂彙張維屏錄

襄勤伯鄂虛亭容安沒於王事袁子才挽詩有云男兒欲報君恩重死到沙場最善終傳文忠公最愛末句謂人曰我不識袁枚何人能作此語

右雨村詩話張維屏錄

石庵相公在江甯時聞其蕩佚將訪而按之子才投以二詩公閱畢卽請相見頓釋前嫌

右湖海詩傳張維屏錄

己未朝考題是賦得因風想玉珂余欲刻畫想字有云聲疑來禁

院人似隔天河諸總裁以爲語涉不莊將置之孫山大司寇尹公
與諸公力爭曰此人有用心思必少年有才者尙未解應制體裁
耳此庶吉士之所以需教習也儻進呈時 上有駁問我當獨奏
羣議始息余之得與館選受尹公知從此始

右隨園詩話符葆森錄

國史館藏書

卷三十三

三

楊愚

君姓楊氏諱愚字大智號北峰山西太原府興縣人先世由陝之神木遷焉祖玉鼎考如震皆以君貴累 贈奉政大夫例晉朝議大夫祖妣李氏母崔皆宜人例晉恭人配康氏處士庸炳女例封恭人兄明修職郎弟澹山東泰安通判君學有體用年十八補弟子員以書經舉乾隆戊午鄉試己未成進士歸十年謁選初授福建詔安知縣調繁侯官縣署南臺同知卓異擢廈門同知調淡水同知丁外艱服闋仍赴閩署建甯同知補漳州兼攝南平縣代守建甯漳州汀州興化四府再調南臺兼攝侯官平和二縣龍巖州再舉卓異升知廣西柳州府以卒年五十有七君先後在閩二十

餘年及爲柳州僅半載故宦績莫著於閩性好約不冒苟取與言
訥訥如不出口及遇事敢任應對上司必竭誠無所瞻徇所遇諸
大吏非一輩皆能重君以劇任相埒遺有所薦舉必以首推閩之
人始而畏其嚴繼而服其明終而戴其慈去之日攀輿而送者道
路爲之塞聞其死而悼歎者比比也嗚呼其必有道以致之非夫
以利結以色取者矣跡君經辦地方庶務無慮數千百件皆卓卓
在人口耳不可悉志志其大者當漳州逆匪蔡榮祖事發郡馳檄
詔安云嘯聚俱在林胡山中詔西北境上山也素險塞稱盜藪僉
議調兵往勦昔奮然曰主一縣不能保地方無事尙敢臨事姑待
乎且多人適同吾民僕公事耳卽輕騎往從者裁數人至則寥寥

百十家迹其謀狀無有俄百總趨來問恚曰某將卒五十人駐此反則某反耳何傳之謬也自君來三年闔境草竊無所宿甯有此乃引還則報其游擊領紅花埠兵至矣卒共白制府師而坐黨逆死者環漳六邑皆與焉詔獨免制府由是重君踰年復有流言烏山反者證其誣如之南臺有桔園洲貢生某與林姓爭田不勝賄營弁捏報林不軌事制府已遣逮百許人以屬君君勘知冤卽盡釋之而馳詣轅門謝反覆陳事讐始末並所勘狀竟霽制府顏抵誣者罪其他治獄明決類此在侯官平反特多往往疑難積案人所聘貽而不敢承者無不應手就理不縱不濫所捕獲則南臺有張興數十人廈門則林天厚十餘人漳州則黃薦兄弟九人皆豪

猾巨盜人或爲君賀輒蹙然變乎色從不以爲己功廈門爲洋艘
隘口出入餽必豐上司挾以採辦洋貨相習成故事君與商民約
勒石禁絕其稅例曰打運錢一無所私越八載君方攝南平會廈
門洋行陋規事發使者出按君獨免吏議焉尙書裘文達公語人
曰吾此行識二君子不虛矣其一謂廉訪朱公珪今晉藩云淡水
生番橫往往襲擊內地人斫其首以去白晝焚掠如戲而熟番復
冒託爲奸屢創不止時楊應琚爲總督以委君君條陳十二事宜
皆見施行如定立疆界禁游民不得僣越番境占墾田畝以清釁
端令熟番各雜髮畱髮以示區別移駐都司營於艋舺渡增設汛
樓令民得家置竹棺木棍以資捍禦給守隘諸番口糧以均賞罰

至於今帖然若夫懲溺女之俗裁嫁娶之禮置省會北郊義冢築
洪塘禁闈根毀淫祠葺諸儒祠立練氏夫人廟新鷺嶼書院庀救
火具驛舍城垣有廢必舉所至皆然凡君所爲在君祇以求稱其
職而已爲人所難能君嘗歎曰作吏當於人不知處與民相安於
無事卽民受福多矣愧予之未能也故能政通人和上下翕如莫
不期之以公輔而徐觀其未竟其遷柳州也閩人以爲望粵人以
爲慶時君方病下痢猶力疾視事埽清積牘竟至不起寶乾隆三
十八年癸巳五月也惜哉恭人有淑德後君卒以甲午十一月享
年之數與君同子四人嗣時嗣秉嗣溥嗣博皆諸生嗣博爲修職
郎君後孫六繹紳綬緹績女子一適諸生李清葵曾孫一葬以

四十年五月在橋家溝村祖塋之側奉康恭人台焉誌取嗣秉所
爲君閩粵宦略及行狀中而系之銘曰

詩之良士史之循吏惟體恭儉能行慈惠不疚於利不怵於勢匪
名之弋曰義與比方隆望實未竟設施天不憖遺人口祝之爲李
翁頌爲孔宙碑詞章非壽明德不衰

右墓誌銘趙佑撰

楊鸞

迂谷先生三輔名賢也諱鸞字子安號迂谷別號可詩老人世居潼關城內勝國中徙居華陰之白頭堡高祖石隱公明廩生曾祖函東公以進士令山東臨淄有惠政崇祀鄉賢祖省園公邑廩生考大櫟公歲進士銓延川司鐸未就職郡伯李公私諡孝靖蓋自關西夫子以來文章經術媲美前徽奕奕簪纓清華於以世濟也先生夙秉神慧在襁褓中太夫人口授古文詩詞卽能成誦比長上承庭訓博通淹貫於學無所不窺年十四受知交河王文誠公取入學隨食廩餼選拔貢成均時與劉繼貢胡靜庵諸名士及先君子爲同年友而詩文唱和獨饒風雅焉丙辰舉於鄉己未成進

士當先生之未遊泮宮也甫七歲而太夫人見背哀毀盡禮至性
遐聞及先生之既捷春闈也元配黨孺人告逝作悼亡詩百首深
情宛摯使非資秉之異學術之醇烏能發皆中節如是哉癸卯銓
捷爲令川中山水縣互地多荒蕪先生下車卽勸開墾墾田日多
居民日富值上有升科之例始行報稅人享其利無所累凡鹽課
市價淆混者槩爲均平無甘苦多寡之弊而士守正學俗崇古道
依稀見絃歌之化云後改授醴陵調署長沙湖南民受漕糧之患
而官倍取貲先生曰彼令姑臧者何人我豈取脂膏以自潤者命
平斛平收外胥役不得折收包納而羨餘飯食之類一切裁損時
步嶽麓書院與掌教者登堂講課於是士慶陶鑄之樂而農鮮稱

貧之苦然循吏可爲而不可爲也乃復聖吏議爰具裝資由粵東
抵金陵錢塘涉大江登虎邱泛舟西湖觀浙江潮水與賢士名流
相往還山川人物之盛古今興敗之跡悉收爲裁詠之資歷練愈
以精深胸襟愈以脫灑佳句琳瑯片紙珠璣同前所作刻爲三帙
名曰邈雲草諷詠者當有以得其精神之所注而心志之所適也
已越二年爲養親故補華容旋題邵陽邵陽苗獠雜居稱難治先
生諄諄化導不數月獄訟不興公堂闐寂可羅雀其興學勸農冰
蘖自矢一如在長沙醴陵健爲也至分房考校所得多知名之士
頻主文教雕予鑄回者不一其人而先生之學術著矣先生之經
濟深矣使得大用詎愧漢太尉哉乃兩袖清風貧且如洗雖匡坐

鼓歌不改其樂而泰山北斗之望霖雨蒼生之澤爲三輔士子幸
能不爲舉世斯民悲也耶憶元宵後二日先生遣力迎予云有寒
疾予聞命疾馳比至而先生歿矣嗚呼泰山其頽乎梁木其壞乎
欲登風騷之堂者誰與指授欲尋孔顏樂地者誰與開陳後之君
子讀其詩可以想見其人拜其墓自必肅生芻之奠已耳先生生
於康熙五十年正月二十一日未時卒於乾隆四十三年正月十
九日未時享壽六十有七元配黨孺人歲貢諱鯤公女繼配汪孺
人州同諱肅公女繼羊孺人生二女悉能詩長適三原庠生員員
家麟次適涇陽庠生員熊映南繼倪孺人生二子長曰初年十四
已入庠聘蒲城魏氏次曰訢幼聘蒲城張氏皆予爲蹇修也銘曰

先生之學濂洛瓣香先生之詩李杜光芒類韋蘇州而尤工狀物
邁温飛卿而雅多慨煉馬蹏秋水芰製荷裳爰及德配永奠幽堂
千春萬禩陵草悉芳

右墓誌銘王夢祖撰

同治十一年... 九月... 廿五日

四

陸廣霖

君姓陸氏諱廣霖字用寶一字補山遠祖福明都督同知賜第居常州遂爲武進人曾祖三松府學生祖廷煒縣學生考載起考授州同君少穎悟多智略然善病而弱年十四始屬文君祖視之異以牙尺曰他日此孫當衡量斯文者自爲制舉業晝夕攻苦題無難易操管立就嘗客都門歷六十七日構七百二十三藝見者無不驚服乾隆三年以國子監生應順天鄉試中五經舉人明年成進士入二甲以知縣卽用方需次在都座主故大學士蔣文恪公延課其子或有屬君關說於文恪者願奉千金爲壽君力拒之文恪因益契重五年正月選福建之連城有余氏兄弟三人孟與叔

後皆鼎盛合建宗祠以仲後單寒誣其已爲人後不得入主仲之
後鴻漸者縱火焚祠遂相劫殺然鴻漸實無死法惟受嚴刑而已
君至視其牘趣召兩造集於庭以情諭之聲淚俱下眾感且悔卒
送主入祠後君去官鴻漸涕泣相送逾年將移甯化會檄勘甯化
橋工有士人袖文謁見詢其地風俗知有鐵尺會其徒兇黠犯之
家立破碎因籍其姓氏居址以歸及下車適逢編審畱會首劉席
玉令勿去俟其魁數人集乃召胥役中之嘗入其黨者雜鞠之復
遣人密偵其黨諸犯倉猝被擒皆款服論如律者十四人餘勿問
建甯下泉里邱氏聚居有積爲盜賊者已十餘年縣官不能誰何
賊雖獲物主莫敢問檄兵往捕聞賊吹笳聲相率遁去君乃設廣

廷延邱氏之諸生舉酒屬之曰家有圯族之子教之不先擒之又
不力咎將誰諉乎眾皆起曰諾卽斂金爲構緝費不二旬積盜皆
獲七年夏旱米翔貴君諭富民出糶而不許多減其值以待四方
來者奸民誼言米貴由令鳴金入署勢洵洵君率家人挺身出闔
署門命悉擒之民不敢譁是歲因平糶致閔者十三縣長吏多受
辱民亦株連不少焉黃家峒黃氏人多獷悍嘗遣役有所擒治役
難之君曰無畏彼或不率吾當親往至則其家已桎梏以待其先
聲奪人如此八年奏調臺灣之彰化初劉甲有蔗園廖乙牛踐之
因格鬪劉黨傷者廖氏願爲醫療旣皆就瘡有二人忽不歸劉訟
廖致死究詰至再迄無端倪君至首詣起事之家反復驗勘見宅

後地數弓土微赤中植芭蕉試拔之應手起復試他樹則堅不可動時方久雨竹葉有焦色疑而鋤之果得人骨蓋被傷者載回皆分瘞不令相聞一人傷重死焚之滅迹及第二人死想火光上燭不敢復焚磔其屍棄於海耳未幾以甯化讞上遲延部議革職督撫連章保之有旨仍以彰化知縣用縣設於雍正四年當其初囹圄空虛官吏無事及君再至訐訟日繁以盜牛殺人者尤夥君虛衷研鞫不以爲倦虎尾溪地遼曠爲劫奪藪君請添設一丞以資彈壓臺多漳泉兩郡人素不協一日集市中漳民誤火灼泉民泉民怒歸告其黨俄頃麇至時君赴淡水乘閒肆劫市爲之空君念首罪固難原然無辜之累必不免亟傳兩郡民委曲勸諭令泉

民盡償所毀之物仍痛懲之兩郡之民咸悅服終君任訟幾息及
俸滿將行巡道某以彰化多鴨寮康熙間叛賊朱一貴卽伺鴨者
恐爲患使善處之始準內渡君曰此臺民素業若因是致疑則耕
者叛將廢耕乎審年貌令鄰佑互結足矣甯德縣東湖三面並海
向有隄捍衛自沒於倭寇邑日蕭索士民請於官願捐貲更築費
且鉅萬而工不就大吏檄君往督做河工下埽法治之齋宿天后
宮焚疏籲禱夢神示異兆工遂以葺移順昌嚴隱糧之弊使民自
首民不敢欺請於學使復歲科兩試府學分取之額邑人省試久
未中式諸生咎初建學宮時擇日不利欲重修君曰諸生盍自反
命豈懸於土木哉乃嚴立講院程課日自校之逾年而三人獲雋

辛酉庚午壬申嘗三與同考得人頗盛桂林陳文恭公撫閩尤極引重君臚十二事陳之多見施行十二事者崇貢院通水利整橋梁裕積貯廣郵亭興煤廠端士習嚴械關禁囤積廢閭神戒溺女止燒山也十八年陳公保舉知府引見記名再羅吏議再以知縣用旋丁太孺人憂免喪揀發廣西補恭城知縣攝百色同知精敏一如治閩時有周甲與二人夜行爲槍所殞同行者驚避黎明走報汛兵屍已不見前官因是被劾君喚周甲之子徐問之曰汝父故與人有隙耶其子初諉不知旣而曰有舊僕某家頗饒父每向假貸積有隙或卽其人乎乃召周甲所宿逆旅主人詰之則曰僕於數日前嘗屬周若宿此盍通一耗某不察實往告之君恍然

曰賊在是矣立械僕至一訊而服蓋是夜僕與其弟候之中途周
既死剖腹置石投之河中至是獲屍沈冤遂雪百色界連雲南有
地數頃田岑二土官互執爲己業歷久不決君奉檄履勘知爲岑
氏產毅然斷歸田氏無怨言君既敷歷閩粵興革利弊知無不爲
尤善折獄凡數十年積讞得君剖之獄乃定上官倚如左右手方
駿駿日起爲同官牽連罷職人咸惜之既家居一意文酒所居後
園蒔花疊石署曰簡園日與知交酣飲其中有以文字質者欣然
論析終日忘倦懷玉素不善制舉文君獨亟賞之辛卯秋試還君
視其文謂必售及報罷爲之太息淚下烏庠可感也已君生於康
熙四十五年十月初二日卒於乾隆四十五年六月二十四日年

七十有五配孺人高氏繼配孺人莊氏並有相德先君卒葬孝仁
鄉方基村子五繼夔雲南平彝縣知縣繼萇河南登封縣知縣繼
皋國子監生繼斐爲君弟廣森後繼臬繼斐先君卒繼輅女五史
洽和湯康業蔣重耀儲一崧黃楚蘭其壻也孫八人耀遷耀遷耀
述耀達耀進耀邁耀遠耀邈會孫六人將以乾隆五十三年十一
月合葬於方基村兩孺人之塋禮也繼夔以志墓之文爲請懷玉
辱君知最早不敢以不文辭謹爲之銘曰

芒芒七閩獫難撫綏或戢以兵君以鞭笞患弭未形克鎮倉卒人
亦有言徙耕曲突平其訟獄光我庠序士歌於農農拊於野移車
桂嶺厥治從同奪邑三百人亮其公水懦火烈胥以濟惠惜乎驥

足再起而蹟凡百郡縣盍來取斯安得百君徧置有司

右墓誌銘趙懷玉撰

廣西恭城知縣陸君諱廣霖字用賓既卒之十七年其子繼輅以書請於張惠言曰先人之葬也內閣中書趙君懷玉既銘其墓然吾子今之有道德能文章者以繼輅之獲與游而不能得一言以傳其先人人且疑先人之有遺行而吾子弗之許也敢以爲請邑有吏如吾先人而傳之俾有述抑亦吾子之責惠言媿謝非其人

不獲則條具其行事可論者以爲版文俾著之廟將俟表君之墓者刻焉其辭曰君中乾隆三年順天鄉試舉人四年會試進士是時福建知縣缺大吏以請天子重其人特用新進士選補而君

得連城進士之有卽用知縣自君始君由連城知縣歷甯化順昌
彰化而順昌再任最後爲恭城縣署百色同知君爲知縣屢以公
事失官凡三失官輒復以知縣用嘗保舉知府終不得遷卒以知
縣爲同官牽連罷職焉君爲知縣二十餘年所治閩粵之間或在
海中林箐谿峪夷民蠻獠盜賊廁處不可施以政地曠以隔俗憤
悍睚眦言語挺刃矢相關結連黨羣千百爲輩吏相顧不敢問則
縱弛羈縻冀且無事及其不可隱則嚴治以法痛芟艾之君以威
惠爲治善撻伏鉤距中民之情片言單辭應手立斷姦民巨豪先
知其主名窟穴所在張網發機壞其萌芽姦不得發甯化豪劉席
玉其黨數百人號鐵尺爲鄉里害君始至行縣召之至及其黨皆

至遽執之眾大驚不知所爲皆首服論十四人如法盜邱氏者居
下泉里聚黨自衛積十餘年吏莫敢捕君致其族之爲諸生者喻
之曰家有巨猾不能擒罪將及汝眾曰諾旬餘盜皆得而盜賊聞
君之威亦不敢匿名捕之無不獲者嘗遣吏有所執取吏難之君
曰不得吾親往至則已自械而待蓋其嚴如此然君實以平恕服
之非以武猛爲務連城民有侮其族之貧者出其主於祠貧者怒
火其祠遂相劫殺吏當之死君至致其族人於庭諭以情涕泣交
下眾皆泣大感悔乃出火祠者於獄而反其主和如初臺灣多漳
泉兩郡人素不悅往往持兵鬪因肆劫君之在彰化以事他出泉
人乘君之不在也攻漳人於市眾大駭君聞馳歸親諭之感解兵

叩頭君子之杖其自彰化調順昌也守道以彰化多鴨寮曩時飼鴨者朱一貴以臺灣畔懲之謂君必禁斷乃去君曰此民業可禁耶審其籍令鄰里保任之君之寬厚喜全活人皆此類故終君所任無劇盜兵鬪者舊獄無不決君所不直退無怨言謗辭君在閩嘗爲巡撫陳文恭公陳十二事曰崇貢院通水利整橋梁裕積貯廣郵亭興煤廠端士習嚴械鬪禁園積廢闔神戒溺女止燒山陳公以爲善多見施行其治縣亦皆用此蓋君明習吏事知大體本末明足以決之強足以勝之而屢起屢躡終不越縣令又以廢退卒故人多惜焉君以善治獄聞其事見於趙君之誌甚具故采其大者而論之君之卒以乾隆四十五年月日年七十五以乾隆五

十三年月日葬於孝仁鄉方基邨夫人高氏莊氏祔子五人繼輅
最小賢而有文孫耀通亦與予善系曰

君之宗自福始祖廷煒父載起世有緒以至君顯其德施於民胡
起之胡蹟之胡有才而已斯君有子亦作宰門未昌其有待君之
季維其賢亦有孫世作程澤之兼於是存有不信訊此文

右祠版文張惠言撰

孫良貴

孫良貴字鄰初號麓門湖南善化人乾隆己未進士歷官常德府教授甘肅安化縣知縣有麓門文續六卷墨樵詩鈔四卷鄰初博聞強記著述甚富有窻古質疑四十九篇其論歲差里差氣差考定三湘九江黃河源諸說多有根據詩有雄直氣不作滯語

右沅湘耆舊集鄧顯鶴撰

五
三
三
一

五

黃澍綸 唐煥 汪啟緒

黃澍綸湖南善化人乾隆己未進士選庶吉士改繁昌知縣政簡刑清吏民詎頌錢塘袁枚同年友也嘗稱澍綸非百里才在繁昌六年致仕歸宦橐蕭然一舟載書而已性嗜靜晚著靜軒銘殫力撰述識者慕其高致同邑唐煥字堯章號石嶺乾隆辛酉舉人知平陰縣縣雲門山產石堅緻上官檄采石助泰山廟工煥慮擾民力爭事遂寢在縣修學校繕城隍明慎折獄邑大治調知昌邑築王可隄遏濰水之衝又設土牛植檉柳爲久固計告歸家徒壁立杜門著書有尙書辨僞五卷姚鼐序曰古文尙書出自東晉韓退之自言辨古書之正僞而不言僞者爲何宋大儒始論古文爲

偽之端其後儒者展轉尋攷至於今日而古文之偽大著閭百詩
之斥偽古文專在考證其言良爲明切而石嶺先生作是書其辨
多以義理文章斷之可謂有識矣爾昔作尙書說中有數條與先
生合竊以自喜第恨生晚不見閻先生亦不見先生也又克己齋
四書十九卷石嶺詩文集若干卷子仲冕陝西布政使汪啟緒號
德圃少孤力學乙酉舉人歷任信豐瀘溪知縣實授峽江卒於官
士民輓詩有恆以慈心懷赤子並無官面對黎元之句

右傳李元度撰

聶燕 彭坊

王世瑞

文光朝

周世玉

溫清子家桂

聶燕字環溪湖南衡山人孝事父母及繼母人無閒言雍正乙卯
舉人乾隆己未進士知陝西鎮安縣會大兵征金川軍需馬匹民
不能備燕於龍駒寨捐貲雇用大兵進行居民安堵如故縣四鄉
舊置社倉遠者或四百里民馱負維艱且時罹虎患燕酌於野珠
土茅二坪移建兩社倉民咸稱便縣多虎募獵戶能捕得者重賞
之已而連得數虎宿患以除捐廉建崇聖祠魁星閣修碣路設義
學輯志乘立虹化亭教民飼蠶及種棉紡布在任八年治行推秦
南第一調知鳳翔俄以內艱歸構別業郊外讀書授徒晨夕歸省
其父顏曰近養堂居數年父沒讀禮其中易名近倚廬乾隆癸巳

舉鄉飲大賓卒年七十九從祀鄉賢並祀鎮安名宦祠著有塾說
鎮安縣志環溪草堂文集四卷子肇奎乾隆壬子以優貢舉鄉試
好學不倦詩古文度越時流晚官益陽教諭著有迪光堂文集曉
嶽山房詩集從祀鄉賢同邑彭坊字儀岳父士商黃州教授有學
行坊乾隆甲子舉人性孝友嘗連居兄弟之喪晨夕悲哀友愛聞
郡邑及居母憂哀毀踰禮宰浙之長興勤於撫字繼補浦江縣培
植風化政尤近古工詩古文詞著有瓦卮集六卷王世瑞字鳳圖
乾隆壬申進士歷貴州安平四川高縣知縣署酉陽知州所至息
事安民公餘卽爲諸生評文藝兩充同考官所得多知名士官兵
平定金川從戎四載遠出塞外兼管山根新店站務運餉迅速尤

龍惠恤人夫爲建恩厝塞外坊歷任皆有去思碑以終養告歸著有周禮撮要文光朝字鶴田乾隆癸酉拔貢宰粵西隆安縣六年以除盜養民興學爲事粵東猾盜張羅仲夜劫典史船於隆安光朝越境偵獲機謀沈密民咸稱神值旱饑發振動倉儲造其子歸售產填補隆安科名未盛光朝勤於訓迪旣而馬延承鄉會聯捷卽其平日督課首拔士也會兼攝兩縣一府勞瘁成疾卒於任用世玉字璞齋乾隆丙子舉人授東阿知縣縣境當運河衝歲發民夫修捍胥役因緣爲奸世玉至捐俸召募民賴之歲旱禱雨於濟源洪範池之龍神願以身塞災無及民雨立降賊民王倫擾壽張距縣數十里世玉率民登陣巡邏不少休偵獲僞軍師袁公溥一

夕往還馳數百里積勞成疾卒時年四十二世玉歷署東平州及
汶上鄆城恩縣皆有循蹟卒之日篋橐蕭然子安邵官鄧州知州
溫清乾隆庚辰舉人大挑發四川以知縣用金川土酋跳梁官兵
進勦調管龍肋巖峒站務在站兩年軍械糧餉轉運迅速旋丁內
艱當事奏請蜀省管西里寨隨營糧務服闋署西藏察木多軍糧
同知廓爾喀蠻匪滋事官兵進勦辦理碩板多站務勞瘁成疾卒
子家桂在站治喪時接任者轉運遲延當事令家桂襄辦三日內
糧械全運到營得旨請蜀省辦理碩板多站務服闋以州同知
補用賞銀二百兩以資扶輓後補遂甯梓潼縣丞兼鹽大使

右傳李元度撰

郭承齊

李德亨

黃昭蘇

郭承齊字資賢湖南桂東人乾隆己未進士知天長縣治奸胥勤聽斷遇事履勘單騎裹糧不以累民縣界高寶諸湖爲盜賊藪承齊嚴保甲治窩隱盜爲息歲徵兵漕二米置號籤鋪布單花戶自執槩諸弊悉除兩江總督令諸州縣皆倣其法值水災倡捐振粥全活甚眾再補鉅鹿亦有政聲同邑李德亨字象衡父世佑性仁厚待兄子親族皆有恩德亨以乾隆辛卯舉於鄉知甯津縣承辦河工有能聲權薊州士民稱德卒於任宦囊蕭然同官賻之始克歸櫬德亨事父母孝事繼母尤謹及沒繼母哭之幾喪明黃昭蘇字思瞻由拔貢中乾隆庚子順天鄉試歷署冕甯鄆都知縣廉幹

有聲補鹽亭清操愈著卒於官

右傳李元度撰

段汝霖 謝仲玩

段汝霖漢陽舉人乾隆四年知龍山縣廉潔而勤於政治撫民苗以誠信皆服其化以最擢知道州再擢永綏直隸同知手輯南苗志凡苗中風俗好尚及歷代治亂叛服考覈周詳於三廳事尤備治苗者奉爲圭臬焉時有謝仲玩陽春舉人知常甯縣下車嘗聯宅門峻卻餽遺遇履勘至鄉自裹行糧至嶠生萊菔供饌月兩課士兢兢以節行戒勉調知平江再調衡陽以代李澎澎徵漕米浮收斛面糧儲道謝濟世發其奸澎與濟世並免戶部侍郎阿里衮奉命使湖廣訊狀事急澎盡出其賄贈簿籍以脅上官阿里衮重與大獄欲出澎浮收罪與濟世俱復官仲玩重治澎丁役乃以

國朝

守令二十

卷

陞中書廣濟府志 卷之五 三十四
洪罰過當被劾罷官明年 特起爲衡山知縣仲玩官湖南三十
二年七署府一護道丞俸攸令之任三十有四鞠大獄數百直懸
名動海內三十七年授永州知府議改准引食粵鹽格例不行以
目疾請告歸卒於家

右傳李元度撰

葉鵬雲

公諱鵬雲字大用官亭其號也姓葉氏世爲江西泰和人明洪武
甲遠祖受以從軍始占籍商邱宗支蕃衍掇魏科躋廕仕者後先
望遂爲中州著姓祖元澍任榮澤縣訓導 贈垣曲縣知縣祖
妣一氏沈氏萬氏生祖妣林氏並 贈孺人考增覃郡庠生 封
垣曲縣知縣妣關氏 封孺人公生而純厚溫仁多恕侍親闈下
氣怡色以孝謹見稱贈公子六人公於行爲長友愛諸弟終其身
無毫髮間與人居必接以恩禮宗戚知舊雖清濁異流無不愛慕
忻忻焉讀書日有程課六經百氏皆通梗槩心思所到往往造其
深微試諸生有聲與秋闈者十一次無所遇以選貢入太學 御

試得甲等引 見 上察其儀度安雅奉 旨以知縣用發山西
待次既至署孝義陵川二縣事乾隆四年授絳州垣曲縣知縣
宰三邑爲政一本儒術崇大體通下情嚴命令慎差遣改弊法以
清心省事與民休息爲務青衿至縣庭者非身犯重譴不令屈膝
以刑者民生軀命所繫兩署邑篆夾棒未嘗一試垣曲土瘠民貧
所以撫摩愛養寬恤安輯之者甚備賦額不登幕客言當杖責一
二以警其餘公曰民以事未遑上納非抗也何遽責爲吾當自下
鄉驗之既至父老謁道左候起居自言差糧未及辦公慰之曰穀
熟且焦汝輩當勤力收穫差糧事吾爲汝任之稍遲旬日未晚也
其平易近民如此在垣曲凡五年竟以不善事上官鐫秩歸旣歸

家計益窘惟整理舊學與一二知故譚經論文蕭然出塵之趣
宦況泊如也余自署年早識公款接連日不飾辭以明謙亦不溫
語以市厚而真意旁流使人常有味其餘既又與公共研席同里
聞於公性度操履識趣器局察之極詳且覈見公學而仕仕而復
學無皎皎之譽亦無赫赫之功然自公考終所接名流勝士求一
悃悞無華歲計有餘如公者指不得再屈嗚呼是可以觀公之所
存矣公生於康熙二十九年二月十八日丑時卒於乾隆十七年
十一月十五日午時年六十三配彭孺人夏邑太學生澄公女後
公二十年卒年八十三子男二長汝耜邑庠生次雁題邑庠生女
三孫男三中易中珠邑廩生中標邑庠生孫女一曾孫女一所著

有響寒詩集藏於家葬以乾隆三十七年十一月十二日墓在邨
居東二百餘步與贈公同兆銘曰

不激於情不矯於行不競於名養其和平以茹其英以含其貞既
篤其祜亦駿其聲琢石鏡辭施於幽宮以詔無窮

右墓誌銘郭善鄰撰

師問忠

師問忠字恕先亦字裕亭趙州人乾隆辛酉亞元歷官長蘆石碑場鹽大使公少孤業耕讀讀輒易忘愈勤憤懣懣如故因泣泣已復讀讀罷又泣如是者以爲常計無復之疏告神直陳苦況忽夜夢一人捉刀啟胃取其心洗之而去遂驚醒由是慧悟舉賢書後以丙戌大挑借補晉甯分訓凡經其指授者皆掇高科躋仕途及司隄務恤商惠竈善政良多其最著則抗樂亭令某指場竈地作官荒招奸民認墾致上游稱強項場官地卒歸竈其曰天下事多被圓融壞卻益會議時語也

右瀛繫小傳師範撰

日本書紀卷之三十一

三十一

主孝治 章國茂 張屏大 龍驤 謝振宇 李罕

王孝治字青溪湖南湘鄉人乾隆辛酉舉人初官通道教諭有獠人分居四里八寨四里歲入獠生二名而八寨不與孝治力請於學使增八寨獠生一名由是益知嚮學擢雲南知縣署鄧川州東湖時有水患民田多廢七次修之皆不就孝治築長隄開支河日赴工所親督之數月而功成廢田俱成沃壤計畝萬有二千其令太和也開渠引水注田四時不竭民稱青溪渠誌弗諼也升鎮沅知州病歸卒年七十有三同邑章國茂字石塘乾隆丙子舉人以知縣試用借補宿州州判分防河間無潰決患時詢民間疾苦訊重囚輒泣下其卽事詩云水來天上狂須挽蝗起田間撲白雞百

里趨工忘足繭綫回問俗轉心寒其自述如此卒年七十有八張
眉大字五渚乾隆己卯舉人官溲浦訓導選開建知縣值久旱到
任甘雨隨車士民建來雨軒頌之縣署中舊有妖連喪五官白日
大石自空下爲文祭之妖遂息興立義學政簡刑清七年無大獄
去任時僅端石數枚壓裝而已奉檄採辦滇銅經理得法蔽事甚
速著運銅事宜一卷署海防同知清釐關稅商旅安業嘗分校秋
闈兩主司詢以疑義辨決如流皆歎服旋升儋州擒獲洋匪平反
數十案積逋一清時大興朱珪撫粵暇則延入署中從容論文年
踰六十致仕歸著經學備纂九卷說書唾餘海南日鈔滇南紀行
詩龍驤字三峰乾隆乙酉舉人以知縣發河南歷署嵩葉汝陽夏

邑臨潁縣事補郟城初知熹甫下車首除秕政十二事會大旱且蝗饑禱之雨立至而蝗亦出境民有祈雨雨來祝蝗蝗徙之頌在夏邑歲大饑不俟請而開倉振或難之驥曰以振去官夫何歎若待請則民已轉於溝壑矣民感其德及秋穫悉輸還之郟城地當通衢且有蘭儀睢汎河工驥理繁治劇布置裕如己酉分校鄉闈稱得士後引退家居二十年卒年七十有八謝振字字元亭乾隆甲午舉人由四庫館議敘以知縣發山西歷署猗氏馬邑黎城崞縣甯武神池等縣補授五寨循聲大著卒於官弟振著舉人振定官御史自有傳皆受其教而成名者也李罕字芝圃乾隆壬子舉人以知縣發四川初署彭水甫下車擒治啣匪七人姦完斂迹會

有人道斃而兇不知名驗之身有簿記知爲貿易者密訪之則索
債於廖某者也檢視公呈廖某固在乃傳訊之廖大駭服曰吾知
罪矣雖然是嘗入吾家而侮吾妹吾忿而斃之者也獄遂定再調
仁壽邑有聶某妾婦子也以誣繫獄經七官不得直罕按舊牘則
詞證已具訊聶則極口稱冤問有仇乎曰有郭某者匿土豪家迹
而得之一訊卽服蓋郭殺人而賄證以誣聶也遂釋聶而置郭於
法

右傳李元度撰

劉德傑 郭士頓

劉德傑字南一湖南巴陵人乾隆辛酉鄉舉授房縣知縣操守潔
清歷署漢陽同知均州知州所至有青天之稱父艱服闕再補原
缺卒於任房人爭輓以詩設主祀之同邑郭士頓字樂儻乾隆庚
子舉人歷官靖邊耀州涇縣城固寶雞等州縣官城固最久察除
水利積弊去縣日士民餞送四十里不絕士頓曉律令工聽斷著
有懷刑摘錄行世又有草草吟野叟錄

右傳李元度撰

史進爵

史進爵字笠庵號三坡陝西興安州舉人乾隆六年令什邡邑舊有義學僅三間雍正九年改節孝祠遂廢公甫至什念義學育才之地烏可缺指俸倡首建方亭書院講堂東西室牆垣井竈牀几諸器悉具延師訓學十二年建後堂五間置田地百數十畝始有膏火之資立二社學招城內外童蒙之不能就傅者又修文廟砌泮池建尊經閣念邑乘屢經前任採訪未及成書舉邑人士詳加纂輯爲書十八卷書中尤於教養之事反復諄諄如水利則示以灌溉修築之法農田則示以耕作種植牧養之法風俗則示以古禮語學者一則則示以德行實踐經濟致用爲有本之學及文藝

乃明理治心之資其途亦有義利之辨尤非儒者不能言此可以
慨然想見公之爲政矣

右小傳紀大奎撰

國朝耆獻類徵初編卷二百三十四補錄

守令二十

徐碩士

歎之西曰巖鎮有人所畏惡競指而名之曰鑪其爲鑪非水非火而沸者烹者剗剗而燔炙者噓且煽者寒附熱者羣聚而熾其燄誘諸富人子弟入輒焦灼糜爛以至於盡其不入中以陰事或誣劫之必歷所欲乃已用是人人惴恐相戒毋陷入入且死吏緣爲奸相助作聲勢益此者率惑於聽罕究切之故縱以久太守徐公治徼及期廉得其實曰此害馬也不去必敗羣需之益張勢將燎原疾縛鑪魁二生至褫其服論徙之徒黨解散民以大和未幾公

坐左官去徼之民奔走叫號怨怒聚泣所在皆是其鄉之士大夫謀勒功德於石而屬其記於紫陽書院山長舊史氏鄭虎文爲道說前事復進而言曰非特爾也吾郡古稱富州富固貧者之資資之眾且久必貧名存實亡循責無已萬目睽睽困莫收恤公來酌水與誓手摩撫之含飴哺糜如乳愛子凡諸彌文苛法呼召役辱之患苦吾民者禁督皆絕民終歲戶外無一吏人跡屬不慈狎死條守要砥節廉靜歲以再和民氣完實譬之病者初起方恃以生而公乃棄吾去文嘆曰此古仁者之治也非磨以歲月不效且無奇功近名人不能爲亦不冒爲而公獨爲之嗚呼難矣若夫大猷巨猾患不治治得一健者害可旦夕已視此猶易顧公持重自卑

言語嘔嘔貌若惟怯寡斷遇事乃如驚霆迅雷之暴怒猝至已輒復其故常威因物生怒不畱己仁者必勇公之謂乎公之被議以庫役盜金逸四日而獲盡還所失金將論報或諷寢其事公曰不可寢則罔上罔上必縱惡罔上縱惡其何以令令而效之又何誅焉誅之是誅其類己也誅類己而不知恥者是謂心死心死不祥莫大焉而余何忍諸卒論報遂坐是左遷嗟乎天下之粥欺蒙詬蹈危鬪捷而以循聲聞者踵相接公顧不用是爲自完計確然不欺其志於進退利害之間如此公真可以屬大事者 今天子神聖幽篋蔽翳靡遺靡阻磨刮洗濯物無枉材豈賢如公而以左官終者則微之大被公惠必在異日微之人可無悲也則皆再拜稽

首曰是吾民之願也乃爲之記公名碩士字遜夫雲南嶧義人用
孝廉爲雲龍州學官歷知河南寶豐封邱縣同知湖北安陸府事
所至皆有惠政云

右政蹟碑記鄭虎文撰

國朝耆獻類徵初編卷二百三十五目錄

守令二十一

孔興誥

袁德達

蔡韶清

武若愚

紀晉

王崇禮

譚之綱歐陽立煥

錢文梓

吳翼行

周鳳儀

孫禮史致祥

李光曉戴澤三

周昭甲

何光晟馬世觀

胡師亮許源

朱廷模朱聲亨

張廷儀

陳德

蔡光清張德履

嚴克任程班

丁大松萬年醇

錢人麟

張甄陶

楊敦

周守一

曾光先

陳夢麒周志傳

張乾珩周錫溥

王立槐

顧奎光

國朝耆獻類徵初編卷二百三十五

通奉大夫前署江西巡撫江西布政使司布政使相陰李桓輯
守令二十一

孔興誥

先聖孔子四十、七世孫曰若蒙始封衍聖公十五傳而至六十二
世曰聞禮別封翰林院博士爲小宗聞禮生山清河務同知貞坤
貞坤生 贈承德郎尙錦尙錦生曲阜縣世尹衍瀆衍瀆生廬州
府知府興誥余聞孔氏子孫廬州公則其賢者也公爲世尹公少
子由太學生以賞例得爲縣年三十二授太谷令歷署祁徐溝樂
平太原諸縣偏關同知課最得爲郡奉 詔旨特授廬州府知府

誥封中憲大夫其爲太谷也太谷故山僻邑豪猾爲奸里甲括歲租往往中飽股民公到縣除里甲之弊以蘇民困而實巨豪杜羽於法奸徒股栗遇編審單車歷村堡冊爲之式吏胥不得手上下性嚴明尤精於鞠獄鉤距發摘若神吳寡婦李氏者爲人所殺莫知誰子公往視良久曰吾得之矣誠役鳴寺鐘大合村中人令無有不至者公到直視眾大聲曰殺李氏賊在此乎中有一人神色異卽麾役爲我取彼蓋吳三以姦李氏不遂而遂批殺之視其衣新浣黯如有血未滅者一訊卽服然眾究不知其何從得也武氏子以石殺其父讐於道而自縛歸官公曰孝子也予杖而釋之雪中有犬走堂上去之不得公異之敕人尾所之至郊得石板發

視則赫然死人也集鄉人識之一婦人前曰吾夫也公詢其鄰知婦與胡燈影私公心疑燈影殺其夫訊之果然遂論如律於是山右人皆奇大之爲主白冤而公益以能吏聞天下其在廬郡別宿弊汰繁文務別黑白澄清爲治貪墨舞文吏望風解綬去居二年二州六縣咸稱治康熙末西夷蠢動天子命親藩大將軍往討之詔選郡縣吏之才者備行閒役公時已去太谷需次吏曹既又以瘍患家居奉部檄奮然請行至則解牛西藏三百六十頭復往巴里坤牧橐駝萬蹏又以輓運自土谷樓出燉煌往返哈密土魯番周迴萬里黑水流沙火山爛泥頭痛身熱名險之地無不到六月飛霜雪寒颶枝枝豎毛髮裂肌膚指直不得結衣領赤瘡白

霧四塞竟天與氣與交輒僵道路駁馬野牛哮聲震岌天地山魘
木客眩人迷盲狂易往往失日月東西公束窺懸井撥沙犯煙而
進出萬死不爲阻卒無貽誤軍務而公及從者竟以全無恙公爲
人長身廣頰修髯如神人彊力敢任才氣縱橫沛若有餘遇事開
明果決截截嶽嶽忠奮不爲身謀以故爲吏有成績而辦公無留
事公年五十五罷廬州任乾隆六年年七十終於家公字遠猷號
沂源恭人徐氏鄒邑進士徐公履端女端謹有賢行嘗典簪珥佐
公邊關費而在官常諷公爲寬政公亦竟得其助恭人後公十年
卒卒年八十二子七人毓憲毓孜毓愆毓志毓愈毓志孫十
七人曾孫八人元孫一人初公在太谷時嘗用形家言勸建文昌

祠邑人科名繩起有魅於狐者想公求驅之公以硃筆點其項怪遂絕在西藏時固原民以賈從軍染瘴瀕死矣出橐中二千金乞公致其家而絕公攜金還西甯卒檄召其子完緘而畀之君子以是知孔公之賢雖位至二千石猶以其才之未竟其用爲可惜也
毓孜與余善來請銘銘曰

曲阜之北萬古宅中有方堂蔭松柏孔公歸此當冬日昌厥後人永貞吉太谷遺惠廬陽績有欲求之視此石

右墓誌銘牛運震撰

袁德達

袁君近齋用乾隆辛酉舉人中壬戌金銜榜進士試刑部大司寇
張文敏公才君子提牢提牢滿歲卽眞投主事旣免考察君遽得
之疑爲私人時副都御史仲公永檀以言事下獄病篤君據例請
文敏以仲病狀上聞俾出獄視疾仲故君座主文敏用以誚君
君曰此刑部例也以例請是提牢職非私仲故當死死亦可於
獄獨刑部不可違例死仲於獄由提牢提牢亂刑部法刑部亂
天子法某何人將恐有任其咎者文敏不應亂以他語同列皆引
君衣令退君端立不動爭益力文敏大發怒去而仲竟死於獄是
時君直聲聞京師君方質有氣當義則奮劬躬燕物一於誠仁旣

爲刑官治律例如治經擿剔疑互離厯會紛雖釁劇促數橫豎鉤貫吏不能欺以輕重用是奏獄同官必推君草章草章俗謂之主彙主彙者必議彙於堂上官相可否俗謂之說堂鬪捷市聲賢能者所爭也君則主彙而委說堂於同官之爭爲賢能者或咎君奈何不自爲計君曰死獄至刑部十不一生吾欲生之而專其功爭者必求殺之是彼之決於殺吾成之也今歸彼以功樂以生人爲功且助我吾之自爲計不亦善乎君守是道不變人敬愛之無論識與不識相語咸稱夫子無字君者他有疑獄持不相下得君立解多所湔白余嘗爲君作趙孝子歌孝子定州人名如勸幼時仇殺其父旣長積十五年母死葬遂殺仇詣獄就死吏以故殺論

抵事下君司君爲做駁復仇議上之孝子得減戍其出人於死類
此大吏倚重之歲秋審率屬君總其事庚午充順天鄉試同考官
稱得士今某部員外郎顧君懋德廣西左江道秦君廷基皆出門
下在刑部首尾十年累官至郎中出爲雲南永北府知府永北治
金沙江外萬山中無屬縣民獠錯處貧瘠頑悍禮教衰廢其俗無
子子壻不立宗法奴婢之異主者相配偶各役於主如初不共居
室夜則就婦宿生子從父生女從母役屬亦如之乖離忿怨毒聲
流聞君至則理論法禁俗立丕變羞前之爲疏渠墾荒省耕贍農
興學勸士口啣手摩如母母子削衣貶食絲粟不染居二年郡無
遺便大吏某徵金無以應怒使某官假他端來陰刺君事毫毛無

所得歸白君治狀大吏慚服行薦君會君丁繼母憂念其貧資之
以歸歸作東歸篇今約其述治永北時事載於篇讀者可以知君
矣其略曰滿目荒荆榛山城一壺繫縣隔金沙外誰復思撫字地
僻雜夷獠生獮多猛氣利乖父子思詬諍况兄弟族亂宗法亡無
子子贅壻錮婢囚眾雛生子非伉儷濟濟膠庠英耳不聞六藝吁
嗟俗如此掉首不忍視疲氓似巢禽板屋架巖際二月春雨生鋤
耜兼似娣樂歲一飽難身無完衣衣甫釋行李艱又對此凋敝龔
黃召杜賢才薄何由繼鬱結摧心胷設施慮無自爲之浚故渠宛
轉引灌溉爲之營始耕開倉給廩餼爲之平舊徵銖粒必親莅爲
之董塾師訓課依傳記時復慮囚餘親指六經義放衙行田閒勞

勸不辭瘁營彼蠶三眠温厚以爲飼又如病起初藥石忌猛厲綱
繆二載中稍稍起顛躓嗟哉風木悲北堂凶問至方寸旣已摧何
能復談治君初在滇病溼旣歸以哀毀勤瘁時復作劇服闋授廣
西慶遠府知府未行竟以是疾卒於京師年四十有九君學有體
用可用康天下而窮於郡符又無年柳州所謂萬不試而一出者
也悲夫君諱德達字信吾近齋其號先世居江西之南昌自宋南
渡遂世爲浙東鄞縣人也

右傳鄭虎文撰

乾隆初有賢大夫袁公鄞人也四十年夏有高將縱游天台於剡
中逢不若而羈反僑鄞識大夫之令子袁鈞以是得備知大夫修

已從政之蹟魁然盛古儒者也前翰林鄭先生炳也辭大夫家傳
義法質美不可梯卽乃別爲記與傳中事語頗互有益損書藏之
爲私鏡楷焉而再書一本歸諸鈞初大夫爲諸生時授經同里生
家塾僮婢夜奔就大夫大夫拒之力婢沮而慙則好謂之曰若幸
自檢我終不告人明日堅設他辭以去晚年始與菴人說鈞是以
知之大夫旣官刑部貫熟成憲勇於求人活利害毀譽及一時風
氣揣摩避就之端漠不省而憚怕退遜恥翹能於同官尙書侍郎
憚其直倚其練事持平而廉白無以濟也同官樂其文無嘗交慕
而親敬之老滑得畏忌若鬼神也本司凡有奏獄論駁大夫主彙
主彙者猶史記屈平傳爲令屬草彙也一司中得善主彙郎則一

方大小吏不敢不慎獄不敢上疑獄嘗部卽一方民鮮冤抑豪黠民亦不得邀幸縱脫大夫爲直隸司郎中時直隸總督以定州趙如勳獄上先時趙如勳父趙和被其同姓趙簡拳而殪趙簡論抵絞十五年矣至是如勳殺趙宋詣有司自言報父仇言趙宋實同趙簡毆殺其父而屬趙簡獨承竟詭免是時如勳年十四弱從兄趙欽錫不平指控趙宋而以誣告人論徒及長母婁婁言趙宋切齒如勳痛人骨母老弟幼自禁耐今母已葬弟能食力矣乃決敢歸死有司當如勳斬大夫或之曰該督慮是獄情未得尙疑遽質擬非祥刑弼教之本義也此案題結久已十五年案內審明無干之人而該犯畜謀狙殺口稱報仇其趙宋同毆致死之語僅屬該

犯一偏之辭出自其已葬之母之口無別證左承審各官曾不察
該總督亦遂依違奏當意謂乃按本律擬斬輕重適等奚俟深
比不知殺人造意罪在不赦而爲父報仇情則可原以不赦之罪
傳可原之情使將來秋審幸邀矜恤暴而逸誅何以懲後且聽其
飾詞未覩其真或凶狡奸民而與天性激昂奮不顧身之子混相
景冒此開誠僞若不明白所關匪細若該犯供詞屬誠則舊案何
妨改正該犯律有本科應從寬典其或舊案並不差謬該犯亦實
無他端止因母言痛傷父命銜恨祗金一十五載至母亡弟長內
顧失戀攜金推仇束身歸法此其處心良可哀憫亦不應與尋常
謀殺一例問擬刑本教理其貫同條豈宜遷就轉致乖疏此案應

令該督再行學究確鑿具題到日再議奉 旨部駁甚是依議獄
再上報仇明白鄭先生爲作定州趙孝子歌卽其事也予從鈞借
得大夫刑部時彙本讀之銖兩釐秩各中其比欺大夫用心精密
仁志條言輒頰首自茹謂不可企其後治永北才二年仁施益懋
著以服去官服除起爲廣西慶遠府知府將行卒於京師惜哉永
北雲南金沙江外叢山中其民獠獍雜蠢忝父子夫婦莫辨治田
蕪疏以故貪前使君大都獠獍之而已大夫曰是非 天子赤子
乎吾敢欺吾心自到隴上教之田教之爲灌渠教之爲蓋藏入其
塾開其塾師入其室廬開其艾壯婦女令曉倫知羞惡煦煦懇懇
境內蒸動若療得蕩若厭寐得寤於乎其爲盛古儒者何疑蓋盛

古儒者之學以不自欺爲本以求仁爲功大夫之能不自欺觀爲
諸生時事可見此其所以能求仁效之於莅官故綴聯之爲語首
又聞大夫爲郎中平反口外部落一案所活蓋五六千人大夫捐
館時鈞幼文書多散脫無從稽而次之而竊深喟恨大夫之位與
年不稱其施也大夫諱德達字信吾自號近齋卒時年四十九鈞
敦敏有器識學於鄭先生嚶嚶三代古文之志年才二十餘大夫
之仁流鴻遠不旣驗矣夫

右傳後記羅有高撰

蔡韶清

余爲諸生時卽知南安有蔡公以甯立行甚高學古文詞有聲於庠序蓋蔡公故安溪李抑亭先生所拔士與余爲同門其舉進士東方官翰林相見於京邸其服官也所至有善政余於蔡公蹤跡雖疎闊心儀之固已久矣歲在壬午余以憂歸里則蔡公之子恆璋繞服來謁以其行述暨公所撰詩文章見示始知蔡公先一年已告終於南州客舍嗚呼痛哉余遂不得復見蔡公乃揮涕爲之誌公姓蔡氏名韶清以甯其字也一字穆如又曰愛廬其先出於中州之考城晉大司徒之裔宋南渡司戶參軍名榮者始自豫徙虔遂家於南安有名有經者其六世祖嘗因歲祲捐粟千石以救

清所全活無算嗣是代有閩人邑乘人物志最豔稱焉公自入鄉
塾即讀左氏傳史記漢書唐宋大家文不屑屑於兔園冊子又
性耽吟詠總角時卽爲詩出語如成人雍正戊申年補博士弟子
員時學使卽安溪李公也乾隆丁巳食餼於庠戊午領鄉薦壬戌
售南宮主考者咸賞異有國士之目壬申需次得湖北之宜昌府
興山縣興固僻邑田瘠而土燥公製水車教民以灌溉歲以有收
或遇恆雨恆暘禱輒應以其暇構書舍置塾田課諸生以學而親
甲乙之興之人以是漸嚮於學興邑民聚族而居而兵戶且三倍
於民公和其將弁兵民用是輯睦無哄爭事興之人愛之如父母
興士戴之如師嘗一署歸州牧篆歸蜀江之衝也公設救生船以

濟覆舟終其任無溺死者丙子以報政最調漢陽公念此劇邑號稱難治夙與夜寐益勵精不遑受詞不以期限日坐堂皇民有赴訴者以其詞付告者與被告者偕來訟無淹日吏胥無所措其弊前所畱滯輒期月而畢理民無畱獄獄無冤民漢陽之人至今頌之又其地爲吳楚交會鹺務聚焉富商大賈比屋皆是公於餽遺一無所取而造官渡以濟行人葺學宮以養髦士建烈女祠以表章節義設巡江船以清查盜賊減耗以利漕施藥以已病又往往捐己貲爲之不少吝維時豫省告災奉旨以楚米協濟又接運川米數十萬石調船二千艘公親駐江干爲之經理剋期盡發無後時者蓋公具幹才而濟之以實心故所投輒無艱鉅如此旣而

司馬管公莅漢陽郡公以兒女親例應迴避調黃岡亦名邑也公
爲政一如漢陽時未幾以檢驗事望吏議去官黃之人攀車涕泣
如失慈父母而公顧淡如泊如也歸里後郡太守游公延之旭升
書院復多所成就公於文章固其性之所好其在興山在漢陽在
黃岡皆以此爲惓惓故里居無事尤樂與諸生相往復無稍厭焉
至其事親孝處叔姪兄弟閒皆有恩意以相接葺先塋修族譜推
衣共食咸有合於敬宗收族之義云配賴孺人出自名族婉順有
婦德鴻按相莊始終罔閒先公卒於漢陽之邑署公自爲行狀所
著事蹟皆質實可援据公卒於乾隆二十六年上距其生康熙四
十七年爲年五十有一子五恆瑋邑庠生次恆瑩太學生次恆瑄

以出繼降服次恆璉次恆理女一適余同年雩都營公第三子今
黃州府太守卽前佐漢陽郡公以故迴避者也孫枝林立皆一時
之秀今恆璋泣言將以某月某日合葬於某吉壤爰爲之銘曰
謂公爲文士兮公乃能吏公有文章而副之以經濟公有子兮實
又資夫德配流水環環兮蒼山嶙次馬鬣旣封兮永無失墜

右墓誌銘裴曰修撰

The image shows a large rectangular frame with a thick black border. Inside the frame, there are several vertical lines that create a grid-like structure. The lines are not perfectly straight and vary in thickness, suggesting they might be scanning artifacts or part of a document's layout. The overall appearance is that of a scanned page with a prominent border and internal vertical lines.

武若愚

邠州牧武公若愚於乾隆二十年閒爲鳳翔令時有大盜李甲羅乙肆劫陝甘數十州縣莫敢誰何而獨不犯鳳翔公曰吾民獲安忍令毒他邑乎乃懸賞購之一日偵者來報曰盜從北來驢馬負載互二三里飯大道旁將南去其魁二人萬人敵也黨十六人皆梟悍幸縱之勿搜其鋒公曰嘻爾無恐爾其率爾徒持縴索聽命選吏二人僕一人日足矣城外橋南平壤可鬪岸側可設伏遂騎而往三人者步從是日微雨公衣製衣膊短兵至其地少休已而盜至李獨身前公並轡出其右閒與問富詰所往輒怒吏手利刃抉其裝則金珠充物盜覺策騾東東瀕河公騎駿甚知人意駛而

尾其後盜以文吏忽之公霍然奮銅椎重四十斤擊而踏之賊躍起兩吏掣其肘僕自後力擊臂折禽之羅望見憤奔公公舍騎迎之未至四五步手發鐵彈中其目僕乘隙撞其胷乃倒羣盜譁欲跳伏發其徒無一人脫者至署釋其縛鞫之時聚觀者數萬人羅猝起奪賣錫者擔走且呼曰不畏死者來左右咸失色公笑曰我在將焉逃死徐起追之至野遇負薪者知盜匿罾井中焚薪投之盜激水滅火諭之曰汝逃至海亦不汝縱況井乎乃躍出鬚髮盡焦矣是役也公以身陷不測之險縛虎狼如牢豕使秦地數千里無犬吠之警嗚呼可謂難矣當是時旁縣聞之走相告曰武公神勇天下莫能及公易直子諒廉公有威擇民之秀者教之塾其壯

者君以兵法回民有罪夜半出片紙拘某人父老飲食而送之曰
武公汝父母命汝死汝勿求活使公至今存所部回民必不敢從
於逆蓋公自有仁者之勇足以攝伏凶頑區區武力甯足以盡公
哉公山東曹縣人壬戌進士軀幹瘦小而膽略絕倫治行著於陝
其禽盜事公之于嘆棠言之

論曰治盜亦吏治之一端也嘗見當時爲吏者其持己也廉其字
民也惠忠厚和平不肯翹翹然負其異於眾如武邠州之手禽巨
盜顧已爲躍治之金不得登諸薦牘近數十年來爲吏者能獲鄰
縣逸盜立蒙超擢視昔爲幸矣一旦筐篋不飭卽刑罰隨乎其後
甚矣爲縣令之難也昔之勇於爲政者既不爲上官所喜今之貪

國朝言行錄卷之三十三
一三
縱者又爲下所疾怨而以身徇之然則封疆大臣宜如何講求吏
治使屬吏知所法守而無失乎牧民之道也歟

右書事邵齊能撰

紀晉

甲戌秋余客揚州甘泉縣署經紀故知縣事紀公之喪紀公余中表兄也余至揚未浹月而公病又旬日而公卒閱十六年庚寅冬其孤淑曾始來乞銘泣而言曰不肖兄弟無狀今乃得謀先人之寢事且念先人居家服官大節可示子孫而式鄉黨者惟尊者能傳之敢以泉壤之文相累也余辭不獲乃按狀而次之公諱晉字企瞻號寬夫行四世爲文安望族公祖孟起公吏科掌印給事中父公選公工科掌印給事中余姑歸焉卽公母也公兄弟六人公第三幼而聰敏年十七補邑庠生力學工詩文顧不屑屑遂時趨以是久困於鄉家素貧自父公選公以邑令行取歷官給諫身歿

家無長物又十五年再遭母憂時伯兄官江南之旌德奔喪後旋以官事未了偕仲兄同之任所家事一以委公公摒擋諸務之餘讀書寶樹軒中課諸弟益嚴業益精文成往往驚其同學戊午舉於鄉壬戌以明通授祁州學正能舉其職祁之士風爲之振六年俸滿遷邑令得江南之當塗當塗獄囚當暑多疫死公抵任首分其罪之輕重別禁大吏嘉獎著爲令斷于王兩姓爭產百餘年未結之案一邑頌神明焉調桃源辦災賑請開倉不俟報牒所全活無算是年 駕幸江南公迎送境上蒙 溫旨宣問出身旣而堵禦六塘河水明年督捕蝗蝻與民夫弁兵雜作數十日不得息歲以無害調甘泉甘泉爲揚城附郭縣水陸之衝浩穰號爲難治公

下車而商民帖然公過邵伯湖知二閘將壞急牒請當道爲先事
防或阻之不果已而閘陷隄壞公引咎大吏重公先見題升江防
廳旣格於例不果然終以疎防部議落職 恩許赴部引見大吏
奏畱任辦賑因查下河回署而病遂卒壽五十有二綜公生平宦
跡蓋勤於民事爲多也自公官祁州學正時眞定順德廣平大名
四郡同災大吏聞有司奉行賑務不善委公勘驗公微服密詢至
一小村有百餘人臥路嘸曰縣冊獨漏我曹公惻然周以錢且曰
我行路人與汝官有舊當爲汝告補登之未至縣其官廉得之要
至館舍叩首請罪獻白金三百公笑曰君畏罪耶子民饑餓至此
而君畱此餘貲營辦免罪此自速罪也如能以此捐給某村饑民

某當更以捐賑高義聞於上其官感激應命而退終不罪一官而
民獲實惠焉公初以祖父皆成進士然後登仕志不欲速化故其
在學官也上游有問或非事關學校輒不對然諸大吏知公才漸
委以民事既不獲已嘗語兒子曰我之就此無以紹祖武汝曹念
之他日無汲汲一命爲也天性篤於兄弟遷當塗之歲伯兄歿攜
其遺孤與副室金氏之任視孤如己出公歿後十年獲登鄉薦云
著有寶樹軒詩二卷制義二卷元配佟孺人繼配李孺人子二人
長發會正申副榜次淑會癸酉舉人見任湖北天門縣知縣題升
沔陽州知州女二人孫男三人孫女二人銘曰

搢紳之門世載其文清白之澤世載其德黃門孫子壽齡壽齡

起而稽屈伸有時祁學六載強仕一命越俎不知孰云其競三宰
江縣民事云勞不辭蹇蹇以蘇噉噉湖隄漫波或議其後曲突無
功爛額爲咎吏文排根 皇恩棄瑕志用未竟隕世而何 叶家軒
寶樹蘭玉滿庭勉繩祖武尙有典型丈夫出處卓犖可紀我勒幽
砥永啟來裔

右墓誌銘李中簡撰

國朝詩林卷之三十三

三

王崇禮 諱之綱 歐陽立竣

王崇禮字希周湖南安化人乾隆辛酉拔貢旋鄉舉中壬戌明通榜選沅江教諭憂歸與築長沙府志主修邑文廟並縣志再任衡陽教諭以卓異遷延長縣知縣手上利病二十條大吏頒示各屬以龐士元目之兼權虜施懷遠延川等縣篆並護理府事大軍進剿西陲檄辦軍儲歷年無誤歲歉奉檄分振九縣事悉躬親不假手吏胥民需實惠在延長修文廟勸縣志建書院捐伏膏火延俗錫子多委壑崇禮禁之陋習丕變歸田後茅簷蔬食晏如也嘗手周易倚柱讀雷擊其柱神色不變主講石鼓書院有狐崇崇禮至卽息里大疫爲文禱於神里人夢大厲爲崇禮叱去境果帖然同

郡譚之綱字雪山茶陵州人乾隆癸酉舉人知溧陽縣以經術飾吏治凡所張弛皆當人心及告歸不名一錢之綱與弟之紀齊名子定元聲元皆以舉人官教授品學爲士林所重歐陽立煨字曠亭攸縣人乾隆庚寅舉人授桃源教諭以嚴正束士有過必誨務全其名邑令施灝有惠政以虧帑將被議立煨勸縣人醵金數千代償得無恙擢知甌甯縣有新冢被發躡之無跡立煨密授役以方略中夜而獲會積盜竊發佯弛之既廉得其窩藏遂率健役掩捕按問伏法盜爲之弭調知順昌俗惑青烏術以未卜地多權厝立煨剴切勸諭令五日內悉安葬否者將聚穴瘞之至期歸土者十之八其無主者捐地封識會齋匪案起株連數十家立煨罪其

首數人餘俱省釋皆感泣去亡何以護送甘肅兵餉卒於汴梁

右傳李元度撰

姓名	性別	年齡	籍貫	職業	學歷	黨派	住址	電話	備註

161-636

錢文梓

昔州守江公以文教治吾郡課士於學宮之尊經閣月有常期所造多淹博英異之士維時先君子及樸園錢公尤爲江守所器試輒第一數舉似其文以式多士學金稍長侍庭訓先君子稱公長於制義醇雅雄厚根柢經史於是學金始知公之文章旣而朱石君師由晉藩內召每指數山右屬吏之賢者必及公以爲惛惛簡靜能得古循良遺意於是學金始知公之政蹟旣而公子敬熙元熙就試京兆與學金以詩文訂交於是知公之事行尤稔旣而公解組里居學金亦以奉諱歸得拜公於堂旣而學金再以内艱歸公已下世矣今年學金謝病還里公子永熙元熙來告葬期出所

撰行狀屬以銘墓之文既不獲辭謹詮次狀中事實俾後有所考
焉公諱文梓字泗良樸園其號也錢氏系出吳越武肅王後其從
常熟縣遷太倉者爲公九世祖道晟遂世爲州人五世祖桓前明
太僕寺卿巡撫南贛贈右副都御史所至有善政世所稱浩川先
生也高祖煥贈通奉大夫順天府府尹加一級曾祖坡候補中書
舍人祖褒錫父渭皆太學生以公仕 贈如其官母張孺人郁孺
人公郁出也少有異稟甫逾十齡已盡讀十三經及史記漢書長
益肆力於諸子百家所著帖括雄視儕輩爲名諸生甲子領鄉薦
屢蹟禮部試垂二十年始以大挑一等奉 旨發往山西以知縣
用委署解州州判事以艱歸服闋仍赴原省先後委署定襄大甯

兩縣事以稱職問補天鎮縣邑故邊地歲常苦旱公度地勢測土脈導桑乾之流演迤以注於南川境內之田賴以霑溉有大石莊者與陽城縣接壤水從陽來至此湍急傾瀉卽盡陽民遇上流以專其利莊民爭之不得奔控於公公乃白太守召陽宰議因請設牖日夕更番啟閉兩邑並受其利而爭遂息邑之西北郊爲古戰場積骨成莽封土爲義冢無賴子窆土其傍公瘞以深坎繚以周垣並嚴其禁公性慈厚而治獄精敏案無畱牘尤以扶良鋤暴爲己責劇賊張五斤子者窟穴新平堡居民患苦惕息不敢發公以計掩執之窮治其黨盜藪一空公之署大同縣事也奸民趙大閩羅者虎於市莫敢與校公已耳其名矣一日驢導出方酬酒持刀

跳梁閭閻立予重杖臀肉盡脫以鐵索貫巨石項鎖之市民歡呼
羅拜其醫保德州事也甫下車吏目某以監犯同時越獄告公曰
勿恐去當不遠耳卽遣丁壯數十輩飛騎伏某某處候之薄暮悉
縛至無一脫者公在天鎮兩遇大差一爲土爾扈特歸順一爲班
禪額爾德尼入 覲符檄星馳供億山積公先事部署不激不隨
賓至如歸而民忘其役大府以公爲能將量移關南蓋晉以雁門
關爲界南肥而北瘠公聞之亟往謝曰某久於是邑雅與士民習
不忍舍之去矣遂不果調夫古人效一官治一邑必欲久處其地
以冀政通而俗成而熟於宦途者往往規畫閭井之殷富料量物
產之豐溢攘臂而爭之捷足以得之其視棄舊民如土苴去故官

如傳舍然後知公之異於俗吏者其意量誠遠矣公筮仕之初中丞鄂公方伯朱公並以清操實政澄敘守令故公得以一意奉職矜其讀書學古之蘊久而公之持守益定乃弗冒變其初志假使後之大吏如鄂與朱者知公之深而薦擢之必有以盡展所長公之設施又豈止於此哉公家居後益以老成樸厚型於鄉越六年乃卒享年七十有二又三年葬公於州之二十四都一圖陽圩之新阡以陸孺人耐焉孺人爲候選州同知陸恬女賢能治家前三十二年卒子五人兆熙敬熙咸熙皆先卒敬熙館書議敘湖北沔陽知州永熙太學生元熙乾隆己亥舉人女七人孫八人孫女六人曾孫一人曾孫女一人銘曰

錢氏遷襄世爲鼎族烏奕蟬珥焜煌繡襮公生其閒含英秉淑廣
業以勤貞履維篤公之文章圭璋在櫝公之才識經緯在軸隄於
一第弗售其璞局於一隅弗罄其蓄畱公有餘光啟似續穿山之
陽水澄土沃余銘公墓質而弗緝懼失其實重貽公辱

右墓誌銘汪學金撰

吳翼行

朝廷設官以爲民也內自公卿庶司外而封疆節鉞無非爲民也而治民者惟縣令一官令而下分繁劇而已令而上司勸懲而已今皇上勵精圖治簡任賢能獨令爲重加詳慎焉士之服古入官者貌榮名而衷厚實揚華裾盪芳風揭危旌引飛霞而或折長腰於下邑則抑塞不伸若夫有道之士志在行其所學以稱 聖天子嘉惠元元之至意則令之重雖鷲掖鳳池不以易也得之而自喜亦得之而自懼舉宇宙之全量以治一邑猶晨夜欲然又奚以怏怏而浮慕於外乎吾友玉山吳公生而穎異稍長好學能文章未冠補博士弟子員食餼由拔貢生舉乾隆甲子科本省鄉試

第二人再上公車不第奉 恩旨揀發山東以知縣用歷署臨淄
武城滕縣捕蝗道水勘災發賑皆著惠政署東阿甫下車恭迎
聖駕東巡公除道清塵毫無派擾屬車所至風日恬和士民扶老
攜幼盈盈道左瞻仰 天顏 上願而樂之 召見溫諭準其實
授方圖報效以內憂解任扶櫬南歸父老哀號焚香路祭者越境
而未已也服闋補湖北公安縣到官訟牒填委公閱之多舊案糾
葛嘆曰俗無鬪官自情耳率亭午坐堂上吏捧案雁行以進且聞
且聽燭盡三條可結十餘案皆鏡清衡平無或爽者遠近稱神君
縣故澤區多曲洲迴岸浦澈深遠叢蘆箐葦之中羣盜所窟宅公
密跡之禽其渠魁餘黨解散雖鄰境亦賴以安歲之首夏江湖異

漲支河隄潰浮家泛宅者十戶而九公親履視疏築沐雨戴星經
月不入署制府臨驗命具陳河流源委防治宣洩之法公卽舟中
手書條對詳明不逾晷刻制府閱之則大喜曰畱心地方是真縣
令且明達如此非百里才也公安旦暮衽席矣旋署卽具疏奏調
江夏江夏全省首邑最爲繁劇公晨起入憲署稟事退而與吏民
相對如治亂絲必髮櫛之縷縷然不以斬截爲能夜秉燭治官書
雖寒暑不輟上官悉其才有餘命兼漢陽司馬江夏無兼他篆者
獨公能之六營一事偶滯先是歸州獲盜上其狀於臬臺臬以誣
良罪州俄而盜復行劫州復以狀上藩臬怙前過屬公反其獄公
故遲之事聞藩臬得罪公以遲延註議降級離任歸卻埽杜門

將闕下老矣越二年奉文催促乃復起赴部引見蒙恩仍以
知縣用得河南之淇縣淇爲九省通衢地方五十里差役繁多民
以衝疲公到官一以安民爲務明年西涼兵過淇兵過又明年索
倫兵過各部署秩然道旁民荷鋤而觀非道旁者不知有兵過也
吏有稟屯戶抗買馬料者公曰無庸我購之他邑足用矣明年調
固始固始民輕生健訟命盜案無虛日公多病然神明逾於治公
安時未逾年民且革心邑有長堰瀆水溉田數萬頃豪民專利阻
塞水源公曰是關民命夫何敢卽親往督工修築無敢睚眦者歲
在癸巳奉檄署信陽州猶以固始報最赴部引見奉旨準其
卓異加一級回任候升八月八日過衛輝府謁臬臺於行次坐甫

定忽痰壅頭暈從者扶歸邸舍病五日遂卒嗟乎令之親於民夫
人而知之矣然而心切愛民者才不足以濟之得一罪民而憫其
愚而民之入於罪者多矣得一盜民而憫其貧而民之入於盜者
多矣至於拮据頓仆敗官以去而民愈不治又或才能理事而心
不在民以其巧慧善事上官營進取甚者幸其與民相近一伸指
而入其腹中掐其脂膏以自飽若斯之類可勝悼哉公入官二十
年歷八縣其來也民望之其去也民思之墮淚之碑山巔水涯所
在多有豈徒廬道旁而挽行人之日哉論者以公夙負公輔之望
宜其歷亨衢踐臺階高牙大纛不足爲公榮而躑躅一令以沒其
身以是爲公惜然而一邑之中政之全體具焉雖天下無以易也

則公之志行矣又奚以官之大小爲哉公在公安治水制府頒其
法於各屬俾得準而行之以此推之則公之政所屆者遠矣公諱
翼行字恆若玉山其號也先世自滇遷楚居湘陰累有隱德曾祖
應台前明崇正甲戌進士任浦江令有遺愛士民廟祀不替祖宜
振贈文林郎父宏道以諸生困棘闈有盛德崇祀鄉賢 贈文林
郎母胡氏 贈孺人生四子公行三元配周氏舉二子繼配徐氏
舉一子皆不育以從兄之子亮魁爲子女三人長適王次適胡次
適羅公生於康熙庚子年十月二十九日卒於乾隆癸巳年八月
十二日享年五十有四某年月日葬於某山某年月日改葬於某
山既葬亮魁以狀來請碑銘銘曰

士不擇官有職斯稱厥道無小慎茲尺寸穆穆天子視遠維近簡
任羣賢所重惟令藐茲下邑富之教之庶幾夙夜神鑒無私纓冠
于于鄧林之枝心在浮雲民瘼其誰公之幼時弱如處女拜命
入官不避風雨志盛氣充每勞非苦遺愛在民陟屺陟岵皇路
砥夷起而復躓方當大用溘然長逝素旆南飛悲風夜厲痾瘵未
遺口碑淚漬峨峨崇山鬱鬱松楸吁嗟斯室英魂伊假大命不延
職輪如瀉樹茲壘碑以告來者

右神道碑徐世佐撰

日本書紀卷之六

三

周鳳儀

孫禮

李光曉

史致祥

戴澤三

周鳳儀字韶亭湖南長沙人乾隆甲子舉人由安鄉教諭授江津知縣因土俗爲民興利民便之大軍征金川軍需旁午鳳儀部署行營令不煩而事集以軍功得超擢尋乞終養孫樹棠樹架舉人樹槐進士同邑孫禮字裕甫家貧力學乾隆庚辰舉人歷任嘉祥鄒平知縣潔己愛民尤樂與士人講論經義人頌儒吏解組日惟藏書數車父老攀轅拜送爭以食物獻乃停車受之禮詩文高潔古淡如其爲人李光曉字鸞溪乾隆乙酉舉人耒陽教諭載取來賓知縣縣多盜光曉督民種植延士紳訓民以禮法盜爲戢著馬易纂說從弟光寶乾隆辛卯領解額與光曉以學行相切磋並有

時名史致祥字蘭階乾隆己亥舉人嘗應禮部試聞親病未畢試
卽俶裝旋里是科文已入選不悔也選廣西修仁縣清介絕俗不
令子姪隨行一日子至署幾至斷炊致祥怡然自若也邑人有史
清天之頌戴澤三字畏齋乾隆己酉舉人歷任雲南恩安富民永
平河西宜良諸縣爲政寬簡然御吏胥嚴民無擾累遇災歎盡心
救之宜良惡俗每村設一棚廠名曰牛叢獲竊賊不報官集眾詣
牛叢焚之官不能禁澤三日豈有竊案不分輕重而一槩擅殺者
乎躬詣鄉村諭毀牛叢殘虐之風一變嘉慶戊寅充鄉試同考官
有富路屬薦一卷澤三不可同官動以利害終不聽年七十致仕
歸著禮耕堂文集詩集四卷滇蹟紀略樂府各一卷

右傳李元度撰

國朝通志卷之二十一

三

周昭甲

何光晟許源

朱聲亨

胡師亮

朱廷模

張廷儀

馬世觀

周昭甲字芝岡湖南湘潭人乾隆甲子舉人以知縣發廣東初署廉州同知捕勦海盜署仁化縣縣故有屯租供兵糈貧民負欠者捐俸代輸之復署化州值大澇振濟多所全活前任以虧帑被劾昭甲有惠政民皆樂輸倉庫並實補臨高訪獲南通巨匪龐三寇等置之法遷儋州未赴以疾歸同邑何光晟字東曉乾隆庚午舉人署咸甯南漳二縣補蒲圻下車集紳耆於庭誓曰宰官受暮夜金卽膺天譴歲旱刺血書文禱於神雨立霑全楚大歉惟蒲圻有年流民入境煮粥振之重建育嬰堂殫心籌畫民肖像於堂以祀署荊州漢陽通判興國州知州以註誤歸嘗四與鄉闈分校所得

士多顯達者著諮餘錄愛吾堂詩文集山火集胡師亮字益三父
松康熙癸酉舉人事繼母孝讓產以贍異母弟兄師孟乾隆丁巳
進士選庶吉士師亮乾隆壬申舉人由明通榜歷知西安平湖遂
昌慈谿德清仁和諸縣遂昌有巨案株連者眾師亮爲懲首惡餘
均省釋德清有廠徒錮於獄師亮出之白上官請飭他縣一體矜
恤如所請在仁和築長隄捍錢塘海口潮不爲患民呼胡公隄嘗
承辦 南巡大差供張無誤上官倚如左右手尋以疾歸朱廷模
字朝範乾隆庚辰舉人歷知宜川韓城三水等縣補朝邑將調山
陽民籲大府乞畱尋署鄜州亦如之山陽學額止十五名廷模修
學舍建義學作育有方得增額四之一縣城被水衝塌申請勸修

易土而輒復建長隄資保障縣界華陰永濟低田爲泥沙淤壅不
分畛域履畝會勘訐訟始息及去任士民送至關外多泣者張廷
儀乾隆辛丑進士知獲鹿縣以文學知名禹貢山水及易詩皆有
纂述而尤邃於易馬世觀字瀟洲乾隆壬午舉人歷署無錫崑山
丹陽知縣及太湖同知補荆溪課農桑清獄訟剔除漕弊吏皆奉
法上官才之檄辦南河鉅工富民以世觀多惠政爭輸金集事在
任六年卒惟敝衣及書數篋而已著禹貢山水注耕餘偶語筠香
詩草紅稻山莊諺語詩學緒餘小紅山房詩業許源字匯泉乾隆
甲午舉人大挑發四川歷署新都漢州內江仁壽等州縣遇勘驗
皆自備夫馬不以擾民知內江時川中賊犯普州竄縣境他縣俱

閉城自衛民無所歸多投水墜巖死源開城招納所全活甚眾嚴
圍堡繕守具誓以身殉賊知有備竄資陽大路去旋補榮縣三臺
爲潼川附郭邑賊常出沒大吏檄源往治安堵無警踰年回本任
嘉慶甲子分校蜀闈稱得士源治榮久百廢具舉獄訟衰息民氣
和樂年七十致仕歸士民追送郡城欲詣省會郡守宋鳴珂留源
小住令於大佛寺集眾諭遣之眾伏地哭不起良久乃去里居多
義舉卒年八十一著榮縣志十卷朱聲亨號甌山父色邑諸生堅
苦勵學著詩經臆言一卷四書偶舉一卷朱陸平論一卷以俟堂
文集詩集等書聲亨有膂力能舉百鈞然嗜學務窮根柢乾隆癸
丑成進士初令廣東遷陝西訖於甘肅凡歷十二任訟獄皆親理

不假手書幕任清澗時有被盜者聲亨突拘木工至工頗富素無
敗行士紳力具狀請保而聲亨已於盜窟下搜得贓三百金在陝
偵南山餘匪於百里外會募役皆倦休聲亨循行館外驚曰氛甚
惡宜速行疾馳數里火起而匪集矣嘗祈雨苦風不息乃設風神
位刑黑犬厭而躡之兩立沛道光十年舉卓異擢安西直隸州知
州踰年卒官

右傳李元度撰

--	--	--	--	--	--	--	--	--	--

161-660

陳德

蔡光清

嚴克任

丁大松

張德履

程班

萬年

陳德字修旃湖南華容人弱冠中乾隆甲子鄉試曾襟坦白言兩
兩如不出諸口及與談經義輒滾滾如懸河能發先儒所未及晚
宰黔之施秉以不合時宜改桃源學教諭卒於官同邑蔡光清字
海玉乾隆庚午經魁爲諸生時肄業嶽麓巡撫楊錫紱器之授以
廿一史不數月畢讀時舉一卷背誦不誤一字由甯鄉教諭遷貴
州龍泉知縣旋調江蘇桃源縣甫履任以歲旱報災散振與當道
不合一日召見光清光清便衣長揖不拜數語卽出口仕不獲展
所學安用仕爲遂告歸嚴克任字伊仲乾隆庚寅舉人挑發安徽
甯甯國知縣溪河水漲築壩捍之民害永除建生祠祀之移鳳陽

補霍山地多崇山密菁歲例獻果子狸令亦因爲利差隸四出民
至破家不足償克任力陳其狀爭於上致解任久之乃任含山英
山等縣調劇宣城兩薦卓異歷縣九充同考官五得士如陳超曾
胡岱雲輩皆名士致仕歸無疾卒孫先俞舉人丁大松字伯章乾
隆辛卯舉人挑發廣西歷署昭平修仁委辦安南軍餉給米改大
升加薪菜錢兵民德之移上思州攝百色同知土知州秦宜棟陣
亡上憲請立賢以次子承襲長子將謀變大松單騎往諭乃解旋
調荔浦以廣東有警調赴吳川時海寇熾大松航海獲巨寇百餘
民乃安大松歷兩粵四分校鄉閭得兩解元卒於官張德履字端
若開歸陳許河務兵備道奎祥長子援直振例議敘任博平及恩

縣知縣授膠萊鹽運判卓薦擢鄆州知州父喪歸服除揀發河南
借補儀考河工通判乾隆四十六年黃河漲溢曹儀之青龍岡大
壩頽裂德履督工下埽瀕危賴拯以免衛輝截漕運兌遲滯請改
移內黃之楚旺河漕運乃速又善剖誣河南令因私憤以左道誣
民大吏幾加兵德履廉得其實禍乃解陝州民李安育諷經惑眾
德履察無他悖按數人於法卒於官程斑字蔚全乾隆丙午舉人
挑發河南值教匪猖獗擾及川陝奉委振恤流亡至鄧有探馬報
匪數千將入鄧境斑集鄉勇千餘人擊走之巡撫奏保加級署裕
州丁內艱服闋赴豫上臺以勞績舊員委權宜陽封邱旋補汴川
縣洧地瘠民貧苦車馬差向多冒官索折等弊斑飭非當堂點驗

不得濫應開渠疏河道洩水患以勞卒於官萬年醇原名康字禪
峯乾隆壬子舉人性穎悟於天文樂律算法兵防河渠靡不講貫
出宰安徽歷任霍山英山巢縣六安州所至有惠政致仕歸著有
易拇洞庭湖南英山縣志通書正本西漢八大家文選古禮拾遺
三史挾四書翼楚辭註解詩文集共八十餘卷於易學尤邃可稱
前軼後云

右傳李元度撰

錢人麟

常州錢稼軒殿撰諱維城官至少司寇太翁諱人麟以乙榜任浙江蕭山令歲大饑有流民千餘詣縣求食勢極洶洶錢卽開倉出數百石振之上游擬以亂民定罪錢堅執不可僅枷責爲首者因以性情躁妄擅動倉穀被劾下獄明年乙丑科稼軒中進士一甲第一名及第太翁尙在獄中卽釋出余曰開倉振濟一案有三善焉援民命於呼吸仁也弭民亂於倉猝智也智仁所在毅然爲之勇也特立不阿身受其咎有親民之責者不當如是耶抑又聞之錢太母吳太夫人方太翁爲諸生時家故寒除夕聞鄰婦哭聲問之知爲無米炊也出斗米予之而子子焉蹈五西之阨矣慷慨任

卽奮不顧身以此相夫子嗚呼此其所以爲太夫人也歟

右筆記金捧闔撰

張甄陶

公諱甄陶字希周一字惕庵先世自中州來居於莆數傳由莆遷福清之江陰里高祖徙居會城爲閩縣人曾祖諱鵬翼祖諱待問皆邑學生父諱捷春字誠齋乾隆丁卯科舉人祖父皆以公貴敕贈如其官公以拔貢舉甲子順天鄉試乙丑成進士改庶吉士戊辰散館授翰林院編修尋奉旨以知縣用在粵東歷任五邑以憂歸起補雲南昆明縣罷去爲院長於滇之五華黔之貴山者十餘年歸里主講鼇峯卒年六十有八始誠齋贈公肄業鼇峯爲巡撫甯陽陳清端公館師漳浦蔡文勤公所器重公方少贈公卽助以正學是時士之爲舉子業者多株守一經公獨於經史子集

旁搜博採自天文地理樂律兵法水利河防以及農桑方技之書無不周覽爲文始學眉山汪洋浩瀚大有聲庠序閒中丞安居王公學使新建周公尤重之 皇上御極之元年特開博學鴻詞科大吏以公應 詔詣徵車旣而報罷時高安朱文端公桐城方望溪先生臨川李穆堂先生畱意人才見公則大喜公辭纂修三禮之命從方公請觀未見書取永樂大典三萬卷閱之三公益以德業相期許磨礪灌溉所學大進而公名自此益重矣其由翰林出爲外吏也人皆爲公惜而公慨然有用世志大學士海甯陳公知公才出呂新吾呻吟語爲贈公讀實政錄喟然歎曰視國如其家視民如其身視官事如其日用飲食之事士之以天下爲己任者

當如是矣官粵東者六年歷鶴山香山新會高要揭陽諸劇邑其所施設綱舉目張輯學實政錄四卷粵中利弊興革一一見諸行事其後鉛山蔣心餘太史讀其書歎爲循吏之最紀以詩人莫不驚異公之有吏才而不知其得於學者素也公學以朱子爲宗而旁通羣書以發其蘊旣罷官居澠黔者十六載專心著述以此爲學卽以此爲教澠黔人士經公口授指畫者皆有發聞於時邊隅文風蒸蒸日上人以爲公之功公所著有四書翼註論文三十卷詩經朱傳拾遺十八卷禮記陳氏集說刪補四十七卷春秋三傳定說五十卷外又有杜詩評註集成若干卷松翠堂文集三十卷惕庵雜錄十六卷讀公之書窺公之爲學其大指以正心術爲本

以多聞見爲資以明體達用爲宗以濟人利物爲效其所論著淹
洽似王深甯而切於世務慷慨似陳同父而根極理要嘉惠來學
本經術以通吏治公雖不究其用而卓然必傳於後無疑者於是
乎在余於公爲後進總角時嘗請見於鄉塾自是不得繼見者二
十餘年請急歸里者久之公始自黔返巨人長德握手爲忘年交
公方掌教鼇峯說經鏗鏗昕夕過從獲聞緒論里黨中善舉多公
倡之輒欲引余爲助意甚惓惓乃不數年而公遽棄世老成凋謝
回首愴然此公子經邦之請銘於余以余爲知公者余固不得而
辭也公卒於乾隆庚子秋九月二十八日配薩氏有賢行 敕封
孺人先公卒側室李氏例封太孺人次何氏子男子三人長經邦

乾隆己亥科解元能世其學次經奮出爲公弟後三經遺皆業備
子女子九人嫁娶皆名族經邦以乾隆丙午夏五月十七日葬公
於福州北郊之銅盤山其地乃公所自擇者銘曰

嶷嶷張公國之羽儀佩服瓊琚咳唾珠璣對策 大廷賈董是師

玉堂珥筆泉涌颯馳出爲民牧始親吏事公曰行哉澤民吾志珊
瑚明珠海南之利人所營營公蚤唾棄彼有田疇我理我疆有隄
有圩庸固其防蠻人漁戶蠓蚬爲糧我弛厲禁波流湯湯乃籌番
舶乃止淫祀乃勸義田乃登髦士倉庾以盈鹽筴以理乃策荒政
饑不他徙公德在粵粵人所懷去粵而滇中心徘徊於黔於黔樂
育英才首邱是念頭白歸來歸來鑄人鼉峯之麓儀封漳浦寒泉

秋菊著書滿家人景芳躅胡蹶不起悲纏梁木善使可繼維其後
人鳳毛麟角文質彬彬銅盤之山公返其真我銘不誣勒此貞珉
右墓誌銘孟超然撰

自高頭講章盛行幾變秀才爲學究惕庵先生四書翼註論文一
書爲習舉業者增其見聞擴其才識較之尋常講章實爲遠勝先
生初舉鴻博後成進士入詞垣散館外用爲知縣未久不獲展其
所蘊而主滇黔書院講席前後十有六年反覆刪定乃成是書其
用心良苦其爲院長也名達九重獲邀議敘宜哉

右聽松廬文鈔張維屏撰

四書翼註論文惕庵先生自撰凡例有云講明四子書乃致知格

物第一義此書博徵百家凡天官地志國典兵機食貨律例方技
與一切雜說果於聖經源流相涉一一考證會通不特臨文者可
以開拓心胷增長筆力卽登朝服官皆有所助

右松心日錄張維屏撰

楊敦

先生姓楊氏諱敦字念齋學山其晚號也世爲陝西榆林府府谷縣人自曾祖而上皆庠生祖禹喬考端本三水訓導 贈皆如先生官妣皆孺人先生生於康熙四十五年丙戌少有異稟五歲始能言隨訓導公授經家塾過目成誦閒與諸生衍說大義雖老宿弗能難然性謹厚未嘗事口給及長益勤問學務設誠致行而不求文飾以是終其身年十七補弟子員雍正乙卯拔貢入太學當就職以母病不赴服闋舉乾隆甲子順天鄉試乙丑成進士補宗人府左學教習期滿授知縣得浙江之新城杭郡西南小邑也莅事者十有二年以疾告歸歸一年卒於里實乾隆二十七年壬午

四月十九日也春秋五十有七世之所謂用縣令起家者盛衣服飾輿馬賓客僕從相闐湊甫下車呼吏問倉穀出入幾何備公幾何稅若干額富賈若干戶吾民休戚弗及也徒欲苟且得當以給上官之求奔走之需夫如是不三年遲亦四五年簡者可謂之繁卑者可升之高上下號曰能吏能吏可爲鮮不以此先生之爲人澹泊甯靜平居一取與必權之於義及爲新城書四知於座右及呂叔簡刑戒八章以自刻厲邑故僻簡民貧糧戶多疲玩前令至下鄉躬自催徵官勞而民擾先生首罷之俗沿陋規自鹽商茶賈而下所在革未盡其歲時土物之供名曰薦新皆亟絕之邑中人文稱儉爲卜建文昌閣於城之黃山招諸生講課如任教習時

城河久淤則捐廉俸督堰長以時修濬溉附郭田歲饑平糶外復捐俸倡紳士量助賑救民賴以濟其他簿書期會事事稟諸律令以樸直行之凡上官所使令必竭誠蒞事以報將謂有所逢迎於其閒則介然勿敢安也如是在新城十有二年昔漢章帝詔安靜之吏悃悃無華先生嘗有味其言曰此吾儒本色也以故終十二年無能名從未求一調邀一薦目擊諸同列之後先騰蹕而上者若不相及諸上官往來更置何啻數輩有賢先生者有嫌且忌之者其嫌且忌求以事中之去而卒不可得久之亦知賢之然雖賢之意弗屬也於是雖欲不十有二年於新邑不可得矣然而新之人則深以爲福自庚午春先生始莅任及移疾歸橐蕭然父老相

與持酒果攀輿而送者道爲之塞皆曰失吾父母乃相謀樹額於
城隍廟之東廡以當甘棠云先生於文崇尚清鏗深惡俳麗之習
如其爲人凡六充鄉試同考官得士合三十有三皆出苦心校閱
歲庚辰八月遂得疾於闈中其歸卒也京師浙士大夫咸以先生
有古良吏風獨未竟其用爲可惜元配劉孺人繼蘇孺人有子一
人廷權女三人長適山西保德州監生徐守見次適同邑庠生王
錚孫一人毓江於是癸未秋八月廷權卜吉葬先生於府谷城西
十里沙峒之原而門下士仁和趙佑爲之表

右墓表趙佑撰

周守一

君姓周諱守一字季和分嶽其字先世淮南人明初遷萊陽高祖諱伯達進士官巡撫祀於鄉曾祖諱世祐蔭侍衛祖諱止庠生早卒祖母趙太君苦節 旌表本生祖諱正進士浦城知縣著有取此居詩古文集父諱星顯浦城公第三子歲貢生中年鰥居力學不遇著四書東軒精纂生二子君其次也生而孝友居母喪哀毀柴立率婦事祖母奉父並善承志意父以居內憂哀痛成疾侍藥餌七年如一日卒與兄盡哀禮性沈默攻苦紹家學試輒冠其曹辛酉學使按臨七試古今學俱冠十邑遂拔貢甲子舉京兆過成進士徐謁選得蜀之南部令路經梁首秦隴周觀戰耕屯牧險要

吟弔興衰故跡過落風坡酌龐士元墓賦詩蜀人及行旅騷士萬
舌傳之既之任地交秦蜀犬牙彈丸一城著亂山中井絡稀闊距
市鎮遠者墟里類不過三五戶俗呼盜爲啣嚙時縱橫出沒君躬
履郊埜練鄉勇實心編保甲村置一鼓一鼓鳴羣鼓應攢簇遮邏
啣嚙望風遁歲卻鹽井陋規千餘金示永禁絕日坐堂皇斷獄必
以情夜檢案牘斗插屋瓴不休立社倉勸種樹災賑親勘戶口飢
羸蒙實惠閱寒暑者再無市旬宴坐署廨時吏治尙强悍多交結
武弁武弁者蜀所謂海查也草履藤纏黨連莠民告密要路變亂
黑白君廉得一武弁奸發摘罷之眾海查側目欲中以奇禍不得
鱗蜚語四騰卒最强悍而殿循良改授濟南府教授不得盡其用

顧擁塞旣教士以敦品勵學監濼源書院英雋從風鍵戶勤修改
負文名自未第及需次時里居寓邸所在名公卿延設講席謝銅
章淹滯川中長官爭邀致至是濟南名士不遠五六百里負笈景
從獲雋者指不勝僂平生受當路禮聘商訂文藝無一語及私歸
然舊德之望也嘗慨然語高才生曰茲吾少時舊遊地憶與朱景
韓曾南村李秋崖諸公握管追逐謂磨礪奮發當不似今日爾也
比意氣都消素髮穆穆重與諸君作文字緣世味真如嚼蠟予來
濼席闌明勞餘山先生實學君叩生死義子舉先生遺書示之曰
人之死大聖賢精氣渾合於日星河嶽助兩大生成忠孝節義一
節克立分麗四時之氣歷久不滅常人無以自存則漸微漸泯強

梁負出者能爲厲不能久也君病甚予就問以未能揚先德悽傷
子解以時命且言晝夜之理乃起謝曰吾今願爲餘山門弟子矣
易簀時神氣清朗灑然而終乾隆辛巳八月二十九日也享年五
十有八所著詩古文辭如千卷藏於家娶張孺人庠生諱樾重女
子三勤家廬生勵家庠生勳家太學生女二孫七孫女九以某月
日葬於某原預自誌墓碣未系以歌曰土花兮碎縷耿漆燈兮悄
獨苦漏盡兮聲鐘不復爲人兮踽踽寒食過兮野棠開家人歸去
兮紙灰舞甃恨石其嶙峋兮天蒼茫而無語請孤以誌銘請卽用
其韻而銘之曰

纂紀文章窮脈縷哺乳嬰赤祛疾苦古道蒺藜行畏踣青鷺引歸

刑天舞天門
詖蕩萃古賢
往搖玉佩與款語

右墓誌銘
桑調元撰

曾光先

陳夢麒

張乾珀

王立槐

周志傳

周錫溥

曾光先字念茲湖南湘陰人乾隆乙丑進士任信豐知縣調浙江歷署餘姚山陰皆稱職 上南巡以卓異授壽昌縣旋調象山三充浙江鄉試同考官居官勤慎謝絕苞苴在象山六年卒於官士民德之從祀丹山書院同邑陳夢麒字天石乾隆戊辰進士歷任餘杭樂清知縣興教勸學發奸擿伏民稱神君 上南巡營辦大差忽盜竊温州知府某金大索不獲總督某專檄夢麒緝盜用鉤距之法捕逮數人一訊得之會兵書某以舞文竊火符遁其族弟一尉樂清一尉善化皆與夢麒善有循聲株連逮訊夢麒以百口保二人無他事遂解旋調甘肅鎮番縣攝狄道州引疾歸張乾珀

字壽南乾隆庚午舉人選江華教諭江華習近徭苗學校廢弛男
女年三十餘不婚嫁乾珀至倡修學宮魁星閣勤月課諭民以時
婚嫁俗爲之變遷武昌府教授擢兩當縣知縣兩當近山多虎終
乾珀任無虎患時用兵準回各部道經兩當供支浩繁乾珀日夕
摒擋不怠差派擾民縣民瘞像爲生祠祀之尋以命案註吏議謫
戍新疆卒於戍所王立槐字蔭庭乾隆壬申舉人有史才與兄廩
生立楷纂修縣志繼修通志爲巡撫陳宏謀所倚重歷官桂陽教
諭龍山訓導擢萬年縣知縣日坐堂皇聽訟目閱口決案無留贖
民無冤獄江西州縣吏稱廉明者推爲第一周志傳字孔贊乾隆
庚寅亞元以知縣發山東歷署金鄉榮城知縣榮城濱海番舶湊

集而例禁貨物不出洋相與徵收課稅爲私利志傳至一切陋例
悉卻罷之召諸典商諭以平值亦免其規例曰與其賂官長以累
民何如轉益民而輕取利也嘗緝盜海口獲八人訊之非盜有欲
藉以資報銷者志傳曰報銷重乎民命重乎卒釋之補費縣分校
山東鄉試旋卒費人士爇香送者萬餘人周錫溥字半帆乾隆乙
未進士授甯朔知縣縣故治甯夏府爲滿兵駐防地芻藁椿石夫
役取給於縣而縣地苦寒阡陌沙常滿霖雨偶降則淖流硝蘆麥
粟不熟科斂日殷民輒逋逃塞外其老而貧者多券其子女於客
商以取給錫溥爲緩徵徭民賴以安布政使汪志伊檄州縣問民
疾苦錫溥進甯夏操風詩八首歎曰甯朔周令可謂真知縣矣檄

攝水利同知五十七年將軍福康安征廓爾喀道出甯夏錫溥扞
圍防奸夜巡城達旦一日五鼓甯夏將軍永貴遇之城上執手歎
曰能者不當如是耶言其事於總督勒保踰年調武威縣嘗奉檄
至鄂爾多斯阿蘭郡善諸部窮邊異俗皆入歌詠以憂歸年五十
卽引疾不出著有安愚齋文集詩集祀鄉賢孫炳枝舉人諱枝進
士官岳州府教授

右傳李元度撰

顧奎光

顧奎光字星五江蘇無錫人博學多識乾隆十年進士任湖南瀘溪縣決獄無滯囹圄一空蒐攷文獻著瀘溪縣志調桑植令勸農桑修學校集諸生講學風俗爲變巡撫陳公宏謀嘗曰顧瀘溪今之元道州有詩古文集二十卷所著然疑錄春秋隨筆採入四庫全書乾隆庚午與華希閔顧棟高浦起龍同修邑志弟斗光諸生負才華著有列女樂府子敏恆進士尤工詩官蘇州教授數愉敬恂敷憲亦皆才士

右傳楊熙之撰

顧奎光無錫人乾隆中知瀘溪縣值歲歉設法救荒徵收悉除火

耗纂修縣志修葺學宮遇學人有加禮政暇輒博覽羣書日學所以補吾政之不及也調知桑植遽卒於任兩邑之人至今稱道不衰

右傳李元度撰

無錫顧先生諱奎光字星五官知縣著春秋隨筆二卷不載經文但偶有所得則錄之故名隨筆其說有出於臆度者然如謂春秋例從義起非義從例生謂春秋有達例有特筆然亦須理會大處不可苛細繳繞謂春秋時天子僅守府方伯亦失職說者乃於小國見伐責其不告不足以服其心謂春秋將以治世之無王者而胡氏於宰咺歸賵則曰貶而書名於榮叔歸含及賵則曰王不稱

天如此則無王自春秋始矣謂說春秋者自相矛盾既云爲賢者
讎又曰責賢者備既曰隱公爲攝又曰桓公爲篡何者爲是皆深
中春秋苛刻迂謬之弊故其所論多能得筆削之旨先生嘗撰然
疑錄所載說春秋諸條與此相同其爲先有此本又編於然疑錄
中或先載錄中又摘出別爲此本均不可考然疑錄頗爲瑣雜論
其菁華則已盡此兩卷中矣

右學案唐鑑輯

國朝耆獻類徵初編卷二百三十六目錄

守令二十二

趙王槐

方求義

呂肅高

鄭之僑
董思恭

申大年

劉紹濂

林明倫

朱仕琇

劉吉

曹學詩

魯成龍

秦倬

陶金諧

賴晉

靳榮藩

秦朝鈺

孫應元

李芝

林愈蕃

歐陽道瀛

簡昌瑋

龔一發

子景瀚

戚朝桂

補錄

呂肅高

朱仕琇

高爲阜

康杰

國朝耆獻類徵初編卷一百二十六

通奉大夫前署江西巡撫江西布政使司布政使湘陰李桓輯

守令二十二

趙王槐

虞山趙氏自文毅公劾張江陵奪情直聲震朝廷孫士春復以劾
楊嗣昌奪情罷黜五世孫嗣孝舉孝廉方正正在吾邑可稱爲忠孝
家汶上縣知縣趙公文毅六世孫也以名家子不肖妄自菲薄居
家服官必依於忠孝而後已於戲可謂難矣公名王槐字器梅又
號者庭其先世朱簡國公仲談子朝請大夫士鵬守江陰軍遂家
焉十四傳至松雲公實始遷常熟松雲公生參議公承謙參議公

生文毅公用賢文毅公生四川敘州太守隆美奢安之變著有勞績敘州公生 封文林郎升之公士功升之公生 封奉直大夫晴巖公世鉞晴巖公生奉政大夫乙未進士常州教授謹凡公承孝公之考也公生而警敏好學不倦寄籍宛平爲諸生舉辛酉順天鄉試榜名環惡唐相趙璟比裴延齡齟齬陸贄乃改今名乙丑取明通榜例得教諭不就丁丑赴闕待選揀發東河巡撫阿文成公命挑馬頰河三十五里工旣訖功裴文達公爲河隄使者列一等改歸地方補用歷陵縣海豐淄川益都冠縣朝城汶上治行皆有可紀其在陵縣也擒劇賊丁大旺破積匪二十餘案苦旱禱雨歲仍熟其在淄川也代輸耗銀一千五百兩民以不病邑紳

孫氏兄弟爭產訟四十年不結公有折獄才不用示以先人讓產
事迹兩造感泣交讓而退其在益都也造浮橋濟渡殛凶僧擒訟
棍戢營兵三月而翕然稱治會翦辦事起獲妖人韓某解部反以
誣良陷公公抗詞辨於政事堂得免罪然猶奪職巡撫富公畱辦
清濟被水事宜請開引河以殺其勢手胼足胝四閱月而工竣以
勞復原官恭逢 皇上東巡委攝陵縣陵有不毛地三萬八千畝
賦稅無出深爲民累力爭於上官得奏豁免時當筵宴公以小臣
預宴拜宮袍之 賜異數也其攝朝城也河決館陶縣尹病公以
他縣接辦隄防開濬勢急而多掣肘乃捐金集工如期蒞事又清
查軍田定按畝加津之法陳利弊十二條其在冠縣也大水淹沒

田廬委員勘不成災乃繪圖上請全活者無算甲午八月亂民王倫戕壽張令破陽穀蹂堂邑冠當賊衝有累卵之危公率子弟攔城守望賊起倉卒民不知兵三路行營事宜倚隻手撐撐軍書旁午筆不停綴倥偬中潛行巷陌誅逆堂內應數人民心始定賊平應紀功膺賞而顧絀於部議復補陵邑公於陵蓋三至矣民之望公如望慈父母焉其在海豐諸城汶上莅事日淺未及大有所張弛而公年幾七十矣遂告病歸公雖歸其勤於治事猶在官也增祭田修祖墓拓祠基建享堂前明許文穆贈文毅兕觥在曲阜顏氏齋重幣乞歸復桃源澗墳地之被他姓冒占者先墓在遠者祭必親往治家嚴整子孫屏息侍側肅若朝典居閒弈碁賦詩嘗得

意時或頃刻數十篇或一字未安苦吟達旦未嘗一日偃仰自適
戊午五月以末疾卒年八十歲 敕授文林郎 誥授奉直大夫
誥封奉政大夫例封朝議大夫父教授公例贈朝議大夫母花
太宜人例贈恭人配張宜人例贈恭人繼配吳宜人例封太恭人
子九人貴慈候選布政司經歷貴覽乾州直隸同知加知府銜貴
羣候選州吏目貴珩候選縣丞羣珩先公卒貴超貴安貴可貴文貴
宗皆早卒女子七人二女適士族四女早卒一女未字孫男八人
同宜候選州吏目同葵候補知縣同武爲從伯父貴鯤後同岐甲
寅副榜署無錫縣教諭候選知縣同壹候選縣佐同簡同良同槃
俱幼孫女十四人曾孫五人元湘元吉元孚元棠元成俱幼曾孫

女四人嘉慶五年庚申四月子貴慈貴覽將葬公於頂山之麓來
請銘銘曰

駿足也不試以遠不見其軼利器也不試以堅不見其銳歷八劇
縣有力必竭公牒盈前指揮倏忽萎枯以膏豺狼靡狝見險則趨
憑河用吉鉅人長德賞其才復惜其窳年未至而歸老惟先人之
志是訖頂山之陬秦坡之水長流生於是乎登嘯死於是乎敖游

右墓誌銘邵齊熊撰

方求義

余僑居江甯少所推許心雅重綺亭先生凡某所意不欲往聞先生
生在焉則必往先生噴於耳而宏於聲有所論議矩己絜人慮靡
俗之難曉也必騰其輔頰揆張叫呼如鐘撼空鶴唳天一坐傾靡
然卒歸於正樂道人之善詆媢奸頑窮極形態使人笑吃吃不能
休先生方姓名求義字綺亭以順天貢士與修 聖祖實錄成議
敘引 見得宰龍南再宰上猶年五十三乞歸七十六而卒性醇
粹任眞推誠不務張施吏民馴伏攝安遠災承宣司不許糶穀先
生愀然曰藏穀爲災災而不糶安用穀爲乃空其倉子民通牒大
府撫軍陳文恭公嘉之符他邑爲例乘舫棧車咨詢桑麻村氓嬉

嬉如其家兒度鼎彝潢治書畫真贗相屢被給不悔學道家言播
引皆賊自夸其能卒皆不讐蓋先生天倪甚和寓於物不滯於物
以故母意毋必訢訢如也今夫色莊之士肖翹其容而人望望然
去之先生不自拔飾率意姍笑而人樂從之游無他真僞之殊也
然則使先生果得長生之術以久居人間必能挽末俗以還於古
而天偏以中壽靳之此余之所以不爲先生悲爲世悲也然道家
以真人爲先仙人爲次如先生之真氣蟠塞久已加仙人一等而
又何必私形骸以拘拘哉尤敦族誼愛風雅恩其從子裕曾等如
己所生攜布衣陳古漁詩走保走將薦之制府敏恪公旣至先生
病公亦病慮負諾責乃半夜力瘵起撼敏恪公牀歌與之聽敏恪

公果以爲佳遂相與奇賞申旦其篤誠如此世居桐城高祖詹事
公拱乾移居江甯夫人何氏子四女五葬上元縣之清風鄉銘曰
不洗而耳不污不杖而老不扶不墨墨以徇俗不稜稜以誦觚形
則隨化盡矣而神則與天爲徒古人有今人無嗚呼

右墓誌銘袁枚撰

方君諱求義字綺亭桐城人也以貢士與修 實錄敘官得贛州
之龍南龍南在江右極邊與粵東接壤僻處羣山中風俗較他邑
爲淳君初至則欣然曰是足以安余之拙矣其莅官不欲以才顯
而一推其樸誠相示歷署定南安遠信豐諸縣皆有聲龍南有豪
民廖氏兄弟五人虎豹蛟龍爲名號橫行苦鄉里而官吏莫能禁

止君至則攝其渠魁至訟庭諭以利害而善遣之諸廖咸感激自奮終君之任無敢縱肆者江右素饒裕歲偶儉不以災聞而君署安遠時適值歉歲是時布政使下令擅糶倉穀無益災黎而徒飽吏胥之貪壑前令皆一遵約束不敢上請君獨喟然曰誠使賑救及一邑之民生則余雖罷黜何憾焉遂急以災狀通牒大府其勢有不糶不可者方伯初聞之愕然而大府深加獎譽且檄屬邑皆倣此施行諸屬相繼請糶其全活不可勝計然君不自以爲功德也在龍南十年有終歲不一至訟庭者囹圄之內草榛叢塞乾隆九年以葬親解任歸里旣一歲謁選補南安之上猶上猶亦江右之邊境風土約略相似而君之治上猶一如其治龍南建社倉以

備荒年勸書院以興文教暇則攜一童雜坐樵夫田父閒親訊疾苦故又別字樂巢使人之旁郡招延繪畫之士繪爲桑麻圖以自鏡也

贊曰樂巢與余家世有婣連知其素行其兄子裕曾余甥也及其弟子玉成皆幼而失怙樂巢教育之無異己子蓋其門內之行尤有人所難能者豈徒恩施一邑爲良吏已哉

右傳劉大櫨撰

呂肅高 與之僑 董思恭

呂肅高新安舉人乾隆中知長沙府省城有荒貨店囤竊賊肅高
真之法盜源以清地棍私立鼓吹行遇婚葬家分界勒索雇值肅
高計程定價居民便之修府志及明推官蔡道憲祠墓在任七年
多惠政郡人祔祀道憲祠又於郡南建專祠祀之乾隆時湖湘郡
守著聲績者又有鄭之僑潮陽進士知寶慶府修輯郡志改建濂
溪書院培補雙清六亭諸勝蹟其建書院也經費無所出之僑親
至所屬五州縣就試諸童悉屏所司供給酌諸童赴郡遠近準資
斧之半按籍勸捐一舉集事人咸樂之門人蔣士銓送以詩曰名
宦從來兼教養清才自古說沅湘祀名宦董思恭壽光進士知常

守令二十一

德府聽斷明允與武陵令翁運標以名行相砥礪公暇集火星池
招諸生講學蒞訪郡中利病終日語不及私人亦不敢以私干之

右傳李元度撰

按呂公乾隆十一年任長沙知府

申大年 劉紹濂

申大年字鶴圃湖南祁陽人乾隆丁卯鄉試第二考取方略館謄錄補翰林院待詔升刑部司員十餘年恪勤厥職晉秩郎中記名以御史用補邵武府知府邵爲閩之邊徼土瘠民貧俗繁訟獄大年至郡悉罷苛政勉僚屬以清惠以病歸攀轅送者塞道橐中惟書數卷琴一張而已著有聽雨廬詩文集同科副榜有劉紹濂字景周澉浦人幼穎慧讀書日數行下經史百家靡不該貫童子試督學閱其文中有十餘字音義弗能識以文甚奧衍姑置榜末覆試時詢之紹濂博舉以對督學驚異之知廣西奉議州事有清操以事謫戍烏魯木齊 高宗八旬萬壽駐防將軍某上賀表

國朝三才集卷之三十一
詔褒讚之後知紹濂所爲乃復職 賜環道卒所著省齋心吟老
莊別言檀弓庖廚性理粹言輪臺偶拾以遷謫多散佚者

右傳李元度撰

林明倫

林君穆庵卒之明年其弟明佐迎喪來京師請其同年友朱珪爲之狀且請銘以歸誌其墓珪惟不能爲古文辭懼不足以表吾穆庵而義又不可辭乃以狀屬之家兄竹君而珪誌之君姓林氏諱明倫穆庵其號也先世自漳浦遷廣東之始興傳十世爲君祖先瑋 貽贈儒林郎翰林院庶吉士加一級生高品君之父也 封儒林郎翰林院庶吉士加一級君少好學初授左氏傳輒以意首尾聯綴之作數十大篇以觀其文章事跡之終始蓋已有志於爲古文乾隆十二年君年二十有五舉於鄉明年成進士改庶吉士時同年官翰林者建甯朱仕琇業古文君居館中日與之劇礮以

爲揚雄韓愈復出不易也居三年仕琇外授去君獨深思古文所以明道不獨有得也時其心所可者與之言不則噤然同年安平陳慶升金匱秦朝鈺兩人最心折之而珪好與之辨論穆庵不拒也十七年冬授編修明年記名以御史用秋奉 命主山東鄉試時仕琇以夏津令充同考官以故所錄文往往有古法十九年夏出知衢州府君之治衢也決然以教化爲必可行以禮一民之吉凶賓祭不得妄有期會衢俗婚則招搖飶於道誇豐嗇相關喪事以布帛賄弔客梵唄闌鋤歲春秋奔走輳九華媚神求福禱者皆一切厲禁之修正誼書院閒則至講堂進諸生而牖之曰士民之倡也太守士之師也士而不學學而悖乎聖賢之志者太守恥

之初眾未信久而翕然曰太守愛我太守賢終其任罷去迄今衡
之人必曰林太守賢歲旱君爲文禱於仙霞嶺及所爲石將軍者
曰知府有罪旱魃殛我無虐我民已而果雨郡或有雨雹災則親
徧視鄉縣計畝戶上報無漏嗚呼君所爲盡心於教化誠於愛民
者歟然君性介而多恥見上官則訥貌不似能吏二十一年冬遂
以才力不及奏罷去例降調者當引 見其明年秋來京師君舊
有咳血疾至則病甚遂卒前卒之日珪往奉其帷視之張目曰死
矣命也無他言顧其僕下帷若不忍視予者嗚呼可傷也已明日
五更珪當朝別去朝罷趨而往哭之於牀蓋君夜半死矣君初來
時珪夢獨騎而過君至門則聞君死入哭之君蹶然生瞪目視予

珪心惡之是日也珪急獨騎而往哭君視之瞪目如夢翌夜珪手
斂君祝之終不瞑嗚呼可哀也矣貧無以治喪發其裝官翰林時
敝衣數襲而已守三年乃不增一衣嗚呼若君者可謂廉矣君來
時珪固索觀其文許諾未出示予比君死而得盡讀之然後知君
之於文幾於道不悖於古也君卒一月而仕琇以改教來京師刻
其古文朝鈔爲之傳君深目而削下多眉鬚廉靜猥潔勇於自任
於道未知其所至然其志決不爲僞君之言曰行百里者至則倦
焉非劬也志在百里行千里者未至則不止焉非勅也志在千里
然則君所謂有千里之志者惜乎其死也君生於雍正元年癸卯
七月十一日卯時卒於乾隆二十二年丁丑十月十五日某時年

三十有五娶張恭人生子落涓涓爲君弟明回後女子一君著有
學庸通解讀書通言古文詩制義若干卷將以某年月日葬於某
所銘曰

孰強其志而弱其躬膏於厥年聞道則豐死而克存視此幽宮

右墓誌銘朱珪撰

林明倫號穆庵始興人乾隆丁卯進士由翰林薦御史未及用出
爲浙江衢州府知府在任三年失上官意降調隨例入京未引

見卒年三十五先生在翰林六年慨然有志於聖賢之學於義利
之介確乎如黑白不可淆其守衢州也以安靜爲治吏民敬而愛
之及卒同年朱文正公秦帖齋農部收拾其遺書擇其可存者錄

之朱梅崖先生爲之序曰穆庵好韓子之書時學爲之已而謂非其至也因上窺性與天道之旨而反覆於宋五子之訓旣三年有得於心不能自言其樂亟欲同之於人又曰穆庵性廉靜寡欲故其才常全日叩而有所啟先生所刻遺文皆梅崖先生評定惜版已無存

右嶺南文鈔小傳陳在謙撰

朱仕琇

朱仕琇福建甯縣人年十五補諸生博通經傳諸子從南豐汪世麟學爲古文嘗代作書求文於副都御史雷鉉鉉歎爲瀟古沖澹近古大家旣而知出自仕琇亟稱之名遂著乾隆十三年成進士改庶吉士十六年散館以知縣用選山東夏津縣緣足疾改福甯府教授歸主講鼇峯書院者十年年六十六卒仕琇治古文自晚唐以迄元明百餘家究悉其利病而一以荀況司馬遷韓愈爲大宗嘗與人論文云經濟其源史覈其情諸子通其指文選辭賦博其趣左氏太史勁其體孟荀揚韓正其義柳歐以下諸子參其同異汎濫元明近世以極其變歸諸心得以保其真要諸久遠以

俟其化又云爲文在先高其志使其心有以自置則吾心古人之
心也以觀古人之言猶吾言也然後辨其是非焉察其盈虧焉究
其誠僞焉定其高下焉如黑白之判於前矣於是順其節次焉還
其訓詁焉沈潛其義蘊焉調和其心氣焉久則自然合之又久則
變化生之於是文之高也如累土之成臺如鴻漸之在天有莫知
其所以然者仕琇與大興朱筠朱珪兄弟相友善筠推其文謂足
成名一家著有梅崖文集三十卷外集八卷

右 國史館本傳

建甯朱先生諱仕琇字梅崖雷翠庭先生序其文集曰余之知梅
崖自其爲諸生時始梅崖之族人投書求余爲其母節孝傳尺幅

中皆涵古冲澹之氣余心異之已而知其出自梅崖越數年遂發
解成進士入史館當是時天下人無不知有梅崖者名公卿咸刮
目焉梅崖落落自如旣而改爲縣令其落落如故遂改教職以歸
余別梅崖八九年其貌加豐容加晬益和以平乃歎向之知梅崖
猶淺也梅崖承先世詩書之澤胸中所浸灌無勢利之見兄弟朋
友所切劘皆超然遠於俗歸而有母可事兄弟友朋唱和之樂山
林池館又足以遂遊息梅崖挾其所有視世之奔走風塵惴惴恐
失意如桎梏之在身甯肯以彼易此哉其文章不爲炳炳烺烺以
動人視聽所謂涵古冲澹者嗜之久而彌篤其所自得蓋在文字
之外然則世之知梅崖者毋涉乎淺而不旣其深也其兄弟友朋

以梅崖集付梓人屬序於余余鹵莽言之如此

右學案唐鑑輯

文貴溫醇隱厚有儒者氣象然執董劉曾以一古今才人之手
筆則非通人余曩愛賈馬縉愛韓蘇終愛侯魏已而頗嫌其奔放
於是參其變於道園震川遵巖堯峯諸家然而或失之平直或失
之冗俚覺漢宋之溫醇隱厚究不如此近人有推竹垞望溪爲
本朝第一者而又拘謹太過未臻極境乃嘆此道綦難數年不敢
爲一字旣而思溫醇者莫如孟子董劉曾其次也而七篇之內
英氣甚多然後知人各有才文各成是非惟賈馬韓蘇卓絕萬古
卽侯魏之才力亦足翹然於作者之林而未易追逐彼執董劉歐

曾以一古今才人之手筆者果非通人之論也乾隆嘉慶之中以古文顯天下者閩有朱梅崖浙有全謝山袁子才上下江有姚姬傳惲子居姚出於望溪全袁惲亦尊望溪獨梅崖病其膚淺竊謂望溪之文揭經之心割子之腴據程朱之義理以行馬韓曾王之法度可謂品格最高駕元明而上之矣然而未臻極境者則以中年以後專力注經爲萬季野所誤也而梅崖乃以爲膚淺則是梅崖之文直接馬韓曾王矣然卽直接馬韓曾王之體而馬韓曾王之理尙遜望溪之深醇乃今觀其集佳者祇似震川遵巖較望溪之雅潔殊未能逮而乃以望溪爲膚淺乎且梅崖之所最尊者揚雄韓李所不屑爲者東坡勺庭蓋以二人議論馳騁無儒者溫醇

之氣象也乃今觀其集則以艱澀之字句文庸淺之意義恐勺庭
有知又不屑爲梅崖矣而況於東坡乎吾觀宋之柳仲塗文最艱
澀然仲塗有言曰古文者非在詞澀言苦使人難讀誦之也在於
古其理高其意隨言長短應變作制同古人之行事是謂古文而
梅崖乃徒以艱澀學揚雄則其以庸淺目望溪宜矣第恐董劉歐
曾不願有此深醇之儒者也

右書梅崖文集後尙銘撰

劉吉

公姓劉氏諱吉本諱垚字方咨號讓庵別號雪厓世爲天津南皮人祖諱榛配黃丈夫子六人公考第四諱發配黃祖父母父母皆以公貴公下有三弟壺仕志成進士先卒公爲封公冢子乾隆戊辰進士歷任江南霍邱陝西武功知縣引疾歸又十二年而沒余與公鄉會同榜居鄰郡願未稔其生平庚子夏其孤啟祥走數百里來京詣余稽顙求所以永諸幽者且以余女夫張汴城書爲之先余反覆其狀而歎曰嗟乎公於法應銘其宦跡行誼載之家乘可矣公純孝人也公自孩提至宦成一舉足而不敢忘父母兩之官皆聚百里之歡心以迎養惟日不足其在武功封公老思歸

公亦解官歸遂絕意仕進日夜謀所以娛親者稚累之事必親之
身猶孺子也季弟先沒公惟恐傷封公心百計排釋多聚親友談
笑夜則口唱鼓詞佐酒至夜分不寐數年如一日啟祥狀云古有
以善居喪爲孝者縱竭誠盡慎而親不逮孝之餘事耳公之過人
尤在善侍親疾同邑觀察兼山張公素敬公爲人以女妻其子故
汴城爲啟祥妻弟能言其詳公侍封公疾不解帶封公素患哮喘
穢其痰涎公恆以袖承密吞之使不見痕此其一節耳自戊子至
庚寅三年之間封公病無苦宗黨見聞以爲固然忘其爲在籍之
官人也汴城書云嗚呼是可銘也已公卒於乾隆四十四年己亥
六月八日距生於康熙五十四年乙未十月五日壽六十有五由

廩生中式乾隆甲子舉人戊辰進士初任江南霍邱縣知縣聖誤
解任復起試用陝西護潼關撫民廳篆題投武功縣知縣加三級
例授文林郎配湯孺人男一啟祥廩膳生娶同邑張氏再娶鹽山
韓氏孫男一有邵聘同邑張氏公後封公九年而沒是年母黃太
宜人亦沒以某月某日隨母氏太宜人葬於某原銘曰

嗚呼孝子謂古孰與偕兮余其徵諸史謂今孰與倫兮余其詢諸
里巍科廩仕兮匪以爲身榮厚誼高行兮匪以爲觀美嗚呼孝子
余銘斯人余穎有泚

右墓誌銘李中簡撰

THE UNIVERSITY OF CHICAGO

131

161-726

曹學詩

乾隆癸巳孟夏震亭先生既歿之三月其冢孫孝廉守浙江甯波府同知榜暨季子邑生頤以先生全集版燬重刻嘗屬序於余爰具狀以告曰生爲序死爲傳先志也敢請嗟乎先生歿而老成典型亡矣如後學何敢不紀實以爲來者告乃不辭而爲之傳曰先生姓曹氏名學詩字以南震亭其號也歛之榕村人康熙辛卯年十五補學官弟子雍正乙巳食餼己酉舉於鄉壬子以貢士分校湖北鄉試是年計偕入都初先生十有二歲作黃山賦一時手寫口熟以徧傳達京師聲動朝列洎所著香屑集出人爭購爲枕中鴻寶四五十年閒言風雅者必以先生爲宗當先生之初入都

也諸公卿咸以第一人擬先生爭欲客先生先生厭苦之至是則
徑入西山中讀書僧舍匿不以其名聞桐城相國張文和公知之
屬先生友招徠不應三反乃強起謁相國於澄懷園爲作澄懷園
賦己而 詔開大科相國來起先生先生以博學名實難副辭自
後連上春官輒報罷乾隆戊辰成進士出試爲令守湖北之西陵
西陵多盜前令坐是免至則不旬日獲其魁旋眞授崇陽令首讞
盜妻者宋某事論宋而以妻還其故夫完鏡歌所爲作也崇陽天
寶初始開山洞建治地多山泉故治田者必先治水宋張公詠爲
邑令營築白泉山引水灌田而泉之出龍頭青山紫龜三巖者農
資其利公相視高下開築塘堰民皆便之其在縣東石硯陂者明

洪武嘉靖間嘗修復之餘漸廢沒今城東下津渡孔塘堰猶宋遺址也先生首卽其處按行循跡輦木伐石瀦流疏壅備旱潦蓄洩灌注因利禦災石田以腴千頃倍穫於是農民各治塘堰不督以勸水利畢興而縣之諸水並匯而入於雋水城西北隅有大阪堰獨當其衝故易崩架黠者歲斂民金錢以築築則故爲庫薄疎漏以速其壞因緣爲奸利至是亦成且固以久自是邑無荒田地僻俗陋士鮮辨聲韻者先生建桃溪書院以課士而身爲之師期年士皆能詩時大吏言賢吏者必首先生敕羣吏曰若爲治不必師古其師曹令自制府而下以使來乞先生文者趾踵填接先生濡筆應之率不稽晷刻而於公無廢事三年以母喪襍被歸久之家

益貧或勸之仕先生曰吾向者徒以有老母在也遂不復出居鄉
凡二十二年卒壽七十有七先生生平於書無所不窺而尤邃於
易吉凶進退身之心之自言嘗坐蒲團參悟得二十一史都在卦
爻象中晚年欲以史注經惜未成書而卒

論曰先生方童子時能立堂上與縣官抗爭立脫其族被誣殺人
者於死其膽識宜可勝國家大任者學又足以充之而竟以卑宦
終嗚呼世無不知有先生先生故未嘗許其知也先生其深於易
者歟

右傳鄭虎文撰

魯成龍

魯氏自宋循吏有開之子孫由江南亳州遷居江西之南豐其後有曰佐文者復由南豐遷居新城之中田里於是新城之中田有魯氏魯氏之處中田世讀書敦禮讓泊明之中晚歷時既久族漸繁士遂多有聲庠序閒其出而仕者忠義之節德義之著皆卓然有以自立入國朝而益顯科第仕宦相屬若雲崖先生其一也先生諱成龍字在田雲崖其號也先生幼讀書穎異年十六爲諸生二十而舉乾隆辛酉鄉試閱八年爲歲之戊辰成進士又九年選授直隸懷柔縣知縣任五年調繁棗強又二年丁母憂歸服闋補河南永甯縣在永甯二年卒於任年僅四十有六先生既早得

國朝書局影印 卷之三十三
科第其自往來公車及通籍後與四方賢士大夫遊益讀書好觀
史事以爲此有用之學也性復勤敏遇事能決無畱滯故其居官
大吏多稱其能然未嘗或失大體初任懷柔地小而衝爲 皇上
歲幸熱河駐蹕之地先生辦理 大差民不知擾嘗卒遇大水衝
橋梁鄰邑恐無以卒辦大吏並委先生代辦焉京北土多瘠懷柔
尤有人滿之患旗民雜處食常不足且多火災先生勸民積穀每
二十五里設倉一所而荒歉有備其救火之法則設爲木籌每火
起輒攜至火廠諭令斯民運水互相救應每運水一次則給一籌
火止繳籌因其多寡而給犒賞焉其鄰里不相救者有罰自是懷
柔火不能災前明戶部主事成介愍公其邑人也國變時闔門殉

難先生爲表其墓復訪其後裔僅有一旁支子孫撫於人先生爲贖回捐俸百金爲之婚娶資膏火送入義學俾奉公祀此皆先生爲政之要務也至如遇歲祲不待請命而發粟出借繼乃詳其所以民有積欠不能償者則捐俸爲之代償此則民之所以歌誦不置而大吏羣以爲能者矣其任棗強也邑稱富庶而多盜賊先生嚴飭捕役巡緝之盜相戒無犯魯公境任永甯也俗多輕生女子尤甚每婦姑不相悅則卑幼自戕先生諭以尊卑之等教民孝敬而其風漸息有孤子無禮於叔父者其叔父欲寘之法訴於前令前令未忍也先生至復訴之先生曰以卑犯尊固當重法然爾兄止一子爾竟忍耶立召孤子嚴設刑具待之其叔父泣以請曰如

此無以見兄於地下矣先生乃薄予懲創誨諭之遂爲叔姪如初
先生之以至性動人如此先生爲政暇則與邑人士講論文藝邑
有書院必加意培植其於節孝忠義諸祠皆修舉無缺以爲此風
教所繫也嗚呼後世之士儉情苟且妄以爲讀書無益於治及事
至每不知所措若先生之所以爲政者非有得於讀書之功乎先
生生於康熙六十一年六月初三日卒於乾隆三十二年十月十
八日曾祖時化國學生 封中憲大夫祖朝用國學生捐授知縣
康熙四十四年山東饑應募以己財振濟泰安州饑民數千口奉
旨議敘候選知州未任而卒乾隆二十六年以先生任棗強

貽贈文林郎父然國學生 封文林郎母孔氏 封孺人配楊孺

人後先生七年卒子四人書訓國學生書鼎書紳書秀孫幾人先生居家篤於倫理與同母弟友愛無閒及孔太孺人沒繼母劉復舉一子先生在永甯聞之甚喜卽欲分俸爲之置產未及而卒楊孺人竟爲終其志焉今諸孤奉先生柩與楊孺人合葬屬仕驥爲之銘銘曰

才生於天耶亦資於古學爲有用庶幾不辱其祖繫世代之遷遙後來者甯不思所以自處耶

右墓誌銘魯仕驥撰

世傳子用美名子系
卷二百三十一

三

秦倬

秦倬字天采寶山人乾隆十三年進士選雲南江川知縣畱心民事抵任後陳於上司云查江邑賦役全書載民屯田地五百二十九頃七十一畝每年額收條丁差發漁課溝課鈔銀一千八百三兩秋米一千五百七十六石九斗地土出產南豆大小麥苦甜蕎水稻穀目下雨水充盈田禾暢茂某督其勤於芸耨以期秋成豐稔常平倉存穀八千四百九十四石零某奉文出借乏食農民穀二千五百四十七石已於五月二十九日開倉均勻借給民食有資而各社倉存穀三千五百六十石五斗前署令已於春仲具報出借二千二十二石七斗以濟籽種見存一千五百三十九石八

斗加謹收貯無虧惟水利民生最關緊要縣轄如海西鄉地勢低窪卽西山鄉亦時慮河隄衝決應令農民隨時疏導修堵近城田畝惟賴東西二河緣河高田低易於衝壓前經設立壩頭巡查擬於農隙時督夫修隄又舊有官溝一道引水入城灌西北一帶田畝亦擬修濬再查海門橋爲星雲河洩水要口一有淤塞則縣屬古城海西雙龍等鄉並甯州虛于鄉每多水患亦應督夫疏修以興水利至於士習民風向稱刁而好訟某到任後據法懲創詞狀漸少勉爲良善他如弭盜賊戒游惰靖地方而安民生尤某分內之事敢不黽勉供職保甲議云江川一邑在晉甯昆陽河陽新興甯州通海河西之間係近省腹裏地方無深山大箐亦無銅鉛等

廠幅員褊小分爲十鄉每鄉各設鄉約一人其保正視村落遠近
人戶疎密爲差多寡不等如榮富甸頭牛摩西山海西古城上下
雙龍普妙等九鄉皆漢人所居惟九寨一鄉盡屬猺夷無土司管
轄被化既久夷風漸變保正之法在在可行是以諭令鄉保將各
村人戶男婦丁口作何生業並同居親屬雇工姓名按照門冊詳
細開報每戶給門牌一面卽照開報人數填載十戶編爲一甲另
給一牌其甲長按月輪當平時則稽查出入失事則分別懲勸甲
內之孤寡廢疾一體編查免充甲長畸零人戶附於甲末該鄉所
設約保悉仍其舊按年更替諭令各就所管不時稽查勿許通同
容隱戶口如有增減於歲底報明換給門牌不必拘定十甲聯爲

十保之例仍於因公下鄉之便畱心訪察務期奸匪難容地方甯
謐門牌所需紙張在官捐辦以省擾累至於九寨一鄉每村大者
數十戶小者十餘戶各有火頭一人催糧辦公按年自行輪替其
每戶各給門牌與各鄉相同每村只須給一總牌卽以稽查約束
責之該村火頭並該鄉約保正毋庸另編甲長更爲簡便又申飭
士子云江川僻處遐方書多未見十三經二十二史有至老不識
其名目者於此而欲求奇才異能之士勢必不能士儻潛心攻苦
日取經史讀之自可開拓心胸讀書之法經爲主史副之十三經
闕一卽如手足之不備而不可以成人者也至於史則先史記次
前後漢書此三史者亦闕一不可且善讀史者不僅以史視史凡

詔誥奏疏檄論策之屬文之祖也樂章歌辭之屬詩歌之祖也
屈原賈誼司馬相如揚雄等傳所載騷賦詞賦之祖也故熟於三
史則文詩騷賦一以貫之矣必待讀經畢而後讀史則史學太遲
須讀左傳以史記副之讀公穀儀禮周官爾雅以前後漢書副之
此外如國語國策離騷文選老莊荀列管韓以及漢唐宋元之文
集與三國志以下諸史擇其尤精粹者讀之然後反求其本出言
爲經術行事爲經濟夫而後可以爲國家得人此縣令之兢兢爲
諸生望者也其篤於教士如此知府李承鄴由蔭生部郎以賞出
爲澱江知府行查倉庫因供億不豐銜之遂言其才力不足總督
恆文劾罷之比去任同官釀銀爲助乃得歸歸六年而卒年七十

餘倬嗜讀書自記平時所讀一萬三千一百九十三卷內記憶者
八千餘卷著有三餘前後集一百三十卷惜無傳之者

右傳王昶撰

陶金諧

邑侯陶適齋去澈五十餘年父老談侯遺事未嘗不歎歎也邑地
庶民刁豪猾者能刺令長短魚肉里閭侯弱冠成進士釋褐宰此
邑胥吏初以年少輕之侯發奸撻伏如神慙強豪不少貸老奸巨
猾皆震懼不敢入城市或逸至他邑侯雖政尙嚴猛然其心一以
仁義爲主先是徐侯堂者亦賢令也勅盧峯書院甫始事而去侯
繼成之闢學舍置膳田日晡則幅巾詣院爲諸生講論以爲常凡
邑士從侯遊者其詩文具有法度侯之治尤以崇禮節成風俗爲
先凡孝子節婦廉得其實必力請而旌之或格於功令終加禮焉
或因事至閭閻必訪潔修老儒優待之以示風厲遇父老停輿訊

農桑事津津不倦侯既治激久政成民信訟獄稀少盜賊絕迹金
激志舊殘缺無以備稽考於是作新志廣搜博採手自著定體大
思精無媿古作者激多稻田賴水利以種爭壩爭塘訟尤多爲詳
定章程繪圖於志某壩灌某處田若干畝某塘灌某處田若干畝
條分縷晰觀之燎如指掌至今斷讞咸取則焉邑有劉姓狂人誣
其族先升等十九人謀不軌訐訟川督督以 聞調大兵勦之事
機密諸軍已抵郡始諭侯侯聞卽上狀中丞以百口保劉姓無反
狀乞止兵星夜抵劉居諭先升等無恐吾保汝皆良民決無害悉
逮於中丞所就訊時獄內有二人者遠備於外中丞令行文捕之
侯曰無庸諭之卽當來也其後卒隨諭自至事旣白皆釋歸中丞

嘆曰吾不意陶令之得民如此也是時也徵侯邑幾糜於兵中丞者桂林相陳公宏謀也侯性剛無所阿凡非法採辦皆引法抗爭不苟從政聲聞湖湘聞例得晉秩吏索其賄侯不與率遷江華以去民扶老攜幼送之數十里咸哭泣不忍捨鳩費爲生祠後格於功令毀之然民猶私祭於家云侯長於詩格律高雄有盛唐人風味稱侯之才宜登館閣守封疆屈宰下邑豈侯志哉然勤於治不鄙夷吾民也民食其德而謳歌俎豆數十年不絕固宜相侯治績其兼漢循吏能吏之長乎侯姓陶氏名金諧江西南城人

右紀略嚴如煜撰

南城陶公適齋名金諧當乾隆中以進士宰吾潯外嚴而內慈去

殘舉墜善政不可枚數去今將百年婦女兒童莫不知其賢而以
予聞諸長者則尤異其拒大兵保劉姓無反狀一事先是邑之某
鄉有劉某者妄人也病狂逾年閒至川值川督簡閱軍容甚壯某
於營外佯笑縛之詢以故某曰是何足道如吾鄉族人某兵若干
馬若干始足威也川督以其語聞時西南諸逆將次削平朝
廷方以兵威懾伏夷夏特旨命湖南巡撫陳宏謀調兵往勦事
機祕密師抵郡始檄公知時公方夜半自鄉歸將投枕捧檄大驚
易草屨急馳百餘里抵軍前跪挽中丞馬首力保劉姓無不軌事
中丞曰上意嚴切設其言實汝一身能自任耶公持益力願以
親屬十餘口下獄爲質自往招劉姓兄弟數人至軍訊詰事解歸

旋生瘞劉某以徇邑人感之其爲生祠格於例不行後公遷江華去老幼涕泣送者數萬人詩云豈弟君子民之父母古之循良生有德於民死可祭於社如公者殆其人哉殆其人哉

右記事舒肅撰

按陶公乾隆戊辰進士

賴晉

君諱晉字晝人姓賴氏唐貞觀時始祖蓀公由甯都徙居廣昌驛前村傳三十餘世至日開公移居石城長樂村君祖考也君生而幼慧十齡能屬文母憂其勤學君輒俟母酣寢起篝鐙默誦塾距家六十里母病輒心動走歸人謂有曾參蔡順風年十五應縣試立草十藝名冠一邑補鄉學生越六載受室奉兩親歸驛前舊宅乾隆甲子舉於鄉戊辰成進士先後執親喪如禮服官後每以祿養弗及爲泣純孝也丁丑宰安東在任五十三日賑災黎三十餘萬戶官與民日處泥濘中無流亡者遷鎮洋絕巨室請託育士卹民稱善治憫不葬惡風乃擇地立義冢於是野樁俱入土且嚴焚

豁之禁薄俗頓革又率夫役二十萬濬劉河六十里經營相度三月而竣田廬永奠者千萬戶民閒尸祝之大吏嘉其能又詳請豁免蘆課積欠中丞陳公宏謀據以入告竟得 允兩辦 南巡名勝欽工及水驛夫役皆受 上賞再膺特薦稱循吏丙戌擢貴州永甯牧入 覲名書 御屏及抵任撫綏苗犵感孚甯帖時軍行旁午君駐驛二載餘露處戎馬閒輒歷數夕旋奉檄往覈威甯銅廠代領驛站者以疎忽註議得鐫級调用泊如也君爲政待人以誠信自矢在安東日甯國人以遺金投訟饑民張子文持金赴縣還君異而詰之對曰官不欺民民敢貪得以玷官政耶在鎮洋日僚吏具謗書密讒於陳公宏謀陳公舉某問君何如對曰老吏也

晉賓師之凡三問荅如故既而某落職去陳公出簡示曰令誠長者使吾信讒人令去久矣君頓首謝且以守官自勵其盛德又如此壬辰開復謁選得濱州以疾卒京邸年方五十又六卿大夫咸以不克竟用爲悼云君嗜學工著作所撰古文四卷詩十二卷帖括文三百餘首在官紀事十卷己卯乙酉兩充江南鄉試同考官得知名士最多其貧不能計偕者輒厚資之子三人仲邦本庚寅中乙科能繼君文學是有子也

太史氏曰政能澤枯骨其心仁矣韓琦知并州禁羌夷火葬買田樹表以瘞范堯夫知太原收無主燼骨別男女異穴以葬他如劉仁軌葬合境殘骨范同請禁民間火化黃震乞免再建化人亭皆

有合周官蜡氏所掌若劉炬閻憲卽餘慶楊簡輩作縣皆路不拾遺卽災治河爲民尸祝者又不可備舉賴君恂恂儒者三守其土而設施兼有焉雖年不及中壽而其績千古於戲官能腐人豈其然哉

右傳蔣士銓撰

靳榮藩

乾隆甲辰春珪扈從 南巡道出河間晤同年大名守靳君執手而歎曰噫君蒼髯盈頰矣蓋自戊辰以來三十七年同榜在者中外落落不數人及秋而君卒於官明年春其子師儉走京師泣請子銘予既悲同人之益稀而賢守之不竟其澤也不可以辭君諱榮藩字价人號綠溪靳姓山西黎城人上世由洪洞來遷高祖妣張及其婦喬孫婦王三世俱婺號靳門三節君祖綺府學生考尙端雍正甲辰舉人官浦江令忻州學正以君官俱 誥封奉政大夫例贈朝議大夫妣溫繼妣盛 誥贈宜人例贈恭人君生左手無名指有附枝穎而嗜學年十七試縣府皆冠其曹爲諸生十九

舉乾隆甲子鄉試乙丑中會試明通榜戊辰成進士辛未丁父憂
丁丑選廣東瓊山縣以母老改河南新蔡時河南歲祲君到官卽
究心荒政賑貸必誠民以蘇己卯分校鄉試是年珪主試事與君
其所夕者竟月有司坐堂皇判決惟意騁輿騶謁戟門一入瑣闥
列坐據案擣藍點赤字暈苦欲睡予時覘君於衡校縵而察所乙
卷無枉歎君之學優而心下之其治民之良也庚辰再與分校後
以母憂歸旣葬置祭田以祠其宗服除乙酉授直隸龍門縣戊子
調遷安均車徭爲旗三民七之制己丑升蔚州知州建文蔚書院
以教士州西二十五里曰暖泉堡其南灘磧夏秋水漲注匯廣
靈滙夷之川盪析田廬歲爲患舊築土壩輒堦君行相度易以石

爲丈三百一十高九尺有奇首尾綴之土壩州人美之曰此靳公隄也君不居易之曰保障戍戍擢知遵化直隸州癸卯授大名府知府 上知君能其官嚮用矣未期月而病以卒君自縣歷州郡官於畿者二十年所在民安之去而思能以經術文教佐治而本之忠愨庶幾有惻愍遺意持身儉素仕不怠學所著吳詩集覽四十卷綠溪詩古文雜著若干種生雍正丙午年三月二十五日丑時卒乾隆甲辰年八月十九日巳時年五十有九配劉恭人側室任生子一師儉附監生某年月日葬於某銘曰
學之塵吏則循穀於其身以庇而後昆

右墓誌銘朱珪撰

秦朝鈺 鄒應元

秦朝鈺字大樽江蘇金匱人乾隆十三年進士由禮部郎中出爲
楚雄知府朝鈺曾無柴棘吶於口而丰裁峻厲人不可干以私官
楚雄日屬有兵事朝鈺辦治井井兵過而民不知一日巡撫過境
朝鈺方讀書廨中之山亭迨終卷出城不及趨謁巡撫聞其賢亦
不怪也繼以左遷歸朝鈺工於詩其集顧光旭刻之尤善治古文
多可傳者又無錫鄒應元字清源乾隆十六年進士授武甯知縣
累遷至杭州知府所至皆有遺愛特調臺灣府知府臺灣懸隔大
海應元甫至賊匪黃教聚黨數千人謀爲逆應元出金募健兒三
百人勦捕之得其死力縛其渠誅之賊遂平凡在臺灣六年以病

免歸

右傳秦滅撰

李芝 林愈著

李芝字瑞五號吉山富順人乾隆戊辰進士官山東招遠縣知縣
吉山才思敏捷爲文一日能成數藝或謂其能知前生事者初官
山左繼令楚北歷著循聲詩五古初學大謝後入韋柳五律初學
少陵後入王孟佳句如亂水晴邊渡夕陽雨外山水流崖腳瘦煙
幕樹頭肥地闔天垂草江平樹入雲綠睡鶯邊柳紅酣燕外花月
痕穿浪出露氣入空無鶴語松煙白龍吟海氣青月明人在水風
過柳先秋野店收殘雨漁歌帶夕陽皆平淡清遠漸近自然可傳
也

右 國朝全蜀詩鈔小傳孫桐生撰

林愈蕃

林愈蕃字淵松號青山中江人乾隆辛未進士官湖南鄱縣著有
青山堂集青山學問淵深操履篤實宰洙泉以德化民沒後崇祀
鄉賢詩多學道語其佳句如細竹翻幽鳥輕風濺落花斷雲移遠
岫春雪點寒風膏肓有患須砭骨性命無權枉問天白傳何曾知
米價鄧通應悔慢錢神俱能獨出新意

右 國朝全蜀詩鈔小傳孫桐生撰

歐陽道瀛 簡昌璘

歐陽道瀛湖南邵陽人乾隆戊辰舉人嘉慶初揀發雲南知縣攝
馬龍知州向例官至民間競饋麥豆獨卻不受曰吾豈以貧乏仰
食蚩蚩者哉地獐夷雜處種性樸拙與民訟數受枉抑道瀛竟直
獐獐麟以千金譴還之調署元江運京銅上銅政十則皆可措行
充辛酉鄉試同考官久之補恩安有土豪倚哈險抄掠爲民害單
馳往諭豪懾服不爲暴卒官所莅邑多祠祀之同邑簡昌璘乾隆
丁丑進士授吏部主事歷稽勳考功司員外郎保擢御史引見
用知府部尙書以其諳習章典奏留之升考功郎中旋降戶部主
事充廣東鄉試主考官再充順天鄉試同考官揀發四川用直隸

知州會金川用兵奉檄治餉餽兼應給甘肅沃日美諾諸軍站事
皆辦金川平調署貴州貴陽府長砦同知以疾歸昌璘清介毫無
所私在部曹論列某侍講題彙不合侍郎某意不謂然正色力爭
坐是降調尤爲公論所與云

右傳李元度撰

龔一發 子景瀚

龔一發福建閩縣人乾隆十五年舉人十七年揀選知縣分發河南署宜陽縣知縣調署密縣善發擿奸伏以法制豪強卒使悔悟樂爲善良十八年補林縣引泉源溉田爲永惠諸渠縣有兄弟爭產者挾母訟一發坐其母於庭譬解之皆呼母泣請無竟訟二十二年調虞城縣歸德水溢虞罹患尤甚一發覈戶口清囚繫去奸竄禁盜賊難民以安修惠民永便諸河以工代賑饑民持畚鍤者相望一發日循河干與其勞苦復捐資修縣城葺橋梁毀三教堂爲義學冊建書院給諸生廩餼身爲之師江南山東有蝗虞介其中獨不入境二十九年以疾去官三十年病痊引見以知縣赴

直隸候補丁母憂三十四年服闋歷署平山元城縣知縣補高陽縣所至有聲三十六年升雲南鎮南州知州三十八年卒官入祀虞城名宦祠

右 國史館本傳

君諱一發字某一字厚齋世居閩縣其先系出宋參知政事文莊公茂良入明有爲翰林院檢討者諱福福之後而澤爲廣東提舉司提舉用卿爲南京國子監祭酒族益顯君曾祖遠吉安府知府祖其裕兩淮鹽運使父曰旣邑庠生以 皇太后萬壽恩 敕贈如君官君生八歲而孤母林太孀人教之嚴稍長爲諸生有名貢入太學以五經舉順天試會有 旨分發舉人補縣令以下官而

君得河南試宜陽密二縣授林縣令河南水災以能治劇調任虞城病假歸病痊需次直隸丁林孺人艱服闋權平山元城縣補高陽令以久俸升知雲南鎮雄州抵任數月感疾卒年五十九君少時慕范文正滕威敏之爲人不治小謹而好恤人之困及爲縣則謂可行其志矣故所至皆有惠政尤盡心獄訟宜陽民訟妻家匿其妻指妻歸甯時同行者一人爲證君謂匿妻者卽其人也一訊果伏林縣民兄弟爭產數訟官不決君一言而叩頭流涕願解訟去密縣日有以酬酒三受杖責者亦同百姓流涕送出境其得人如此治虞城最久初莅任時 朝廷下帑金百萬轉東南漕賑民又 命使者疏積水爲惠民永便諸河冠蓋駱驛於境君賑務

之餘供張無乏勞來饑民就役工先諸縣竣使者嘉歎會藩司檄民受常平倉粟者皆納米君曰非故也因言虞城不產米故以雜糧代今民新經大荒幸無重困之藩司猝聞君言怒甚繼以其理直亦不之罪也有醉民突入典史署詈典史受杖死君言於巡撫曰杖數十五爲刑至輕杖後三日死此死自有故非典史罪也且醉民侮官官輕治而以無故之死累官使官受不明之罪以去則民益輕官從此官難治民矣典史竟罷然人以君言爲難也令虞城七年百廢具舉尤以學校爲急而大城其城曰水患孔亟隄弱不足恃也歲大蝗獨不入虞城界人皆異之君久宦人意君且剋方取容及徵米事乃能自伸其意於上官如此所至得民虞城尤

甚君去任十餘年民語及君輒流涕人謂君必有所以柔之者及
觀君論典史杖民事獄獄持大體不稍假借乃知君政張弛得宜
自有以服民心久而不忘非爲煥休姬拊以求媚也君篤於嫺族
遺祖皆置祀田其疏屬男女貧者計口存恤破產不自悔重以歷
官交代之累益困然君垂歿猶以義田義塾爲惓惓嗚呼可謂難
矣余與君有文字之好不見君近二十年後於龍峯書院見君子
景瀚詢知君在家大喜因訪君一見驩然道故及君官直隸升任
滇南意且大用僨君生平同民憂樂之志矣乃不幸未久而棄世
也悲夫景瀚篤行健文成進士後益好學方廣求古人善世之方
可通於今者變化之以謀宜民成君之志者其不在茲乎君夫人

某氏生子某某女某某云某年月日景瀚兄弟將以君葬於某地
先期狀君行來請銘銘曰

君之文章如秋決河龍鱗萬怪舞於洪波奔流所屆禦我者何急
仕活民乃老一科君任七縣遺愛如貫訟無畱牘學有集彥牛犢
肥字盜賊渙散渤海之風於今再見高城額額廣渠淵淵君子成
績澤流億年蝗避其治暴霽其賢中孚之吉浹於人天遷秩滇南
其陟伊始萬軻之高忽蹶舉趾於君何傷斯人失庇宗族銜哀舊
民隕涕昔范文正仁設義田君病彌畱亦致拳拳豈私一家恩有
自延憂樂同人宗族先焉至誠感神積善餘慶君子克賢繼述方
盛必成君志以終治命配文正公奕世歌詠

右墓誌銘朱仕琇撰

龔景瀚

龔景瀚福建閩縣人乾隆三十六年進士以知縣歸部銓選四十九年遷甘肅靖遠縣知縣旋署中衛縣清釐訟獄案無畱贖邑有七星渠淤塞常苦旱景瀚捐俸築壩遏水入渠溉田十餘萬畝又大濬常樂鎮靖等渠重葺減小諸厝溉田二十餘萬畝民享其利五十二年調平涼縣書院傾圮景瀚捐資新之親爲講學增驛站車馬罷民充鹽商俾無累邑西北有潭潛怪物夏秋間發冰雹爲田禾人畜害景瀚移牒城隍神驅之患遂息歷署靜甯固原州知州固原漢回雜處時構衅景瀚密探諸堡誅積賊境內以安署循

化廳同知五十五年舉卓異五十九年升陝西邠州知州未赴任
值川楚教匪肆擾陝甘總督宜絲調赴軍營從破賊嘉慶元年
命以知府用先換頂帶從入蜀屢著戰功二年 賞戴花翎授甘
肅慶陽府知府三年調蘭州府時流賊蠶起景瀚隨營充左翼長
籌畫軍事上堅壁清野議備陳調兵增兵鄉勇三害勦賊四難先
安民然後能殺賊民志固則賊勢衰使之無所裹脅多一民卽少
一賊民居奠則賊食絕使之無所攜掠民有一日之糧卽賊少一
日之食用堅壁清野之法令百姓自相保聚賊未至則力農貿易
各安其生賊既至則閉柵登陣相與爲守民有恃無恐自不至於
逃亡其要先慎簡良吏次相度形勢次選擇頭人次清查保甲次

訓練壯丁次積貯糧穀次繕畫經費如是行之則有十利反復數千言剴切中事理嗣是被兵各省舉做其法民獲自保則無所逞成效大著五年赴蘭州府任七年送部引見卒於京十一年命採其議入皇清文穎祀蘭州府名宦祠福建省城鄉賢祠

右 國史館本傳

公諱景瀚字惟廣一字海峯福州閩縣人也先世系出宋參知政事茂良迨明南京國子監祭酒用鄉族始顯曾祖其裕 國朝兩淮鹽運使司鹽運使祖旣 贈文林郎河南虞城縣知縣父一發雲南鎮南州知州稱循吏自有傳公幼就傅日誦數千言年十八補府學生員乾隆三十三年舉鄉試三十六年成進士罷歸里居

教授十有四年研究經史時務凡古今因革必窮源竟委求所以
通變宜民之道四十九年選授甘肅靖遠知縣郡王傅察福康安
時以通侯使相督關隴軍事天下督撫莫與並於屬吏尅許可一
見公獨喜謂監司曰是一好鮮明縣令也未抵任卽委權中衛判
牘如流見者不知其初仕也縣南鄉七星渠袤百三十餘里溉新
甯安恩和鳴沙三堡及白馬灘田十餘萬晦久淤塞歲常苦旱戶
口率逃亡公相形勢立捐俸購石築壩大河兩岸遏水使入渠口
料通渠夫額併力挑浚露宿河干數十日渠流始通逃亡復業復
請於大吏假常平倉穀千餘石資渠夫口食次年春大浚七星常
樂鎮靖三渠重葺紅柳溝環洞及減水諸牐洎立夏放水水高於

往時六七尺溉田十餘萬晦迄今縣食其利焉是冬歸靖遠未數
月調平涼前後四年多政績籌穀米增驛騎禁強取竅炭除強派
鹽賈閭閻商旅咸無累邑東北七十里有地曰淺淺子夏秋閒每
起雲霧發冰雹傷田禾人畜民以爲苦公齋三日移牒城隍神期
以翌日驅之及期率兵役往中途民走告曰昨夜半其地忽風雷
如戰鬪聲晨視則水減大半矣公至果如所言發鉏水涸自是平
涼無冰雹災夏禾將熟螟蠶忽生農民恐奔告於公公躬禱城隍
祠及好蚘祠翌日往勘螟蠶盡滅一邑驚以爲奇五十五年權固
原州兼攝鹽茶廳撫民同知捕獲積賊境內肅然是冬舉尤異五
十七年權循化廳同知申約束釐訟讞解番釁嚴關禁不以荒陋

而慢之八月復回平涼則前所整理者皆隳壞公竭力支持二載
乃復初五十九年擢知陝西邠州嘉慶元年參督府宜縣軍事當
是時督府奉 旨治事蘭州而西安又召滿兵赴楚馬首東西未
有所決公進謁曰今楚賊蠢動商洛毗連楚境內逆黨響應且防
鼠入方請東行彈壓督府從之及抵關中奉 廷寄適如公所言
於是幕中大小事悉令公參決而後行尋以緝鞠逆犯功奏升知
府從大營攻勦鄖西賊平之籌漢口以北善後事宜乃還冬十月
督府以蜀楚賊氛熾率兵赴陝而興安賊徒屯聚窺伺郡城陝撫
連檄告急公從督府至督戰破賊巢五賊首乞降餘悉奔竄陝境
平補慶陽知府部議覆駁 高宗知公之贊軍謀也 特旨如督

府所請行二年元旦入蜀冒雪攀崖屢瀕危從攻三賊巢破之尋以前從攻五柞雲功 賜花翎當是時達州巴州賊紛起官兵不暇接公統計兵數審形勢要害議遣甘州兵赴楊柳壩分五路勦禦金峩寺遣土兵赴清溪口遣延綏兵赴王家砦督府悉從之賊渡河四出焚掠公望見煙火數簇曰賊猖獗至此意不在金峩寺而大兵尙在彼環守何也亟調督府陳狀督府令赴諸營卽馳謁元戎達督府意翌日元戎督兵攻破金峩寺賊果空砦逃矣六月督府兼四川軍事復奉 命總統三省幕府文書及四省軍情皆屬公公隨營久坐臥溼地足瘍項腫日夜痛楚然軍務倥傯常力疾據几治事不敢少安者踰二載三年春督府移駐興安禦陝賊

冬奏調公知蘭州府四年春督府奉命歸京師以將軍恆某權
軍事將軍松筠尙書長齡先後至皆畱公軍營奉旨飭回蘭州
公從軍五載奔走四方晝參戎機夜撰疏札大府倚爲腹心不可
暫離目睹流賊情狀謂禦禦非善策作堅壁清野議曰竊惟邪匪
滋事以來蔓延四省輾轉兩年負固則經年累月不能克奔竄則
過都歷郡不能禦議者惟以兵少爲辭於是調鄰省增新兵募鄉
勇但謂以多爲貴不知其無益而反有害也何則國朝經制之
兵有限而腹裏尤少其重兵所在非番回錯雜之區則形勢要害
之地也一調不已而至再三備禦空虛奸民因而肆志是無事之
區又將滋事卽如四川湖北之兵皆以全赴苗疆邪教遂乘機起

事豈非明效大驗乎此調兵之害也倉卒募兵但取充數非市井無賴之人則窮苦無聊之輩紀律不習技藝不精心志不齊膽氣不壯遇賊惟有紛然鳥獸散耳此增兵之害也鄉勇守護鄉里易得其力若以從征則非所願無室家妻子田廬墳墓之足繫其心也平居未受涓滴之恩臨難責以身命之報於勢既有所難能而爲之長者素昔等夷本無上下之分與以虛名強相鈐制於心又有所不服故加恩則玩而驕執法則忿而散求其約束而整齊之者難矣其藉此爲利浮開名數冒領銀糧者又無論也至於臨陣旣未習乎戰鬥又各自爲步趨疑則易驚紛則易亂卽或誘之以重利鼓之以大義而有勇無剛能暫而不能久闕然而進亦闕然

而退耳此鄉勇之害也且兵勇多則糧餉廣糧餉廣則轉運難
國家帑藏充盈殺賊安民雖千萬所不計而民間之疲於輓輸困
於差徭者不知凡幾矣文報有站糧運有臺軍營之移徙使節之
往來其夫馬不能不資於民力近地不足調之遠處州縣雖官爲
給價而例案所銷豈能敷用每縣夫數百名馬數十匹道途之費
守候之費津貼之費司事者口食之費皆派之里下不肖生監又
從而乾沒其中爲日旣久民力竭矣官吏但顧考成一切以軍興
法從事科斂督責民必不堪事變滋起或遇水旱之災何以處之
況乎將領不能約束兵丁所過甚於盜賊鄉勇從而效尤激而生
變是所憂者不獨在邪匪也然使有濟於事僥倖成萬一之功可

也而自去年以來其情形大槩可見矣四省之山層崖峭壁削立如城砦者所在多有其上有田有水賊若據之非數萬之眾不能攻取然周圍百餘里或數十里終未能環而圍之也竭力仰攻士卒損傷過半幸而得之賊已乘閒率眾他徙矣則又窮日夜之力以追之而其勢常不相及蓋賊因糧於民無地非民則無地非糧官兵之糧必須轉運賊竄無定向亦無定期糧臺豈能豫設夫馬豈能豫增倉卒移營糧必遲誤此一難也賊皆輕身登降便捷而我兵鳥鎗弓箭火藥鉛彈身所佩帶不下二三十斤行走不易此二難也賊皆本土之人慣於山行婦人孺子亦趨捷若飛而我兵如陝甘等處壯健有餘輕捷不足登山半日汗流氣喘未遇賊而

先困矣此三難也賊隨時隨地可以休息而我兵行必按隊止必安營空壕樹柵守卡站牆日夜不得安歇此四難也賊常飽而我兵常飢賊常逸而我兵常勞勝負之勢已分矣幸而勝之所殺者賊之後隊數十百人或其之弱疾病不能行者耳其首逆及全夥不可見也賊之詭計又分布數人於左右十餘里中四面放火使我兵疑畏不敢遽進及至探明而賊蹤已遠矣此尾追所以常不及也於是有謂宜繞道前進迎頭截殺者然前後夾擊則左右分馳東西並攻則南北各竄山澗重疊道路分歧安所得十餘萬之兵一一迎而擊之卽令兵多將廣四面兜圍而賊聚而衝我散而守十餘萬之兵分布於周圍數百里之內其勢旣分其力亦薄賊

以全力捨命衝突亦未有不潰而出者故賊之往來可以自如我之進退反不能自主賊合而我兵不得分賊分而我兵遂不能復合焚掠裹脅賊愈殺而愈多疾病死亡兵日添而日少勦則無以爲守守則無以爲勦今日之賊無論非今日之兵所能蒞事卽或額兵全來新兵已練而使之追逐千里之餘奔馳半月之久力疲氣阻其勢又爲今兵之續賊勢益張兵氣益餒日延一日事恐不可問矣然則爲今之計將奈何曰賊未至巴州而巴州之民先去賊未至通江而通江之城已空守土之官雖欲效死勿去其誰與守此無他民心無所恃也故殺賊以安民也今必先安民然後能殺賊民志固則賊勢衰使之無所裹脅多一民卽少一賊矣民

居莫則賊食絕使之無所撈掠民存一日之糧卽賊少一日之食
矣爲今之計必行堅壁清野之法責成地方官巡行鄉邑曉諭居
民團練壯丁建立堡砦使百姓自相保聚併小村入大村移平處
就險處深溝高壘積穀繕兵移百姓所有積聚實於其中賊未至
則力農貿易各安其生賊旣至則閉柵登陴相與爲守民有所恃
而無恐自不至於逃亡別選精銳之兵二三千以牽制賊勢不與
爭鋒但尾其後賊攻則救賊退則追使之進不得戰退無所食不
過旬餘非潰則死此不戰而屈人策之上者也其要必先選擇良
吏一省之中賢而能者道府豈無數人牧令豈無二十餘人其奔
走趨事明白勤幹者佐貳豈無數十人今川省賊所往來川東惟

夔州達州川北惟寶甯順慶而已陝西惟興安漢中商州河南惟南陽湖北惟荊州宜川施南襄陽鄖陽而已所屬牧令賢者畱之不肖者易之每處各派佐雜數人分任其事以一道府董局事佐以正佐數員講明利弊議定章程總其大綱其餘道府分路經理稽察不過三月可以畢事其次則相度形勢天成之險如大成砦太平砦者加卑因高使之可守移附近居民於其中先藏積穀貧者官代其資茅屋草棚聽其自便其故居仍畱勿毀賊未至時仍可如常安業也其村莊市鎮人煙輳集如臨江市普安場者隨其所居因山臨水爲築城堡外挖深壕務令高廣民居零星在外者移入之甄石木料匠役之費皆給於官惟丁夫取於民有貧乏者

量給口糧以代振恤其次則選擇頭人山上之砦平地之堡人戶
既多一切事宜需人經理擇其身家殷實品行端方明白曉事者
或紳監或者民舉爲砦長堡長給以頂帶予以鈐記使總一砦一
堡之事其清察戶口董視工程經營銀糧稽察出入訓練丁壯修
飭守備別擇數人爲之副各就所長分任其事以專責成其次則
清釐保甲戶口繁多奸良莫辨外至者虞其爲間諜也卽久居者
亦慮其有匪黨也行保甲之法十家聯保互出甘結始準移居匪
類送官究治其蹤跡可疑尙無確據者別附冊尾聽其另居自便
毋使滷入以滋後累其餘良民悉使團聚家有幾人大小幾口所
操何業田土若干詳註冊內以備稽覈其次則訓練壯丁每戶抽

壯丁一人或二三人編爲部伍鳥槍刀矛各習一技官爲給價製備器械每一堡若擇營中千把或外委一員兵三四名使之勤加訓練有事則登陣守禦自保鄉里毋令出征惟本州縣有警或鄰堡告急許以其半救援其次則積貯糧穀堡砦之中建倉數間富家囤戶有糧難以盡移者官給銀悉行收買入倉無者買於鄰近各鄉官兵經過卽以此糧供支賊至閉砦壯丁守陣按名給糧毋令家食其鰥寡孤獨貧乏殘疾及家稍充而實無糧者準其照冊分別振借賊平之後卽爲本鄉社倉分貯常平一遇災歉亦可就近振糶其次則籌度經費所有築堡挖壕建倉買糧置備軍械一切守禦器具及搭棚蓋屋之費銀皆官給交堡砦長司其出入惟

倉穀之數主於官振借供支官爲報銷其餘銀勻攤於堡砦居民
所有田地分爲十年或八年隨地丁徵還如此者有十利焉川省
無土著之民五方雜處其性輕於去就故一聞警報輒四散奔逃
民心疑懼則千里無堅城矣今堡砦林立聲勢聯絡民居旣安民
志自定父母妻子一家團聚無流離死亡之憂並不慮爲賊偏脅
陷於邪黨可以保全良民潛消賊勢其利一也糧皆藏於堡砦之
內所餘村落店館皆空屋耳賊卽千里焚掠無所得食若攻圍堡
砦則丁壯自護身家其守必力又有鄰堡之救援官兵之策應其
力必不能攻陷狂奔十日非潰而四散則輾轉於溝壑之內而已
區區首惡何難就擒可以制奔竄之賊其利二也據險之賊不能

不下山掠食今民皆團聚糧不露處冬春之交野無青草附近已無所掠遠出則近山之堡砦皆得邀而擊之其勢又不敢出坐困月餘積糧既竭終亦歸於死亡逃散而已可以制負固之賊其利三也州縣之有鄉村如樹之有枝葉枝葉傷則本根無所庇鄉村皆爲賊所蹂躪其城郭之不亡者僅矣今四面皆有堡砦障蔽擁護賊必不敢徑犯城郭有急則環而救之如手足之掉頭目賊將腹背受敵況官兵又乘其後乎可以保障州縣其利四也堡砦遠者相距數十里近者或十餘里官兵經過就近供支糧臺可以不設官無轉運之費民無輓輸之勞至文報往來尤關緊要堡砦之在大路者卽安設夫馬遞送無須兵勇護之可以省臺站之費其

利五也每省挑選精兵三千賊合亦合賊分亦分牽制其後使之
不得攻陷城堡足矣其餘悉令歸伍所省鹽糧猶其小者也兵少
則差糈亦省民受無窮之利而營伍不至空虛亦無虞再生他變
其利六也守陣壯丁惟賊至時數日給以口糧耳無按月之鹽糧
無安家之銀兩也其費較招募鄉勇所省何啻天淵而愛護鄉里
朝夕相見猶有古者守望相助之意可以情法維繫之不若鄉勇
從征日久習於兇暴怯公戰而喜殺掠釀爲將來無窮之隱憂其
利七也保伍時相糾察而堡砦之長又從而稽之則姦宄無所容
其桀驁不馴如暍嚼者亦懾而不敢肆可以漸化爲良民其利八
也邪教蔓延爲日既久伏而未動者正不乏人今淑慝既分居不

相雜其冥頑者苟潛入於賊黨可以一并殲除其愧悔者必安居
乎故業可以保全身命絕後患之萌開自新之路其利九也規模
既定守而勿失遠近一體上下同心如網之在綱有條不紊如身
之使臂無令不從無事之時按籍而稽瞭如也有事之時畫地而
守井如也一勞永逸數世賴之其利十也然而愚民可與樂成難
以慮始因循目下畏難苟安此議一出必有阻之者矣一則曰騷
擾反以累民也夫擇利莫若重擇害莫若輕賊匪所過焚燒房屋
殺戮人民擄掠婦女其慘極矣民雖至愚亦必明於利害所全者
大卽小有騷擾猶當毅然爲之況保其身家全其積聚順其情之
所樂何累之有若云奉行不善則官吏之過當易其人不當廢此

國朝元朝... 卷之三十一
瀟如戰場失利豈以偶無良將而遂永不用兵乎一則曰迂緩不切於事也夫欲速則不達自去歲以來各省所行者何一不速何一有效事固有不急急於目前而收功於異日者及今爲之未爲晚也行之一縣可保一縣行之一府可保一府同時並舉不過三月賊在羅網之內矣是速莫速於此也舍此以圖其果有旦夕奏效操券而得之策乎一則慮其費大也夫成大事者不惜少費苟能平賊卽多費亦所不惜今州縣大者不過堡砦數十處小者十餘處一省所辦者不過三四十州縣耳裒多益寡合計每省不過用銀一百萬兩而已自是卽無所費較之養兵養鄉勇每月需銀百萬者其費何如且尙未有底止也況惟買糧爲費較巨而糧分

貯於堡砦何異貯於州縣之倉今各州縣豈能不採買乎其餘借項分年帶徵歸款是不獨省費且並無所費矣一則畏其繁難也夫天下無難成之事患無任事之人今自道府下至堡砦之長總理者有人分任者有人勞瘁不辭纖悉具舉何慮其繁難且通江巴州儀隴賊所蹂躪之處失業難民豈能不爲撫卹清察戶口修理房屋弔生卹死振乏周貧其繁難何止十倍於此與其補救於已然之後何如豫備於未事之先願平心而熟計之也是數說者皆不足以難之然則今日急務莫有先於此者矣安民卽所以殺賊民懼賊而逃猶可言也兵愈增則差徭愈重師愈久則擾累愈多數月之後恐民之見賊將不逃而合之矣今不早爲後悔何及

哉議上大府深以爲然適當事者急於見功以爲迂闊中止又撰
平賊議大略謂平賊之策不過勦堵撫三者而已堅壁清野之法
不戰而屈人策之最上者也然而工鉅費繁蹂躪之餘民之蓋藏
旣空生計復窘軍興日久官亦未有餘力及此需之歲月今日又
急不能待也無已其惟分屯合擊之一策乎夫兵宜聚而不宜散
貴精而不貴多今徵調半天下其數將十餘萬而經略參贊總督
將軍所用僅二三千人合四省計之不過二萬其餘安歸乎賊股
愈分而愈多路亦愈分而愈雜於是派提鎮參游率兵千餘或數
百人以分勦分堵不計賊之多寡兵之足數勦捕否也究之所謂
勦者隨賊奔走而已所謂堵者望延歲月而已兵力旣衰聲勢愈

弱數年以來未淨一路是置兵於無用之地而虛糜糧餉也府廳州縣每處畱兵或百餘或數十勢孤力微故轉糧散餉常覺兵多臨陣出征又常患兵少其弊在於分是不可不台而聚之也疲病恆懦之兵不能爲利而反爲害矢石交加之下一人驚顧萬眾披靡卽有勇者亦無所施其力矣善用兵者惟在能忍我不退則彼必退機之先後不過須臾將帥以時訓練使上下之情洽則休戚相關彼此之技均則臂指可使故兵將必相習而後兵可用今所調之兵不必領於原營之將數月而易人臨時而更換兵不識將將不識兵倉卒遇賊有委而去之耳近年陣亡之官甚多陣亡之兵反少以此是不可不精於操練也精壯之兵皆歸大營分給諸

將大半老弱多不過二千人少者千人其能戰者惟數百人耳何可責其成功且尤患者兵少而官多將軍提督副都統各數人總兵十數人盡子重兵焉有此額其供支百倍於官兵省一人即可養數百兵而有餘又一隊之兵僅二三百人而參游都守或多至七八員連翼之雞不能俱飛而本營至無一官以目兵而署都守以武舉而護參游兵備空虚營伍廢弛何不別而擇之汰老病而擢勇智其循分供職者均回本營訓練新兵以備更調此兩得之道也是將帥不可不精選也統馭在將致死在兵今軍營告捷官之升擢者一疏至數十人而兵之得官者千百無一二也一升之米一兩三錢之銀所得幾何所望者惟厚賞耳而今之經略參贊

不名一錢安得賞不踰時爪牙無摧堅陷陣之士偵謀無深入效命之人賞濫報輕孰爲我用是犒賞不可不厚也今被賊者四省一省之大屬吏賢而才者豈無數十大府大加甄別度人地之宜升調勿拘成例使之撫循民人慎固疆圉假以便宜寬其文瀆每州縣視其緩急輕重予銀萬餘兩或數萬兩以暇儲米麥草豆雇騾馬整器械勤修堡砦團練鄉丁使自相保聚官爲巡行郊野曉諭大義其民皆有尊君親上之心敵愾從王之志以戰則克以守則固可以助將帥官兵之所不及是牧守尤不可不擇也數者既具可以行吾之策矣以陝西一省言之經略參贊總督將軍各提鎮各州縣之兵及隨營鄉勇其數不下十萬汰其老弱疾病怯

懦無能者罷歸原營可得精兵四萬人以爲戰兵又其次者可得二萬人以爲押運軍馱畱守營盤每一千把領兵百一參游都守領兵五百或三百卽爲所部兵將永不相離四萬精兵分爲八營每營五千人守兵以千人輔之經略參贊總督各領一營其餘以提鎮之有勇略者領之又於其中擇敢死之士數百人以爲親軍明白善步者數十人以爲偵探倍給鹽糧卽於汰歸四方之兵餉取之有餘分屯要地宜疏而不宜密宜遠而不宜近如賊在終南山中則蓋屋五卽鎮安石泉洋縣留壩鳳縣寶雞皆要地也相形勢扼險要四面分布聽賊之游衍於山中我自椎牛饗士休養撫循使我兵力足氣盛皆有勃然殺賊之心賊蹤在百餘里內兵力

可及者星夜發兵風馳雷擊附近之營各有偵探不期而來或截其旁或邀其後州縣之鄉勇亦乘其敝則一舉可以成功或賊乘閒移至甘肅四川近我營者邀而擊之遠則不堵不追亦移各營之兵徐行環布相機而動若賊分竄兩省則各分四營之兵環之若分竄數處則擇其重且急者環之以逸待勞令不得出我之範圍旬月之內可以蕪事矣以此爲剿卽以此爲堵剿堵得宜而勝算旣得投出者必多賊勢旣窮悔過者亦眾不言撫而撫在其中是亦策之善者也不則分股而馳分地而守兵力日疲賊勢轉熾如前所云吾不知其所底矣旣而大臣有以前堅壁清野議奏御者四川總督勒保亦行於蜀有效總督松筠在漢中復奉旨

飭行其濼卒用蕩平十一年續編 皇清文穎 仁宗特出是議
付館臣載之論者以公經世之學先幾之明老謀壯志上與 廟
算符契非凡百賢能所及也既返蘭州辦軍需派糧餉振旱災七
年冬入覲 仁宗溫諭垂詢軍事甚悉蒙 恩內記名十二月二
十六日疾終於京邸年五十有六公豁達明敏曉兵事尤喜植士
類引人才士之貧不能赴省試者皆贈以道里費所在民悅所去
民思去之日奔走於道皇皇然如失所恃蘭州爲之立生祠馳驅
戎馬之閒迫徧賊壘往來不少動聲色嘗返蘭州宿江口中夜譌
傳賊至百姓驚竄丁役烏散公堅臥不起須臾譌言頓息其臨事
鎮定皆此類也丁父艱開關萬里由滇之楚旅費不繼奔走淮揚

徐豫閒乃克扶喪歸葬家數十口一身肩之族戚困乏者假貸助之捐資葬吳氏子停棺十餘出仕後歲周宗族數十家十九年如一日簪祭儀考四卷禘祫考一卷說禠二卷邶風說二卷離騷箋二卷孔志三卷循化廳志八卷澹靜齋文鈔八卷詩鈔六卷讀書錄訪古錄若干卷子四長式穀廩貢生仕至壽州知州受穀舉人左翼宗學教習豐穀舉人湖北天門縣知縣瑞穀河南睢州州同

右傳陳壽祺撰

戚朝桂

府君諱朝桂字弁亭別字約齋晚自號苧園先世自餘姚徙德清始遷祖諱卿紹興府學生七傳至瓶谷府君諱麟祥康熙己丑進士歷官至翰林院侍講學士有子五人希言候選訓導張言雍正庚戌進士福建連江知縣敬言浦江訓導皆黃蒸人出繼室於俞生縣學生种言及府君府君始名序言也以女兄弟同次故行十七歲侍瓶谷府君歸自京師尋遭母喪明年瓶谷府君以事謫戍甯古塔十五歲從兄連江縣解讀書寄所業於塞外瓶谷府君題其端曰陸機二十作文賦汝更小年能綴文使老懷頓慰一二作臨溪竹枝詞九十九首連江君和之傳誦一時乾隆元年丙辰瓶

谷府君蒙 恩釋歸戊午府君補縣學生辛酉遭瓶谷府君喪庚
午充順天副舉人尋考取入旗教習俸滿引 見以知縣用丙子
挑發河南丁丑春二月到官甫四日大吏卽委之延津振災民米
事事親覈胥吏無所欺婦孺無所漏署寶豐數月又之永城開小
澗溝若干丈深於其舊初府君從兄晴川翁振鷺守歸德開大澗
溝邑民利之至是易其名曰大戚溝小戚溝云補臨漳值歲大旱
徒跣禱城隍之神卽夕雨蝗起坎掩之旱不爲災辛巳秋大霖雨
漳水溢數丈及城壅土塞禡縣門皆不足禦乃亟發金具糗糧聯
竹木分督吏人若守官廨若守倉守庫若拯溺若食餓者又募夫
出囚周行市廛相宜以瀉水躬乘筏出城開下流溝渠十數遠至

一二十里水乃復已又爲粥以振踰冬及春至麥秋乃已餘杭朱先生穎爲五言古詩紀其事當是時府君之子芸生患痘危甚不知人僕從於風雨中昇以門扇置城上府君不問也已而痘竟愈及府君去而臨漳之民祝府君爲位祔於河神廟中以此王家莊楊某夜被殺介居無鄰翌日坐堂皇訊它案百姓聚觀林立一人神色有異曳之前一喝盡吐實眾驚以爲神或控鄰人誣其女女不從而自繆死也府君詣驗時女腋下有條脫二貯之庫已而問鄰人則相從已久曰若然汝亦有所贈於女乎對曰有條脫乃詰以某年月某店製之卽日驗店簿悉合鄰人得末減或問府君何以知之曰女子之性有金飾必耀於外今不在臂而在腋是以知

之也有悍婦奴使其夫又忤其姑也里長聞於官府君曰是當以家事治之爾使其夫笞婦旁室服罪於其姑而釋之婦後竟悛過云巡撫胡公寶瓌知府君賢能使兼攝武安旋調繁永城居一年以失察邪教鏽級引見奉旨仍以知縣用時癸未六月也甲申揀發湖北明年權應山篆入境訪楊忠烈之後皆零落散處得一童子質可教請於巡撫肄業漢陽書院尋入縣庠或於山澗中得木佛像龕而祝之祈禱輒應一邑奔走恐後府君曰是所謂偶然題作木居士者也夜登山令從者壞其像淫祀遂絕題補廣濟地濱大江又多山夙爲盜藪府君至一月獲盜二十餘案邑之匪人患鄉里者鄭大虎鄭小虎等悉嚴治之明年元旦行香還百姓

鼓樂四出縣扁於公堂曰是真父母府君皇然謝曰是惟古卓魯
可以當之吾何敢也未幾忌者有以蜚語觸上官怒或勸謁府以
自明府君曰窮達命也王晞熱官思之熟矣遂罷歸沿江東下舟
中口占曰樓船高興斗山齊眼看灘邊化作泥千里片帆輕似葉
飄然歸去浙江西時丙戌之秋府君年才四十八遂不出乃僑居
海昌之園花鎮足不入公府積書七千餘卷稍藝花竹春秋觴詠
悅親戚之情話常日坐一室中寂無聲看書啜茗而已夜飲盡一
壺爲節外孫錢儀吉讀書府君家府君奇愛之夜下學講書府君
聽之輒歡甚壺盡復沽或連引巨觥亦終無醉云著讀史隨筆四
卷續瓶谷府君仰止錄一卷他詩文雜鈔又若干卷家居二十六

年卒乾隆壬子六月十八日也年七十有四

右家狀錢儀吉撰

國朝耆獻類徵初編卷二百三十六補錄

守令二十二

呂肅高

天下之勢患在時和物豐而民窮財盡天下之人質質以安之上
之人不卹卹以憂之譬如虛浮之體醉飽冥豫精氣耗索一旦感
寒暑疴僂不能終日此其漸也比歲以來自山東河南江南諸州
郡報水旱災荒外各省雖歉收無恙然而民窮財盡之勢岌岌乎
不可止庚午秋大中丞開公泰延見余問境內豐歉狀對曰歉曰
若何曰近五分中丞爲太息久之然例不得減稅給振郡民亦安
之今年四五月米價日昂貧者持服器典白銀號叩富者之門富

者靳升斗閉糶四郊告饑太守呂公念民瘼屬邑之民舟楫雲集日閱票千百城中豪富射利黠領屯販鄉民愚謹終不能勝市井之捷得也公乃詔飭胥役數人巡禁在城確戶不得取買以便鄉民而蠹役緣此爲奸反欺鄉民稚弱或劫筮或劫舟豺聲虎目持鐵索械鄉民嚇利贖放違者誑稱包買送上笞責鄉民愚不得辨誣受嗚乎家人夏金旅客覆盆數百里饑困之身橫遭蠹役之害幾何不瀕於死也是時子家亦拏舟買穀泊城下蠹役數人者至將辱子仲幸仲力格不受辱而鄉民納價未領穀者率畏禍颺舟去子雅知非公意走白公公召蠹役數人者至訶責之旋宣諭鄉民聽次第領買無阻民歡忭祝公且感子意云夫使公素不禮士

則子言不得聞子素無以服公則子仲將亦誣受子仲既誣受則鄉民甯餓死不爲此升斗匍匐求禍天下事良有司利之胥吏害之往往如此平糶其細焉者也昔范質書筭頭詩云大暑去酷吏清風來故人旁有貌寢者揖曰酷吏何止大暑相公他日當究此弊持其扇而去質後至沃廣見土木鬼手持此扇心異焉仕周乃手訂刑統然子謂酷吏之害易知蠹隸之害難除要其弊當痛懲之也夫一事也而人情之狃於治安不圖預防者見焉官府之拘於常格難爲厚下者見焉胥吏之肆於積虐枉辜惠政者見焉士民之貴於通情咨訪疾苦者見焉是皆不可不記

右平糶記陳益撰

書院在深山之麓。初自宋開寶時，江岸有古石牌坊，定向與舊院向差一字。朱子所欲改就之而未及爲者也。乾隆中建城南書院於會城中園闌紛華可悅，而嶽麓書院遂鞠爲茂草焉。時太守呂公南村聘子修長沙郡乘蹙，頌告子曰：「吾守此郡而不能復嶽麓書院，吾不能見先人矣。」因捐俸薪請子館此。子以終養固辭，呂公請益力，又令司馬鮑公縣尹魏公明經朱檻到門敦請，子乃就席。及門多應童子試者，迫學憲按試，邀山靈之秀入泮者凡十餘人。後中式者數人，其姓名今猶勒講堂右壁。於是讀書士子爭東行，李渡江肄業嶽麓，當事亦以師生膏火移歸嶽麓院中。而嶽麓書院遂從此中興矣。此德政之出呂公者一也。然朱子欲就之，向猶

未成也癸未甲申閒撫軍陳公榕門毅然撥公項金若干增齋舍
兩層凡數十閒照依朱子所定向兩山交會大江橫繞路從古牌
坊下而出大修後連科賢書疊薦此德政之在陳公者二也書院
在深山中人煙稀少暮夜閒屢受穿窬之害予亟請於驛憲熊公
蔗園迺詳定更夫二名每年共給工食銀壹拾肆兩肆錢永夜輪
守師生安枕此熊公之德政三也戊子年當事以術士禍福之言
忽改書院頭門偏對麓右白虎高昂千尺院中災病大作幾致撤
散幸純庵德公福來撫予爲先後詳述其事德公按視之曰此如
人面然移齋居右耳之旁尙復成人面乎立命有司喚匠作卽行
拆改刻期觀成門復舊制院中漸次安堵如故是德公之德政不

居其四乎此皆予親歷其事亦通省十餘郡中人所共見其間且
共仰其戴者予掌嶽麓教前一載後八載今以年髦辭歸恐後人
不知其詳故特據實而略紀之增入嶽麓志中俾後之沐浴此中
者每飯祝之而世世無隕善政無忘舊德也

右德政紀略王文清撰

國朝耆獻類徵初編卷二百三十六補錄

守令二十二

朱仕琇

朱仕琇字斐瞻邵武建甯人年十五入縣學舉乾隆九年鄉試第一十三年成進士選庶吉士改夏津知縣再改福甯教授以足疾去掌鼇峯書院教十年仕琇深於文上薄周秦二漢引之唐宋晚求息於元明作者雷轆雲謁灑灑乎風與水相忘視近世魏禧侯朝宗汪琬姜宸英儲欣邵長蘅方苞等十數家猶嶽俯於崩施也與大興翰林學士朱筠友善筠狀其文曰康豈涉瀾若黨鬼神而推而準之平直方圓察人倫五以平吾氣以甯吾心斬斬自成名

一家集代以邇者未之聞焉仕秀作原法以究治道曰意者上與
下同適於治之路也法者所以象上之意導天下使不迷於路也
意者何主也曰仁義忠信是也四者之爲天下迂久矣然四者道
行則匹夫負重旅山海而無憂一日失之則兵起於室故雖前世
暴君千辟恣睢而其張下郡縣詔令未嘗不日以四者責望天下
暴君利四者日詔於天下天下眩而莫應以法壞而意不至也修
法柰何曰刑名之家曰嚴家無格虜故明威以行法細賞深罰以
致威威氣中人則賊心生其法之行如褻針於絮而寢處其上安
其柔而不知偪於刺也息偃輟轉未幾而身且血斃矣商君以此
亡秦酷吏以此衰漢法行之時夜戶不闔道無拾遺境內肅清豪

猶屏息聲震殊俗遠塞益北上之人御此威而過自喜也心泰意
侈巡山告功刻石頌德謂天下不足爲而子孫長治然忠愛根莖
禍賊胎結皮傳骨離形強脈死九族崩心安問閭巷一旦乘機迸
裂遠近冰釋名號四起城池自下國亡之日求一人死宗廟社稷
不可得秦之二世是也威極而犯法極而靡袴取一切不可暨於
精微垂諸後世是以明君不用也故善制法者以意不善制法者
以威世之說者皆曰國之利器不可以示人故爲天下宜明法而
隱其意若是則以詐令也意倍仁義忠信四者而舉四者之法挾
非質張浮具以愚天下天下卽裸其法而衷其意還以愚上上下下
相誦幽險荒蕪則人心敗而世道憂詩曰爲鬼爲蜮則不可得此

之謂也父不能恃子夫不能恃婦恤不能恃嫻任不能恃友伏刃
酒食匿讐交際禮容正色以相篡取聖口默心則四者反爲天下
市故文忠市僞文愛市忍陰陽反復泯泯焚焚吾不意周公仲尼
之訓直爲盜跖佐奸也舉天下如此則君人者何以安其位耶一
的立而萬矢至斯上人隱意之禍也故諸葛忠武治蜀賞罰亟明
與商君治秦無以異也一則車裂而民不憐一則身歿怨家出涕
舉國喪之若考妣不忍除服白帽成俗宣與幽之效也夫宣者求
人知知之則不逆其意幽者畏人知知之則毒其欺己而法訖不
行此商君之所處所以爲可危也夫商君營戎狄爲魯衛法未嘗
不舉四者也而其反若此故荀卿曰宣而成隱而敗闇君無有周

而成泄而敗明君無有上幽而下險上明而下化誠審於理亂之
原也故君人者必將以四者著之意矣則哀矜懲創之思闐然人
皆見之吹噓百度朝野震動如春將雷百蟄物皆鼓翼頓足啟穴
吐土以俟出則雖未下一令未畫一謀而民固已早正以待之矣
由是圖議大中以規無弊綱舉目張以持四者原而流之本而生
之不於其意少加損焉則其政事之下浩浩乎若江河累累乎若
轉丸於壁知則無有滯之者也賞一而勸百刑少而威眾讀詔書
則泣樂政成則歌求其自而無可疑故視聽得一而心志得齊也
是以朝廷清明官吏信度上下膠固風俗淳美易世之後其教可
復夫意與四者皆不敝之器也兩不敝相合明示天下以繫之其

明不可滅其繫不可解此法之所恃以長固也故偷主持法聖君
明意意立而法舉則正路不塞百世長享矣與山陰胡天游書論
古文升降曰六經之作聖人本諸身垂教天地萬物理畢備孟子
七篇明仁義荀況輔之斯非背師以售術附周假道德放言管商
新法不韋呂覽穰且孫吳申軍制邱明傳春秋災異於董劉詩變
於原史變於遷易紹於雄建安好靡韓愈救其弊此周秦漢至唐
爲辭之大較也皆馳騁聖人末流著書要以六經之旨有正有僞
然學者一例存之不欲申明而舉廢之也其所以惜而不廢者非
謂於道有疑徒以其辭耳則辭之繫歲立言固不重歟自韓愈關
佛老後千餘年道粗明然爲辭益下大約唐長慶後其氣傷宋熙

甯後其理漻二者交譏古文道缺不全以迄於今雖其間數十豪傑力自振積廢中然以二者追隨終始卒不能脫也豈非世遲爲之歟竊謂辭之要具李翱荅王載言書辭之本具韓愈荅尉遲生李翺書繼而議者益支稍事藻績擊輓則夫辭之益下固亦從其趣也然則專罪世又豈明通之論與輔韓愈相次起者李翱而外若柳宗元杜牧歐陽修蘇洵父子李覲曾鞏王安石姚燧虞集歸有光王慎中之倫雖派有遠近要爲斯文大宗學者所當依據舍諸家而外求系固不免前二者之失矣又其淫則公倘規矩裂六經以逞強欲不囿於世而納於作僞若前代濟南新安之類皆廝養僕隸僭主人曾不得比庶孽沐猴而冠妄自侈大亦可哀也年

六十六卒學者祠祀之有梅崖文集三十卷外集八卷兄仕玠字筠園拔貢生爲鳳山教諭以詩鳴有谿音集二卷仕琇門人閩縣陳天文侯官魏瑛官崇鄭超皆知名而崇最得古文法瑛字述臻乾隆三十九年舉人署浙江衢州通判安吉知縣超字在謙乾隆四十四年舉人天文字賢開以布衣終行誼皆端慤崇字述言有至性能自砥厲去華存實乾隆四十四年故太傅朱珪主福建鄉試從落卷中拔崇置第六由是知名崇父業鹽筴負官帑獄急崇出代繫累月家遂破貧甚而善事其親然崇守益潔克己日益嚴嘉慶元年舉孝廉方正崇以親意強就徵行至吳中病卒年四十九有志齋文鈔一卷

右傳陳壽撰

國朝書院後刀書
卷三十三
守令二十一
附錄

世系表
卷之三
三三三

五

國朝耆獻類徵初編卷二百三十六補錄

守令二十二

高爲阜

聖人之道大而博學者各以其學學聖人要其至焉耳後世河北宗鄭江左宗王尙未聞其有所拘闕也東天下而崇宋儒自元明始於是高才生退有後言且過激人見其激也又羣驚爲奇服怪民而莫敢近焉是過也乾隆甲戌高先生守村訪余於白下年七十許清臞蘊立高睨而大談解孔孟專攬秘宋儒其所見亦未必盡是要皆的的然有心得者余灑然異之別六年陶明府京山從溟歸道先生守姚安事甚具又十餘年蔣蒼生太史來賢先生不

絕口二人非妄譽人者余益信先生果奇男子也蒼生授二石刻
曰此先生知平彝劍川二州德政碑也滇人不文序事不識體制
又過欲揚頌如郝鑒見王導意滿口重言殊不流子其采而傳之
其一碑曰先生廉不言貧勤不言勞 王師征烏蒙運餉六千石
而民不知理訟可和者和之可決遣者決遣之罔不當其一碑曰
征劍川糧減額外公件銀每兩若干引老君山水溉西莊畝收增
數鬴丈鵝雅場清其界酋夷皆拜曰從此百年無事矣嗚呼滇最
惜俗也能齊其口爲無窮之聞以存先生然則碑愈俚民情愈真
想先生之經德秉哲殆不愧其言者先生亡已久子弟才下無所
發明門生故吏又懼大忤於俗不敢張其說余聞而悲之夫犯眾

敵抗令甲以追取聖人之心此其志直合萬世爲一朝者而卒之
身甫歿姓氏就湮然則與夫庸庸然曹出曹入者何以異也天之
所以生斯人使獨異於眾人者又何也追憶當日先生與余天涯
一邂逅耳豈料身後事余爲存之而余亦豈料十餘年後尙有先
生兩知己在耶夫儒者闢然之學原不爲名計而卒其所以常存
於天地間者又舍名曷以哉嘻古之人所以重後死者也先生名
爲阜鉛山人

右傳袁枚撰

臣等謹將各省情形
分列三三三三

十一

國朝耆獻類徵初編卷二百三十六補錄

守令二十二

康杰

邳州守雙峯康公以今歲二月卒於位其孤綬基自中州赴江南扶喪還將以十月之吉葬公於馬布村先塋之側而先期以狀來請銘余之來涉也在去夏之六月而公前一歲壬子奉 旨引見乞假暫歸里旋赴江蘇候補始終未一面然公鄉里數以公名德稱道於余而士夫之自南來者談公政績復籍籍滿余之耳雖未親炙公而所以心重公者非一日矣又兩辱公遠頒手書余亦累用書相荅則今之銘公也益非無因不可以不文辭按狀公諱杰

字超羣雙峯其號也世居涉北鄉涉爲豫邊邑在太行之下萬山之中地僻而險民俗澆樸類耕種自給獨公家代以儒顯公曾祖鑄九公有清德祖琢吾公郡縣以孝友旌事蹟詳志乘顧皆未遇其用文字取科名者自公叔祖瑞公公始而公父西坡公謹秉禮繼之公又繼之蓋祖父孫三世登賢書彬彬乎爲河北衣冠望族矣公少承家學兼天資穎異於書無不窺丁卯魁豫省時年僅二十四緣父西坡早世而祖壽逾八十竭力孝養不忍離左右以故未得仕至乾隆三十七年始用 恩例揀發江蘇試縣事先署桃源縣尋改沛縣奏補鹽城縣調署句容期年回鹽城以能調青浦升邳州牧旋離任未久仍補邳州凡公歷官二十餘年皆不離江

南而在淮徐閒爲最久功名亦於淮徐爲著蓋自江淮被災大憲檄委公監江甯粥廠時已灼知公能比署桃源遣黃流齧隄百方搶護活生靈萬計用是能益彰其至鹽城也適高家堰合黃水漫溢淮揚鹽首當其衝大浸瀰天不辨村落公奉檄促裝星發由馬家蕩乘小舸而來值逆風幾覆眾相顧色沮公謂民亟矣吾行不可以緩風雨中凡兩喚渡始達官署至輒具狀請速振災黎又虞吏侵漁親爲撫給鹽人咸感泣謂公實生我也鹽數有海患公之再任乃益爲民籌永安計相地築牖令每年九月三日下版至次年三月三日而開以豬以洩早潦有備又請於上憲俾附近興化東臺等縣一體遊行自是斥鹵皆爲沃壤而頌聲達鄰境矣公所

至有循績然善聽斷吏不能舞文爲奸沛有命案歷數任不得主者公密偵獲其人一訊而服私梟季光祖爲鹽城患至白晝率眾拒捕親督役擒獲置之法王匡者邳之巨盜也常公剽掠兵役不敢近公託查煙戶單車赴陳家場出不意逮治之匡死而餘黨皆散又邳舊有擲刀會皆椎埋之輩屢犯法至是悉改化爲良民至治桃源決史家樓兄弟爭產之獄釋株連生監數十人在句容半載平反積年冤獄數百案又公之威德兼濟者也自餘如撥鹽城流均溝澗田膳生徒墾瀕海荒田利竈戶除青浦漕糧之積弊廣邳城育嬰之仁政凡有利於民者孜孜爲之如不及以故雖兩銜吏議而 聖主心知公賢且 察公無罪仍 命回江蘇候補蓋

方駸駸向用而公反邳州任不半年已捐館矣公律已甚嚴居平無藻飾處鄉黨以和訓子姪以儉尤好親禮士人勛後進多所成就丁酉己亥庚子三充同考官所得盡知名士江南人服公之議有遺集數十卷藏篋笥其孤綬基將謀梓以傳公卒於乾隆六十年二月初七日酉時距生於雍正二年甲辰六月初九日亥時得年七十有二曾祖父父皆以公貴 贈文林郎 誥封奉直大夫曾祖母申氏祖母申氏母李氏皆 贈孺人 誥封宜人配李氏例以公得 封贈先公卒繼配任氏側室蕭氏段氏高氏龔氏子二長卽綬基段氏出次紆基龔氏出女七孫女一皆例得附書銘

曰

循循乎其德歷任懋厥績已乎公乎而南中至今頌不息也符山之陽公其宅曰惟不朽視此石

右墓誌銘戚學標撰

國朝耆獻類徵初編卷二百三十七目錄

守令二十三

莊繩祖

胡敘甯

子令瑞
蔚一瑞

鄧文起

張震

侯可儀

子鈴

柳秉謙

葉藩

周曰萬

從弟扶
鄒麟書

王元啟

朱山

劉夢鵬

鄧夢琴

陶其懷

李炯

康基淵

莊映

徐士龍

魯濱

莫宗蔭

鄧正琮
徐日炯

李正中

謝世應
詹顯紳

補錄

國朝耆獻類徵初編卷二百三十七目錄

王元啟

國朝書獻類徵初編卷二百三十七

通奉大夫前署江西巡撫江西布政使司布政使湘陰李桓輯
守令二十三

莊繩祖

君姓莊氏諱繩祖字蜚英晚號樂閒居士世爲武進人曾祖諱京
生順治戊子副貢生考授知縣祖諱騫 贈奉直大夫直隸開州
知州考諱懷祀國子監生考授縣丞 贈如君官母趙氏故講官
編修諱申季女也自曾祖以上代通顯至縣丞而中落君少居貧
能自刻厲季父官東安令監視倉稅雞鳴至稅所暇卽讀書晚歸
衙齋讀仍弗輟旣而幕客皆睡缸中油竭挹人所餘者注之如是

以爲常乾隆十五年庚午以北籍生員中順天鄉試舉人屢應禮部試不第丙戌大挑奉 旨發往山西以知縣用初權平陽府同知旋授交城知縣勞心諄諄一以撫字爲事有少女殺於野君集村人履勘某某者視速脅動君密召女父母問識此二人否曰是日黎明獲尸竄見二人其居高阜君曰地甚僻爲時又早不宜有人至必殺人者內怯於此偵探耳嚴詰之果女不受汗被殺燕某縊其妻及其弟之妻誣鄰戚偪至則二婦其縊一索足離牀二尺許土牀又設木榻君卒然問曰榻非舊在此乎然則婦由汝死何誣鄰爲燕堅不承君曰此易知耳果自縊必有承其足者非偪之使縊抽榻而何燕辭塞蓋二婦皆不謹燕故欲其死適與鄰仇遂

縊而致誣也縣中稱神明縣故產羊皮及白鷹大吏皆歲徵之然
白鷹實不數見前官於羊皮多減值浮取白鷹則剋期令山民分
捕民競納昧乃免君至給羊皮民價而白臺使革取鷹之弊嘗得
檄取野雞千頭吏思資緣爲利請仍飭民捕君弗許廟買百餘頭
應焉方是時巡撫爲鄂寶公布政使爲朱公珪二公者以清節聞
天下待僚屬開誠布公故君得久任而展其志如此會大計將條
君治行以上君以年逾六十非老氏止足之義遽引疾歸去之日
縣民遮道送數十里不絕道經太原眾問車中何人僕夫以告皆
曰是交城賢父母也胡爲欲歸有挽車以送者其後交城人來官
南中及里人之客山右無不嘖嘖道遺愛以爲君去莫之能繼吾

郡有鬻裘者家交城忽登堂請見時君目已盲鬻裘者再拜曰自
公歸邑父老日冀公復出今日盲其不能重莅吾土矣歛歔而去
烏虜何以得此於人人哉君天性誠樸至老不失赤子心誨人循
循弗倦甲午同考鄉試知名士多出其門歸田後唯事吟詠與同
里宣城訓導程君景傅潁州知府蔣君熊昌及君族父勇成族弟
選辰族孫宇達爲觴酒賦詩之社懷玉亦時與其間積久倡酬頗
夥君超出於懷玉爲大父行願嘗以弟畜之歲時過從興特豪逸
既曠恆鬱伊不自聊或攜酒肴就之意趣猶不減曩昔嘗爲賦二
盲詩翁歌君喜而屬和二盲者訓導程君故亦病目也君生康熙
五十六年十月八日卒乾隆五十六年四月一日春秋七十有五

吳氏繼娶董氏子二榮諸國子監生心喬女二嫁同里董襄仁
和周光祿

論曰後漢元和二年詔曰安靜之吏悃愾無華日計不足月計有
餘如君者殆其人歟迹其居官斷獄近知愛民近仁引退又似勇
非聞道而孰能之聞君臨終以三事教其子曰毋作行狀毋修二
氏法毋增飾喪禮受親友賻而淹久不葬夫習俗移人而確然於
生死之際所養蓋非一朝夕之故矣

右別傳趙懷玉撰

胡敘甯

子令瑞

鄧文起

張瓊

蔣一瓊

張震

胡敘甯字慎典湖南清泉人乾隆庚午舉人揀發山東知縣借補
永阜場鹽大使時頻年大水有曾王兩族計口近萬居利津樂安
界兩縣互諉竟不得與振敘甯以奉委查災至其地廉知之爲力
請補振兩族人慶更生他善政類此去官時士民立碑紀德後有
訟不得直者每焚香碑下對之流涕其遺愛可知已題授新泰知
縣歲旱蝗禱神卽雨蝗隨滅縣人驚爲神以勞卒官多巷哭者子
令瑞福建詔安場鹽大使署政和知縣有惠政同邑鄧文起字景
韓乾隆癸酉舉人以知縣發福建補政和爲政崇尙儒術然嫉惡
如讐宵小側目縣有劇盜號黑飛虎者多奧援前官不敢問會案

發文起持之急遂爲所反噬以失入落職政和父老百餘人赴行
臺省乞畱卒無白其事者歸橐蕭然僦居新城市投徒以終著萍
湘集閩中草東和藏橐張瓚乾隆丙子舉人官福建松谿知縣多
善政松谿士民立張公祠歲時奉祀蔣一璉字豈石父文誘附貢
生勇於爲善中年以疾棄舉子業喜藏書多手自校錄宅母憂時
年幾六十哀慕如嬰兒舉鄉飲賓一璉乾隆丙子鄉試第一庚辰
進士分發江西知縣疊遭父母喪哀毀成心疾遂不復仕初一璉
在京師年少通籍多結納當世賢豪尤善同年生畢沅後沅官湖
廣總督閱伍至衡州過從款洽絕不干以私是時清泉始析治庶
政旁午一璉佐縣令江恂經營建置公帑不足則捐私橐成之既

又與陳三恪勸建懋屏書院士林感頌丙申歲大饑爲粥食餓者發粟數千石活人以萬計平時宗黨待以舉火者不勝數也子廷隴乙卯舉人任俠有父風張震字光四乾隆己亥舉人大挑分發浙江歷署海鹽慶元二縣及温州通判嘉興防海同知事補麗水知縣震清而儉居官峻卻苞苴廉俸所入搏節以濟公需在慶元麗水彌補前任所虧倉穀數千石未嘗以顆粒擾民積勞卒於官喪歸士民哭奠數十里不絕

右傳李元度撰

侯可儀 子鈞

侯可儀字于遠江蘇金匱人乾隆十五年副貢生授湖南知縣歷任新化龍山大府器之將特薦以養母歸母石年九十曲盡孝養服闋知安徽五河縣有惠政祀名宦先後仕十六年務靜化不事鞭扑宦橐蕭然子鈞字鍵六嘉慶十三年進士湖南安仁衡山知縣廉愛有父風鈞兄大鏞弟鐸皆知名族孫叔度煜並從鐸學皆有聲庠序

右傳楊熙之撰

侯可儀金匱人乾隆中知甯鄉縣日坐聽事勤理獄訟謂縣官一日耽閒待質者卽受一日株守之苦縣衝要上官往來無虛日可

儀循例供夫馬迎送亦惟其禮不冒事趨奉或遇要訟再四審讞
謀者報驕從臨境弗輟也上官多以爲慢聞民稱頌優容之調知
新化亦著政聲

右傳李元度撰

柳秉謙

乾隆辛巳署廣西新甯州知州補永淳縣知縣牧人柳侯卒少司
寇王公際華國子助教林公人樾張公元觀陳公彬走書謂錫胙
與侯爲同年生宜作傳備 國史採擇嗟乎柳侯之學行其止於
斯也夫侯諱秉謙字益夫又字牧人蘭溪人也裔出唐河東文肅
公後始祖敘宋南渡任浙江蘭溪尉殉國難藁葬城北因家焉族
姓繁衍世多廩仕祖文運 贈儒林郎父師殷 封儒林郎舉鄉
飲大賓侯大賓第四子也穎異端凝童戲時卽異羣兒年十七補
博士弟子二十選貢京師充教習授職知縣乾隆十五年揀發湖
南令朱旗彩綬過里門同學賀之侯曰願我身在此行矣里

考成人早覘其非俗吏云十六年署道州牧十七年授黔陽令二十一年調益陽令所至矢慎矢勤詢察民隱母字師教訟無留贖賑荒恤患鋤暴植良民皆謳歌之先是湘鄉縣土民謝若天等聚眾劫奪戕民命憑恃險阻據懸崖鳥道兵卒畏阻莫敢誰何前令坐是獲隨者且五人矣中丞以才略傑出者莫侯若乃檄侯行侯夜率趨健三數人從開道直抵盜穴盜猝不及備遂奪其器械縛其黨羽盜計窮始以其魁獻當是時軍民間侯往咸私議侯年少書生深入虎口非惟事不克濟且其人可惜也及盜既獲軍民又相慶仁者之有勇如是中丞奏入 天語褒嘉調侯湘鄉令益陽人甯之不得爲侯立去思碑并製侯長生牌位於神廟僧寺以祝

侯嘏明年註誤解任二十四年復職發廣西以原官補用侯至廣西初署恭城令再署桂林府同知二十五年署新甯州牧新甯州地濱交趾民徭雜處向無崇獎節孝者侯以禮義者國之維十室之邑必有忠信甯一州之大承國家昇平百年之久竟鮮孝子節婦乎爰廉得節婦王氏李氏事實請表之又廉得百歲民李春調請寵賚之州人興起州人未知學侯歎曰吾之在黔陽也有書院而無師生業已爲之所矣今并此而無之其何以勸因捐廉俸建義塾於州署之東延師訓迪邊士用振公暇則纂古忠孝節義故實刊布鄉野俾傳誦諷詠以善其俗又州城臨河河流春夏色赤多毒飲者苦疫作侯於城內鑿三井甘泉涌出居民相謂使吾輩

得飲清泉免凶札者侯之賜也會南甯府永淳縣有疑獄罪關生死出入二十六年監司請於中丞以侯改任其地侯啟行之日州老幼婦女攀留走送者塞衢巷立去思碑俱奉長生牌一如去道州黔陽益陽時七月侯自州赴首道感暑疾以二十五日卒於會城公廨年僅四十藥誤與積瘁而竭與命與橐中僅殘書數卷方伯贖百金資其喪事朝野聞者莫不嗟歎悼惜之侯之初至京師從少司寇父王文山先生學聞天人性命之旨得洛閩正傳先生視侯語訥沈潛士謂須剛克乃佳迨侯任道州詰獲鄰封殺人盜事聞晉階一級任益陽禱雨婆婆山往返步行三百里少司寇每語柳侯奮發有爲惜先人不及見之知其所成就者遠也

侯在成均見同舍生某欲許人陰事侯苦諫若如此則彼固敗辱君亦何能獨免且卽免將自居何等人乎其人不聽侯起怒遽奪其橐裂之大司成襄勤伯鄂公聞之語侯曰勉之行將薦汝於朝矣侯事親孝事長悌家三世不析居事無大小不敢自專在官無私橐在家無私語兄秉義艱於嗣侯爲置二妾旦夕焚香告天祈兄舉子以慰親志弟秉芳隨任黔陽病幾危侯調藥餌四十餘日衣不解帶弟病以瘳有善言雖賤必錄之有善士雖遠必造訪之抑抑孜孜其敦行不怠君子哉侯娶鄭氏子三萬清萬泰業儒萬全尙幼女三壬午冬侯外兄畢君告侯喪歸將葬於蘭溪縣西鄉釵盆山之岡且徵銘錫胙卽取所嘗爲侯傳而系以銘曰

維石有璞維沙有金靈淑於人蔚爲德音維金需鎔維玉需礪維
人有學於古乃逮有斐柳侯學懋行完祇父棊兄其天無利退承
道肩進輝福曜楚水湘流是則是倣旌移百粵地偏南交振武宣
文民用不佻克寬克信亦和亦肅春風與清冬日與燠人瞻侯度
從容令儀疇念芳修翼翼夔夔人歌侯仁渴漿飢飫疇念芳修衡
公鑑恕云何其逝魂招何方其位未顯其名彌彰陰陽推移誰而
無死今之神君昔之彥士婺星耿耿灑水盈盈刷石幽墟奕世常
貞

右墓誌銘韓錫胙撰

葉藩

葉藩字登南仁和人幼能自檢侍母疾足不出戶十六爲諸生試高等補府學生於昆弟居第六於是葉六之名甚諫中乾隆十五年鄉試次年成進士改庶吉士習國書散館補江西建昌令居官口不言阿堵物避俗如仇人以爲迂而民甚安之遭喪去官服闋補陝西同官縣知縣移蒲城鞠獄不恃三木反覆初供以求得實同官多指爲弛然爲所治者輒心服曰此真健吏也卓異遷廣西太平府同知定雇夫法人以爲便再遷廣東廉州府知府調廣西思恩府知府土官桀黠者輒斥不見咸嚴憚之歲饑民多粥子給直養之官比歲稔歸其父母民大悅藩狀貌癯瘠甚趨府白事在

公所罕與人言人常怪之一日值貲郎在坐藩不耐之閉目坐久
同官問何爲閉目不荅微語曰癡人去否貲郎大恨卒爲所中以
微譴罷歸家暴貧教授生徒以自給屢爲吳楚閒書院院長門內
行甚飭昆弟老而友愛撫諸孤姪有恩卒年八十有詩文集如干
卷子之朗之田能守之

右文獻徵存錄錢林撰

周曰萬

從弟揆
鄒麟書

周曰萬字鵬九江蘇無錫人雍正十年與父永禧同舉鄉試乾隆十六年與弟曰贊同登進士補景甯知縣諸弊肅清改安慶教授致仕歸主講東林學者奉爲模楷崇祀鄉賢曰贊由庶吉士改戶部遷員外郎視學雲南河南典試山西以公明著稱從弟揆字舒仲乾隆三十六年進士任浙江縉雲知縣調鄞縣取士公明所拔皆宿學需次時仍資硯田以養累主講席成就尤眾同邑鄒麟書字魯瞻乾隆三十六年舉人壯歲文名最著都中推爲名師尙書那清安出其門任故城知縣地繁劇有政聲後改江甯教諭由故城赴任值歲歉道殣相望麟書隨子葬埋在江甯幾二十載多所

傳記卷之八 楊熙之撰
造就升淮安教授歸年八十餘卒

右傳楊熙之撰

王元啟

先生諱元啟字宋賢號惺齋先世自杭遷嘉興曾祖國泰祖承榮父昌業世有隱德先生幼卽有志聖賢之學不爲時俗文字舉乾隆甲子浙江鄉試辛未成進士署福建將樂縣知縣三月而罷然其釐訟獄禁賭博設十家牌平鹽價立排糶之法禁質庫之重利濟溝渠修橋梁道路諸實政悉殫心力爲之邑人以爲抵他令數十年之功旣以誣被吏議復至其邑民扶老攜幼饋芻米汲爨及鄰境之民皆歡迎如慈母先生雖於經濟未竟其志而教人之用尤著前後歷主講席於延平道南書院者再又於仙遊之金石邵武之樵川順昌之華陽蓋在福建最久也河南則衛輝之崇本山

東則濟南之深陽蒿庵曹州之重華於其鄉則鎮海之鯤池三十年開十主書院之任所成就之士以學行文藝科目著顯者數千百人先生爲學以宋五子爲宗說經尤精於易而爲文一本韓子撰讀韓記疑十卷周易四書講義史記漢書韓非子孫可之歐曾王文集及錢文子補漢兵志諸書校正評注凡若干卷惺齋論文句股九章論祇平居士文集蒸壽堂家訓若干卷凡嗜學多文之士知考訂者輒多厭薄宋儒以自喜今日學者之通患也先生博極羣書勤考證工文詞而篤守程朱之旨終身勿貳誨人勿懈若先生者可謂眞儒矣旣病革猶補注周易下經及易贊前一日猶命子尙繩改定順宗寶錄記疑條中二字蓋其貫天人古今之精

力畢世以之先生生於康熙五十三年七月十一日卒於乾隆五
十一年七月一日年七十有三娶沈氏例封孺人子男三天石早
卒尙珽附監生四庫全書臚錄廣西候補縣丞尙繩增廣生孫男
二克任國子生克新孫女一曾孫男一錯曰

孰能博綜漢唐而篤執程朱淵哉若人不見是圖學則伯厚東發
教則鹿洞蘇湖蓋超出乎籍澁紹述開而獨爲韓之徒

右墓誌銘翁方綱撰

朱山

湖州朱君名山者以進士選臺灣諸羅令諸羅近海俗悍難治君到謁廟畢卽詣獄問吏彼曩曩者何囚耶曰竊賊曰吾以爲巨盜耳若小竊何繫焉召而集於庭昇以十金曰與汝作備與汝約再犯者死應聲曰唯乃悉縱之邑之人相與匿笑以爲君書生泥於古故然亡何所縱者犯法君語行杖者曰立法之始不可寬也鈇其足而杖之斃亡何又斃一賊邑之人股栗相與駭曰是非書生乃一健吏亡何又獲賊方喝杖而疑之曰汝而有淚痕何耶曰自分必死適與母訣故悲偵之果一嫗抱裹屍席哭而來君曰勿殺渠有孝心尙可悛改再畀十金曰汝持金販他方勿居此爲老捕

所捉搦也仍縱之故事臺灣道巡縣供張華侈有某公者將至吏以舊例白君不可餽粟十斛羊四羴某公銜之俄而檄命造冊將丈其邑田君爭曰臺灣一府皆濱海斥鹵之地與他府不同康熙清丈時原畱餘地濟貧氓今或有浮漏處而生齒日繁丈之將於民大病抗冊不上巡道符下如火督愈急諸紳士謀賂萬金以免君又不可曰我在此不使諸君賄上游鋸棄行矣半途奪歸某大怒撫他事申督撫劾之委員逮君諸羅民數萬洶洶然揭竿起將逐委員君曉之曰諸百姓抗王章生事是殺我非愛我也再三言且泣諸百姓曰若然則我等護公往鞫有不測願同公死甫登舟擔暇脯糗糧者壓其艙幾滿出海一男子透水上手餅金爲獻問

何人曰公所赦養母賊也受公金販魚漳浦得十倍利已成家矣
今聞公行老母命來報恩君笑曰汝改行與否我實未知手中金
安知非又儉而遺我乎拒不受曰公勿受是仍以賊待我也歸何
顏見母不如死趯然蹈於海舟人救之腹膨亨矣君不得已受之
到省頌繫月餘獄不具會福建將軍新公入 覲密以其事奏

天子召見復原官再遷灤州知州順道還家舁至一大宅門牆巍
峩君不肯入曰此非我家與人笑不言已而夫人子婦出迎曰嘻
此前年君罷官時諸羅人送我家居此也並券在焉出而視之購
價萬金

右書事袁枚撰

按朱公乾隆
辛未進士

劉夢鵬

蘄水劉先生諱夢鵬字雲翼進士官知縣著春秋義解十二卷卷首刊孟子朱子之論春秋者爲述孟述朱次爲王朝世次考列國世次考魯世次考以下十二公爲十二卷大指推本公穀謂公穀比事屬辭義不詭於儒者其斥左氏持論甚辨

右學案唐鑑輯

按劉公乾隆辛未進士

鄧夢琴

嘉慶十三年十一月十九日 誥授朝議大夫簣山鄧公卒於羅源迎養之署越明年子傳安扶匱歸籍將合厝公及元配陳恭入於新阡不遠數千里緘書請銘於安康董詔辱知於公二十年矣誼不敢辭謹爲志曰公諱夢琴字虞揮簣山其號也世居江西之南城遷於浮梁則自曾祖秀甘三公始祖諱文諫父諱以忠皆處士以公貴俱 誥贈朝議大夫祖妣陳妣石井 贈恭人公幼敏就塾師讀四子書未徧耳孺日染卽能爲同學代草課文師驚爲夙慧年十八補博士弟子明年試冠軍食餼於庠甲子舉於鄉壬申成進士引 見以知縣需次吏部辛巳選授四川綦江署江

津者再乙酉以繼母吳孺人艱歸繼丁外艱戊戌夏始謁選得陝西之洵陽癸卯署岐山明年調繁寶雞戊申以卓異升任商州甲寅以制府勒公保撫軍秦公承恩保薦晉秩漢中知府再攝陝安道事丁巳引年歸歸八年嘉慶甲子科秦公撫江右以重遇鹿鳴奏請 特詔入燕儒林榮之此公出處之大略也當公之筮仕葦江也以廉持己以明燭奸以嚴御下期月而民服其化適江津令某者以冤獄被訴解任矣大府俾公治之蓋殺人者楊在位也前令誤以黃君相當辜已痍斃公廉得其實獄成而服司臬者誅於羣咻以在位兄在高蔽獄公力爭不能得形於聲色司臬嘆焉而某令又有周秉康被毆身死一案歸獄於周應律不知爲其族弟

周秉魯峻訟不遂，錫斃移尸嫁禍也。公庭鞠之，尸傷證見，悉符既輸服。上讞司臬欲翻之，中公以法斷，齏數月。及其攝藩，繼任者始成信讞，蓋猶以前嫌也。然屬吏有請教者，則必曰：「當師鄧令云。」時人頌神君，至有越境求一言以判曲直者。厥後津志傳公曰：「聽斷嚴明，遠近畏服，蓋實錄也。時定遠有廟祝譚學海，以指證二僮招怨被殺，莫知主名，其令誤以韓奇元六人刑訊誣服。及郡呼冤，郡囑公莅之，察訪既確，罪人斯得。既呈案郡，以令之誣也，擬黜之。公曰：「前江津令以被訴且案已成，不得不翻。今案甫報郡，某何敢居平反而擠學製者乎？」請之再三，始以同訊免議。蓋公明於折獄而厚於僚誼如此。洵陽環山臨水，民情頗瀟而流寓雜沓，楚人尤

多佃山則主不能名其田業舟則估或喪其斧公爲定其限年編
以名籍遂以輯甯越明年去邑二百里楚民有糾眾強借者公適
在郡從數人馳往諭以明憲皆搏頰乞命倡者十二人卽詣庭首
罪得杖責繳賊結案撫軍畢公聞而善之謂能活人無算也後撫
軍以讀禮歸繼任者爲劉公雅公皆有地治事宜之訪公詳明條
荅咸擊節以爲快活條款飭山南諸州縣做焉數年中興文教正
祀典表節烈百廢皆舉及畢公再至訝公之猶滯於山中也未幾
檄署岐山岐當秦蜀大道冠蓋所經民素遵教趨令顧不無藉以
爲褻褻者公平其繇役寬其期會民戴慈母及聞將調寶雞相率
爲借寇之請公聞之怵以憲禁始怛然而退寶雞與岐接壤而東

兼舊號西至隴秦南踰散關兼兩驛道長而山險驛政不修遂致累民公補乘增庠其困遂蘇歲癸卯逆回田五馬文熹弄戈甘省秦隴傳烽公疾馳二百里至與秦接界之仙靈峪山峻箐深爲從來官長所不到信宿木皮房中斷道設戍歸而授邑民兵登陴及官兵赴勦儲峙車馬兼濟隴汧軍興不乏功遂速葺大府嘖嘖歎爲難邑東利民渠開自前明灌田三十頃有奇已久湮矣公濬之增灌至五十頃其南北注渭諸渠皆加疏導丙午夏邑南數處民獻歧麥焉商州地邇洵陽公久知其利弊龍駒寨關稅舊多苛索公嚴禁胥役不得於額外有絲毫侵城中有所謂行戶者凡食用槩給官價派諸市廛卽爲裁革勒石於屬邑饋問並一槩謝絕初

皆色然駭及奏當岸獄凡情事之不符比附之未當則先令錄呈
改正遂無翻駁棘手之苦蓋公治縣則無憚大吏直道而行率屬
則曲體人情東溼不事始其歎來之晚也歲辛亥署西安府事僅
兩月十六屬之塵案有羈候至積年者至是清理一空明年冬監
渭南北諸邑賑剔浮冒搜隱漏鴈戶咸得實惠焉漢中幅員北接
寶雞西過金牛峽驛長而馬少役多而民疲五廳州縣不勝拮据
公請於方伯阿公借閒款萬金買馬儲費用民有節赴公遂敏守
土者因得息肩略陽之銅卅試採多年矣得不抵費從事者猶希
冀於萬一公細勘之灼知無效力請大府封閉遊民既散地方亦
甯無何以吏議將賦歸矣適荆湖教匪蠢動當事以轉輸重任非

公莫可奏請畱署制府宜公前任秦藩悉公幹濟適督師至謂方
事之殷臣子不宜引退愈加委重當是時巴州賊羅其清嘯聚於
方山坪通江賊冉文儔跳梁於王家寨南鄭之小壩毛狗洞皆與
接壤公於兩路分設五卡募鄉勇數百人練器械整行列遣之遠
探屢獲賊諜制府予書云風鶴頻警熊羆四馳非循聲素服鄰封
豈能獨來獨往僅以周道逶迤爲使君賦猶不足彰賢勞也明年
夏楚匪竄陝欲由五郎窺漢中公親往城洋西鄉巡查接界諸隘
鄉勇時年已七十五矣控單騎冒寒衝暑馳驅於羊腸鳥道中風
塵所薄遂患足弱逮南北防戍既定託之觀察王公而遂初焉其
被議也以失察南鄭令王君行儉議獄失出後王君卒以死事蒙

恩加贈三品 子蔭蓋公之取人固有見其大者矣初自碁江歸去江津已二年及過時沿江迎送者縣數百里至邑則清廉生祠已建相率擁入申拜謝而後別在寶雞有事白河歸途過洵民望舟而迎攀轅而送者復數百里依依不忍去其牧商也因公至省適寶雞有訐其令者召而問之則赧然曰吾等實出不得已然愧無以見公矣公有命敢不遵因毀案而去夫居愛去思古循良聞有之至於不被宇下已久而望其顏色卽有所愧而不爲古之傳潁川中牟者或未之聞而公止於郡邑展經濟識者莫不歎公用所學之不盡也公性孝友篤交誼初石菘人之卒也公甫訕哭泣之哀弔者不忍聞見及繼母吳孺人卒哀痛一如所生旣免喪

修潔白之養左右於封翁忠憲公暨叔父仲章公之側越四年忠
憲公捐館舍搶號之中附身附棺卜兆安厝哀禮兼至及釋纆依
戀如父猶不忍遠宦也及仲章公歿始爲出山計及在洵恭逢
覃恩陳情以身所應得文林郎 馳封焉從兄卬浦明經林有光
處士某中憲公夙切十起之慈二昆亦殫在三之孝公在籍數年
館穀玉山訓子課姪書讀等身姪傳仁遂籍諸生凡一門男女婚
嫁無不爲籌畫得所繼而公子及處士子傳牧相繼列芹宮迎卬
浦至洵談燕唱酬宛然二蘇風流也至奉調始以憚於山行送歸
并以產宅讓之故自漢中歸尙僦屋而居云初謁選主同年葉農
部宏高無何農部卒子幼公爲視舍斂治馭疊請兵部勘合送之

南歸至德州後返在關中時藍田令周君崧曉同郡後進也有治
聲因調繁卒省垣公厚恤其喪備狀其行後過繞柳聞土人道其
遺愛尙爲感喟賦詩云其學根柢六經而沈酣史籍文章不爲無
用之言己亥分校典試吳銘茶太史欽服文望執從學禮甚恭及
壬子監內簾試所作程墨並關中諸詩主文施琴泉太史羅碧泉
學士俱極推服所歷郡縣延師訓士之外月課而季考之丹黃甲
乙親爲評騰受教者文章皆有法度兩次里居歷主玉山之端明
饒州之芝陽及白鹿書院講席訓士以先器識後文藝人人皆自
以爲得師所刻著作如麗澤講書遜業初約數文講義懷玉草皆
爲訓士作也而洵陽志畢秋帆中丞有郡邑治譜之評寶雞志胡

少宗伯高望有事覈文古之贊咸謂五泉三石不足多也未刻者
史記書後二卷補筆一卷古文有林亭初稟續稟四卷詩有洵關
草陳倉草商山草四巨編歸田後有來卽應興到疾書者甚夥尙
未集錄也距生雍正元年癸卯六月二十九日享壽八十有六元
配陳恭人同邑處士士奇之孫太學生大錦次女克備壺德事尊
嫜則婦代子職教子女則慈兼嚴訓主內政則儉助清操後公四
年生先公十一年卒壽七十有一公親述其行所悲爲閨中失一
良友者也子一傳安己酉選貢乙丑進士羅源尹女一適同邑康
熙戊辰進士工部都水司主事吳公從治孫附貢生季敏次子出
繼處士季臯太學生篤照孫二世疇世畚皆邑庠生詔之初見公

也於郡伯史公家塾過蒙下交勛以名行洵寶二志皆與載筆公
在商於興元時凡得異書遇勝地嘉月相召之使無歲不至往輒
旬月畱茲之請也其亦以見聞於公者最嚴與謹舉其大者著於
篇而係之銘曰

於惟先生有德有言德爲民母言作士閑懿茲幹濟宜麗台垣勛
勩郡邑未究其全福斂壽耆穀貽後昆他年崇國更表隴阡

右墓誌銘董詔撰

嘉慶十有三年十一月庚辰前漢中府知府鄧公卒於福建羅源
縣之署舍時子傳安知羅源公就傳安養也年八十有六十四年
八月乙卯公之喪至本貫浮梁十九年十月丙寅傳安卜地葬公

於浮梁青峰之原公之配陳蕃人合葬焉先是公以耆德奉命
重赴甲子科鹿鳴宴來南昌敬介公之姻江訓導幼光謁公傳安
又與敬同出戴文端公衡亨之門至是以銘請敬不敢辭敬觀班
孟堅范蔚宗傳循吏皆推本儒術或列所治經舉其科可謂知爲
政之要矣然所載多郡國二千石縣令惟蔚宗傳王渙一人任峻
附見傳中且以明發姦伏爲未充德禮之教夫德禮苟不相應則
姦伏之心侈矣何明發之功可紀哉縣令官卑其權不足攝下故
爲縣令視二千石爲難而德禮之效則以能明發姦伏爲治縣符
驗能如是未有不爲良二千石者也公諱夢琴字虞揮姓鄧氏曾
祖國挺自南城遷浮梁祖文諱 贈贈朝議大夫父以忠 贈朝

議大夫母石氏 贈恭人繼母吳氏公年十八補縣學附生二十
一爲廩膳生二十二鄉試中式三十會試中式以進士候選吏部
授四川綦江縣知縣縣人相沿呼大府胥吏爲老上司橫甚公察
其尤者先予杖後申請治罪遂俱斂貴州遵義有巨盜亡命過縣
公遣捕人蹟至二千里外之萬縣獲之以能署江津江津民宋志
聽者與楊在位爭博負在位毆之仆死置尸黃君相之門江津前
政比君相殺人罪已瘐死矣公鉤距得獄情讞之前政因推事官
巧請於按察使倚其獄公力爭按察使遂怒此初獄也而前政在
江津事多率爾民周景康盜樹爲樹主斫願左旋以他事與周秉
魯爭傷腹下乃死前政以比樹主公請復診之腹下傷重罪當比

周秉魯而按察使挾前怒欲如前政比以傾公此繼獄也當是時
前政以因宋志聰獄去官公復持此獄甚急於是諸黨按察使有
氣力者爲蜚語以爲公好排人人已墜坑阱尙下石按察使雖知
公直而必洩前怒幸其言公勢危甚會公還碁江定遠民譚學海
被殺不得主名縣攝民六人笞服之至府皆不承公奉府檄廉知
諸偷鄧理瑤等竄殺人一訊獄具此最後獄也公白府分功定遠
定遠得免議諸大府益信公非排人者適按察使權布政使周景
康獄乃如公讞焉丁吳太恭人艱服闋以贈朝議年老請養家居
十二年後服闋選授陝西洵陽縣洵陽處萬山中流民賃山種稞
自立下手書曰稞前取木石耳曰耳前燒炭曰炭前黠者不立期

遂多訟公令種稞期五年耳炭期三年民安之山南州縣地日墾
大府歲檄升科公言流民開荒食數年之利不可使失所他徒
國家賦額已定徒飽吏胥耳終公去洵陽不報升科旋署岐山調
寶雞寶雞臨棧道轄陳倉東河二驛冠蓋旁午驛馬多疲損前政
以給里民需其值日領馬有急復攬私馬應官日里馬公令領馬
皆交見馬驛遂充非大差不撥里馬逆回田五作亂陷通渭公斷
仙靈谷石道爲戍守計後馬文熹屯底店公料丁壯登陴賊未至
而罷旋擢商州知州署西安府擢漢中府知府護漢興道因事鐫
級大府以教匪方熾奏畱公後病溼累上記乞休年七十五矣始
公家居時知浮梁黃君泌治頗辦而性卞急請益於公公曰聽訟

末也雖然有本焉古之人先治己之好惡矣至聽訟則察人之好惡爲好惡焉夫天下固有得其辭而失其意者豈有舍其辭而得其意者哉當官難於慎守官難於和緩求其難焉可也自公爲州爲府所屬皆喻以此意而公持大綱不苛察故皆治公年二十四陳恭八來歸孝謹守婦道年七十有一先公十一年卒子一傳安進士福建羅源縣知縣女一適國子監生吳篤照孫二世疇世畬皆縣學生公爲學自少時以小學近思錄洛學編爲宗後從座主蔡文恭公新遊窺閩中道學源流終身守師說所著有林亭文彙十六卷詩彙八卷銘曰

養魚勿煩治民勿殘勿煩者清其池勿殘者察其辭池濁而漚浮

魚之仇也辭差而聽惑民之賊也登山不可趨學道不可愚如公者儒術之所與也

右墓誌銘憚敬撰

先生少家貧而勤於學問嘗假友人書舍讀書誦達旦不輟既舉於鄉遊座師蔡文恭公河南學幕及隨居澄懷園者數年學益進蓋四試禮部而後成進士既以知縣用歸家待選則益肆力於濂洛關閩之學植躬行己非義不蹈嘗曰才足有爲當自志有不爲始舍是而能自立未之有也居數年謁選得四川之綦江善聽訟蹈瑕抵隙使訟者不能遁其情及讞之成未嘗事敲扑也調署江津江津民宋志聰與黃君相不相能而楊在高在位與志聰爭博

進在位毆志聰仆死寘尸君相所前江津令遂以君相論如律周
秉魯使周景康索周應律財景康盜伐應律樹應律刀斫之傷未
至死居周宇先家應律控之典史典史遣役往秉魯招景康偕役
訴之縣中途景康不能行互相怨秉魯毆景康死棄尸崖下誣謂
應律寶棄之前江津令亦遂以爲應律當論如律也有控宋志聰
讞爲不實者重慶守王采珍舉待質中三人屬先生曰死志聰者
於此求之先生旣訊得實拘在位至在位亦具服讞定上大府前
江津令聞之屬居省會同鞠此獄者謂君相已痠死獄中第當如
初讞重慶守不可劾前江津令同鞠獄者迺當楊在高論如律讞
兩上按察使不右先生先生爭之力按察使滋不說會周應律獄

上按察使曰應律毆景康矣景康之死不問秉魯可也先生曰檢尸前後傷異處死於後傷之重不可以爲死於前傷之輕也且應律居距宇先家十里景康死之夕應律父子俱居家其鄰人皆知之何由棄之崖下乎文移再上比先生旋禁江獄始定當未定周應律獄時定遠縣民譚學海爲何人殺死定遠令拘韓奇元等六人訊之具服且從韓某家得所埋屠刀定遠令彌以爲不疑也比至郡迺稱冤檄先生往治之得鄧理瑤殷立瓚二偷挾仇殺死狀論如律六人者乃得釋郡守胡承璧欲劾定遠令先生曰江津之讞人以某爲操切今周秉魯獄尙未定某何敢居平反之功乎固請之乃已先生治碁江二年聽斷敏而訟日就簡比再署江津

適遇三獄理枉獲實心力交瘁而僚寀持之以惑大府非先生聲望素著意不獲伸矣先是按察使嘗語某君曰爲令但法鄧君足矣然則亦非不知先生者而懸言弗受遂至聽獎以此見獲上之難也先生旋丁父母憂歸數年出補陝西之洵陽洵陽民淳樸楚人之流寓洵陽者教之訟因胥役有藉事爲患於鄉者控罷之遂持官短長官無如之何先生至訪問民閭疾苦一切以嚴明爲治而於諸楚猾若無所問者徐廉得其斂錢諸簿籍置數人於法洵陽以大治楚饑運米於洵陽洵陽人患之請於先生旣勸以平糶矣而有力者尙蓄米居奇次年春楚人率眾強借米距城二百里勢甚張先生從數人馳諭之皆叩頭曰公活我先生令十二人從

至縣十二人請由徑行果先至縣訊之論如法畢中丞過洵陽聞而亟稱之調署岐山旋調寶雞治俱如洵陽當在洵陽時畢中丞再撫秦語先生曰君尙在山中耶秦人以近南山州縣調三輔者爲出山故中丞云然在寶雞時回民田五爲亂於石峰堡先生防守縣境陟厓礪披箐篁民恃以無恐及漢南援兵過境先生爲供其車馬乏困民皆應役如趨私事旣平他邑訟派累者相踵寶雞民乃製錦爲縣官壽過客嘆曰君豈有餘財爲供張耶官無所私而區畫得宜乃使民知感如是孰謂廉吏不可爲耶頃之擢知商州再擢知漢中府時先生年逾七十矣再護漢興道將乞休歸制府宜縣以漢中守方防守西鄉乃令先生辦漢中府事先生募鄉

勇相險易爲防守自冬徂夏跋涉山谷得足疾遂引疾歸歸十年
就養於子傳安羅源縣官署嘉慶戊辰十月十八日申時卒享年
八十有六先生故善爲文所著有楸亭文集十六卷其他主端明
鹿洞書院山長所誨示子及在官所修志書復其若干卷先生
嘗洵陽時替大府訪勸事宜諸官行文字皆詳究利病可資考覈
子傳安輯之爲外集先生所至興學校濬溝渠旌節義修廢墜與
時消息所爲必果茲皆不書書其大者嘉慶二十二年陝西諸州
縣民人請祀先生名宦祠巡撫聞於 朝年終得 旨如所請先
生以乾隆甲子與先大父同舉於鄉先生用光大父行也願未得
謁見今得讀先生之文及傳安所爲行狀以爲先生真不愧西漢

經生循吏之目願請祀名宦發於秦人而不能繼於蜀故用光所
敘先生治績詳於蜀而略於秦以告後人之學期爲世用者

右墓表陳用光撰

陶其慄

吾友陶君孚中太守歿入載其孤嗣會跣足二千里捧狀來揚州
乞銘君墓予與君爲貧賤昆弟交又同公車同官於朝先後幾二
十年不敢辭按狀君諱其慄字孚中號簡夫系出柴桑九世祖諱
燦由宜黃徙南城郭家山爲建武始遷祖君祖諱成康熙乙酉五
經解元己丑翰林修 國史致仕歸講學於鄉士林稱吾廬先生
考諱學樞由辛卯乙科官中書舍人妣王氏生子四君其季也君
有奇稟慧悟絕人髫齡侍母疾中夜屏息立帳外然恐母知爲家
人感歎年十六補邑庠生員文采所交皆名士庚午得鄉舉壬申
成進士授刑部奉天司額外主事補陝西司主事兼奉天直隸廣

東三司事遷福建司員外充律例館纂修晉雲南司郎中總辦大
庫及秋審兩遇京察皆一等記名復記名以御史用秩滿出守彰
德時甲申八月在官歷十有三月一攝河北道印竟以勞瘁卒彰
德有萬金渠徑百里久淤君由姬家屯溯安陽羨河湯陰李道村
楊家村朱家口履勘得故道請上官入告 允可剋日濬之水利
大興又修復畫錦書院加營學舍數十間捐俸益其膏火延名師
主講於各邑義學則擇學官掌之按季課最士氣日熾君在西曹
有聲數以抗直忤司寇然卒從君議且語人曰陶君能得法外意
憚其風采若是旗奴賈倉菽 上震怒司寇欲並坐其主雍某君
力爭不可雍賴以全廣東陳某被奸民謀殺陷以姦罪已成讞君

方在假心疑其事急入署白司寇請覆勘得實遂置奸民於法決
獄之神類如此以故守郡日上官有疑獄輒檄君往治然君益詳
慎惴惴以傷生爲懼河陰以邑小併歸榮澤榮澤令激河陰民變
君往撫之僅依法誅三人餘皆不問歸德巨猾牛二黨羽百數肆
淫毒六七年君捕斬之道路以安他若夏邑聚眾案汝甯邪教案
郟陵臨漳考城南陽衛輝懷慶各大獄皆賴君平反無駢戮者上
官亟稱曰陶君年未四十判事明允雖老吏不及也然郡署蕭然
祇一友司錢穀書算而已爰書縱橫几上君一手治之無有兩滯
同官歎服不敢嫉其能郡出布額解五千餘匹布充羨餘者歲可
值六七百金君以此爲官物不可取乃緇之製爲棉袴袴得四千

三百餘領召郡人申員外衍緒持散四鄉及流民無衣者挾纊歡
聲加雷動教養噢咻之術秩如也君內行醇密事祖母極孝敬愛
兩兒禮孀嫂教從子輩如所生凡戚黨孤寡存恤保抱不遺餘力
京師南城會館漸圯君新之立規垂久館中客病君必手奉湯藥
死則殮斂如禮各返其輓於家急友朋患難雖涉險蹈坎不少顧
積書萬卷付兩子曰不欲以田宅遺汝之危也其志趣如此君生
於雍正丙午正月二十二日卒於乾隆丙戌正月十一日享年四
十有一配臨川才媛游氏 封恭人子二嗣曾墨曾女二皆適文
士所著栗亭集若干卷宣化勸懲錄一卷某年月日葬某邱合銘
法銘曰

白雲司職國網所重五禁四難君適其用旅豐賁噓皆本離明苟
任俗吏民曷以生守鄴一載手提保障爲西門豹爲梁彥光韓陵
片石足紀君績盡瘁而亡相人皆泣粟里之昆吾廬之孫治獄啟
後君其永存

右墓誌銘蔣士銓撰

李炯

李君名炯字澹成世爲蘇州人父逢春早卒母顧太孺人教子嚴每課君夜讀紡織聲相和達旦君旣冠補元相諸生乾隆元年以五經舉於鄉十七年成進士居數年授廣東茂名知縣以慈惠爲政自奉薄嘗題其堂柱云窮秀才作官何必十分受用活菩薩出世不過一點良心士民誦之每聽訟平心察理未嘗用一暴刑縣有重獄或牽連一二十人君案驗多縱舍所羈候才一二人而已所莅黃塘在山谷閒暴雨水溢居民多死者水退請上官發棺銀收殮有續報者太守難其請君捐俸益之其生者爲起竹屋復爲粥食之初紹興沈生以刑名佐君頗通賄屬君謝遣之及是客府

衙構君於太守遂以不勝任勒罷改教官去之日士民執香送者踵錯於道作德政歌用金書采旗爲導有警百餘人製布袍獻君服而見之誓曰貧不能得錦恐不當公意君曰服之矣誓前捫君衣果布也則大喜舟過梅棗鎮商民張采棚設樂要君餞飲三爵後獻百金爲壽君卻之已而昇君徧歷鎮中曰公去矣俾鎮人一識公君旣歸遂不出卜居靈巖山下野服脩然未嘗謁官府時與及門諸子敖游山水閒晚遷居城中以卒年七十一

論曰自君罷官後更數年粵人之至蘇者輒道君善政不去口予以是知君之能其職也縣有胥李棟者詐取鄉人牛事發君痛杖之責償其牛及是君將去棟數來候君起居君曰得無怨我乎棟

曰身自犯法何敢怨公嗚呼觀棟之於君足以槩其餘矣故曰斯民也三代之所以直道而行也不其然乎

右傳彭啟豐撰

李先生名炯字澹成別號小樊世爲蘇州人父逢春 贈文林郎
母顧氏 贈孺人先生爲兒嗜讀書母嘗夜紡車助勤往往至旦
長通五經傳記諸子工制義每撰一篇文人傳觀之皆自嫌瑕短
宿貧無昆弟早歲喪父母長病執苦致養醫藥將護盡方卒凡附
身物一於禮年二十餘趨童子試爲元和縣生皆首名尋補廩生
乾隆元年中舉人十七年成進士數歲授高州茂名縣入政尙慈
惠以省素居身聽訟平當督賦稅不緊繩文雅教化壯者無爭慢

老幼利安亭落閭里修整先時縣有重獄輒連及二十許人羈候
先生至案訊辨識無辜者悉遣還畱二三人而已嘗攝信宜縣事
堂案歷政填委先生尋省領煩亂決疑文不四月率皆清理一縣
帖服黃塘去高州可四十里許濱臨山谷暴雨水漲嘗漂沒人甚
眾先生言之府爲發官銀收葬不贍請復發太守不可先生出奉
錢瘞浮殍結竹屋置流穴作粥食之縣中書生雜載贄詣門自白
乞爲弟子先生謝辭乃飾潔書院選僑髦令就受業物務之暇輒
親往慰誨縣人繇此益愛文術視事二年以不勝任改教官士子
爭欲赴巡撫請畱先生諭止之將去治薦紳先生作詩繡青蓋上
又造聯語泥金書諸旗載先生德去治日揚旗張蓋導引執香者

充街先是有百餘勾藤錢製布衣一領贈先生行及是停輿勞之
勾皆瞽者一瞽者傍輿曰小人窮無得綉綾爲袍布恐公不服先
生曰見著之一瞽者卽前摸先生語徒輩布也皆大喜舟行由梅
菜鎮有商人設采棚鳴鼓吹要先生餞岸上中酒餽金先生笑不
受商人繼而昇先生觀歷鎮中曰使鎮中人咸得見公面先生以
疾辭教官歸徙居靈巖山下後復徙城內水僊祠旁閉齋講授所
與遊多貧士羸服粗飯蕭然先生爲人不長髮黔須不多鬪雞眼
高顙語音亮識理精果潔愨而篤義妻從父吳念祖作兵部主事
卒官子幼爲助營扶柩歸葬同年友馬受疇滇南人以其族旅於
京師病亡無以具殯棺爲募之及卹其妻兒妻中表弟彭績甚貧

國朝通志卷之三十一
不能從師學遂受爲徒績於是得不廢學先生年七十一病終時
乾隆四十年十二月某日所著制義詩尺牘凡百餘篇子斑

右傳彭績撰

康基淵

公諱基淵字靜溪山西太原府興縣人明康對山先生支裔始遷祖登有十二傳而至公仍世有聲庠序中乾隆十七年壬申科進士歸班候選二十八年選河南府嵩縣知縣治官事如家事博求利病而洞審其原委推行有序必將以誠嵩山縣也地饒瘠少曠卽歉濬伊水舊濬渠十一道明末湮絕按行舊址乘農隙勸民復之而山澗諸流可引溉者勸開大渠四小渠六渠身高下不一則於首尾中分設三閘以畜洩之水勢湍急則設閘渠口防衝漲田仰渠下則教之爲水車引溉凡開渠十八灌田六萬二千餘畝民賴其利巡撫阿思哈上其事奉 上諭交部議敘以邑民淳厚其

士皆勤慤簡質有古周南遺風而貧寒子弟童穉則相率嬉戲稍
能力作則樵於山傭於市有終身不見禮讓爲美詩書可貴者乃
覈絕業地若干因廢基建社學城關爲倡訖於四鄉三十二所地
之相去或十里每社脩脯以二十金爲率悉攢集公私絕產廢業
地三十五頃銀八十兩錢五百六十餘千取足敷用擇本庠通亮
之士專心教授酌定學規從事於踐履實學嵩上貢百合以本草
云百合生宛胸也嵩西南連宛胸故葦莽間亦時有之特生而難
成率在窾谷危崖間披荆棘犯虎狼乃得之民深苦焉公商於士
之人購宜種地於西郊凡四十畝分六區歲可產千餘斤五年一
取復播種周而復始股引賈砮水防其旱募田夫給工食以專其

任因建亭樹柳藝桑鑿池爲久遠計時太夫人迎養在暑夏則清暑其中四郊婦女咸來起居或有勃谿時一赴愬開賜果餌歡如家人逮太夫人卒男女臨奠日數百人卽百合園立祠歲時祭焉嵩有桑而植不繁民不知蠶公勸以種桑教以種植之法建先蠶祠繪蠶織之事於壁以道之由是蠶絲之利甲旁邑迄今以嵩紬蒿絹稱乾隆三十四年始服闋選甘肅鎮原縣屢宰舉蘭升肅州牧其爲治一如在嵩其去肅也州人士爲之建德政坊而最其政十六事刊而布焉一曰修洪水渠渠舊築峻巖岸崩衝而下爲田禾災公度形勢於南石岡別鑿渠口行戈壁之灘避衝陷之害二曰開興文渠野豬溝有古荒田縱六里橫三里因無水而廢公詢

訪耆舊於柳樹關龍口加寬六分別開子渠一道界荒田爲七區
招七佃戶每區設租十二石額糧則佃戶自納而以其租給各社
學之師命之曰興文渠三日改屯歸民肅東南九家窯鑿山後渠
開屯田招民佃種移駐州判主之田漸薄瘠不支官役之供民以
重困公請汰州判改屯升科而民有恆產四日籌置歲修五日均
清水下堡水利六日勸民種樹肅民樵蘇遠取諸邊牆外日費而
價貴公相東北郊外廢灘不堪種藝勸民於農隙濬溝以洩鹵鹹
種楊十餘萬株募民有行誼者董之建利民亭三楹守戶住屋八
楹以守視之徧諭鄉堡可種樹處如式種之彌望樹陰踵而增者
無窮薪樵不外取矣七日建置社學肅屢經軍興之後民不知學

公莅任籌建共二十一所其學舍則修葺廢廨及廢梵刹之基歲修則取諸各社無主絕業脩膳則取諸興文渠地租師則取本學生之有學者以社之老成人董之不許紳士捐助里保派擾定學規十六條崇實學以端蒙養八日籌設鄉會試盤費九日建倉便民鄉保邊山距城遠者徵收糧石借貯民房至四十餘處既已久假不歸又復早夜警守公憫之請於金佛清水各建倉二十餘間清還民業十日時發籽糧十一日催科不擾十二日嚴禁賭博十三日詞訟速結十四日禁革差務派累十五日鋪行逐月發價十六日革除番民派累肅南三山口有黃黑數種番民向通茶馬更無徵求軍興時皮革羽毛等暫著採取後沿爲例名曰給價藉

以需索諸番苦之公言諸鎮營悉與裁革四十四年擢江西廣信
府知府廣信民產女不舉而溺之公愷切勸諭爲之厲禁又令接
生之婦人給穀七石足資口食有溺者首之設嬰長一人給田十
九畝使之稽察女嬰不需乳哺而貧不能養者嬰長暫育之以所
活女數列冊呈官因推行於各鄉及所屬邑活者無算越一年七
月甘肅監糧獄起公暴卒於鉛山舟次公爲學務究根本故其爲
政一自其胸中之誠孚之在嵩時凡開一渠建一社學皆自爲記
尤班班可考其社學記序曰古者教民之道詳矣周禮州長問疇
各掌其政教治令以屬其民自二十五家以上莫不有學焉蓋無
一民無養亦無一民無教其養也作其勤去其擾其教也俾胥安

禮義胥率親睦道本無二施爲亦非有先後是故無不足之民而後可以爲良民無不良之民而後可以爲善國富厚之家克興禮讓養之隆也日誦聖言希榮干祿教之敝也教以讀不若教以禮孝之禮曰順而溫清晨昏無方之節詳焉弟之禮曰敬而序立隨行饋酌之節詳焉循乎溫清晨昏之節知順而知其爲孝循乎序立隨行之節知敬而知其爲弟則教之道得矣嵩邑土田磽瘠民用不舒家鮮專塾夫民不贍於日用而以興仁讓難矣不興仁讓而強凌眾暴奚以保其日用爲長久樂生之計乎予任事期年籌建社學三十二所酌定學規俾從事踐履日循子弟之禮而詩書之文可通也日由順敬之實而孝弟之名斯在也人知親親長長

因而知不獨親其親不獨長其長所以爲教卽所以爲養也若夫
侈興學之名循之而無其實使士獵虛譽民增浮僞並所爲養而
失之則于尤滋之懼矣所著南圃文鈔家塾蒙求女學纂行於世
卒年五十二乾隆五十年公兄茂園資政葬公於王屋山下之任
家窯子七人紹鏞成進士歷安徽廣東湖南巡撫

李兆洛曰自學問之道不修而士大夫之心幾不可問矣冒於榮
利儻於進取甚者憑權自恣如虎而翼閒有知自立求有益於國
是民生者則擇較然顯著之事督束粉飾以收民譽否或毛舉細
故滋其苛碎蓋誠正之未明格致之功無由以達其於鉅細本末
何以得其曲折審其緩急求之於心曾惜然而不知尙安問其施

爲之實也哉此天下之所以無善治而民生之所以日益愁苦也
如公者可謂篤於學而信之於仕能設誠於內而致行之者哉予
故備著其事後之傳循吏者有考焉

右傳李兆洛撰

莊映

故商州知州莊府君沒之三載孤關和等卜兆協吉持狀請銘君與先君先後歸田稱莫逆懷玉與關和兄弟少爲文字交長孫穎曾又子女夫也世嫻之好其何敢辭君諱映字兼訥晚號學晦高祖起元明太僕寺少卿曾祖應會刑部右侍郎祖帽生 贈文林郎考紹平宜城縣知縣莊於吾郡雖世通顯至是已中落年十二從師鄉塾遇寒食還舍母鄒太宜人訶之曰家貧方宜努力何令節之有而以歸爲復冒雨去往返蓋三十里其勵學如此稍長從宜城君入都寄大興籍補生員第一乾隆辛酉宜城之官念父逮適獨行遂不就試隨侍入楚讀書之暇明習吏事未幾宜城望議

旋卒君先期已奉母歸賓客僮奴之司筦庫者各散去君至按籍
交納後令無以難也免喪三試不售壬申中順天舉人以迴避格
禮部試戚友知其才勸速仕爲祿養計且伏以費因入貲爲令揀
發陝西試汧陽補醴泉攝咸甯調臨潼其在汧陽每獄輒疏其
始末巡撫按邊問訟事繁簡見所判牘下州縣以爲法獄未允必
與大吏力爭嘗因事面折巡撫明德公公怒甚終不爲屈及明德
公成新疆諸受拔擢者瑟縮退君獨周旋患難舉裘爲贈繼撫者
陳公宏謀一見契合題授醴泉時烏魯木齊用兵添設中站驛馬
少借給於民胥吏欲弗遂則斃所乘騎民大苦之君禁借民馬撥
帑金買充募民之無業者職飼養使遞羽書皆樂用命比撤站賣

馬還帑猶多羨金邑有衛丁數百家授田盡磽确且沙水爲患舊額重積逋五千金前官嚴追弗得迺舉馬價所餘益以廉俸爲清積逋又請上官減其糧額己卯充鄉試同考官校閱無遺憾其攝咸甯多積案未結有兩造死猶下牒拘訊者命吏呈牘則纍纍盈几檢視既周次第剖決案爲之空居醴泉五年輿情悅服去任獄無死囚在臨潼值歲祲斗麥錢五百他邑匿災不上或借採買重斂自肥君以實報得緩徵又捐金爲倡設粥廠施絮衣全活頗眾他邑民至者居以寺觀未嘗歧視會巡撫鄂弼公查社倉穀數虧者過半立限奏追時穀價三倍窮黎束手自布政以下莫敢申論君慨然曰民瀕死亡忍更鞭笞之邪歲已偪除馳至西安泣陳情

狀請俟穀賤補償良久巡撫動容令以牒請牒上署可得通行展
限迺擇穀之紅俯者減價糶之明年麥大稔以糶價羅償所虧適
如其額是役也免于萬人囹圄筆楚而於倉儲固未絲髮損仁心
仁術殆兼有焉明德公再撫陝西薦堪勝知府有 旨記名候升
然以母春秋高決意乞養及遷商州而君已就道矣事鄒太宜人
生死無違禮與弟勇成甚友愛里居既久贍窮乏息紛競人多賴
之易贊之日索衣冠跣坐連呼曰樂境化境遂瞑以嘉慶六年九
月十七日卒年八十四配宜人徐氏翰林院庶吉士依孫女候選
州同知純昭女賢孝有家法勤身約己而處事各當爲嫺族所師
後君一年卒年八十二嘉慶九年十月壬申合葬於南鄉菱港之

原子六人關和國子監生文和雲南永北直隸同知泉和國子監
生廷綬國子監生慶和同和縣學生員女七人呂蘭枝吳錫緒王
育瑜倪時慶楊炯汪和鼎汪燮其壻也孫十人孫女十人曾孫四
人君樓神家荷垂四十年伉儷偕老孫曾滿前人徒見其極林泉
頤養之福而不知有足以致之者在也銘曰

勞以生息以死莊之先善終始人而神豈殊理樂與化得其旨宜
子孫方趾美宅孔安永千祀

右墓誌銘趙懷玉撰

A large rectangular table with 10 empty columns and a thick border. The table is oriented vertically on the page. The columns are of varying widths, with the central columns being wider than the outer ones. The table is currently empty of any data or text.

161-918

徐士龍

士有負才氣謹步履重然諾修之家以信於友及試之功名之塗而連蹇不足以自遂幸有可遂而旋得旋喪不知者得以成敗短長其人卽不然而精力旣半摧於前日連蹇之中往往設施未就而病衰隨之居無幾何以死此君子所致慨於命之不齊者也若徐君星槎其一已星槎少樹文譽有大志不屑屑篆刻俳儷之學讀書砥行躬秉諒直善事父母爲諸弟先與人樂易無猜獨重氣誼而惡勢利一介未嘗苟性不能容人過稍不合輒徵諸詞色有急則褻裝就之竭忠謀如在己善飲每酒酣耳熱談古今得失事慷慨激發無少假借漸不覺其聲氣之盛人疑其醉已而裁決瑣

屑豁如也舉乾隆十七年壬申 恩科鄉試時年三十六越甲戌
始遊京師畱滯者數科從未嘗輕半刺有所干謁亦不應諸雜試
與歸安鄭步雲葉佩蓀杭州趙佑最相友善文章道義切劘無閒
先後居停不踰三子所嘗歎謂時方 邳隆而士傲苟得拙者弊
章句巧者規形勢不立身何以致用故獨厚自刻厲介然於內外
本末之間匪求異俗而標置自遠歷壬辰年五十六矣再與大挑
以一等發直隸試用始謝場屋單車出都門至則制府以下交器
其才謂此文學吏不可苛以奔走會 詔求遺書環畿輔以學獻
者數百種悉屬君校勘真贋而後進又使蒐訪所在金石藝文得
古碑版數通多元明人攷錄所未及者以爲快甲午冬題署冀州

衡水縣事明年春疾作數月未得告告未及替而疾不可爲矣實
乾隆四十年乙未七月二十五日也壽止五十有九惜哉君體素
強能耐寒暑佐其父綜理家政惟勤惟儉南北屢遷攜一僕善醉
從不督過之病或躬藥餌之自辛巳秋丁母吳孺人艱歸得咯血
證時時作止初至保陽聞糟糠不祿益傷懷抱懼違嚴侍宦情日
以減病日以滋癸巳春 車駕謁 秦陵君奉文分治蹕道稱善
迎送之次蒙 遣侍衛問職名去尋加一級上旨由是益加期許
君亦行自勉以圖報塞其在衛也自莅任至移疾不過十月而郵
不成之偏災修久廢之水利捐貲至數百緡上下稱便病猶力親
案牘夫以君之才之學充君之志斷斷當不止於是而可表見者

已如是向使得蚤表見於十年二十年之前或更假之年以觀其
後於以奏循績躋大用亦復何加於君而乃試之遲奪之遽也豈
非命哉豈非命哉君本姓漏氏系出吳諸葛瑾後以避難改爲漏
明有漏坦之以文學名其宗也徐則自七世祖某公用外家姓登
第仕至尚書子孫相承莫能復遂爲徐氏世居紹興山陰黃石里
父曰泰德始遷湖州德清之新市家焉君鄉薦時著籍猶稱山陰
學生久之始改從所選定爲德清人諱士龍字荀若星槎號也配
徐氏雖同姓在源本異有淑德其詳具君自爲行略中子一健雲
諸生孫一元會君之病也健雲來省父於官舍至是將以喪歸因
奉君狀乞其執友趙佑爲之傳以備家乘焉

敘曰佑與是槎定交二十年悉君族里爲人言行大節較備不待狀也健雲書述君病革時猶惓惓予不置君傳非予誰護者願維十數年閒事君母歿而予爲之傳徐孺人歿爲之誄今復以傳君何君家之多故而予友道之窮且重予文憾也始予嘗從容規君以徐娶徐爲異日臨文之嫌曷若棄冒姓復祖姓君深韙之而未暇及蓋亦將貽其後之人之善繼矣夫

右家傳趙佑撰

魯濱

公諱濱字守原號緯躔一號渭川江西新城人贈公長子少負奇氣不事家人生產既困甚隨婦翁王君遊京師遂畱居琉璃廠肆性善別古字畫玉石以是稍稍居積作書買而身遊士大夫閒與陳伯常守誠蔣心餘士銓交善裴文達公嘗欲經紀某君喪歸江西屬其事伯常薦君才可任三日而事集文達以是奇之居久之遂入貲爲山西知州凡歷任霍澤源兩州攝平定州調忻州爲澤源時有武生醉毀其鄉之佛寺鄉人縛而訟之公公疑一人醉安能毀寺沃之水醒而問其故生具伏曰非有蹊也醉而逞力故及此公不信生日試之輒可矣命果巨輒與人齊生以一指中擊之

有裂痕深至地公曰是不啻能援廟楨矣材如是何爲酗以逞也
諭遣之歸生卒爲善士知忻州有翁殺其婦與女孫者其子誣服
殺妻公疑之訊得其姦乃抵翁以義絕故殺平人罪州人以公爲
神明或衍爲小說戲劇以頌公云居山西十餘年所任事無不辨
性明決而不能爲媿媿與按察使某不相能而朱文正時爲布政
使獨器之公初娶王氏無子繼娶李氏生子枚才而早卒公初迎
養父母居山西及是皆歸公念母老投牒以終養請文正再三
之不能得其巡撫某亦素重公問公曰孰可繼公者某公以白金
八千乞公薦已公卻之而薦某州牧某曰其人貧而性鎮靜且次
不可越也巡撫卒聽公公將歸忻州人迎公至所立生祠具酒饌

以餼公焚香跪路左以送者相屬復醵金二千爲公歸貲公笑受而盡畱以爲書院膏火費書院公所剗也公居官時凡寄貲爲遠祖近祖廣祭田學田諸事皆以屬其族子仕驥學者所稱爲山木先生者也其事具詳於山木集諸尺牘中公歸而復加擴充焉公兄弟四人公皆推己所餘廉俸與之立產業其三從四從兄弟賴以舉火者甚眾公旣歸事贈公尙數年贈公乃卒公居家內事父母以色養親故往來者皆以公爲法外以善化宗族鄉里凡以事來就公決者得公一言莫不服年五十卒於家在京師所娶李氏生子二果本生女一適陳用光妾生女二適陳玘蔣知重

陳用光曰伯常予世父也山木予舅氏也先生與公交後於世父

公既歸乃爲余議婚余爲公婿數月而公卒子於公家得觀公所
與山木往還諸書肫然一本之思何其篤也公未嘗讀書而所樹
立如此彼被服儒者宜何如然公卒後而其子貧困乃彌甚嗚呼
天爲之耶人爲之耶

右家傳陳用光撰

莫宗蔭 鄧正琮 徐日炯

莫宗蔭字禮坤湖南益陽人乾隆癸酉舉人由明通授巢縣知縣
慈惠愛民讞獄平允歲饑設法振救民以不困縣焦湖水素濁宗
蔭在任忽清飛蝗過境不傷稼人謂其德政所致同邑鄧正琮字
宗玉乾隆甲戌進士知密縣歷新鄭洧川皆以廉明稱所至士民
感戴署陳州府同知以病乞歸正琮學問淹博才思浩瀚所著洞
庭賦論者謂可與江海賦並傳徐日炯字半霞由貢生任沅陵訓
導土苗嘯聚日炯單騎往諭皆投戈納款擢知無錫縣檄勘宜興
疑獄立雪沈冤皆焚香頌神明歲旱移地丁爲漕代輸貧民逋賦
再補南匯縣歲漕十餘萬日炯徵解如限民亦不擾以疾歸

右傳李元度撰

李正中

謝世應

詹顯紳

李正中湖南衡陽人乾隆癸酉舉人知麻城縣以禮爲教作儀禮約解及通鑑四字引以訓士民政化彬彬如也嘉慶七年京朝官論前輩名德祀立中主於上湖南鄉賢祠同郡謝世應耒陽人乾隆中由舉人知廣豐縣事時豐民健訟告期投狀者數百人上控郡庭無虛日世應自朝至日中昃以十案爲度皆得其情太守因得休暇邑盜風甚熾城四門門各選捕役二人守之報竊者計賊若干五日不獲賊罪捕役十日不獲賊罪尉更五日不獲遂自罰也先給事主贓值之半捕役無敢隱賊相率遁去曰無趨謝家墟也遇告期詞狀亦止七八紙而已會因原任瀘溪事里誤士民赴

府保留者數百人格於例遂歸後不出詹顯紳字書存常甯人乾隆間舉人遭父母兄弟之喪一門孤幼以身撫之知南康縣清慎自矢縣送迎差役率供自里甲牙行顯紳至酌爲省罷人爭感頌時郡守貪恠顯紳不屑迎合屢乞休不許亡何卒於任士民立木主於學宮私謚明惠

右傳李元度撰

國朝書獻類微初編卷二百三十七補錄

守令二十三

王元啟

王元啟字宋賢嘉興人乾隆十六年進士銓福建將樂縣專業屢算以算法始於句股撰爲句股衍一書分甲乙丙三集甲集論開平十法爲句股因積求邊起義次論立方以及平方法再論和數開立方以盡立方諸法之變爲術原三卷乙集兩卷爲相求法百三十二則之綱要故名曰綱要丙集卽相求法逐則分之以發明立法之意凡四卷敘之曰句股弦相求法參以和較凡得七十八則求句股中函數又有羅積之數容員容方容縱方及依弦作底

求容方與句股求外方外員之數又有積數與句股和較相求容
方與句股餘數相求之法綜計之又得二十九則立表測量得求
高求遠求深三則重表亦然舊算書多簡略不備詳者又苦錯出
無緒嘗意爲區別使各以類從先定相求法百三十則一一盡通
其故運思布算特比舊法爲直捷而舊法亦不敢沒附見以致參
考至以中函積數與弦之所和所較相求而得句股弦之正數其
法爲舊算書所不載今亦竊擬一法以附於後又別刪截弦分兩
及補句求股之法分爲六則並載不成句股求中函積數二則容
方容員四則外切員徑一則員內累求句股六則凡又一十九則
以該西術三角之算兼備割員之用使學者知周髀一經於術無

所不該後人不能旁推交通以盡其變故使西術得出而爭勝而其術亦本周髀總無出於折句爲股之外也其略例引言曰算家句股一門非盤指一數以爲布算之準難以虛領其義然如廣三修四見於經者特其正例正例外變例尤多必欲正變兼陳則彼此錯出使閱者耳目數易轉增煩憤茲特標舉數端以爲略例並不成句股之形亦附見焉以盡句股之變也并附荅友人問句股書曰欲求句股必先學開方法方有正方縱方之異縱方則以修廣之和較數開之其次則求四率比例有三率求四率之法有二率求三率之法又有一率求三率之法知此卽可以求句股弦無零數之法以三率之中率爲主倍中率爲股首末二率相減爲句

相和者用其和者
卷二十一
相加爲弦依此術之得句股略例十數則然後以句股弦爲正數
兩數相加爲和數相減爲較數又有弦與句股三數加減之和較
數弦與和和弦與較和三數相加之和數也弦與較較弦與和較
三數相減之較數也三數相加減今名之爲兼三和較凡正數和
較之數各三兼三和較數各二共十三數十三數中隨舉兩數卽
可求句股弦全數凡得相求法九十四則而其中容方容員及截
弦分兩與夫立表測量又有單表重表之法猶不與焉其次則求
截弦分兩之法是爲一句股分兩句股之術可以知不成句股亦
可以分兩句股卽西法三角算之所由名今則總以句股槩之其
法取大小兩句股形小股與大句同數者爲一形卽爲不成句股

之形分之爲兩則所謂中垂綫者卽小句之股大矩之股大矩之
句以此衍之又得不成句股五十餘則於此求之又得合形分兩
削形求全二法合形分兩則有正合形截偶分兩反合形截中分
兩偏合形截分兩之法削形求全則有削去正矩削去偏矩之
殊偏矩中又有淺削深削之分知此則平句股之學盡此矣雖本
舊法而分條析目及入手前後之次悉出新意其標題名目及運
思布算多有不循其舊者更有舊法不載而以意補入者其後嘉
定錢塘讀其書謂爲獨絕題書後曰開方句股之法擬始於九章
周髀二經自後算家遞相推衍至乎梅勿庵之少廣拾遺句股闡
微幾無餘蘊矣惺齋尙以舊術爲繁也更立簡法善書若干卷先

以開方究其原繼於句股窮其變以開方爲句股所取資也統名
之曰句股衍余問著書數十種皆卓然可傳算其藝之一耳猶神
明變化若此比者考求律呂若密率方員周徑未免乎比例之煩
也竊自辦法以十倍徑積爲周積十分周積之一爲徑積又以員
積自乘而十六乘之則十分一爲方積之自乘方積自乘而十六
除之復十倍之爲員積之自乘由是以得周徑方員也不過開方
而已其數視密率稍異而驗之器物似較密焉惜乎先生已歸道
山不獲面質其是非也元啟有史記正譌分律書厯書天官書爲
三卷漢書正譌總爲律厯志二卷合之名惺齋雜箸又有厯法記
疑角度衍九章雜論若干卷其草皆藏於家

右文獻徵存錄錢林撰

右文獻徵存錄錢林撰

K320·49

1573310

2

文科圖書室

--	--	--	--	--	--	--	--	--	--

161-940



21101000160760